


Nkangala Bible Translation



The New Testament in the Nkangala language of Angola:
Nkangala Bible Translation (New Testament)

Nkangala Bible Translation

The New Testament in the Nkangala language of Angola: Nkangala Bible Translation (New Testament)

copyright © 2024 The Word for the World International

Language: (Nkangala)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-17

PDF generated using Haiola and XeLaTeX on 17 May 2025 from source files dated 17 May 2025
9a9c909c-dd81-59f5-8c45-51bc768de51c

Contents

Mateu	1
Mako	60
Luka	95
Iuano	158
Vilinga	203
Loma	260
1Kolinte	285
2 Kolinte	308
Ngalata	323
Efeso	331
Filipu	340
Kolose	346
1Tesalonika	352
2 Tesalonika	358
1 Timateo	362
2 Timateo	369
Tito	374

Muzimbu Uacili uasonekele MATEU Citsindikiso

Muzimbu ua Mateu uapua umo ua mavulu auana mu Litavasano Lialiha liye lilumbununa vuyoye vua Yesu Kilistu. Limo ku limo liauo vhalitumbula nguavo “muzimbu.” kulumbununa “muzimbu uacili.” Va asonekele hanima ya kutsa ca Yesu kuli Mateu, Mako, Luka na Iuano. Vaka kulilongesa kuvatantekeya muaka muka uje muzimbu ua Mateu vausonekele, vuno honi casa kupua mu miaka makumi atanu na limo hanima ya kutsa ca Yesu. Naua kuvatantekeya ku cihela cije vausonekelele, vuno honi vavengi vakasinganiekela nguavo hamo vausonekelele mu Phalisitane kaha naua hamo mu nganda ya Yelusalema.

Muko kuusonekani ikeye vene Mateu, uje uapuile muka kutambula lisimu te kanda Yesu amuihule linga apue ndongisi yendi. Naua vamu-tantekeyela na lizina lia Levi. Mateu uapuile umo ua tunganda likumi na vavali kaha naua ua usonekelele kuli vaka kutanda Ciyunda. Eci vanacimuesha mu vitaleso hakupua makumi atanu na limo mu visoneka ku Litavasano Lialaja. Uatondele kumuesa ngue Yesu ikeye vene Mesiya, muyoyesi uakuhangula ua Njambi, uje ivahandekela vunanguizi vua hali ikeye. Mateu naua uasonekele viavingi via vumuene vua Njambi. Vayunda vatondele Mesiya kupua muene vua vumuene vua vimpande via mavu. Mateu uahakelele mana mukuhisa viyongola vije mukulumbununa vumuene vua vusunga vua Njambi.

Muzimbu ua Mateu uapua livulu lia cili hakuputukila Litavasana Lialiha omuo lia vitaleso vihalio viaku Litavasano Lialaja. Livulu eli lianungakana Matavasano avala. Vaka kulilongesa naua vasinganieka nguavo Mateu hamo uesekele kutemunuisa cifua ca mavulu a Mosesa, aje akeo apua mavulu atanu akulivanga mu Litavasano Lialaja. Kuambulula ca Yesu ha munkinda (5-7) tuasa kucesekesa na Njambi ahana lishiko kuli Mosesa (Ndetulonome 19:3, 23:33).

Muvanavitumbikilamo:

1. Mateu aputuka muzimbu nakuhandeka ha kusemuka ca Yesu Kilistu na maputukilo a vipangi viendi mu kapetulu 1-4.
2. Cakuhatako Mateu alumbununa vipangi via Yesu na vilongesa viendi viavingi mu kapetulu 5-25.
3. Cakumanusuila mukusoneka ca Mateu cikeco cihandeka ha vipangi via Yesu mu kutsa cendi na kusanguka cendi (26-28).

Vakukuluila va Yesu Kilistu (Luka3:23-38)

¹ Livulu lia vakukuluila va Yesu Kilistu, muna Ndaviti, muna Avilahama.

² Avilahama uapuile ishe ya Isake, kaha Isake uapuile ishe ya Yakomba, kaha Yakomba uapuile ishe ya Yunda na vamunaina,

³ kaha Yunda uapuile ishe ya Peleze na Zela vaje vaina vapuile Tamale, kaha Pelezi uapuile ishe ya Hezelone, kaha Hezelone uapuile ishe ya Lama,

⁴ kaha Lama uapuile ishe ya Aminandave, kaha Aminandave uapuile ishe ya Naheshone, kaha Naheshone uapuile ishe ya Salemone,

⁵ kaha Salemone uapuile ishe ya Mbouasi uje vaina vapuile Luhave, kaha Mbouasi uapuile ishe ya Ovende uje vaina vapuile Lute, kaha Ovende uapuile ishe ya Njesi,

⁶ kaha Njesi uapuile ishe ya muene Ndaviti.

Kaha Ndaviti uapuile ishe ya Solomoni uje vaina vapuile te mpuevo ya Uliya,

⁷ kaha Solomoni uapuile ishe ya Lehovouame, kaha Lehovouame uapuile ishe ya Aviya, kaha Aviya uapuile ishe ya Asa,

⁸ kaha Asa uapuile ishe ya Njosefati, kaha Njosefati uapuile ishe ya Njeholame, kaha Njeholame uapuile ishe ya Uziya,

⁹ kaha Uziya uapuile ishe ya Yotame, kaha Yotame uapuile ishe ya Ahaze, kaha Ahaze uapuile ishe ya Hezekiya,

¹⁰ kaha Hezekiya uapuile ishe ya Manase, kaha Manase uapuile ishe ya Amoni, kaha Amoni uapuile ishe ya Yosiya,

¹¹ kaha Yosiya uapuile ishe ya Yehoyakine na vamunaina, ha ntsimbu ije vavatualele ku vunzinda mu lifuti lia Mbambilone.

¹² Kaha kuhuma hakuvatuala ku Mbambilone, Yehoyakine uapuile ishe ya Sheyaletiyele, kaha Sheyaletiyele uapuile ishe ya Zelumbambele,

¹³ kaha Zelumbambele uapuile ishe ya Aviyunde, kaha Aviyunde uapuile ishe ya Eliakime, kaha Eliakime uapuile ishe ya Azole,

¹⁴ kaha Azole uapuile ishe ya Zandoke, kaha Zandoke uapuile ishe ya Akime, kaha Akime uapuile ishe ya Eliunde,

¹⁵ kaha Eliunde uapuile ishe ya Eliazale, kaha Eliazale uapuile ishe ya Matane, kaha Matane uapuile ishe ya Yakomba,

¹⁶ kaha Yakomba uapuile ishe ya Yosefa uje uapuile yala lia Maliya uje uasemene Yesu, uje ivatumbula Kilistu.

¹⁷ Kaha honi vikota vioshe kuhuma kuli Avilahama nakutuala kuli Ndaviti viapuile likumi na viuana, kaha kuhuma kuli Ndaviti kutuala noho vavatualele ku Mbambilone viapuile vikota likumi na viuana, kaha kuhuma hakuvatuala ku Mbambilone kuneha noho kuli Kilistu viapuile vikota likumi na viuana.

Kusemuka ca Yesu Kilistu (Luka2:1-7)

¹⁸ Honi kusemuka ca Yesu Kilistu cezile mucifua eci. Omo vaina Maliya vamulamene kuli Yosefa, kaha te kanda valimoneho vamumuene nguavo akemita lizimo lia nzili yaku Cimbembesi Uakulela.

¹⁹ Kaha Yosefa uje uamulamene hakupua ua vusunga, katondele kumu-uisa shuamua kaha uasinganiekele kuviana vulo muvushueke.

²⁰ Vuno honi te acili nakusinganieka eci, taleni, kangelo ua Muene uasholokele kuli ikeye mu cilota nakuhandeka nguendi, “Yosefa, muna Ndaviti keti uteue kuambata Maliya mpueyove, omuo eci kuimita cali naco cinapu caku Cimbembesi Uakulela.

²¹ Akasema muana ua yala, kaha ukamuluka lizina liendi Yesu, omuo ikeye akovola vantu vendi ku vipi viavo.”

²² Vioshe evi vialingiuile mukushulisisa vije viahandekele Muene kuhitila muli kananguizi ua Njambi nguendi,

²³ “Talen, mpuevo uje kanda alimone na yala akemita kaha akasema muana ua yala, kaha lizina liendi vakamutumbula Manuele” (kulumbununa Njambi ali netu.)

²⁴ Omo Yosefa uahindikile mutulo, ualingile ngue muje muamushikile kangelo ua Muene. Uambatele mpueyendi,

²⁵ vuno honi kalimuene nendi kuvanga noho hasemenene muana ua yala, kaha uamulukile lizina liendi Yesu.

2

Kumeneka ca Vaka Mana vaje vahumine ku Ngangela

¹ Honi omo Yesu uasemukile mu Mbetelehema ku Yundeya mu matangua a muene Helonde, taleni vaka mana vahumine ku ngangela vezile ku Yelusalema,

² vehuile nguavo, “Ali kuli ou nasemuka muene ua Vayunda? Tunamono ntanga tanga yendi mu ngangela, kaha tuneja nakumulemesa.”

³ Omo muene Helonde uevuile eci, ualiniengele cikuma, hamo navoshe vaje vakele nendi mu Yelusalema.

⁴ Kaha uakunguluile vakuluntu voshe va tusasendote na valongisi va mezi a lishiko, kaha uavehuile kuje Kilistu napande kusemukila.

⁵ Vamulekele nguavo, “Mu Mbetelehema ku Yundeya,” omuo omu mukemo muvavisonekelele kuli kananguizi ua Njambi,

⁶ “ ‘Nove Mbetelehema, mu nganda ya Yundeya, keti usinganieke nguove u uamundende hhakati kavaka kuyula vamu Yundeya,

omuo kuli yove kukahuma muka kuyula uje akatuamenena vantu vange va Isaleli.’ ”

⁷ Amba honi Helonde uasanene vaka mana muvushueke, uavehuisisile ntsimbu muka ije ntanga ntanga yasholokele.

⁸ Kaha uavatumine ku Mbetelehema uavalekele nguendi, “Yeni mukaton-desese cikuma ha kanike ou, kaha omo muamuuana, muije muakunjileke linga nange naua njije nakumulemesa.”

⁹ Omo vevuile vije via handekele muene kaha vaile, kaha taleni, ntanga ntanga ivamuene mu ngangela yakele kulutue luavo noho yezile nakutulila ha cihela cije hakele muana.

¹⁰ Omo vamuene ije ntanga ntanga, vavuahelelele cikuma na nzolela yakama.

¹¹ Kaha omo vakovelele mu njivo vamuene muana na vaina Maliya, kaha vatsikamene ha mavuli avo nakumulemesa. Ambahoni vafukuile mu viambatelo viavo via vufuko nakumuhana mavuana a seho a ngolinde na mazi a kunika luengo luacili a fulankininsense na miila.

¹² Kaha hanima yakuvanangula mu cilota linga keti vahiluke kuli Helonde, vahilukile ku cifuti cavo na ngila yeka.

Vateuesela Yesu ku Ingito

¹³ Honi omo vaile, kaha taleni, kangelo ua Muene uasholokele kuli Yosefa mu cilota kaha auhandekele nguendi, “Hinduka ambata muana na vaina, kaha teuela ku Ingito, kaha yakakale kuje noho njikakuleka, omuo Helonde alinakutonda muana linga a mutsihe.”

¹⁴ Ambahoni uahindukile nakuambata muana na vaina ha vutsiki vuje vene nakuya ku Ingito.

¹⁵ Vakele kuje noho Helonde uatsile. Cije capuile kushulisisa vije via-handekele Muene kuhitila muli kananguizi ua Njambi nguendi, “Njasanene munange uje uakele mu Ingito.”

Vatsiha vanike

¹⁶ Ambahoni Helonde omo uamuene nguendi vaka mana vanamukuisa, uanienguele cikuma, kaha uashikile linga vatsihe vanike voshe vava mala mu Mbetelehema na mu vihela viakulihatako voshe vaje vakele na miaka ivali na vaje vakele muinsi lia miaka ivali yakusemuka, kuya ku ntsimbu ije yalilongesele ku vaka mana.

¹⁷ Ambahoni vialishulisile vije viahandekele kananguizi ua Njambi Njelemya nguendi:

¹⁸ “Vovuile Lizi mu Lama
lizi lia kulila na kulinenga cikuma,
Lakele alilila muomu ya vana vendi,
katavele kumuzembeleka,
muomu voshe vatsile.”

Vahuma ku Ingito vaya ku Nazaleta

¹⁹ Vuno honi omo Helonde uatsile, taleni, kangelo ua Muene uasholokele mu cilota kuli Yosefa mu Ingito, ua handekele nguendi,

²⁰ “Hinduka ambata muana na vaina linga muye ku cihela ca Isaleli, muomu vaje vasinganiekele kutsiha muana vanatsi.”

²¹ Kaha uahindikile nakuambata muana na vaina nakuya ku cihela ca Isaleli.

²² Vuno honi omo uevuile ngeci Alekelau nasuana Yundeya mu cihela ca ishe Helonde, kaha uateuele kuya kuje. Kaha honi hakumunangula mu cilota, kaha uaile ku cihela ca Ngaleleya.

²³ Kaha uaile nakukala mu mbonge ivasana Nazaleta, linga vije viva-handekele tunanguizi va Njambi vilishulisise nguavio, “Vaka mutumbula Kanazaleta.”

3

Kuambulula ca Iuano Muka Kumbuitika (Mako1:1-8; Luka3:1-18; Iuano1:19-28)

¹ Mu matangua aje kuezile Iuano muka kumbuitika, uakele nakuambulula mu mpambo ya Yundeya,

² nguendi “Tengulukeni, muomu vumuene vua muilu vuli muyehi.”

³ Omuo ou ikeye ivahandekele kuli Kananguizi ua Njambi Isaya, omo uahandekele nguendi,

“Lizi lia umo ali nakutambeka mu mpambo ngualio,
Vuahezeni ngila ya Muene
kaha sungameseni ngila yendi.”

⁴ Honi Iuano uazalele vuzalo vuakupanga ha maka a kamelu kaha ualikutile muiva ua cilambu mu mbunda yendi, na viakulia viendi viapuile vambimba na vuci.

⁵ Vantu vezile kuli ikeye kuhuma ku Yelusalema na ku Yundeya yoshe, na ku vihela vioshe viakulihata na ndonga ya Yundau.

⁶ Valitavelele vipi viavo kaha uavambuitikile mu ndonga ya Yundau.

⁷ Vuno honi omo uamuene Vafaliseo na Vasanduki vavengi valinakuija mukuvambuitika, kaha uahandekele kuli vakevo nguendi, “Yeni vana vamanoka iya naminangula linga muteue ku vutenu ovu vuli nakuija?”

⁸ Imeni vushuka vuje vumuesa ngeci muatenguluka.

⁹ Kaha keti musinganieke ngueni muhasa kuhandeka kuli yeni vavenia ngueni, ‘Tuli na Avilahama tatetu’, omuo njimileka nguange, Njambi asa kupuisa aua mavue kupua vana va Avilahama.

¹⁰ Cipue hano vene ngimbu inalivuahesela laja kuteta miti kuputukila ku mizi, nankuma muti uoshe uje kuuimi vushuka vuacili vakauteta nakuumbila mu tuhia.

¹¹ Yange njimimbuitika na mema linga cipue cimueso ngeci munatenguluka, vuno honi ou eja munima yange anjipulakana ku nzili, kunjafuillile cipue kuambata vinkaku viendi, ikeye akamimbuitika na Cimbembesi Uakulela na tuhia.

¹² Lisehwa liendi lili mu livoko liendi, kaha akakomba ku lijunguilo liendi, kaha akakunguluila tiliku mu cishete cendi, vuno honi mujungu akautsimika na tuhia tuakuhona kuhua.”

Kumbuitika ca Yesu

(Mako1:9-11; Luka3:21-22)

¹³ Ambahoni Yesu uahumine ku Ngalileya nakuya ku ndonga ya Yundau linga vakamumbuitike kuli Iuano.

¹⁴ Vuno honi Iuano uatondele kumuvindika kaha uahandekele nguendi, “Yange capande kunjimbuitika kuli yove, nkuma naua yove uija kuli yange?”

¹⁵ Vuno honi Yesu uamukumbuluile nguendi, “Cilingiue ngoco vene hano, cacili kuli yetu kushulisisa vije vioshe Njambi atonda kuli yetu.” Ambahoni Iuano uatavele.

¹⁶ Hanima yakumbuitika Yesu, kaha hajevene uahumine mu mema, kaha taleni, melu ashokolokele kaha uamuene Cimbembesi ca Njambi cishuluka ngue livembe nakumutonkama.

¹⁷ Kaha lizi liahumine muilu ngualio, “Ou ikeye Munange injazanga, muli ikeye njivuahelela.”

4

Yesu Vamueseka

(Mako1:12-13; Luka4:1-13)

¹ Ambahoni Yesu vamutualele kuli Cimbembesi mu mpambo linga vakamueseke kuli Liyavolo.

² Ualiuminine kulia ha matangua makumi auana vutsiki na mutania, kaha hanima yakuliumina kulia uevuile njala.

³ Kaha muka kumueseka uezile kuli ikeye nakuhandeka nguendi, “Nga u Muna Njambi, shika aua mavue linga ahimpuke mbolo.”

⁴ Vuno honi Yesu uamukumbuluile nguendi, “Vanacisoneka nguavo, ‘Muntu kasa kuyoya na mbolo lika kuahi, vuno honi na mezi oshe aje Njambi ahandeka.’”

⁵ Ambahoni Liyavolo uamutualele mu nganda yakulela, uamuhakele helu lia kashongua ka Njivo ya Njambi.

⁶ Kaha uahandekele kuli ikeye nguendi, “Nga u Muna Njambi,” “liumbile ha mavu. Muomu vanacisoneka nguavo,

“‘Akashika tungelo vendi hali yove, kaha vakakukavuila na mavoko avo, linga viliato viove keti vikansunsuke ku mavue.’”

⁷ Yesu uamukumbuluile nguendi, “Vanacisoneka naua nguavo, ‘Keti useke Muene Njambi yove.’”

⁸ Kaha naua Liyavolo uamutualele ku munkinda ualaha cikuma, uamu-mueseke vumuene vuoshe vua hano ha mavu na vumpau vuavuo.

⁹ Kaha uahandekele kuli Yesu nguendi, “Vioshe evi njikakuhanavio, nga ukatsikama ha mavu na kunjilemesa.”

¹⁰ Yesu uamukumbuluile nguendi, “Huma kuli yange Satana! Omuo vanacisoneka nguavo, ‘Ukalemesa Muene Njambi yove na kumupangela ikeye lika!’”

¹¹ Ambahoni Liyavolo uamusezele, kaha tungelo vezile nakumukuasa.

Yesu Aputuka Vipangi viendi mu Ngalileya

(Mako1:14-15; Luka4:14-15)

¹² Omo Yesu uevuile nguendi Iuano vanamukutu, kaha uaile ku Ngalileya.

¹³ Kaha hakuhuma mu Nazaleta uaile nakukakala mu Kapenauma kuyehi na mema a kalunga a Ngalileya, mu nginga ya Zembuloni na Nafetali,

¹⁴ linga cije cahandekete kananguizi ua Njambi Isaya cilishulisise nguendi:

¹⁵ “Cihela ca Zembuloni na cihela ca Nafetali, vije viakala mu ngila yakuya ku mema a kalunga, kulutue lua Yundau, Ngalileya, lifuti lia vaje keti Vayunda.

¹⁶ Vantu vaje vakala mu milima vanamono ceke cakama.

Kaha na vaje vakala mu cihela na mu cimbembe ca kutsa, ceke cinavatuila.”

¹⁷ Kuhuma ha ntsimbu ije Yesu uaputukile kuambulula nguendi, “Tengu-lukeni ku vipi vieni, omuo vumuene vua muilu vuli muyehi.”

*Yesu Asana vandongisi vendi vakulivanga
(Mako1:16-20; Luka5:1-11)*

¹⁸ Omo Yesu uakele nakuenda kucikulo ca cisali ca Ngalileya, uamuene vamunaina vavali, Simoni uje ivatumbula Petulu namunaina Anduleo, vatele manda avo mu cisali, omuo vapuile vakakuta vantsi.

¹⁹ Kaha uahandekete kuli vakevo nguendi, “Njikaveni, kaha njikamipuisa vakakuta vantu.”

²⁰ Kaha hajevene vasezele manda avo nakumukava.

²¹ Omo uakele nakutualelelaho kuya kaha naua uamuene muntu mukuavo na munaina, Tiango muna Zembendeo na munaina Iuano mu vuato hamo na ishavo Zembendeo vakele nakutungulula manda avo, kaha uavasanene.

²² Kaha hajevene vasezele vuato na ishavo, kaha vamukavele.

*Yesu Alongesa na Kuambulula na Kukanguisa
(Luka6:17-19)*

²³ Yesu uahitanganene mu Ngalileya muoshe, nakulongesa muvi njivo vi-avo via malombelo, na kuambulula muzimbu uacili ua vumuene nakukan-guisa mishongo yoshe ya vantu yakuliseza seza na vakakuvavala.

²⁴ Kutsimana cendi cevuikile naku Siliya kuoshe, kaha vamunehetelele vaka kuvavala voshe, na vaka mishongo yakuli seza seza na kuvua kuvavala, na vaka mahamba, na vaka kushinia, na vaka tulepa, kaha voshe uavakanguisile.

²⁵ Kaha vivunga viakama via vantu kuhuminina mu Ngalileya, namu Ndekapolisi * na ku Yelusalema, na ku Yundeya, na musinia lia ndonga ya Yundau, viamukavele.

5

Yesu Alongesa ha Munkinda

¹ Omo Yesu hakumona vivunga via vantu, kaha ualondele cindende ha munkinda, kaha omo uatumamene ha mavu vandongisi vendi vezile kuli ikeye,

² kaha uaputukile kuvalongesa nakuhandeka nguendi,

*Kuvuahahelela ca Vusunga
(Luka6:20-23)*

³ “Vakukuisula vaje vanapu vihutu mu Cimbembesi,

* **4:25** (Ndekapolisi ilumbununa vimbonge likumi)

muomu vumuene vua muilu vunapu vuavo.”

4 “Vakukuisula vaje valinakulila,
muomu vaka vazembeleka!”

5 “Vakukuisula vaje valikehesa,
muomu vakasuana mavu!”

6 “Vakukuisula vaje vevua njala na mpuila muomu ya vusunga,
muafua vakakuta!”

7 “Vakukuisula vaje vali na cikeketima,
muomu navo vakavevuila cikeketima!”

8 “Vakukuisula vaje na lele mu mitima,
muomu vakamona Njambi!”

9 “Vakukuisula vaje vakakulinga ciyulo,
muomu vakavasana vana va Njambi!”

10 “Vakukuisula vaje vavalinakupakesa muomu ya vusunga,
muafua vumuene vua muilu vunapu vuavo!”

11 “Munapu vakukuisula omo vantu vamishaula nakumipakesa nakuhan-
deka viuma vioshe via vipi via makuli hali yeni muomu yange.”

12 Joleleni nakuvuahelera muomu vuana vueni vukapua vuakama
cikuma muilu, muafua omu mukemo vantu vayandesele tunanguizi va
Njambi vaje vakeleko tele kanda yeni.

Muongua na Ceke

(Mako9:50; Luka14:34-35)

13 “Yeni munapu muongua uaha mavu, vuno honi nga muongua
unashamuka, kaha vatihoni kutovala cauo cikahiluka? Ku ukapu naseho
naua ku cuma coshe kuvanga lika vaumbile kuti kaha na vantu vakauli-
atangela.”

14 “Yeni mu ceke ca vaka mavu. Nganda yakutungila ha munkinda kuyasa
kulishueka.”

15 Nankuma naumo uahi asa kushuameka ndeya naku ihaka muintsi lia
muhela, vuno honi aihaka ha citumbiko, kaha ituila ceke kuli voshe vaje
vali mu njivo.

16 Mucifua cimo vene eceleni ceke ceni citue ku vantu, linga vamone
vipangi vieni viacili, kaha vakahana vumpau kuli Ishueni uje ali muilu.

Vilongesa via ha Lishiko lia Mosesa

17 Keti musinganieke nguenu njineja nakumanusula Lishiko lia Mosesa,
cipue vilongesa via tunanguizi va Njambi, kunjezile nakuvimanusula vuno
honi nakuvishulisisa.

18 Muavusunga njimileka nguange kuvanga lilu na mavu vinahiti,
nacimo cahi cikahita keti cipue cisona, cipue citoma kuhuma ku Lishiko,
kuvanga noho viuma vioshe vanavimanusula.

19 Nankuma uoshe uje kononoka cipue koma kakandende kaku mashiko
aua kaha acilongesa na vakuavo naua linga vacilinge kaha vakamutum-
bula uamundende mu vumuene vua muilu, vuno honi uoshe uje aniuanga
na kulongesa mashiko auu vakamutum-bula uakama mu vumuene vua
muilu.

20 Nankuma njimileka nguange, nga vusunga vueni kuvupulakana
vusunga vua valongisi va mezi a lishiko lia Mosesa na Vafaliseo, kaha
kumuka kovala mu vumuene vua muilu.

Vilongesa via ha Kuniengua

21 “Muevuile muje muvalekele vantu va kunsenkulu nguavo, ‘Keti mukat-
sihe, kaha uoshe uje atsiha mukuavo vaka musompesa.’”

22 Vuno honi njimileka nguange uoshe uje anienguela munaina vana-pande kumusompa, kaha uoshe uje atuka munaina vaka musompa ku nzango, kaha na uoshe uje ahandeka mukuavo nguendi yove cilema, vakamutuala mu ngehena ya tuhia.

23 Nankuma nga utonda kulambuwa vuana vuove ha mutula, kaha nga uanuka mulonga uje u uapihisilile mukueni,

24 seza vuana vuove ha mutula kaha yatahi ukalisambuese nendi, kaha kuhuma oho hiluka ukalambuile vuana vuove.

25 “Lisambuese vuasi vuasi nauje yunapihisila oku muli nakuya hamo ku nzango, kuteua yunapihisila akakutuala kuli lihako, kaha lihako akakuhana kuli lisualale, kaha lisualale akakuhaka mu kamenga.”

26 Muavusunga njikuleka nguange, kukahumumo kuvanga noho uka-manusula kufueta kambongo ka mamanusulo ku mulonga uove.

Vilongesa via ha Vupangala

27 “Muevuile muje vacihandekela nguavo, ‘Keti mulinge vupangala.’

28 Vuno honi njimileka nguange, uoshe uje atala mpuevo ntoma na lishungu lia lipi na lingi laja nendi vupangala mu mutima uendi.

29 Nga lisho liove liaku cilio likusevuisa kulinga vupi, licokovolemo uliumbile kuti! Muomu cacili kuli yove cilio cove cimo ca muvila cinonge kupulakana kumbila muvila uove uoshe mu ngehena.

30 Kaha nga livoko liove lia cilio likusevuisa kulinga vupi, livatule, kaha liumbile kuti! Muomu cacili kuli yove cilio cove cimo ca muvila cinonge kupulakana kumbila muvila uove uoshe mu ngehena.

Vilongesa via ha Kutsiha Vulo

(Mateu19:9; Mako10:11-12; Luka16:18)

31 “Kaha naua vacihandekela nguavo, ‘Uoshe uje akondola mpuevo yendi, napande kumuhana mukanda ukutsiha vulo.’

32 Vuno honi yange njimileka nguange, uoshe uje akondola mpuevo yendi, kuakuhona mulonga ua vupangala, amupuisa ngue nalingi vupangala, kaha na uje uoshe akamuambata akapua lika lipangala.

Vilongesa via ha Kulisinga

33 “Naua muevuile muje valekele vakukuluila kunsenkulu nguavo, ‘Keti upokole cisingo cove, vuno honi linga vije vialisingile ku mesho a Muene.’

34 Vuno honi njihandeka kuli yeni nguange keti mukalisingeho, cipue na lilu, omuo liapua litanda lia Njambi,

35 cipue na mavu, omuo apua ha cituamo ca vialiatelo vuendi, cipue na Yelusalema, omuo yapua nganda ya Muene ukama.

36 Kaha naua keti ulisinge na mutue uove, omuo kuuasa kutokesa cinkambu cimo cipue kucizivalesa.

37 Kuhandeka cenii kupue ‘Eyo’ cipue ‘houe’ omuo coshe cakupulakana eci cihuminina kuli citozi.

Vilongesa via ha Kuhiluisila vupi ku vupi

(Luka6:29-30)

38 “Muevuile muje vahandekela nguavo, ‘Lisho ku lisho, kaha lizo ku lizo.’

39 Vuno honi njihandeka kuli yeni nguange keti muhiluisile vupi ku muntu uje akupihisila. Vuno honi nga muntu akupupa ku litama liove lia cilio, mutenguluisile naua ku litama likuavo.

40 Kaha nga muntu atonda kukusompesa ngeci akunieke cikovelo cove, muhane naua na kazaku kove.

⁴¹ Kaha nga muntu akusindiya ngeci uende nendi vungenzi vua ntunda imo, enda nendi vungenzi vua vintunda vivali.

⁴² Uoshe uje akulomba muhane, uoshe uje akulomba mukuli keti umu-mine.

Cizango ku Vitozi

⁴³ “Munevu muje vahandekele nguavo, ‘Zanga mukueni, kaha zinda citozi cove.’

⁴⁴ Vuno honi njimileka nguange, zangeni vitozi veni, kaha lombeleleni vaje valinakumipakesa,

⁴⁵ linga mupue vana va Ishueni uje ali muilu. Omuo ikeye akatuisa litangua liendi kuli vaka vupi na kuli vaka vacili, kaha akanokesa kalunga kuli vaka vusunga na kuli vaka kuhona vusunga.

⁴⁶ Muomu nga muzanga lika vaje vamizanga, kaha vuana muka mukauana? Nkuma omu keti mukemo muvakalingila vaka kutambula lisimu ndi?

⁴⁷ Kaha nga mulihinduisa lika na vamuanoko, kaha mualisezela haka na vakueni? Nkuma omu keti mukemo muvakalingila na vaje keti Vayunda ndi?

⁴⁸ Nankuma yeni munapande kupua vaka kusungama, ngue muje Ishueni ua muilu uapua uakusungama.”

6

Vilongesa via ha kukuasa vaka kujeneka

¹ “Zangameni linga keti mulinge vucili vueni ku mesho a vantu, ngeci vamimone, nga mucilinga eci kaha kuvakamihana vuana kuli Ishueni ua muilu.

² “Kaha nga uhana uje nahonoua, keti usike tolombita, ngue muje muvakalingila vaka civembulu mu vinjivo via malombelo na mu vitapalo, linga vavashangazale ku vantu. Muavusunga njimileka nguange, vanatambula laja vuana vuavo.

³ Vuno honi omo ukuasa vaje vanahonua, keti utavese livoko liove lia cimoshue lizivuke vije livoko liove liacilio vililinalingila,

⁴ linga kukuasa ceni kuli vaje vanahonua cipue ca vushueke, kaha Ishueni uje amona vije vili mu vushueke akamihana vuana.

Vilongesa via ha Lilombelo

(Luka11:2-4)

⁵ “Kaha omo mulombela, keti mulombe ngue vaka civembulu, muomu vakevo vazanga kuimana nakulombela mu vinjivo via malombelo na mu vitapalo, linga vantu vavamone. Muavusunga njimileka nguange, vanatambula laja vuana vuavo.

⁶ Vuno honi omo ulombela, ya mu mulili uove, shoka ku cikolo kaha lombela kuli Isho uje ali mu vushueke. Kaha Isho uje amona via mu vushueke akakuhana vuana.

⁷ “Kaha omo mulombela, keti muhandeke cikuma ngue muje muvakalingila vaje keti Vayunda, muomu vakasinganieka nguavo vakavevua omuo ya mezi avo akuhona seho.

⁸ Ketu mupue ngue vakevo, muomu Ishueni azivuka laja vije vimutonda kanda mumulombe.

⁹ Lombeleni ngueni,

“Tatetu uli muilu,

Valemese lizina liove,

¹⁰ Vumuene vuove vuije,

Cizango cove vacilinge hano ha mavu, ngue muje vacilinga muilu.

¹¹ Tuhane lelo kulia cetu caha litangua na litangua,

¹² Tukonekele ku milonga yetu,
ngue muje yetu tukakonekela vaka kutuvulumuina.

¹³ Ketu ututuamenene ku vieseko viakama,

vuno honi tuohiele ku citozi!*

¹⁴ "Omuo nga mukonekela vantu vaje vanamipihisila, kaha neni naua vakamikonekela kuli Ishueni ua muilu.

¹⁵ Vuno honi nga kumukonekela vantu vaje vamipihisila, neni naua Ishueni kakamikonekela ku milonga yeni.

Vilongesa via ha kuliumina kulia

¹⁶ "Kaha omo muliumina kulia, keti mulimuese ngue muazeye, ngue muje muvakalingila vaka civembulu muje muvaka pihisa kuvihanga viavo, linga ku liumina kulia cavo vacizivuke ku vantu. Muavusunga njimileka nguange vanatambula laja vuana vuavo mukushula.

¹⁷ Vuno honi omo muliumina kulia, likuiteni mazi ku mitue yeni kaha taneni ku mesho eni,

¹⁸ linga kuliumina kulia ceni keti vacizivuke ku vantu vuno honi vacizivuke kuli Ishueni uje ali muvushueke, kaha Ishueni uje amona muvushueke akamihana vuana.

Vufuko vua muilu

(Luka12:33-34)

¹⁹ "Keti mulitulikile vufuko vua hano ha mavu, vuje tuntembulu na nkalaue vakavupihisa, naua vuje vezi vatuva nakuiva.

²⁰ Vuno honi litulikileni vufuko vua muilu, vuje tuntembulu na nkalaue kuvasa kuvupihisa, cipue vezi kuvasa kuvutuva na kuvuiva.

²¹ Omuo kuje kuli vufuko vuove, kukeko naua kukakala mutima uove.

Ceke ca Muvila

(Luka11:34-36)

²² "Mesho akeuo ndeya ya muvila. Nankuma nga mesho ove amona muacili, na muvila uove uoshe ushula na ceke.

²³ Vuno honi nga mesho ove akutsitsivala, muvila uove uoshe ukashula na milima. Nga ceke cije cili muli yove cinapu milima, kaha milima ikapua yaingi cikuma.

Njambi na Vufuko

(Luka16:13; 12:22-31)

²⁴ "Naumo uahi asa kupangela vimienne vavali, akazindaho umo nakuzan-gaho mukuavo, akalihana kuli umo nakusembulula mukuavo. Kuuasa kupangela Njambi na vimbongo.

²⁵ "Nankuma, njimileka nguange, keti mulinienge ha vuyoye vueni, vika mukalia cipue nguene vika mukaua, cipue nguene vika tukazala ha mivila yetu. Nkuma miono yeni keti ya seho kupulakana viakulia, cipue mivila yeni kupulakana vuzalo ndi?

²⁶ Taleni tuzila va muilu, kuvekukuna cipue kuteja cipue kutulikila mu vishete, vuno honi Ishueni ua muilu alinakuvalisa. Nkuma keti yeni muli na seho yakama kupulakana tuzila ndi?

²⁷ Kaha iya hhakati keni muomu yakulinienga asa kuvuezelelako hola imo ku muono uendi?

* **6:13** Mu Vimbimbiliya vikuavo vanahakako na mezi aua nguavo, Omuo vumuene vunapu vuove, na nzili na vumpau, ku miaka yoshe. Eua.

²⁸ “Nkuma vika mulinienga ha vuzalo? Taleni vinsani via mu lihia muvikakolo, vikevio ku viekupanga cipue kulitongela vuzalo.

²⁹ Vuno honi njimileka nguange, cipue Solomoni mu vumpau vuendi vuoshe, kazaleleho vuzalo vuacili ngue vua vinsani evi.

³⁰ Kaha nga Njambi azika muila ua mu lihia uje ukalako lelo lika, imene vaumbila mu tuhia, nkuma kasa kumizika muacili ndi? Yeni vantu wa lutsilielo lua lundende!

³¹ “Nankuma keti mulinienge nguene, ‘Tukalia vika?’ Cipue ‘Tukanua vika?’ Cipue ‘Tukazala vika?’

³² Omuo viuma vioshe evi vakavitondo vaje keti Vayunda. Vuno honi yeni Ishueni ua muilu azivuka nguendi muvitonda vioshe.

³³ Vuno honi tondeni tahi vumuene vuendi na vusunga vuendi, kaha viuma vioshe evi akamihanavio.

³⁴ Nankuma keti mulinienge via imene, omuo imene likalinienga likelio vavenia. Muomu litangua na litangua lili na tuyando tualio tuakupuamo.”

7

Kusompa Vakueni (Luka6:37-38-41;42)

¹ “Keti musompe vakueni, linga neni keti vamisompe.

² Muomu kusompa cije musompa naco vakueni, cikeco civakamisompa naco, kaha seteko ije museteka nayo vakueni, ikeyo ivaka miseteka nayo.

³ Vika umuena cishoni cili ha lisho lia muanoko, vuno honi ku umono mukambo uje uli mu lisho liove?

⁴ Cipue vika uhandeka kuli muanoko nguove, ‘Teua njikuhumise cishoni cili mu lisho liove,’ vuno honi yove ulina mukambo mu lisho liove?

⁵ Yove muka civembulu! Hakulivanga humisa tahi mukambo uje uli mu lisho liove, ambahoni umone muacili hakuhumisa cishoni cije cili mu lisho lia muanoko.

⁶ “Keti muhane vije via kulela ku tutali, muomu vaka mitengulukila nakumuluisa. Keti mumbile vusanga vueni kulutue lia vangulu, muomu vaka vuliatangela na viliato viavo.

Kulomba, na Kutonda na Kutota (Luka11:9-13)

⁷ “Lombeni, kaha muka tambula, tondeni, kaha mukauana, toteni ha cikolo, kaha vaka mishokoluela.

⁸ Muomu uoshe uje alomba atambula, kaha uoshe uje atonda auana, kaha uoshe uje atota vaka mushokoluela cikolo.

⁹ Nkuma iya hhakati keni nga munendi amulomba mbolo, kaha ikeye amuhana livue?

¹⁰ Cipue nga amulomba intsi, kaha ikeye amuhana linoka?

¹¹ Kaha nga yeni vaka vupi, muzivuka kuhana mavuana acili kuli vana veni, kaha cikafua vati honi kuli Ishueni uje ali muilu uje akahana viuma viacili kuli vaje vamulomba!

¹² “Kaha vioshe vije mutonda nguene vakueni vamingilevio, neni naua valingilenivio, omuo eli likelio Lishiko lia Mosesa na vilongesa via tunanguizi va Njambi.

Cikolo ca Cindende (Luka13:24)

¹³ “Koveleni mu cikolo ca cindende, omuo cikolo cakama na ngila yaco yapua yayasi ije ituala kukunonga, kaha na vaje vakovelamo vapua vavengi.

¹⁴ Vuno honi cikolo ca cindende na ngila yaco yapua ya ikalu, ije ituala ku muono, kaha na vaje vaiuana vapua vavandende.

Muti na Vushuka vuauo

(Luka6:43-44)

¹⁵ “Zangameni na tunanguizi va makuli, vaje veja kuli yeni mu vuzalo ngue vampanga, vuno honi mukati kavo vanapu tungunga vamu musenge.

¹⁶ Muka vazivukila ku vushuka vuavo. Nkuma vushuka vua viniu vaka vutomona ku muti ua vimbimbo, cipue vushuka vua mukuyu ku shaku ije ili na mambimbo ndi?

¹⁷ Mucifua cimo vene muti uoshe uacili ukemi vushuka vuacili, vuno honi muti ua upi ukemi vushuka vua vupi.

¹⁸ Muti uacili kuuasa kuima vushuka vua vupi, kaha naua muti ua upi kuuasa kuima vushuka vuacili.

¹⁹ Muti uoshe uje kuuimi vushuka vuacili vaka uteta naku umbila mu tuhia.

²⁰ Nankuma muka vazivukila ku vushuka vuavo.

Kunjamizivukile

(Luka13:25-27)

²¹ “Keti muntu uoshe uje ahandeka kuli yange nguendi, ‘Muene, Muene,’ akakovela mu vumuene vua muilu, vuno honi kuvanga lika uje alinga cizango ca Tate uje hali muilu.

²² Ha litanga lije vavengi vakahandeka kuli yange nguavo, ‘Muene, Muene! Nkuma kutuahandekela vunanguizi mu lizina liove, nakuhumisa mahamba mu lizina liove, kaha tualingile viuma viavingi viakukomouesa mu lizina liove?’

²³ Ambahoni njikahandeka kuli vakevo nguange, ‘Kunjamitantekeyele, humeni kuli yange, yeni vaka kulinga via vipi!’

Vaka Kutunga njivo Vavali

(Luka6:47-49)

²⁴ “Kaha muntu uoshe uje evua aua mezi ange naku akavangeya napu ngue uje yala uakuzangama uje uatungile njivo yendi ha livu.

²⁵ Kaha kalunga uanokele, na livazi liezile, kaha mpunzi yezile nakuningangesa ije njivo. Vuno honi kuyauile, muomu luvula luayo valutungilile ha livue.

²⁶ “Vuno honi uoshe uje evua aua mezi ange, kaha ka akavangeya, napu ngue uje yala ua cilema uje uatungilile njivo yendi ha museke seke,

²⁷ Kaha kalunga uanokele, na livazi liezile, kaha mpunzi yapekumukile nakuningangesa ije njivo, kaha yauile, kaha kuua cayo capuile cacipi cikuma!”

Nzili Yakama ya Yesu

²⁸ Kaha omo Yesu uamanusuile kuhandeka viuma evi, vivunga via vantu vialikomokelele ha kulongesa cendi.

²⁹ Muomu uavalongesele ngue uje alina nzili yakama keti ngue valongisi vavo va mezi mashiko.

¹ Omo Yesu uasikumukile kuhuma ha munkinda, vivunga viakama viamukavele,

² kaha taleni, muka mbumba uezile kuli ikeye nakumutsikamena nakuhandeka nguendi, “Muene nga utonda uasa kunjilelesa.”

³ Kaha Yesu uoluele livoko liendi nakumukuata nakuhandeka nguendi, “Njitonda, lela.” Kaha hajevene uje yala uakangukile ku mbumba yendi.

⁴ Kaha Yesu uahandekile kuli ikeye nguendi, “Keti ukalekeko cipue umo, vuno honi ya ukalimuese kuli kasasendote, kaha ukahane vuana vuje vuashikile Mosesa, linga cipue vukaleho ku vantu.”

*Yesu Akanguisa Ngamba ya Mukuluntu ua Masualale va Loma
(Luka7:1-10)*

⁵ Omo Yesu ukovelele mu Kapenauma, mukuluntu ua masualale va Loma uezile kuli ikeye mukumulomba vukuasi

⁶ kaha uahandekile nguendi “Muene, ngamba yange nakosa mu njivo ali nakuvavala kalepa, kaha alinakuvua cikuma kuvavala.”

⁷ Kaha Yesu uahandekile kuli ikeye nguendi, “Njija nakumukanguisa.”

⁸ Vuno honi uje mukuluntu ua masualale uamukumbuluile nguendi, “Muene, kucanjipandele yove kukovela mu njivo yange, vuno honi handeka lika lizi, kaha ngamba yange akakanguka.”

⁹ Muomu nange naua nji yala uje ali muintsi lia nzili yakama, kaha na masualale naua vali muintsi liange, kaha njihandeka kuli umo nguange, ‘Ya,’ kaha aya, kaha kuli mukuavo naua nguange ‘Ija,’ kaha eja, kuli ndungo yange nguange, ‘Linga eci,’ kaha acilinga.”

¹⁰ Omo Yesu uevuile vije viahandekile, ualikomokelele cikuma, kaha uahandekile kuli vaje vakele naku mukava nguendi, “Muavusunga njimileka nguange, cipue mu Isaleli kunjauanene lutsilielo luangacije.”

¹¹ Njimileka nguange vavengi vakeja, vakahuma mu ngangela na mu kangombe kayambi, kaha vakatumama ku ciuano hamo na Avilahama, na Isake, na Yakomba, mu vumuene vua muiulu,

¹² vuno honi vana va vumuene vakavombila mu milima hambanza, kuje kukakala kulila na kulishumanga ku mazo avo.”

¹³ Kaha Yesu uahandekile kuli uje mukuluntu ua masualale nguendi, “Ya, cilingiue ngoco kuli yove ngue muje munatsiliela.” Kaha ngamba yendi uakangukile ha ntsimbu ije vene.

*Yesu Akanguisa Vantu Vavengi
(Mako1:29-34; Luka4:38-41)*

¹⁴ Kaha omo Yesu ukovelele mu njivo ya Petulu, uauanene vainamueno ya Petulu vanakosa vakele nakuvavala lisika sika.

¹⁵ Kaha uamukuatela ku livoko liendi, kaha lisika sika liamuhumine, kaha uahindikile nakuputuka kumupangela.

¹⁶ Kaha kucinguezi cije vene vamunehetelele vantu vavengi vaje vakele na mahamba, kaha uahumisile vimbembesi na lizi, kaha uakanguisile vakakuvavala voshe.

¹⁷ Eci capuile linga vilishulisise vije viahandekile kananguizi ua Njambi Isaya nguendi, “Uambatele makalu etu, kaha uambatele mishongo yetu.”

*Makalu akala hakukava Yesu
(Luka9:57-62)*

¹⁸ Omo Yesu uamuene civunga cakama cinamuzengeleka, uashikile vandongisi vendi linga vaye musinia lia cisali.

¹⁹ Kaha mulongisi ua mashiko uezile kuli ikeye nakuhandeka nguendi, “Mulongisi, njikukavangeya kuoshe ku ukaya.”

²⁰ Kaha Yesu uamukumbuluile nguendi, “Vambanje valina mena, kaha naua na tuzila va muilu valina mashua, vuno honi Muna Muntu kesi na cihela cakuhiimina.”

²¹ Kaha naua umo ua vandongisi vendi uahandekela kuli ikeye nguendi, “Muene, tahi njiye njikatsinde tate.”

²² Vuno honi Yesu uahandekela kuli ikeye nguendi, “Njikave, kaha seza vatsi vatsinde vatsi vakuavo.”

*Yesu Aholuesa Mankimba Akama
(Mako4:35-41; Luka8:22-25)*

²³ Kaha omo Yesu uakovelele mu vuato, vandongisi vendi vamukavele.

²⁴ Kaha taleni, kuakatukile mankimba akama cikuma ha cisali, kaha vuato vuakele nakuninganga na mankimba, vuno honi Yesu te nakosa.

²⁵ Kaha vaile nakumhindula nakuhandeka nguavo, “Tuovole Muene, tuli nakunonga.”

²⁶ Kaha uahandekela kuli vakevo nguendi, “Vika muteua, yeni vamala va lutsilielo lualundende?” Ambahoni uakatukile nakutenukila mpunzi na mankimba, kaha aholokele kuluu.

²⁷ Kaha vandongisi vendi valikomokelele cikuma nakuhandeka nguavo, “Muntu uacifua muka ou, uje cipue mpunzi na mankimba vimuononoka!”

*Yesu Akanguisa Vamala Vavali vaka Mahamba
(Mako5:1-20; Luka8:26-39)*

²⁸ Omo Yesu uahetele musinia lia cisali ku cihela ca Ngandalena, ualiuanene na vamala vavali vaje vakele na mahamba tele vahuminina ha vihilo. Kaha omuo ya vutenu vuavo naumo uahi uasele kuhita ngila ije.

²⁹ Kaha vatambekele nguavo, “Utonda kulinga vika netu yove Muna Njambi? Uneja nakutuhana kashitiku oku kanda ntsimbu yetu iheteho ndi?”

³⁰ Kuyehi navo kuakele vutanga vua vangulu vavengi vaje vakele nakulia.

³¹ Kaha mahamba amulombe nguavo, “Nga utuhumisa, tutavese linga tukakovele mu vutanga vua vangulu.”

³² Kaha Yesu uahandekela kuli vakevo nguendi, “Yeni.” Kaha aje mahamba ahumine nakukakovele mu vutanga vua vangulu. Hajevene vuje vutanga vua vangulu vuoshe vuasikumukile nakushatukila mu cisali. Kaha vuakanongelelemo mu mema.

³³ Vaje vantu vaje vakele nakuniunga vangulu vashatukilile mu nganda nakukambulula vije viose vamuene navije vialingiuile kuli vaje vamala vaka mahamba.

³⁴ Kaha taleni, vantu voshe vahumine mu nganda vezile nakuliuana na Yesu, kaha omo vamumuene, vamulombe ngeci ahume mu cihela cavo.

9

*Yesu Akanguisa Yala Uakalepa
(Mako2:1-12; Luka5:17-26)*

¹ Omo Yesu uakovelele mu vuato, uajavukikile musinia, kaha uayile kuimbo liendi.

² Kaha hajevene vamunehelilelele muka kalepa uakosele ha muhela uendi. Kaha omo Yesu vamuene lutsilielo luavo, uahandekela kuli uje muka kalepa nguendi, “Simpa, munange, vupi vuove vana vusambuesa.”

³ Kaha vamo valongisi va Lishiko valihandekesele umo na mukuavo nguavo, “Ou yala alinakushaula Njambi!”

⁴ Vuno honi Yesu hakutantekeya viyongola viavo uahandeketele nguendi, “Vika muli nakuyongueta viuma via vipi mu mitima yeni?”

⁵ Nkuma cacasi cika kuhandeka nguange, vupi vuove vanavusambuesa, cipue kuhandeka nguange katuka uende?”

⁶ Ngeci mutantekeye nguene Muna Muntu hali na nzili yakama cikuma hano ha mavu yakusambuesa vupi.” Kaha uahandeketele kuli uje muka kalepa nguendi, “Katuka, ambata muhela uove, kaha ya kuimbo!”

⁷ Kaha uakatukile, nakuya kuimbo.

⁸ Omo civunga vacimuene, vakele na liova, kaha vashangazalele Njambi, uje uahanene nzili yakama cikuma ku vantu.

Yesu Asana Mateu

(Mako2:13-17; Luka5:27-32)

⁹ Omo Yesu uahumene kuje ku cihela, uamuene yala ivatumbula nguavo Mateu uatumamene mu njivo ya kutambuila lisimo. Kaha uahandeketele kuli ikeye nguendi, “Njikave.”

Kaha uakatukile nakumukava.

¹⁰ Omo uatumamene ku mesa mu njivo, kaha vavengi vaka kutambula lisimo na vaka vupi vezile nakutumama hamo na Yesu na vandongisi vendi.

¹¹ Kaha omo Vafaliseo vacimuene, vahandeketele kuli vandongisi vendi nguavo, “Vika mulongisi ueni alinakulia na vaka kutambula lisimo na vaka vupi?”

¹² Vuno honi omo uavevuile, uahandeketele nguendi, “Vakangule kuvuketela cimbanda, vuno honi kuvanga lika vaka kuvavala.

¹³ Yemuye mukalilongese vika eci cilumbunuka, ‘Njishunguiya cikeketima, keti cikombelo.’ Muomu kunjezile mukusana vaka vusunga, vuno honi vaka vupi.”

Cihula ca ha kuliumina Kulia

(Mako2:18-22; Luka5:33-39)

¹⁴ Kaha vandongisi va luano muka kumbuitika vezile kuli ikeye nakuhandeka nguavo, “Vika yetu na Vafaliseo tukaliumina kulia, vuno honi vandongisi vove kuvukuliumina kulia?”

¹⁵ Kaha Yesu uahandeketele kuli vakevo nguendi, “Nkuma vangenzi vaje vali ku ciuano ca vulo vanapande kulila oku liavenia vulo acili navo ndi? Matangua akeja omo uje liavenia vulo vakamuambata hali vakevo ambahoni vakaliumine kulia.

¹⁶ “Naumo uahi asa kutongela citope ca ntanga yaiha ha kazaku kalaja, omuo cije citope caciha cikatawula kaje kazaku kaha mukasala mbengua yakama kupulakana mu muje yakele.

¹⁷ Naumo uahi asa kuhaka viniu via viha mu vinjenge via vilambu via laja, nga mulinga ngoco kaha vije vinjeke via vilambu vikatawuka, kaha vije viniu vikahitila muangoco na vije vilambu kaha vikapihia, vuno honi viniu via viha vaka vihaka mu vinjeke via vilambu via viha kaha mukulinga ngoco vioshe vivali vikakala muacili.”

Muna Njailosi ua Mumbanda na Mpuevo uje uakuatele ku Cikovelo ca Yesu

(Mako5:21-43; Luka8:40-56)

¹⁸ Te Yesu acilinakuhandeka navo, taleni muka kuyula ua Vayunda uwezile kuli ikeye nakumutsikamena, uahandeketele nguendi, “Munange ua mumbanda natsi hano vene, vuno honi ija nakumusaleka livoko liove, kaha akayoya.”

¹⁹ Kaha Yesu uakatukile nakumukava hamo na vandongisi vendi.

²⁰ Kaha taleni, mpuevo uje uayandele ku mushongo ua kuhita maninga ha miaka yakupua likumi na ivali uezile munima yendi kaha uamukuatele ku mukunduilu ua kazaku kendi,

²¹ omuo uahandeketele kuli ikeye vavenia nguendi, “Nga njikuata lika ku kazaku kendi kaha njikanguka.”

²² Omo Yesu uatengulukile uamumuene kaha uahandeketele kuli ikeye nguendi, “Simpa, munange ua mpuevo, lutsilielo luove luakukanguisa.” Kaha hajevene uje mpuevo uakangukile.

²³ Kaha omo Yesu uakovelele mu njivo ya uje mukuluntu ua masualale, uamuene vaje vakakuimba miaso yaha viakutsa na civunga cakele nakulila,

²⁴ Kaha uahandeketele nguendi, “Tuhukeni! Omuo ou kanike uampuevo katsile vuno honi nakosa lika.” Kaha vamujolele.

²⁵ Vuno honi omo civunga catuhukile hambanza, uakovelele mukati kaha uakuatele uje kanike ku livoko nakumuhindula, kaha uje kanike uahindikile.

²⁶ Kaha muzimbu ou ualishanduokelele mu mbonge yoshe ije.

Yesu Akanguisa Tupuputua Vavali

²⁷ Kaha omo Yesu uahumine kuje, tupuputua vavali vamukavele, vatam-bekele nguavo, “Tuivuiliko cikeketima Muna Ndaviti,”

²⁸ Omo uakovelele mu njivo, vaje tupuputua vavali vezile kuli ikeye, kaha Yesu uahandeketele kuli vakevo nguendi, “Mutsiliela ngueni njasa kucilinga eci ndi?” Kaha vamukumbuluile nguavo,

“Eyo Muene.”

²⁹ Ambahoni uakuatele ha mesho avo nakuhandeka nguendi, “Kuya ku lutsilielo lueni cilingiue ngocovene kuli yeni.”

³⁰ Kaha mesho avo emukile, kaha Yesu uavashikile nguendi, “Keti mukalekeko muntu cipue umo.”

³¹ Vuno honi vaile nakushanduola lutsimo luendi mu mbonge muoshe muje.

Yesu Akanguisa Kaveveve

³² Omo vaje vamala vakele nakuya, kaha kuakele vamo vantu vane-helelele Yesu yala ua kaveveve uje uakele na lihamba.

³³ Kaha omo lije lihamba valihumisile, uje yala ua kaveveve uaputuk-ile kuhandeka, kaha vivunga via valikomokelele cikuma nakuhandeka nguavio, “Nacimo cahi cakufua ngue eci cituamona muno mu Isaleli.”

³⁴ Vuno honi Vafaliseo vahandeketele nguavo, “Akahumisa mahamba na nzili ya muene ua mahamba.”

Yesu Ovuila Vantu Cikeketima

³⁵ Kaha Yesu uendanganene mu vimbonge vioshe na mu membo oshe, uakele nakulongesa mu vinjivo viavo via malombelo nakuambulula muzimbu uacili ua vumuene, uakanguisile mishongo yoshe na mavezi oshe.

³⁶ Omo uamuene vivunga via vantu kaha uavivuililile ngozi, omuo vakele nakulinienga nakuhona viakulinga ngue vampanga vaje vakuhona kaniungi.

³⁷ Kaha uahandeketele kuli vandongisi vendi nguendi, “Viakuteja vinapu viavingi vuno honi vaka kupanga vavandende.

³⁸ Nankuma lombeleni kuli Muene ua vaka kuteja linga atume vaka kupanga kuviakuteja viendi.”

10

Tunganda Likumi na Vavali
(Mako3:13-19; Luka6:12-16)

¹ Kaha Yesu uasanene vandongisi vendi likumi na vavali, kaha uava-hanene nzili yakama ha vimbembesi viakujuala, nakuvihumisa, nakukan-guisa mishongo yoshe na vaka kuvavala.

² Mazina a tunganda likumi na vavali aua, uakulivanga Simoni uje ivatumbula nguavo Petulu, na munaina Anduleo, na Tiango muna Zem-bendeo, na munaina Iuano.

³ Filipu na Mbatolomeo, Tomasi na Mateu muka kutambula lisimu, na Tiango muna Alufeya, na Tandeo,

⁴ Simoni uaku Kanana, na Yunda Sakaliote uje uendele Yesu vungungu.

Yesu atuma Tunganda likumi na vavali
(Mako6:7-13; Luka9:1-6)

⁵ Kaha Yesu uatumine likumi na vavali, uavashikile nguendi, “Keti muye kuli vaje keti Vayunda, kaha keti mukovele mu mbonge ya Samaliya.

⁶ Vuno honi yeni ku vampanga vaje vazimbala va mu njivo ya Isaleli.

⁷ Kaha oku muli nakuya ambululeni ngueni, ‘Vumuene vua mulu vuli muyehi.’

⁸ Kanguiseni vaka kuvavala, hinduleni vaka kutsa, kanguiseni vaka mbumba, muhumise mahamba. Muatambuile kuakuhona kufueta, kaha haneni kuakuhona kufuetesa.

⁹ Keti muambate Ngolinde cipue Siliva cipue vunengu mu vinkombe vieni,

¹⁰ keti muambate lipakumuna ha vungezi vueni cipue vikovelo vivali cipue vinkaku, cipue mbueti, omo muka kupanga napande kutambula kulia.

¹¹ “Kaha nganda cipue limbo lioshe mukovela, tondeni muntu iya uje na-pande ku mitambula muacili, kaha tumameni nendi noho mukahumamo.

¹² Omo mukovela mu njivo, menekeni vaje muuanamo.

¹³ Kaha nga muje mu njivo vanamitambula vuino, ciyulo ceni cikale navo, vuno honi nga kuvamitambuile vuino, kaha ciyulo ceni cimihilikile.

¹⁴ Kaha nga kuli umo uje kamitambula cipue kuvuilila ku mezi eni, kaha totononeni likungu ku viliato vieni, omo muhuma muje mu njivo cipue muje mu nganda.

¹⁵ Muavusunga njimileka nguange, ha litangua lia kusompa Njambi akahana kashitiku cikuma ku cihela cije kupulakana Sondoma na Ngomola.

Mapakeso aje hali nakuija
(Mako13:9-13; Luka21:12-17)

¹⁶ “Talen, njimituma ngue vampanga hakati ka tungunga, kaha zanga-meni ngue linoka kaha ononokeni ngue mavembe.

¹⁷ Zangameni ku vantu, omuo vakamituala ku vinzango, na kumipu-panga mu vinjivo viavo via malombelo.

¹⁸ Kaha vakamituala ku vanguvulu na kuli vimiene omuo yange, linga cikapue vukaleho kuli vakevo na kuli vaje keti Vayunda.

¹⁹ Omo vamituala, keti mulishoshomuene mumuka handekela cipue vimukahandeka, ha hola ije.

²⁰ Omuo keti yeni mukahandeka, vuno honi Cimbembesi ca Ishueni cikahandeka muli yeni.

²¹ “Muanaye akatuala munaina mukutsa, kaha ishe na munendi, kaha vana vakaluisa visemi vavo na kuvatsiha.

²² Kaha vakamizinda voshe omuo ya lizina liange. Vuno honi uje akakateya na kumamanusuiilo akovoka.

²³ Omo vamiyandesa mu mbonge imo, teueleni mukuavo, muavusunga njimileka nguange kumukendangana mu vimbonge vioshe ya Isaleli ntsimbu kanda muna muntu eja.

²⁴ “Ndongisi kasa kupulakana mulongisi uendi, cipue ngamba kupulakana muene yendi.

²⁵ Capande ngeci ndongisi kupua ngue mulongisi uendi, na ngamba kupua ngue muene yendi. Nga vanatumbula muene ua njivo nguavo Mbelezeambulula, kaha cikapua vati ku vaka njivo yendi.

Uje itunapande kuteua

(Luka12:2-7)

²⁶ “Kaha keti mukale na liova navo, omuo kukuesi civanafuiki cikahona kucifukula, cipue cakushueka cikahona kucitantekeya.

²⁷ Vinjimileka mu milima mu vihandeke mu ceke, kaha vije vimuvua vayeveeta vihandekeleni helu lia njivo.

²⁸ Kaha keti muteue vaje vatsiha muvila vuno honi kuvasa kutsiha muono, vuno honi teueni uje asa kunongesa muono na muvila mu ngehena.

²⁹ Nkuma keti tumpiasa vavali vakavalandesa ha muuaya uaya umo ndi? Vuno honi naumo uavo uahi akau ha mavu kuakuhona cizango ca Ishueni.

³⁰ Vuno honi yeni cipue vinkambu via ku mutue ueni vanavitanda.

³¹ Keti muteue, nankuma yeni muli naseho yakama kupulakana tumpiasa vavengi.

Kutsiliela Yesu cipue Kumuviana ku mesho a Vantu

(Luka12:8-9)

³² “Uoshe uje akanjihandeka hakati ka vantu, nange naua njikamuhandeka kuli Tate uje hali muilu,

³³ vuno honi uoshe uje akanjiviana ku mesho a vantu, nange naua njikamuviana ku mesho a Tate uje hali muilu.

Keti Ciyulo vuno honi Nzita

(Luka12:51-53; 14:26-27)

³⁴ “Keti musinganieke nguene njinanehe ciyulo ha mavu, kunjezile nakuneha ciyulo, vuno honi mukuale.

³⁵ Njineja nakulinga muana aluise ishe, kaha muana uampuevo aluisa vaina, vaina mueno aluise vanayemuono,

³⁶ Kaha vitozi va muntu vakapua vavushoko vendi.

³⁷ “Uoshe uje azanga ishe cipue ina cikuma kupulakana yange kaha kanjipandele, kaha uoshe uje azanga munendi ua yala cipue uampuevo cikuma kupulakana yange kaha kanjipandele,

³⁸ kaha uoshe uje kambata cilindakano cendi nakuhona kunjikava kaha kanjipandele.

³⁹ Kaha uoshe uje atonda muono uendi akauzimbalesa, kaha na uoshe uje a zimbalesa muono uendi omuo yange akau uana.

Citsatselo

(Mako9:41)

⁴⁰ “Uoshe uje amitambula natambula yange, kaha uoshe uje anjitambula natambula uje amanjitumine.

⁴¹ Kaha uoshe uje akatambula kananguizi omuo ikeye kananguizi akatambula vuana vua kananguizi, kaha uoshe uje akatambula yala ua

vusunga omuo ikeye napu yala ua vusunga akatambula vuana vua yala ua vusunga.

⁴² Kaha uoshe uje ahana kuli umo uava vanike vavandende cipue nganja ya mema akutontola omuo napu ndongisi, muavusunga njihandeka kuli yeni nguange kakazimbalesaho vuana vuendi.”

11

Iuano Muka Kumbuitika Atuma Vandongisi vendi (Luka7:18-35)

¹ Omo Yesu uamanusuile kushika vandongisi vendi likumi na vavali, uahumine kuje kaha uaille nakulongesa nakuambulula mu vinganda viavo.

² Honi omo Iuano te hali mu kamenga uevuile vije vialingile Kilistu, kaha uatumine vandongisi vendi na mezi aua nguendi

³ yemuye mukahandeki kuli ikeye nguendi, “Yove uje hali nakuija indi tuvandamene mukuavo naua?”

⁴ Kaha Yesu uavakumbuluile nguendi, “Yemuye mukaleke Iuano vije munevu navije munamono,

⁵ tupuputua vamona na vilema venda, vaka mbumba vanajele na tuveveve vevua, vatsi vasanguka, kaha na vihutu vali nakuvambulula muzimbu uacili.

⁶ Nakuisuliua uje katsutsuka omuo yange.”

⁷ Omo vakele nakuya, Yesu uaputukile kuhandeka ku civunga via Iuano nguendi, “Vika muaille mukumona mu mpambo? Muaille mukumona lihongo litepuzoka na mpunzi ndi?

⁸ Indi vika honi muaililile kuje? Muaille mukumona muntu nazala vuzalo vuasenga ndi? Taleni, vaje vazala vuzalo vuasenga vakala mu mapela a muene.

⁹ Vika muaililile kuje? Muaille mukumona kananguizi ndi? Eyo, njimileka nguange muakamuene viavingi kupulakana kananguizi.

¹⁰ Ou ikeye vene uje ivasonekele nguavo, ‘Tala njikatuma kanganda kange kulutue luove, uje akavua hesa ngila yove.

¹¹ Muavusunga njimileka nguange, hhakati ka vaje vanasemuka ku mpuevo naumo uahi uakama nahumuho kupulakana Iuano muka kumbuitika, vuno honi uoshe uje alikehesa mu vumuene vua muilu napu uakama kupulakana ikeye.

¹² Kuhuma ku matangua a Iuano muka kumbuitika kuheta kulelo lino, vumuene vua muilu vunayanda cikuma kaha vantu vakukalua mitima vanavuambata nampindangano.

¹³ Omuo voshe tunanguizi va Njambi na valongisi va mashiko vahan-dekele vunanguizi noho Iuano,

¹⁴ kaha nga mutonda kucitava, Iuano ikeye Eliya uje akeja.

¹⁵ Uoshe uje hali na matuitui evue.

¹⁶ “Vuno honi vika njasa kusetekesa na vantu valelo? Njivasetekesa ngue vanike vaje vanatumama ku cihela ca kulandesela oku valisana muvakehela nguavo,

¹⁷ ‘Tuamiohieselele miaso, vuno honi kumuakinine, tuamimibilile miaso ya ha kutsa vuno honi kumualilile.’

¹⁸ Omuo Iuano uezile kuakuhona kulia cipue kunua, kaha vahandekela nguavo, ‘Ali na lihamba!’

¹⁹ Kaha omo Muna Muntu uezile oku alia na kunua, kaha vahandeka nguavo, ‘Mutaleni uamutupu na cipenda, kavusamba ua vaka kutambula

lisimu na vaka vupi!" Vuno honi mana a Njambi vanaashulisisa na vilinga viendi."

Vinganda via Kuhona Kutsiliela
(Luka10:13-15)

²⁰ Kaha Yesu uaputukile kutenuka mu vinganda muje mualingile cikuma vikomoueso viendi, omuo kuvatengulukile.

²¹ "Cisingo kuli yove Kolazini! Cisingo kuli yove Mbetesainda! Omuo nga vije vikomoueso vialingiuile muli yeni, ngue vialingiuililile mu Tile na Sindone ngue vatengulukile laja mukuzala vinjeke naku likuita muto.

²² Vuno honi njimileka nguange, ha litangua lia kusompa Njambi akevuila cikeketima Tile na Sindone kupulakana yeni.

²³ Kaha yove Kapenauma, nkuma uatondele kulijundula yove vavenia muilu ndi? Houe, vakakuneha ha mavu mu ngehena. Omuo nga vikomoueso vije vialingiuile kuli yove ngue vialingiuililile mu Sondoma, ngue nganda ije hanga kuicili na lelo lino.

²⁴ Vuno honi njimileka nguange, ha litangua lia kusompa Njambi akevuila cikeketima lifuti lia Sondoma kupulakana yove."

Ijeni kuli Yange Muuane kuhuima
(Luka10:21-22)

²⁵ Kaha ha ntsimbu ije Yesu uahandekela nguendi, "Njitsantsela kuli yove Tate, Muene ua muilu na mavu, omuo unashueke evi viuma kuli vaka mana na vaka kulilongesa, kaha unavisholola ku vanike vavandende.

²⁶ Eyo Tate, omuo mukemo muuatondele linga cilingiue.

²⁷ "Viuma vioshe Tate nanjihanavio, kaha naumo uahi atantekeya Muana kuvanga lika Ishe, kaha naua naumo uahi atantekeya Ishe kuvanga lika Muana na kuli vaje Muana ahangula linga avashololueye.

²⁸ "Ijeni kuli yange yeni voshe vaje vanahono nakuambata viteli vi-akulema, kaha njikamihana kuhuima.

²⁹ Litukeni mutiyo uange, kaha lilongeseni kuli yange omuo yange njapua uakulikehesa nakulihana, kaha mukauana kuhuima mu miono yeni.

³⁰ Omuo mutiyo uange uapua ua uasi, kaha na citeli cange capua ca cehu."

12

Cihula ca ha Litangua lia Sapalalo
(Mako2:23-28; Luka6:1-5)

¹ Ha ntsimbu ije Yesu uahitile mu mehia a tiliku ha litangua lia Sapalalo. Vandongisi vendi vatsile njala, kaha vaputukile kutomona mitue ya tiliku nakulia.

² Vuno honi omo Vafaliseo vacimuene vahandekela kuli Yesu nguavo, "Tala vandongisi vove valinakulinga vije lishiko kulitavesa kulinga ha litangua lia Sapalalo."

³ Kaha Yesu uavakumbuluile nguendi, "Nkuma kumuatandele vije Ndaviti ualingile na vaje vakele navo omo vatsile njala,

⁴ muje muakovelele mu njivo ya Njambi nakulia mbolo ije ivalambuile kuli Njambi, cije kucapuile lishiko kuli ikeye ku ilia cipue vaje vakele navo, vuno honi kuvanga lika tusasendote ndi?

⁵ Cipue nkuma kumuatandele mu lishiko vati muje ha litangua lia Sapalalo tusasendote mu Njivo ya Njambi muvapokuele mashiko a ha litangua lia Sapalalo, vuno honi kuvakele na mulonga ndi?

⁶ Njimileka nguange, cuma cakama kupulakana njivo ya Njambi cino cili kuno.

⁷ Kaha nga muatantekeya vika evi vilumbununa, 'Njatonda cikeketima, keti nkombelo,' ngue kumuahisile vaje kuvesi na mulonga.

⁸ Omuo Muna Muntu ikeye Muene ua litangua lia Sapalalo."

Yesu Akanguisa Yala ua Kusekua Livoko

(Mako3:1-6; Luka6:6-11)

⁹ Yesu uahumine ku cihela cije kaha uaile nakukakovala mu njivo ya malombelo.

¹⁰ Kaha hajevene kuakele yala uakusekua livoko, kaha vehuile Yesu nguavo, "Nkuma lishiko litavesa kukanguisa ha litangua lia Sapalalo ndi?" Vatondele linga vamuvangeyeleho.

¹¹ Kaha Yesu uahandekela kuli vakevo nguendi, "Nga umo haliyeni hali na mpanga kaha auila mu cina ha litangua lia sapalalo, nkuma kumuasa kumuhumisamo ndi?"

¹² Nkuma muntu kapuile uaseho cikuma kupulakana mpanga! Nankuma, cinapande kuya ku lishiko kulinga cacili ha litangua lia Sapalalo."

¹³ Ambahoni uahandekela kuli uje yala nguendi, "Olola livoko liove." Kaha uje yala uoluele livoko liendi, kaha liolokele kupua hamo nalikuavo.

¹⁴ Vuno honi Vafaliseo vatuhukilemo kaha vakatumbile vutumbe muje vati vasa kutsihila Yesu.

Ngamba Uakuhangula kuli Njambi

¹⁵ Vuno honi Yesu uatantekeyele vutumbe vuavo, kaha uahumineko. Kaha vavengi vamukavele, kaha voshe uavakanguisile.

¹⁶ Kaha uavashikile nguendi keti vamutsimanese.

¹⁷ Eci capuile linga vilishulisise vije viahandekela kananguizi ua Njambi Isaya nguendi,

¹⁸ "Talen ngamba yange injinahangula,
uje injazanga kaha muli ikeye muono uange uvuahelela.

Njikahaka Cimbembesi cange hali ikeye,

Kaha akahandeka vusunga kuli vaje keti Vayunda.

¹⁹ Kakakalaho na vimpata cipue kulila,
kaha na umo uahi akevua lizi liendi mu vitapalo.

²⁰ Kakapokolaho lihongo liakuhenga

Kakazimiho tuhia tuje tucili nakutuhuisa vuisi.

Kuvanga noho nanehe vusunga ku kuhiana."

²¹ Kaha mu lizina liendi mukemo vakatsiliela vaje keti Vayunda.

Yesu na Mbelezembulu Muene ua Vimbembesi via Vipi

(Mako3:20-30; Luka11:14-23)

²² Ambahoni vantu vamo vanehelele Yesu yala uje ua kapuputua nakuhona kuhandeka uje uakele na lihamba kaha uamukanguisile, kaha uje yala ua kaveveve uaputukile kuhandeka nakumona.

²³ Kaha vantu voshe valikomokelele cikuma nakuhandeka nguavo, "Nkuma ou keti ikeye muna Ndaviti ndi?"

²⁴ Vuno honi omo Vafaliseo vaviuvuile vahandekela nguavo, "Kuvanga lika na nzili ya Mbelezembulu muene ua mahamba, ikeyo ou yala yali-nakuhumisa nayo mahamba."

²⁵ Yesu uatantekeyele visinganieka viavo kaha uahandekela kuli vakevo nguendi, “Vumuene vuoshe vuje vukalitepe hhakati nakuliluisa vukalipihisa, naimo yahi nganda cipue njivo vije vililuisa vikevio vavenia vikemana.

²⁶ Kaha nga satana ahumisa mukuavo satana, kaha nalitepe hhakati ikeye vavenia, kaha vatihoni vumuene vuendi vukakola?

²⁷ Kaha nga njikahumisa mahamba na nzili ya Mbelezembulu, nkuma na nzili yeya vana veni vaka ahumisa? Nankuma vakevo vakamisompa.

²⁸ Vuno honi nga njikalikuasesa Cimbembesi ua Njambi mukuhumisa mahamba, kaha vumuene vua Njambi vuneja hali yeni.

²⁹ “Cipue vatihoni muntu asa kukovela mu njivo ya yala uanzili nakuambata viuma viendi, nkuma keti tahi akuta uje yala uanzili ndi? Ambahoni apukule njivo yendi.

³⁰ “Uje kesi nange anjiluisa, uje kalipandakana nange ashandola.

³¹ Nankuma njimileka nguange, vupi vuoshe nakushaula coshe ca vantu vakavikonekela, vuno honi kushaula Cimbembesi kuvaka cikonekela.

³² Kaha uoshe uje ahandeka lizi lia kuluisa Muna Muntu vakamukonekela, Vuno honi uoshe uje ahandeka viakuluisa Cimbembesi Ukulela kuvaka mukonekela cipue mu miaka ino cipue mu miaka ije ilinakuija.

Muti na Vushuka vuao (Luka6:43-45)

³³ “Kukala na vushuka vuacili kuvanga muti uao upua ua cili, cipue kukala na muti ua upi na vushuka vuao vupua vua upi, omuo muti vakautantekeya kuvushuka vuao.

³⁴ Yeni vana vamanoka, muasa kuhandeka vati viacili omo yeni muapua mu vaka vupi? Omuo vije viashula ku mutima vikevio kanua kakahandeka.

³⁵ Yala uacili akahumisa vuima viacili vije viakatulika mu citulikilo cendi ca cili, kaha yala ua mupi akahumisa viuma via vipi mu citulikilo cendi ca cipi.

³⁶ “Njimileka nguange, ha litangua lia kusompa vantu vaka vasompa kuya ku mezi avo aje avakahandeka akuhona seho,

³⁷ omuo kuya ku mezi ove mukemo muvaka kusompa kaha kuya ku mezi ove akeo avakakuhisa nao.”

Cihula ca Cimueso (Mako8:11-12; Luka11:29-32)

³⁸ Ambahoni vamo valongisi va mezi na Vafaliseo vahandekela kuli ikeye nguavo, “Mulongisi tutonda yove linga utulingileko cimueso.”

³⁹ Vuno honi uavakumbulule nguendi, “Vantu vavupi na vupangala vantsimbu ino vakevo vatonda cimueso, vuno honi nacimo cahi cimueso civakavahana kuvanga lika cimueso ca kananguizi ua Njambi Yona.

⁴⁰ Omuo Yona uakele muzimo lia intsi ha matangua atatu na matsiki atatu, mucifua cimo vene na Muna Muntu akakala mu vukalo vua vatsi ha matangua atatu na matsiki atatu.

⁴¹ Vantu vaku Ninive vakemana ha litangua lia kusompa na vantu vantsimbu ino kaha vaka vahisa, omuo vatengulukile ha kuambulula ca Yona, kaha taleni cuma cakama cikuma kupulakana Yona cino cili kuno.

⁴² Muene ua mpuevo uaku Shemba akemana ha litangua lia kusompa na vantu vantsimbu ino nakuvahisa, omuo uahumine kuntongo ya cifuti kuija nakuvuilila mana a Solomoni, kaha taleni umo uakama kupulakana Solomoni uno hali kuno.

Kuhiluka kua Cimbembesi Cacipi
(Luka11:24-26)

⁴³ “Omo cimbembesi cacipi cihuma muli muntu, cikahiti mu vindinda kutonda kuakuhimina, vuno honi kucekuaana cipue hamo.

⁴⁴ Ambahoni cihandeka nguaco ‘Njihilukila ku njivo yange kuje njahumine.’ Kaha omo cihiluka ciuana ije njivo mupulungua, muakukomba nakuivuahesa muje muinapande kukelamo.

⁴⁵ Ambahoni ciya nakuambata vikuavo vimbembesi vitanu na vivali vije via vipi cikuma kupulakana cikeco, kaha vakovelamo nakukakalamo, kaha cifua ca uje yala ca mamanusulo cikapua cacipi kupulakana caha kulivanga. Omu mukemo vene mu vakafua na vantu vantsimbu ino.”

Vaina ya Yesu na Vamunaina
(Mako3:31-35; Luka8:19-21)

⁴⁶ Tele Yesu acili nakuhandeka ku vantu, taleni vaina na vamunaina vemanene hambanza, vatondele linga vahandeka nendi.

⁴⁷ Kaha umo ua vantu vaje kuje uamulekele nguendi, “Tala, vanoko na vamuanoko vanemana hambanza vatonda kuhandeka nove.”

⁴⁸ Vuno honi Yesu uamukumbuluile nguendi, “Iya vanana, kaha iya naua vamuanetu?”

⁴⁹ Kaha uoluele livoko liendi kuli vandongisi vendi nakuhandeka nguendi, “Ava vakevo vanana na vamuanetu!”

⁵⁰ Omuo uoshe uje alinga cizango ca Tate ua muilu ikeye napu muanetu ua yala na uampuevo na nana.”

13

Cisimo ca Muka Kukuva
(Mako4:1-9; Luka8:4-8)

¹ Ha Litangua lije vene, Yesu uahumine mu njivo kaha uaile nakukatumama ku mukulo ua cisali.

² Kaha vivunga viakama viezile kuli ikeye nakumuzengeleka, nankuma uakovelele mu vuato nakukatamama, kaha civunga coshe cemanene ha ntunda.

³ Kaha uavalekele viuma viavingi mukulikuasesa visimo nguendi, “Muka kukuva uaile nakukuva.

⁴ Kaha omo uakele nakukuva vimbuto vimo viauililile ku mukulo ua ngila, kaha tuzila vezile nakuvilia.

⁵ Kaha vimbuto vikuavo viauililile ha mavue aje kuhakele livu lialingi, kaha hajevene viasokele, omuo kuhakele livu lia lingi.

⁶ Vuno honi omo litangua liatuhukile kaha vije vimbuto viajuuamene, kaha omuo mizi yavio kuyakovelele cikuma mu livu, kaha vije vimbuto viomine.

⁷ Vimbuto vikuavo viauililile hhakati ka mingonga, kaha ije mingonga yakolele nakuvitua.

⁸ Vimbuto vikuavo viauililile ha mavu acili kaha viemine muacili, vimo vimbuto vihita, vimo viemine vimbuto makumi atanu na limo, kaha vikuavo naua viemine vimbuto makumi atatu kupulakana vije vivakunine.

⁹ Uoshe uje hali na matuitui ovue.”

Vutumbe vua Visimo
(Mako4:10-12; Luka8:9-10)

¹⁰ Ambahoni vandongisi vezile kuli Yesu nakuhandeka nguavo, “Vika honi ukahandekela navo mu visimo?”

11 Kaha uavakumbuluile nguendi, “Yeni vanamihana kutantekeya vushueke vua vumuene vua muilu, vuno honi kuli vakevo kuvavahanene-vuo.

12 Omuo uoshe uje alinavio vakamuvuezelako vikuavo naua, kaha akakala na viavingi, vuno honi uje kesi cipue nacimo, cipue cije cali naco vakamuniekaco.

13 Eci cikeco canehesa linga njihandeki navo mu visimo omuo vakevo vamaona, vuno honi kuvamonesesa, kaha vovua, vuno honi kuvevuisisa.

14 Cilivene kuli vakevo vinalishulisisa vije viahandekele kananguizi ua Njambi Isaya nguendi,

“ ‘Cilivene mukevua vuno honi kumukevuisisa,
kaha cilivene mukamona vuno honi kumukamonesesa.

15 Omuo mitima yava vantu inahono mana, kaha na matuitui avo anaziki, kaha na mesho avo vana azimi, keti ngoconi mesho avo akamona kaha na matuitui avo akevua, kaha na mitima yavo ikevuisisa, nakutengulukila kuli yange linga njivakanguise.’

16 “Vuno honi anakuisuliua mesho eni omuo amona, na matuitui eni, omuo ovua.

17 Muavusunga njihandeka kuli yeni nguange, tunanguizi va Njambi va Njambi vavengi na vantu va vusunga, vatondele kumona cikuma evi vimuli nakumona, vuno honi kuvavimuene, nakuivua vije vimulinakuivua, vuno honi kuvaviuvuile.

Yesu Alumbununa Cisimo ca Muka Kukuva (Mako4:13-20; Luka8:11-15)

18 “Ambahoni ivuilileni cisimo ca uje muka kukuva.

19 Omuo uoshe uje ovua lizi lia vumuene kaha kaliuvuisisa, kaha uje muka vupi eja nakuambata vije vivanakuvu mu mutima uendi, eyi ikeyo mbuto ije ivakuvile ku mukulo uangila.

20 Kaha mbuto ije ivakuvile ha mavue, ou ikeye uje ovua lizi kaha hajevene alitambula nanzolela,

21 vuno honi kuliesi na mizi muli ikeye, kaha likala lika muka ntsimbu kandende. Kaha omo tuyando cipue mapakeso vija omuo ya lizi, kaha hajevene kalikavangeya.

22 Kaha vimbutu vije vivakuvile ha mingonga, ou ikeye uje ovua lizi, vuno honi omo ha kuzanga via ha mavu nakuzanga vufuko vua mavu kaha vikatva lize lizi, kaha kulikemi vushuka.

23 Kaha ije mbuto ivakuvile ha mavu acili, ou ikeye uje ovua lizi nakulivuisisa, ikeye cilivene akema vushuka vavuingi vuakupua vimo vimbutu vihita, vimo, vikuavo viemine makumi atanu na limo, kaha vikuavo naua viemine makumi atatu kupulakana vije vivakuvile.”

Cisimo ca Shaku

24 Kaha Yesu uavatelele cisimo cikuavo naua nguendi, “Vumuene vua muilu tuhasa kuvuesekesa ngue yala uje uakuvile mbuto yacili mu lihia liendi,

25 vuno honi tele vantu vanakosa, citozi cendi uezile nakukuva shaku muje mu lihia lia tiliku, kaha uaille.

26 Omo ije tiliku yakolele nakuhaka vinona ambahoni naikeyo ije shaku yasholokele.

27 Kaha vaje vangamba vendi vezile kuli ikeye nakumuleka nguavo, ‘Muene nkuma kuuakunine lika mbuto yacili mu lihia liove ndi? Kaha cineja vati honi linga mukale naua na shaku?’

²⁸ Kaha uahandekela kuli vakevo nguendi, 'Kuli citozi uje nalingi eci.' Kaha vaje vangamba vendi vahandekela kuli ikeye nguavo, 'Nkuma utonda linga tuye tukaitukulemo ndi?'

²⁹ Vuno honi uavakumbuluile nguendi, 'Kuahi!' Omuo muje mu mukaitukulamo ije shaku hamo mukatukuila kumo na tiliku.

³⁰ Vieceleli vioseha linga vikole kuvanga noho ha ntsimbu yakuteja, kaha ha ntsimbu yakuteja njikaleka vaka kuteja nguange, 'Tukulenimo tahi shaku muikute mikuta, kaha itsimikeni, vuno honi kungululeni tiliku nakuihaka mu cishete cange.'

Cisimo ca Mbuto ya Musalata

(Mako4:30-32; Luka13:18-19)

³¹ Kaha Yesu uavatelele cisimo cikuavo naua nguendi, "Vumuene vua muilu vunapu ngue nona ya mbuto ya musalata ije muntu uambatele nakukuna mu lihia liendi.

³² Yapua yaindele cikuma ku vimbuto vioseha, vuno honi omo ikola ikapu ciputa cakama na kukola kupua muti, nankuma tuzila va muilu vakeja nakutungila mashua ha mitango yauo."

Cisimo ca Cimbaluila

(Luka13:20-21)

³³ Kaha Yesu uavatelele naua cisimo cikuavo nguendi, "Vumuene vua muilu vuapua ngue cimbaluila cije mpuevo uambatele nakucishingasana na ha lilonga haje hakele vinganja vitatu via vunga vua tiliku kuvanga noho vioseha viafutunukile."

Vika Yesu Akalikuasesela Visimo

(Mako4:33-34)

³⁴ Vioseha evi Yesu uavihandekela ku vivunga mu visimo, cilivene nacimo cahi cahandekela kuli vakevo kuakuhona kulikuasesa cisimo.

³⁵ Eci citozi uje uaikuninemo ikeye napu Satana. Kaha kuteja cikoko kuhua ca mavu, kaha vaka kuteja vakevo tungelo.

³⁶ Njikafukula kanua kange mu visimo.

Njikahande vioseha vije vialishueka hume ha luvula lua mavu."

Yesu Alumbununa Cisimo ca Shaku

³⁶ Ambahoni Yesu uasezele civunga nakuya mu njivo kaha vandongisi vendi vezile kuli ikeye nakuhandeka nguavo, "Tulumbunuine cisimo ca shaku ya mu lihia."

³⁷ Kaha uavakumbuluile nguendi, "Uoshe uje akuna mbuto yacili napu Muna Muntu.

³⁸ Lihia likelio mavu, kaha mbuto ije yacili ilumbununa vana va vumuene, kaha naije shaku inapu vana va muka vupi,

³⁹ kaha uje citozi uje uaikuninemo ikeye napu Satana. Kaha kuteja cikoko kuhua ca mavu, kaha vaka kuteja vakevo tungelo.

⁴⁰ Ngue mujevene muvaka kungungulula shaku nakuitsimika na tuhia, mukemove mu cikafua naku mamananuulilo a mavu.

⁴¹ Muna Muntu akatuma tungelo vendi, kaha vaka kunguluila hamo vije vikanehesa vupi navaje vakalingi vupi mu vumuene vuendi,

⁴² nakuvombila mu litende lia tuhia, kuje vantu vaka lila nakulishu-manga ku mazo avo.

⁴³ Ambahoni vaka vusunga vakaviakuma ngue litangua mu vumuene vua Ishavo, uoshe uje hali na matuitui ovue.

Cisimo ca Vufuko Vuakushueka

44 “Vumuene vua muilu vunapu ngue vufuko vuakushueka mu lihia, vuje omo muntu avuuna kaha avushueka naua ambahoni hakuvuahelela cendi aya nakukalandesa vioshe vije alinavio kaha alanda lije lihia.

Cisimo ca Vusanga vua Seho

45 “Naua vumuene vua muilu vunapu ngue muntu uje muka kulandesa uje atonda vusanga vuacili,

46 uje omo auana vusanga vumo vua seho yakama, kaha aya nakukalandesa vioshe vije alinavio kaha akavulanda.

Cisimo ca Vuanda vua Kuta Vatsi

47 “Naua vumuene vua muilu vunapu ngue vuanda vua kuta vatsi vuje vuvanate mu cisali kaha vutsiha muyati uoshe ua vatsi,

48 omo vuashulile vamala vavukokelele ha ntunda kaha vatumamene nakuhangulamo vatsi vacili nakuvahaka mu mitonga yavo vuno honi vombilile vaje vakupihia.

49 Nankuma omu mukemo mucikafua naku mamanusuilo a mavu. Tungelo vakeja nakutepesa vaka vupi ku vaka vusunga,

50 nakuvombila mu litende lia tuhia, kuje vantu vakalila nakulishumanga ku mazo avo.

Vusunga vua Vuha novu vua Laja

51 “Yesu uavehuile nguendi, nkuma munoviuvuisisa viuma vioshe evi ndi?”

Kaha vamukumbuluile nguavo, “Eyo.”

52 Kaha uahandekela kuli vakevo nguendi, “Nankuma uoshe mulongisi ua mashiko uje ivalongesele via vumuene vua muilu napu ngue uje vavenia njivo, uje ahumisa vufuko vuendi vua laja novu vua vuha mu citulikilo cendi.”

Yesu Vamuviana ku Nazaleta

(Mako6:1-6; Luka4:16-30)

53 Kaha omo Yesu uamanusuile kuta vije visimo, uahumineko kuje,

54 nakuya ku cifuti cendi nakukavalongesa mu njivo yavo ya malombelo, kaha vaje voshe vamuvuile vali komokelele cikuma nakuhandeka nguavo, “Nkuma kuli ou yala kuanauana mana aua na vikomoueso evi?”

55 Nkuma ou keti ikeye muna uje muka kushonga ndi? Nkuma vaina keti Maliya? Nkuma vamunaina keti Tiango, na Yosefa, na Simoni na Yunda ndi?

56 Nkuma vashongo vendi voshe va vampuevo keti ava tuli hamo navo ndi? Nkuma kuli honi ou yala nauana vioshe evi?”

57 Kaha vamuvianene.

Vuno honi Yesu uahandekela kuli vakevo nguendi, “Kananguizi ua Njambi kuvekumusingimika mu cifuti cendi cipue muimbo liendi kuvanga lika kuka.”

58 Kaha kalingilileko vikomoueso kuje omuo ya kuhona kutsiliela cavo.

14

Kutsa ca Iuano Muka Kumbuitika

(Mako6:14-29; Luka9:7-9)

1 Ha ntsimbu ije muene Helonde omo uevuile lutsimo lua Yesu,

2 kaha uahandekela kuli vangamba vendi nguendi, “Ou ikeye Iuano muka kumbuitika, vanamusangula ku vatsi, mukemo evi vinzili vili nakupanga muli ikeye.”

³ Omuo Helonde uakuatele Iuano nakumukuta nakumuhaka mu kamenga, omuo ya mulonga ua Helondiya mpuevo ya munaina Filipu,

⁴ omuo Iuano uahandekele kuli ikeye nguendi, “Kuya ku lishiko yove kuupandeke kumuambata.”

⁵ Cipue vene uatondele kumutsiha, vuno honi kamutshile uateuele vantu, omuo vamuivule nguavo uapuile kananguizi ua Njambi.

⁶ Omo litangua lia kuanuka kusemuka ca Helonde liahelele, muna Helondiya uampuevo uakinine hhakati ka civunga ca vantu kaha uavuahelele Helonde,

⁷ kaha uamukulahesele nakulisinga kumuhana vioshe viatondele kulomba.

⁸ Omuo vaina vamusindiye, kaha ualombe nguendi, “Njihane mutue ua Iuano muka kumbuitika ha lilonga.”

⁹ Vuno honi muene uovuile vusiua, vuno honi omuo hakulisinga cendi na hali vangezi vendi, kaha uashikile linga vamuhanee,

¹⁰ uatumine kukateta mutue ua Iuano mu kamenga.

¹¹ Kaha mutue uendi vaunehle ha lilonga nakuuhana kuli muana mpuevo, kaha uauhanene vaina.

¹² Kaha vandongisi va Iuano vezile nakuambata muvila uendi nakuutsinda, kaha vaile nakulekesa Yesu.

Yesu Alisa Vamala Vakupua Makulukazi Atanu (5, 0 0 0)

(Mako6:30-44; Luka9:10-17; Iuano6:1-14)

¹³ Honi omo Yesu uovuile eci, uahumine kuje mu vuato kaha uaile kumutambela ua likaliendi. Vuno honi omo vivunga vievuile eci, viamukavele ha mavu kuhuma ku vimbonge.

¹⁴ Omuo Yesu uaile ha ntunda uamuene civunga cakama, kaha uavovuulile ngozi, kaha uavakangisile ku mishongo yavo.

¹⁵ Omo capuile cinguezi, vandongisi va Yesu vezile kuli ikeye nakuhandeka nguavo, “Cino cinapu cihela ca kuholoka, kaha litangua honi liatoko, kaha leka vivunga linga vaye ku membo linga vakalilandele viakulia vakevo vavenia.”

¹⁶ Kaha Yesu uahandekele nguendi, “Kuvapandeke kuya, vahaneni vimo valie.”

¹⁷ Kaha vahandekele kuli ikeye nguavo, “Tuli lika na vimbolo vitanu na vatsi vavali.”

¹⁸ Kaha Yesu uahandekele nguendi, “Vineheni kuno kuli yange.”

¹⁹ Kaha uashikile vivunga linga vatumame ha muila, kaha uambatele vimbolo vitanu na vatsi vavali kaha uatalele kuilu, kaha uavikuile, nakutavuoza vimbolo nakuvihana kuli vandongisi vendi, kaha vandongisi vendi vavihanene ku vivunga.

²⁰ Kaha voshe valile nakukuta. Kaha vakunguilile mitonga ya vimbazuvuila ya kushula ya kupua likumi na ivali.

²¹ Kaha vaje valile vapuile ngue makulukazi atanu a vamala, kuhumisako vampuevo na vanike.

Yesu enda ha Mema

(Mako6:45-52; Iuano6:15-21)

²² Ambahoni Yesu ualekele vandongisi vendi linga vakovele mu vuato vaye kulutue luendi musinia tele ikeye acili na kuleka vivunga linga vaye.

²³ Kaha hanima ya kuleka vivunga linga vaye, uaille helu lia munkinda lika liendi mukulombela. Uakele kuje likaliendi noho cinguezi,

²⁴ vuno honi ha ntsimbu ije vuato vuakele hhakati ka cisali kaha vuakele nakulininganga na mankimba omuo mpunzi yakele nakuvuluisa.

²⁵ Kaha ku vandemba Yesu uezile kuli vakevo, oku alinakuenda helu lia cisali.

²⁶ Vuno honi omo vandongisi vendi vamumuene hali nakuenda ha cisali, vovuile liova cikuma kaha vahandeketele nguavo, “Ndumba ya muntu!” Kaha vatambekele naliova.

²⁷ Kaha hajevene Yesu uahandeketele kuli vakevo nguendi, “Simpeni keti muteue yange vene.”

²⁸ Kaha Petulu uahandeketele kuli ikeye nguendi, “Muene, nga yove, njileke njije kuli yove nange njende ha mema.”

²⁹ Kaha Yesu uahandeketele nguendi, “Ija.” Kaha Petulu uahumine mu vuato nakuenda ha mema kuya kuli Yesu,

³⁰ vuno honi omo uamuene mpunzi uateuele, kaha uaputukile kuvombela kaha uatambekele nguendi, “Muene njovole.”

³¹ Hajevene Yesu uoluele livoko liendi, nakumukuata kaha uahandeketele nguendi, “Muntu ua lutsilielo lualundende, vika ku utsiliela?”

³² Kaha omo vakovelele mu vuato mpunzi yahuile.

³³ Kaha vaje vakele mu vuato vamulemesele nguavo, “Muavusunga u Muna Njambi.”

Yesu Akanguisa Vaka Kuvavala mu Ngenesaleta

(Mako6:53-56)

³⁴ Kaha omo Yesu na vandongisi vendi vajavukilile musinia, vezile ku cihela ca Ngenesaleta.

³⁵ Kaha omo vantu vakumutambela uje vamutantekeyele, vatumine voshe vaku cihela cije nakumunehela vaka kuvavala voshe,

³⁶ Vamulombele linga vakuate cipue ku mukunduilo ua kazaku kendi, kaha voshe vaje vakuateleko vakangukile.

15

Vilongesa via Vakuluntu

(Mako7:1-13)

¹ Ambahoni Vafaliseo vamo na valongisi va lishiko vezile kuli Yesu kuhuminina ku Yelusalema kaha vahandeketele nguavo,

² “Vikahoni vandongisi vove kuvekuononoka cisemua ca vakuluntu? Omuo kuvekutana ku mavoko avo omo valia.”

³ Kaha Yesu uavakumbuluile nguendi, “Nkuma neni kumuekuononoka lishiko lia Njambi omuo ya cisemua ceni ndi?”

⁴ Omuo Njambi uashikile nguendi, ‘Singimika isho na noko,’ kaha ‘uoshe uje ashaula ishe cipue ina, cilivene atse.’

⁵ Vuno honi yeni mukahandeka ngueni nga uoshe uje aleka ishe cipue ina nguendi, ‘Vije vimunapandele kuhana kuli yange vanavihana Njambi,’

⁶ kaha muntu ou kononokele ishe. Nankuma, omuo ya cisemua ceni, munaseze lizi lia Njambi.

⁷ Yeni vaka civembulu! Nkuma Isaya uahandeketele via vusunga hali yeni, omuo uahandeketele vunanguizi nguendi,

⁸ “‘Ava vantu vanjisingimika na tunua tuavo, vuno honi mitima yavo ili kulahako nange.

⁹ Vakanjilemesa lika muangoco, vakalongesa mashiko a vantu lika!’”

Viuma vije vilingisa Muntu kupua Uakuhona kulela

(Mako7:14-23)

¹⁰ Kaha Yesu uasanene vantu linga veje kuli ikeye kaha uavalekele nguendi, “Ivueni kaha ivuisiseni.

¹¹ Keti coshe cije cikakovela mu kanua ka muntu cikalingisa muntu linga keti apue uakulela, vuno honi vije vikahumu mu kanua ka muntu vikevio vikalingisa muntu linga apue uakuhona kulela.”

¹² Ambahoni vandongisi vezile kuli Yesu nakuhandeka nguavo, “Nkuma uatantekeya nguove Vafaliseo vapihilile ku mitima omo vevuile mezi aua ndi?”

¹³ Kaha Yesu uavakumbuluile nguendi, “Muti uoshe uje Tate ua muilu kakunine vakau tukula.

¹⁴ Veceleni lika, vanapu vantuamena va tupuputua, kaha nga kapuputua atuamenena kapuputua mukuavo, voshe vakauila mu cina.”

¹⁵ Vuno honi Petulu uahandekela kuli Yesu nguendi, “Tulumbunuine eci cisimo.”

¹⁶ Kaha uahandekela kuli ikeye nguendi, “Nkuma nove naua hanga kanda ucinongonone eci ndi?

¹⁷ Nkuma ku umono nguove coshe cije cikovela mu kanua cakahiti muzimo nakuhitilila ndi?

¹⁸ Vuno honi vije vioshe vikahumu mu kanua vikahumu ku mutima, kaha evi vikevio vikalingisa muntu kupua uakuhona kulela.

¹⁹ Omuo ku mutima kukeko kukahuminina visinganieka via vipi via kutsiha, vupangala, vukoyi, kuiva, vukaleho vua makuli, na vungumba.

²⁰ Evi vikevio vikalingisa muntu linga apue uakuhona kulela, vuno honi kulia cakuhona kutana ku mavoko kucekulingisa muntu linga apue uakuhona kulela.”

Lutsilielo lua Mpuevo uaku Kanana (Mako7:24-30)

²¹ Kaha Yesu uahumine kuje nakuya ku cihela ca Tile na ku Sindone.

²² Kaha taleni, mpuevo ua ku Kanana uje uahumine ku cihela kuje vene ualilile nguendi, “Njivuileko cikeketima Muene, Muna Ndaviti, munange uampuevo ali na lihamba lia lipi cikuma.”

²³ Vuno honi Yesu kamukumbuluile cipue lizi limo, kaha vandongisi vendi vezile nakumulambelega nguavo, “Mulekese linga aye omuo hali nakutupangela kalua.”

²⁴ Kaha Yesu uavakumbuluile nguendi, “Vanjitumine lika ku vampanga vakuzimbala vaku Isaleli.”

²⁵ Vuno honi uje mpuevo uezile nakutsikama kuli ikeye nguendi, “Muene njikuase.”

²⁶ Kaha Yesu uamukumbuluile nguendi, “Keti cacili kumbila mbolo ya vanike ku tutali.”

²⁷ Kaha uje mpuevo uamukumbuluile nguendi, “Eyo Muene, vuno honi cipue vene tutali vakali vishaniu vije vikau ku mesa ya muene uavo.”

²⁸ Kaha Yesu uamukumbuluile nguendi, “Nanaa ove mpuevo lutsilielo liove luakama cikuma. Cilingiue kuya mu utondela.” Kaha hajevene munendi uampuevo uakangukile.

Yesu Akangula Vantu vavengi

²⁹ Kaha Yesu uahumine kuje kaha uahitile kuyehi na cisali ca Ngallileya. Kaha uaille kumukulo ua munkinda nakukatuma.

³⁰ Kaha civunga cakama cezile kuli ikeye, vamunehelele vilema, visu-alonda, tupuputua na tuveveve, na vakuavo veka naua, kaha vavanehele ku viliato viendi, kaha uavakangusile.

³¹ Nankuma cije civunga calikomokelele cikuma, omo vamuene vaje tuveveve vahandeka, na visualonda vanapu vamutuntu, na vilema venda, na tupuputua vamona, kaha vahanene vumpau kuli Njambi ua Isaleli.

*Yesu Alisa Vantu Makulukazi Auana
(Mako8:1-10)*

³² Ambahoni Yesu uasanene vandongisi vendi nakuvaleka nguendi, “Njilina kuivula ngozi eci civunga, omuo vanakala nange ha matangua atatu, kaha kuvalileho cipue cimo, kaha kunjitondo linga njiveceli vaye na njala, hamo valezumukila mu ngila.”

³³ Kaha vandongisi vahandekela kuli ikeye nguavo, “Kuli honi tuasa kuuana mbolo muho muho ndinda ya kulisa civunga cakama eci?”

³⁴ Kaha Yesu uahandekela kuli vakevo nguendi, “Muli na mikasha ingahi?” Vamukumbuluile nguavo, “Itanu na ivali, na vatsi vavandende.”

³⁵ Kaha Yesu uashikile cije civunga linga vatumame ha mavu,

³⁶ kaha uambatele ije mikasha itanu na ivali na vatsi, kaha hanima yakuhana citsantsela, uavipazuile nakuvihana kuli vandongisi, kaha vandongisi vavihanene kuli vije vivunga.

³⁷ Kaha voshe valile nakukuta. Kaha vandongisi vakunguilile mitonga ya kushula ya kupua itanu na ivali ya vije vimbazuvula viasaleleho.

³⁸ Kaha vaje valile vapuile makulukazi auana a vamala (4, 0 0 0), kuakuhona vampevo na vanike.

³⁹ Kaha uecelele cije civunga linga vaye, kaha uakovelele mu vuato nakuya ku cihela ca Mangandane.

16

*Vafaliseo Valomba Cikomoueso
(Mako8:11-13; Luka12:54-56)*

¹ Kaha Vafaliseo na Vasanduki vezile kuli Yesu nakumueseka, vamuihuile linga avamuese cimueso cakuhuminina kuilu.

² Kaha uavakumbuluile nguendi, “Omo nga cinguezi, mukahandeka nguendi, ‘Kukaca vuino, omuo lilu livenga.’”

³ Kaha kucimene muhandeka nguendi, ‘Lelo kukakala mashuela, omuo lilu livenga na kuteuesa.’ Muatantekeya kulumbununa cifua ca lilu, vuno honi kumuhasa kulumbununa vimueso via vi ntsimbu.

⁴ Vantu vantsimbu ino va vupi na vupangala vatonda cimueso, vuno honi kukuesi cimueso civakavahana kuvanga lika cimueso ca Yona.” kaha uavasezele nakuya.

*Cimbaluila ca Vafaliseo na Vasanduki
(Mako8:14-21)*

⁵ Omo vandongisi vahetele musinia, vasuvile kuambata mbolo.

⁶ Kaha Yesu uahandekela kuli vakevo nguendi, “Linuingeni kaha zangameni ku cimbaluila ca Vafaliseo na Vasanduki.”

⁷ Kaha vakele nakuhandeka hhakati kavo vavenia nguavo, “Kutuezile na mbolo.”

⁸ Kaha Yesu, hakutantekeya eci, uahandekela nguendi, “Yeni valutsilielo lualundende, vika muli nakuhandeka hhakati keni vavenia nguendi kumuesi na mbolo?”

⁹ Nkuma kanda muvuisise ndi? Nkuma kumuanuka mikasha itanu ya vimbolo, ya vantu makulukazi atanu, kaha mitonga ingahi muakunguluile?

¹⁰ Cipue mikasha itanu na ivali ya vimbolo ya vantu makulukazi auana, nkuma mitonga ingahi muakunguluile?

11 Nkuma vika kumuvuisisa ngueni kunjahandekela neni via mbolo? Zangameni ku cimbaluila ca Vafaliseo na Vasanduki."

12 Kaha vevuisisile nguavo nkuma kavalekele kuzangama ku cimbaluila cakupangesa mbolo, vuno honi ha vilongesa via Vafaliseo na Vasanduki.

Petulu Atava ngeci Yesu Ikeye Kilistu Uakuvuavesa

(Mako8:27-30; Luka9:18-21)

13 Omo Yesu uahetele ku mbonge ya Sesaliya Filipu, kaha uehuile vandongisi vendi nguendi, "Vantu vahandeka nguavo Muna Muntu ikeye iya?"

14 Vamukumbuluile nguavo, "Vamo nguavo Iuano muka kumbuitika, vamo nguavo Eliya, vamo nguavo Njelemya cipue umo ua tunanguizi va Njambi."

15 Kaha Yesu uahandekela kuli vakevo nguendi, "Vuno honi yeni ngueni Yange iya?"

16 Simoni Petulu uamukumbuluile nguendi, "Yove Kilistu, Muna Njambi uakuyoya."

17 Yesu uamukumbuluile nguendi, "Uakuisuliua Simoni muna Yona! Omuo keti vuntu vuasholuele evi kuli yove, vuno honi Tate uje hali muilu.

18 Kaha njikuleka nguange yove Petulu, ha livue eli njikatunga cikungulukilo cange, kaha nzili ya kutsa ku ikacihiana*.

19 Njikakuhana masapi a vumuene vua muilu, kaha coshe cije civakavindika hano hamavu na muilu vakacivindika, kaha coshe cije civakatavesa hano ha mavu na muilu vakacitavesa."

20 Ambahoni uashikile vandongisi vendi linga keti valekeko muntu umo nguavo ikeye Kilistu.

Yesu Ahandeka ha Tuyando tuendi na Kutsa cendi

(Mako8:31; 9:1; Luka9:22-27)

21 Kuhuma ha ntsimbu ije Yesu uputukile kulumbunuina vandongisi vendi nguendi, njapande kuya ku Yelusalema naku kayanda viuma viavingi kuli vakuluntu na kuli vakuluntu vatusasendote na kuli valongisi va mashiko, kaha vakanjitsiha, vuno honi hanima ya matangua atatu njikasanguka.

22 Kaha Petulu uamuambatele nakumutuala kualikaliavo na kuputuka kumutenukila nguendi, "Njambi vindika, Muene! Eci kucikalingiua kuli yove!"

23 Vuno honi Yesu uatengulukile nakuhandeka kuli Petulu nguendi, "Huma kuli yange yove Satana! Yove unapu citsutsukiso kuli yange, omuo kuukundama kuli Njambi, vuno honi ku vantu."

24 Ambahoni Yesu ualekele vandongisi vendi nguendi, "Nga uoshe uje atonda kunjikava, napande kuliviana ikeye vavenia nakuambata cilindakano cendi na kunjikava.

25 Omuo uoshe uje atonda kuniunga muono uendi akauzimbalesa, vuno honi uoshe uje azimbalesa muono vuendi omo yange akauuana.

26 Kaha cikakuasa vika kuli muntu, nga alikunguilila viuma via ha mavu vioshe nakuzimbalesa muono uendi? Kaha vika muntu viakahana linga ahingisemo muono uendi?

27 Omuo Muna Muntu akeja na tungelo vendi mu vumpau vua Ishe, kaha akafueta muntu na muntu uoshe kuya ku vilinga viendi.

* 16:18 Mu Cingelengu vanaisonaka nguavo Hendisi, kulumbununa Cikolo ca vaka kutsa.

28 Muavusunga njimileka nguange kuli vamo hano vaje ku vakatsi kuvanga noho vanamono Muna muntu neja mu vumuene vuendi.”

17

Yesu Alimpuka

(Mako9:2-13; Luka9:28-36)

1 Hanima ya matangua atanu na limo Yesu uambatele Petulu na Tiango na munaina Iuano, kaha vahile hamo ku munkinda ualaha kua likaliavo lika.

2 Kaha Yesu ualihimpuile ha mesho avo, kaha na cihanga cendi caviakumine ngue litangua kaha na vuzalo vuendi vuatokele too ngue ceke.

3 Kaha taleni, ambahoni kuasholokele Mosesa na Eliya vaje vakele na kuhandeka nendi.

4 Kaha Petulu uahandেকে kuli Yesu nguendi, “Muene, cacili yetu kukala kuno, nga utonda njikatunga vimalaka vitatu kuno, imo yove kaha ikuavo ya Mosesa na ikuavo ya Eliya.”

5 Tele acili nakuhandeka, kaha hajevene lishelua liakuviakuma liavafuikile, kaha muje mulishelua muahumine lizi ngualio, “Ou ikeye munange injazanga, uje muli ikeye njivuahelela, muivuilileni.”

6 Omo vandongisi vevuile evi, vavulumanene ha mavu, kaha vovuile liova cikuma.

7 Vuno honi Yesu uezile nakuvakuata kaha uahandেকে nguendi, “Katukeni keti muteue.”

8 Kaha omo vemukile mesho avo, kuvamuene ueka vuno honi Yesu lika.

9 Kaha omo vasikumukile kuhuma ha munkinda, Yesu uavashikile nguendi, “Keti valekeko muntu hali uoshe cije cimona, kuvanga noho Muna Muntu vanamusangula ku vatsi.”

10 Vandongisi vamuhuile nguavo, “Nkuma vika valongisi va lishiko vahandeka nguavo Eliya eje tahi ikeye?”

11 Yesu uavakumbuluile nguendi, “Eliya eja nakuhiluisila naua viuma viose,

12 vuno honi njimileka nguange Eliya neja laja, kaha kuvamutantekeyele, vuno honi vamulingile muoshe muje muvatondelelemo, omu mukemo vene na Muna Muntu vakamuyandesela.”

13 Ambahoni vandongisi vevuisisile nguavo alinakuhandeka kuli vakevo via Iuano muka kumbuitika.

Yesu Akanguisa Kanike ka Yala uje uakele na Lihamba

(Mako9:14-29; Luka9:37-43a)

14 Kaha omo vezile ku civunga, yala umo uezile kuli Yesu nakutsikama nakuhandeka nguendi,

15 “Muene ivuila cikeketima munange, omuo hali na mushongo uakushinia kaha ukamuyandesela cikuma, omuo ha vintsimbu viavingi akauila mu tuhia na mu mema.

16 Kaha njamunehale kuli vandongisi vove, vuno honi kuvasele kumukanguisa.”

17 Kaha Yesu uamukumbuluile nguendi, “Yeni vantu va ntsimbu ino vakuhona lutsilielo na vupi, njikakala neni lungahi? Njikamileka lungahi? Muneheni kuno kuli yange.”

18 Kaha Yesu uatenukilile lije lihamba, kaha lije lihamba liahumine muli ikeye, kaha hajevene uje kanike uakangukile.

19 Ambahoni vandongisi vezile kuli Yesu muvushueke nakuhandeka nguavo, “Vika honi yetu kutuasele kulihumisa?”

²⁰ Kaha uahandekela kuli vakevo nguendi, “Omuo ya lutsilielo lueni lualundende. Muavusunga njimileka nguange nga muli na lutsilielo ngue nona ya mbuto ya musalata, ngue muasa kuhandeka ku munkinda ou ngueni, ‘Huma kuno ya kuje kaha ukaya, kaha na cimo cahi cimuka-honoua.’”

²¹ Vuno honi lihamba liangacije kuliekuhuma ngoco kuvanga na lilombelo na kuliumina kulia.

Yesu Ahandeka naua ha Kutsa cendi

(Mako9:30-32; Luka9:43b-45)

²² Omo valikunguluile hamo mu Ngalileya, Yesu uahandekela kuli vakevo nguendi, “Muna Muntu vanapande kumuhana ku mavoko a vantu,

²³ vaka mutsihia, kaha vakamusangula munima ya matangua atatu.”

Kaha vandongisi vevuile vusiua cikuma.

Kufueta Lisimu lia mu Njivo ya Njambi

²⁴ Omo Yesu na vandongisi vendi vezile ku Kapenauma, kaha vaka kutambula lisimu lia mu njivo ya Njambi vaile kuli Petulu nakuhandeka nguavo, “Nkuma mulongisi ueni kekufueta lisimo ndi?”

²⁵ Kaha Petulu uavakumbuluile nguendi, “Eyo.”

Kaha omo Petulu uakovelele mu njivo, Yesu uahandekela kuli ikeye hakulivanga nguendi, “Simoni vika usinganieka? Nkuma honi kuli veyi vimiene va hano ha mavu vakatambula lisimu? Kuli vana vavo indi kuveka?”

²⁶ Kaha omo Petulu uakumbuluile nguendi, “Kuveka,” kaha Yesu uahandekela kuli ikeye nguendi, “Nankuma vana vanapatuka.

²⁷ Nankuma keti tuvapihisile, ya lika ku cisali ukalovele, kaha ukambate intsi uje uamaputukilo kaha omo ukafukula mukana kendi ukauanamo mbongo ya muuaya uaya, kaha yakayambate nakuvahanayo, linga ikapue lisimu liange nove.”

18

Iya Uakama Cikuma?

(Mako9:33-37; Luka9:46-48)

¹ Ha ntsimbu ije vandongisi vezile kuli Yesu nakuhandeka nguavo, “Iya uakama cikuma mu vumuene vua mulu?”

² Kaha Yesu uasanene kanike nakumuhaka hhakati kavo,

³ kaha uahandekela nguendi, “Muavusunga njihandeka kuli yeni nguange, kuvanga mutenguluke kupua ngue ava vanike, keti ngoconi kumukakovele mu vumuene vua mulu.

⁴ Uoshe uje alikehesa ikeye vavenia ngue ou kanike, ikeye napu uakama mu vumuene vua mulu.

⁵ Uoshe uje atambula kanike ou mu lizina liange na tambula yange.

Vieseko vije vituala ku Vupi

(Mako9:42-48; Luka17:1-2)

⁶ “Vuno honi uoshe uje alingisa ava vanike vavandende vaje vatsiliela muli yange kulinga vupi, cacili kuli ikeye kumukutilila livue liakulolela vunga mu ntsingo yendi kaha nakumukokela ha seta ya cisali.

⁷ Cisingo ha mavu omuo ya vieseko vije vituala ku vupi! Omuo cilivene vieseko evi vija, vuno honi cisingo kuli muntu uje vieseko evi vizila!

⁸ “Kaha nga livoko liove cipue mukono uove vikulingisa linga ulinge vupi, vitete nakuviumbila kuti, cacili kuli yove kukovele mu muono oku

ucisualonda cipue cilema kupulakana na mavoko avali cipue mikono ivali nakukumbila mu tuhia tua miaka yoshe ya yaye.

⁹ Kaha nga lisho liove likulingisa linga ulinge vupi, kaha licokovolemo nakuliumbila kuti, cacili kuli yove kukovela mu muono na lisho limo kupulakana na mesho avali aje akanehesa linga vakakumbile mu ngehena ya tuhia.

Cisimo ca Mpanga Uakuzimbala (Luka15:3-7)

¹⁰ “Talení keti musembulule ava vanike vavandende, omuo njimileka nguange muilu muli tungelo vaje ntsimbu yoshe vakamono cihanga ca Tate uje hali muilu.

¹¹ Omuo Muna Muntu uezile nakuovola vaje vanazimbala.

¹² “Vika musinganieka? Nga yala hali na vampanga cihita, kaha umo uavo nazimbala, nkuma kaseze vaje makumi atanu na auana na vatanu na vauana (99) ha munkinda nakuya mukutonda uje nazimbala ndi?

¹³ Kaha nga amuuana, muavusunga njimileka nguange akavuahelele cikuma omuo yendi kupulakana vaje makumi atanu na auana na vatanu na vauana (99) vaje kuvazimbalele.

¹⁴ Mucifua cimo vene Tate ua muilu katondo ngeci umo uava vanike vavandende vanonge.

Muntu nga Nakupihisila

¹⁵ “Nga mukueni na kupihisila, ya uye ukamuleke vije via nakupihisila, muvuvali vueni lika. Nga akuivuulila kaha uamuovola.

¹⁶ Vuno honi nga ka kuivuulila, kaha ambatako umo cipue vavali linga mezi oshe akapue navukaleho vua vantu vavali cipue vatatu.

¹⁷ Nga aviana kuvevuulila, kaha lekesako cikungulukilo, kaha nga naua aviana kuivuulila cipue ku cikungulukilo, mupuisse ngue vaje keti Vayunda na vaka kutambula lisimu.

Kuvindika na Kutavesa

¹⁸ “Muavusunga njimileka nguange, coshe cije civakavindika hano hamavu na muilu naua vakacivindika, kaha coshe cije civakatavesa hano hamavu na muilu naua vakacitavesa.

¹⁹ “Kaha naua njimileka nguange, nga muvuvali vueni mulitavasana hano ha mavu ha cuma mukalomba, vakamilingilaco kuli Tate ua muilu.

²⁰ Omuo kuje kunakungulukila vavali cipue vatatu mu lizina liange, kuje vene nange naua njili hhakati kavo.”

Cisimo ca Ngamba Uakuhona Kukonekela

²¹ Ambahoni Petulu uezile kuli Yesu nakuhandeka nguendi, “Muene, nkuma lungahi njasa kukonekela muanetu nga na njipihisila? Nkuma lualuingi vintsimbu vitanu na vivali ndi?”

²² Yesu uamukumbuluile nguendi, “Njikulekesa nguange keti luakupua vintsimbu vitanu na vivali, vuno honi luakupua makumi atanu na avali na vintsimbu vitanu na vivali.”

²³ Nankuma vumuene vua muilu tuvuesekesa na muene uje uatondele kufueta vangamba vendi.

²⁴ Omo uaputukile linga avafuete, kaha vamunehелеle yala uje uakele na mukuli kuli ikeye ua vimbazuvuila via ngolinde viakupua makulukazi likumi (10 0 0).

²⁵ Kaha omo uje yala uahonouele kumufueta, uje muene uendi uashikile linga vamulandese hamo na mpueyendi, na vana vendi na vioshe vije viakele navio linga afuete.

²⁶ “Kaha uje ngamba uatsikamene ha mavuli endi ku mesho endi naku-mulomba nguendi, ‘Muene acinjivandameneko tahi, kaha njikakufueta vioshe!’”

²⁷ Kaha uje muene uevuilile ngozi uje ngamba kaha uamuecelele nakumukonekela mukuli uendi.

²⁸ “Vuno honi uje vene ngamba omo uaile ualihanene na umo uavakuavo vangamba uje uakele na mukuli uendi uakupua cihita ca vimbongo via muuayauaya. Kaha uamukuatele ha milivu nakuhandeka nguendi, ‘Njifuete mukuli uange.’

²⁹ Kaha uje mukuavo ngamba uauilile ha mavu nakumulambelega nguendi, ‘Acinjivandameneko tahi, kaha njikakufueta.’

³⁰ Vuno honi uavianene kaha uamutualele mu kamenga noho haka-fuetela uje mukuli uendi.

³¹ Omo vakuavo vangamba vamuene vije vialingiuile, kuvevuile muacili, kaha vaile nakuambulula kuli muene uavo vije vioshe vialingiuile.

³² Ambahoni uje muene uendi uamusanene nakuhandeka kuli ikeye nguendi, ‘Yove ngamba uamupi! Njakukonekelele uje mukuli uoshe omuo uanjilambelegelele.

³³ Kaha vika honi yove kuuamuvuilileko cikeketima mukueni ngamba, ngue muje munjakuvuilile cikeketima yange?”

³⁴ Kaha na vutenu uje muene yendi uamutualele ku vaka kamenga linga vamuzangamese kuvanga noho akafueta mukuli uoshe uje uakele nauo.”

³⁵ “Omu mukemo vene na Tate ua mulu akalinga yeni voshe, nga kumukakonekela vamuano ku huminina ku mitima yeni.”

19

Yesu Alongesa Hakutsiha vulo (Mako10:1-12)

¹ Omo Yesu uamanusuile kuhandeka evi, uahumine mu Ngalileya uaile ku cihela ca Yundeya musinia lia ndonga ya Yundau.

² Kaha civunga cakama ca mukavele, kaha ua vakangusile kuje.

³ Vafaliseo vamo vezile kuli ikeye nakumueseka, mukumuihula nguavo, “Nkuma capua lishiko yala kukondola mpuevo yendi ha mulonga uli uoshe indi?”

⁴ Nankuma Yesu uavakumbuluile nguendi, “Kumuatandele nguavo uje uavatangele ku maputukilo ua vatangele yala na mpuevo.”

⁵ Uahandekela nguendi, “Omuo hacifua eci yala akaseza vaishe na vaina na kulipandakana hamo na mpuevo yendi, kaha vavali va kapua muvila umo lika.”

⁶ Kaha kuvapu vavali vuno honi vapua muvila umo lika. Kaha cije Njambi napandakana hamo keti vakacihangunune.

⁷ Kaha Vafaliseo vahandekela kuli ikeye nguavo, “Nkuma vikahoni Mosesa uashikile umo yala kuhana mukanda uakukondola kuli mpueyendi nakumusheka?”

⁸ Kaha Yesu uahandekela kuli vakevo nguendi, “Omuo yakukalua ca mitima yeni Mosesa uamitavesele linga mukondole vampuevo veni, vuno honi kumaputukilo kucapuile ngoco.

⁹ Kaha njihandeka kuli yeni nguange, uoshe akondola mpuevo yendi, kuakuhona kulinga vupangala, nakuambata mpuevo ueka, kaha alinga vupangala."

¹⁰ Vandongisi vahandekela kuli ikeye nguavo, "Nga mukemo ngoco hali yala na mpuevo yendi, nkuma cacili kuhona kuambata."

¹¹ Vuno honi uahandekela kuli vakevo nguendi, "Keti muntu uoshe atambula evi vihandeka, kuvanga lika kuli vaje vavanavihana.

¹² Omuo kuli vamo vaje kuvasa kuambata omuo vasemukile muje vene, kaha kuvali vamo vaje kuvasa kuambata omuo vantu vanavalingimo, kaha naua kuvali vamo vaje kuvambata omuo vanalingi vakevo vavenia ngoco vene omuo ya vumuene vua muilu. Kaha uoshe uje atambula evi, avitambule."

Yesu Akuisula Vanike Vavandende

(Mako10:13-16; Luka18:15-17)

¹³ Ambahoni vanehele vanike vavandende kuli Yesu linga avasaleke mavoko endi nakuvalombelega. Vuno honi vandongisi vatenukilile vaje vantu vavanehele.

¹⁴ Vuno honi Yesu uahandekela nguendi, "Eceleni vanike vavandende veje kuli yange, keti muvavindike, omuo vumuene vua muilu vunapu vuavo."

¹⁵ Kaha uavasalekele mavoko endi kaha uaile.

Mukuenje Uakupita

(Mako10:17-31; Luka18:18-30)

¹⁶ Kaha taleni, umo muntu uezile kuli Yesu nakumuihula nguendi, "Mulongisi, cuma muka cacili njapande kulinga, linga njikakale na muono uayaye?"

¹⁷ Yesu uahandekela kuli ikeye nguendi, "Vika unjihuila vije via cili?" Kuli lika umo ikeye uacili. Vuno honi nga utonda kukovela mu vuyoye, niunga mashiko.

¹⁸ Uje muntu uamuihuile nguendi, "Vika?" Kaha Yesu uamukumbuluile nguendi, "Keti ukatsihe, keti ukalinge vupangala, keti ukeve, keti ukahane vukaleho vua makuli,

¹⁹ singimika isho na noko, kaha zanga mukueni ngue muje muualizangela yove vavenia."

²⁰ Kaha uje mukuenje uamuihuile nguendi, "Vioshe evi njaviniungu." Vika naua vikuavo vinjasa kulinga?

²¹ Kaha Yesu uahandekela kuli ikeye nguendi, "Nga utonda kupua uakusungama, ya linga ukalandese viuli navio kaha uvihane ku vihutu, kaha ukakala na vufuko muilu, kaha ija, njikave."

²² Omo uje mukuenje uevuile evi uaile navusua, omuo uakele na vufuko vua vuingi cikuma.

²³ Kaha Yesu uahandekela kuli vandongisi vendi nguendi, "Muavusunga njihandeka kuli yeni nguange, cikapua ca cikalu kuli muka kufuka kukovela mu Vumuene vua muilu.

²⁴ Njimileka naua nguange, ca casi kamelu kuhita mu lisho lia nguya, kupulakana muka kufuka kukovela mu vumuene vua Njambi."

²⁵ Omo vandongisi vovuile eci, valikomokelele cikuma, nakuhandeka nguavo, "Kaha iya honi akovoka?"

²⁶ Vuno honi Yesu uavatalele nakuhandeka kuli vakevo nguendi, "Eci cacikalu ku vantu vuno honi kuli Njambi vioshe viapua viaviasi."

²⁷ Kaha Petulu uahandekela nguendi, "Tuaseze vioshe nakukukava. Vika honi tukakala navio?"

²⁸ Yesu uavakumbuluile nguendi, “Muavusunga njimileka nguange, mu mavu a maha, omo Muna Muntu akatumama ha litanda liendi lia vumpau, yeni vaje muanjikavele mukatumama ha matanda makumi na avali, mukusompa miyati likumi na ivali ya Isaleli.

²⁹ Uoshe uje naseza vinjivo viendi, cipue vamunaina vavamala, cipue vamunaina vavampuevo, cipue vaishe, cipue vaina, cipue vana vendi cipue vihela, omuo ya lizina liange, akatambula cihita ku vioshe nakusuana muono ua yaye.

³⁰ Vuno honi vavengi vaje vakulivanga vakapua vakumanusuila, kaha vakumanusuila vakapua vakulivanga.”

20

Vaka Kupanga mu Lihia lia Viniu

¹ “Omuo vumuene vua muilu vunapu ngue vavenia njivo uje cimene mene uaile nakulania vaka kupanga mu lihia liendi lia viniu.

² Hanima yakulitavasana na vaka kupanga ha fueto ya ha litangua, kaha uavatumine mu lihia liendi lia viniu.

³ Kaha ha ntsimbu ya muciuana ku cimene omo uaileko uamuene vamo vanemana ngoco ku cihela cakulandesela,

⁴ kaha uahandekele kuli vakevo nguendi, ‘Neni naua yemuye mukapange mu lihia lia viniu, kaha njikamifueta fueto ije inapandemo. Kaha vaile.’

⁵ Kaha uaileko naua ku ntsimbu ya likumi na vivali ya mutania na ntsimbu ya likumi na vitanu na vivali ku mutania uacinguezi, kaha uatumineko vakuavo naua.

⁶ Kaha ku ntsimbu ya mu citanu ya cinguezi uaile naua ku cihela ca kulan-desela kaha uakauanene naua veka vanemana ngoco, kaha uahandekele kuli vakevo nguendi, ‘Nkuma vika honi munemanena lika kuno ngoco ha litangua lioshe liamutuntu?’

⁷ Kaha vahandekele kuli ikeye nguavo, ‘Omuo naumo uahi natulania.’ Kaha uahandekele kuli vakevo nguendi, ‘Yemuye mu lihia neni.’

⁸ “Kaha omo cinguezi cahetele, uje vavenia lihia uahandekele kuli muka kutuamenena vaka kupanga nguendi, ‘Sana vaka kupanga linga uvafuete fueto yavo, putukila na vaje vakukotokela kaha manusuila na vaje vakulivanga.’

⁹ Kaha omo vaje vavalaniene ha ntsimbu ya mucitanu ya mutania ua cinguezi vezile, umo na umo uavo uatambuile fueto ya ha litangua limo.

¹⁰ Honi omo vaje valivangele vezile, vasinganiekele nguavo hamo vakatambula viavingi, vuno honi umo na umo uavo navo uatambuile fueto ya ha litangua limo.

¹¹ Kaha omo vatambuile vapusukile kulinienieta kuli uje vavenia lihia

¹² nguavo, ‘Ava vakukotokela vanapanga lika hola imo, kaha unavapuisa hamo netu vaje vanapanga litangua lioshe mukatania.’

¹³ Vuno honi vavenia lihia uakumbuluile umo uavo nguendi, ‘Kavusamba, kunjakulingile mua mupi, nkuma kutualitavasanene kupangela fueto ya ha litangua limo ndi?’

¹⁴ Ambata vije vinakupande kaha ya, njinahangula kuhana vaje vakukotokela eci ngue muje munjihanenana yove.

¹⁵ Nkuma kunjasa kulinga muje munjitondela na vimbongo viange ndi? Cipue nkuma yove uli nacipululu omuo ya ngozi yange ndi?”

¹⁶ Kaha omu mukemo vene mucikafua, vaka kukotokela vakapua vaka kulivanga, kaha vaka kulivanga vakapua vaka kukotokela.

*Yesu Ahandeka lua Mucitatu ha Kutsa Cendi
(Mako10:32-34; Luka18:31-34)*

¹⁷ Omo Yesu tele alinakuya ku Yelusalema, uaile hamo na vandongisi vendi likumi na vavali kuavo lika, kaha mu ngila uahandekela kuli vakevo muvushueke nguendi,

¹⁸ “Talení, tulinakuya ku Yelusalema, kaha Muna Muntu vakamuhana kuli vakuluntu va tulasendote nakuli valongisi va mashiko kaha vakamuhisa nakumutuala ku kutsa,

¹⁹ kaha vakamuhana kuli vaje keti Vayunda linga vaka mushendumune nakumupupanga nakumushukika ha cilindakano, kaha vakamusangula hanimu ya matangua atatu.”

*Catonda Cisemi Uampuevo
(Mako10:35-45)*

²⁰ Ambahoni naye ya vana va Zembendeo uezile kuli Yesu hamo na vana vendi, uatsikamene ku mesho endi kaha uamulombeke cuma cimo.

²¹ Kaha Yesu uahandekela kuli ikeye nguendi, “Vika utonda?” uamukumbuluile nguendi, “Shika linga ava vana vange vavali linga vatumame umo ku livoko liove liacilio mukuavo kulia cimoshue mu vumuene vuove.”

²² Vuno honi Yesu uamukumbuluile nguendi, “Ku utantekeya vika vije ulinakulomba. Nkuma muasa kunu nganja ije injikanuina ndi?”

Vamukumbuluile nguavo “Tuasa.”

²³ Yesu uahandekela kuli vakevo nguendi, “Mukanuina mu nganja yange, vuno honi kutumama ku livoko liange liacilio na lia cimoshueni, keti yange njili nanzili yakucitavesa, vuno honi cinapu cavaje Tate navuahesele laja.”

²⁴ Kaha omo vaje likumi vacuvuile, vanienguelele vaje vamunaina vavali.

²⁵ Vuno honi Yesu uavasaneke nakuhandeka nguendi, “Muatantekeya ngueni vaka kuyula va vaje keti Vayunda vali nanzili hali vakevo, kaha na vantuama vavo vali na nzili yakama hali vakevo.

²⁶ Kucikafu muje hali yeni. Vuno honi uoshe uje akapua uakama hali yeni akapua ngamba yeni,

²⁷ Kaha uoshe akapua ukulivanga hali yeni akapua ngamba yeni,

²⁸ cipue Muna Muntu kezile mukumuovola vuno honi mukuovola, nakuhana muono uendi ngue fueto mukuovola vavengi.”

*Yesu Akanguisa Vamala Vavali Vatupuputua
(Mako10:46-52; Luka18:35-43)*

²⁹ Kaha omo Yesu na vandongisi vendi vahumine ku Yeliko, civunga cakama camukavele.

³⁰ Kaha taleni, vamala vatupuputua vavali vatumamene ku mukulo ua tapalo, kaha omo vevuile nguavo Yesu alinakuhita, vatambekele nguavo, “Tuvuileko cikeketima Muna Ndaviti.”

³¹ Kaha cije civunga cavatenukilile nguavo vaholoke kuluu, vuno honi vatambakanene cikuma honi nguavo, “Muene, tuvuleko cikeketima, Muna Ndaviti!”

³² Kaha Yesu uemanene nakuvasana nguendi, “Vika mutonda linga njimilingile?”

³³ Vahandekela kuli ikeye nguavo, “Muene tutonda kumona.”

³⁴ Kaha Yesu hakuvevuila cikeketima uakuatele ha mesho avo, kaha hajevene vaputukile kumona kaha vamukavele.

21

*Yesu Akovela na Kasingimiko mu Yelusalema
(Mako11:1-11; Luka19:8-40; Iuano12:12-19)*

¹ Kaha omo Yesu na vandongisi vendi vahetele kuyehi na Yelusalema, vaile ku Mbetafanje ku munkinda ua Oliveta, ambahoni Yesu uatumine vandongisi vavali,

² nakuhandekela kuli vakevo nguendi, “Yeni ku limbo lije lia litala neni, kaha hajevene mukauana cimulu vanamukutu na munendi, kaha vazituleni munjinehelevo.”

³ Nga muntu umo akahandeka cimo kuli yeni, mukahandeka ngueni, ‘Muene hali nakuvatonda, kaha akavahiluisa mu vuasi vuasi.’”

⁴ Evi vialingiuile linga vilishulisise vije viahandekela kananguizi ua Njambi nguendi,

⁵ “Leka muana ua mpuevo ua Siyoni nguove,
Tala, muene yove hali nakuija kuli yove
Uje uakulikehesa kaha nalondo ha cimulu,
na hali muna cimulu.”

⁶ Kaha vandongisi vaile nakukalinga muje muavashikililemo Yesu,

⁷ ambahoni vanehele uje cimulu na munendi, kaha vajalele tuzaku tuavo ha miongo ya vimulu, kaha Yesu uatumameneho.

⁸ Vuingi vua vivunga vajalele tuzaku tuavo mu ngila, kaha vakuavo naua vatetele mitango ya miti vajalele mu ngila.

⁹ Kaha cije civunga caile halutue liendi na vaje vamukavangeyele vatam-bekele cikuma nguavo, “Hosana kuli Muna Ndaviti! Njambi amukuisule ou eja mu lizina lia Muene! Lemeseni Njambi!”

¹⁰ Kaha omo uakovelele mu Yelusalema, nganda yoshe ya lijajelelele vahandekela nguavo, “Iya ou?”

¹¹ Kaha vivunga via vantu vahandekela nguavo, “Ou ikeye kananguizi ua Njambi Yesu uaku Nazaleta yamu Ngallileya.”

*Yesu Aya ku Njivo ya Njambi
(Mako11:15-19; Luka19:45-48; Iuano2:13-22)*

¹² Kaha Yesu uakovelele mu mbalanda ya njivo ya Njambi nakusheka voshe vaje vakele nakulandesa na vaje vakele nakulanda mu njivo ya Njambi, kaha uafulumikile vimesa via vaje vakele nakulandulula vim-bongo na vitumamo via vaje vakele nakulandesa mavembe.

¹³ Kaha uahandekela kuli vakevo nguendi, “Vacisoneka nguavo, njivo yange vakaitumbula njivo ya malombelo, vuno honi yeni muaipuisa cihela ca vezi.”

¹⁴ Kaha tupuputua na vilema vezile kuli ikeye mu njivo ya Njambi, kaha uavakanguisile.

¹⁵ Vuno honi omo vakuluntu vatusasendote na valongisi va mezi omo va-muene viuma viacili vije vialingile, na vanike vavandende vatambekele mu njivo ya Njambi nguavo, “Hosana Muna Ndaviti,” Nankuma vanienguele cikuma,

¹⁶ kaha vahandekela kuli ikeye nguavo, “Uli nakuvua evi vivalinakuhandeka ava ndi?” Kaha Yesu uahandekela kuli vakevo nguendi,

“Eyo, nkuma kumuatandele nguavo, ‘Mu tunua tua vanike na vaje vali nakujamua mukumo mukahumu kulemesa ca vusunga ndi?’”

¹⁷ Kaha Yesu uavasezele, uahumine mu nganda nakuya ku Mbeteniya kukeko kuakakosele.

*Yesu Asinga Muti ua Mukuyu
(Mako11:12-14;20-24)*

¹⁸ Cimenemene omo Yesu uakele nakuhiluka ku nganda ya Yelusalema, uevuile njala.

¹⁹ Kaha omo uamuene muti ua mukuyu ku mukulo ua ngila, uaileko kaha uauanenekeo nacimo cahi kuvanga maputa lika. Kaha uahandekele kuli ukeuo nguendi, "Keti ukeme vushuka naua!" Kaha hajevene uje muti ua mukuyu uomine.

²⁰ Omo vandongisi vacimuene valikomokelele cikuma, kaha vahandekele nguavo, "Nkuma vati honi ahavene ou muti ua mukuyu unomu?"

²¹ Kaha Yesu uavakumbuluile nguendi, "Muavusunga njimileka nguange, nga muli na lutsilielo nakuhona kulikanouela, kumukalingi lika evi vinalingia ku muti ua mukuyu, vuno honi cipue nga mukahandeka kuli ou munkinda ngueni, 'Katuka linga ukalumbile mu mema a kalunga, kaha cikalingia.'"

²² Nga muli na lutsilielo, vioshe vimukalomba muli lombelo mukavitambula."

*Cihula ca ha Nzili Yakama ya Yesu
(Mako11:27-33; Luka20:1-8)*

²³ Kaha omo Yesu uakovelele mu mbalanda ya njivo ya Njambi, tele acili nakulongesa, vakuluntu va tusasendote na vakuluntu vezile kuli ikeye nakuhandeka nguavo, "Nzili muka yakama ulinakulinga nayo viuma evi, iya uakuhanene eyi nzili yakama?"

²⁴ Kaha Yesu uavakumbuluile nguendi, "Nange naua njimihula cihula kaha nga munjikumbulula, kaha nange naua njikamileka nzili yakama injikalingi nayo evi vuima.

²⁵ Nkuma kumbuitika ca Iuano cahumine kuli? Cahumine kilu indi cahumine ku vantu?"

Kaha valikananganene umo na mukuavo nguavo, "Nga tuhandeka ngueto cahumine mulu, kaha akahandeka kuli yetu nguendi, 'Nkuma vika honi kumua mutsiliielele?'"

²⁶ Vuno honi nga tuhandeka ngueto, 'Cahumine ku vantu,' kaha tuteua civunga ca vantu, omo voshe vatsiliielele nguavo Iuano uapuile kananguizi ua Njambi."

²⁷ Kaha vakumbuluile Yesu nguavo, "Kututantekeya,"

Kaha uahandekele kuli vakevo nguendi, Kaha nange naua kunjimilekesa kuje kunjikahumisa eyi nzili yakama injili nakulinga nayo viuma evi.

Cisimo ca Vana va Vamala Vavali

²⁸ "Nkuma yeni vika muhandekaho? Kuakele yala uje uakele na vana vavali va vamala, kaha uaile kuli uakulivanga nakuhandeka kuli ikeye nguendi, 'Lelo ya ukapange mu lihia lia mikolovozi.'

²⁹ Kaha uamukumbuluile nguendi, 'Kunjiiko' vuno honi muka ntsimbu lika uatengulukile nakuya.

³⁰ Kaha uaile kuli uamucivali nakukahandeka viakulifua, kaha uamukumbuluile nguendi 'Njiya muene,' vuno honi kaile.

³¹ Nkuma hali ava vavali iya ualingile cizango ca ishe?" Vamukumbuluile nguavo,

"Uakulivanga."

Kaha Yesu uahandekele kuli vakevo nguendi, muavusunga njihandeka kuli yeni nguange, vaka kutambula lisimu na vikoyi vakovela mu vumuene vua Njambi yeni kanda.

³² Omo Iuano uezile kuli yeni mu ngila ya vusunga, kaha kumuamut-silieielele, vuno honi vaka kutambula lisimu na vikoyi vamutsilieielele, vuno honi cipue vene muacimuene, vuno honi kumuatengulukile nakumut-siliela.

Cisimo ca Vaka Kupanga mu Citungu ca Mikolovozi ya Vushuka vua Viniu (Mako12:1-12; Luka20:9-19)

³³ Kaha Yesu uahandeketele naua nguendi, "Ivuilileni cisimo cikuavo, Kuakele liavenia njivo uje uakunine lihia lia mikolovozi, kaha uazen-guisileko cipatanga, kaha uahindile cina ca kukamuinamo viniu, kaha uatungile kaposhi nakusezelako vaka kupanga, kaha uaile ku cifuti ceka.

³⁴ Omo ntsimbu ya kuteja vushuka yakele muyehi, uatumine vangamba vendi kuli vaka kupanga, linga vakambate vushuka vuendi,

³⁵ kaha vaje vaka kupanga vakuatele vangamba vendi kaha vapupileho umo, nakutsihaho umo, kaha nakuashaho umo mavue.

³⁶ Kaha naua uatumine vangamba veka, kupulakana va kulivanga, kaha navakevo vene vavalingile cifua cimo.

³⁷ Kuhuma haje uatumine munendi kuli vakevo nguendi, 'Vaka-musingimika munange.'

³⁸ Vuno honi vaje vaka kupanga omo vamuene uje muana, valihandekese umo na mukuavo nguavo, 'Ou ikeye muna uje vavenia lihia, tuyeni tumutsihe kaha tukasuana lihia liendi.'

³⁹ Kaha vamukuatele nakumumbila hambanza ya lihia lia mikolovozi, nakumutsiha.

⁴⁰ "Nankuma omo liavenia lihia lia mikolovozi ua viniu akeja, nkuma akalinga vika kuli vaje vaka kupanga?"

⁴¹ Vahandeketele kuli ikeye nguavo, "Akatsiha vaje vantu va vapi kaha vakatsa mua mupi, kaha akahana lije lihia lia mikolovozi ua viniu kuvaka kupanga veka vaje vakamuhana vushuka mu ntsimbu yavo."

⁴² Yesu uahandeketele kuli vakevo nguendi, "Nkuma kumuatandele mu visoneka nguavio,

" 'Livue lije vene vaka kutunga vavianene, likelio linapu nsina ya mu mbango.

Eci cikeko calingile Muene,

kaha cinapu cakukomouesa kuli yetu.' "

⁴³ Nankuma njimileka nguange, "Vumuene vua Njambi vaka miniekavuo nakuvuhana ku vantu vaje vema vushuka vuauo."

⁴⁴ Kaha muntu uoshe uje auila ha livue eli likamutetanga vipindi pindi, vuno honi nga uoshe uje likauala, likamutsena.

⁴⁵ Omo vakuluntu vatusasendote na Vafaliseo vovuile visimo viendi, vatantekeyele nguavo hali nakuhandeka vakevo.

⁴⁶ Vuno honi omo vesekele kumukuta, vateuele civunga ca vantu, omuo vatantekeyele nguavo ikeye kananguizi ua Njambi.

22

Cisimo ca ciuano ca Vulo (Luka14:15-24)

¹ Kaha naua Yesu uahandeketele kuli vakevo mu visimo nguendi,

² "Vumuene vua muilu vunapu kusetekesa ngue muene uje ualingile ciuano ca vulo vua munendi ua yala,

³ kaha uatumine vangamba vendi mukusana vaje valaniene ku ciuano ca vulo, vuno honi kuvezileko.

⁴ Kaha uatumine vangamba vakuavo naua nguendi, 'Lekeni vaje vanalania, Taleni njavuahesa laja viakulia viange, vangombe vange na vimuna vange vakuhindala vanavatsihi, kaha viuma vioshe vinavuahesa laja, ijeni ku ciuano ca vulo!'

⁵ Vuno honi kuvahakeleleko mana, vaile kuavo, umo ku lihia liendi, mukuavo kumingoso yendi,

⁶ vakuavo vakuatele vaje vangamba vendi nakuvayandesa mua mupi, kaha va vatsihile.

⁷ Kaha muene uanienguele cikuma, kaha uatumine masualale vendi nakukavanongesa vaje vatsihile vangamba vendi nakukatsimika vinganda viavo.

⁸ Kaha uahandekete kuli vangamba vendi nguendi, 'Ciuano ca vulo cavuaha laja, vuno honi vaje valaniene kuvezile.

⁹ Nankuma yemuye mu vimbango via vitapalo, kaha mukalanie voshe vaje vamukauana veje ku ciuano ca vulo'

¹⁰ Kaha vaje vangamba vaile mu vitapalo nakukungulula voshe vaje vavauanene, voshe vacili na vaje va vapi, kaha ije njivo ya ciuano ca vulo yashulile na vangezi.

¹¹ "Vuno honi omo muene uezile nakukovela mukumona vaje vangezi, uamuene ngeci yala umo kazalele vuzalo via ha vulo,

¹² kaha uahandekete kuli ikeye nguendi, 'Kavusamba uakovela vati muno kuakuhona kuzala vuzalo vua ha vulo?' Kaha uahonouele viakuhandeka.

¹³ Ambahoni muene uahandekete kuli vaje vaka kukuasa vangezi nguendi, 'Mukuteni ku mavoko na ku mikono, mutualeni hambanza mu milima, kuje vantu vaka lila na kulishumanga ku mazo avo.' "

¹⁴ "Omo vavengi vanavalandia, vuno honi vavandende lika vavandahangula."

*Cihula ca Kufueta Lisimu
(Mako12:13-17; Luka20:20-26)*

¹⁵ Ambahoni Vafaliseo vaile nakutumba vutumbe ngeci vakamueseke navihandeka viendi.

¹⁶ Kaha vatumine vandongisi vavo kuli ikeye hamo na Helonde nguavo, "Mulongisi tutantekeya ngueto u yala uavusunga kaha ukalongesa vingila via Njambi mu vusunga, cakuhona kuteua muntu hali uoshe, omuo kuuekutala muntu muafulamo.

¹⁷ Tuleke vika usinganieka? Nkuma cinapu lishiko kufueta lisimu kuli Sezale, indi kuahi?"

¹⁸ Vuno honi Yesu uatantekeyele laja vupi vuavo kaha uahandekete nguendi, "Yeni vaka civembulu, vika honi munjesekele?"

¹⁹ Njimueseni vimbongo via lisimu."

Kaha vamunehetele mbongo ya muuaya uaya.

²⁰ Kaha Yesu uahandekete kuli vakevo nguendi,

"Cihanga ceya eci?"

"Kaha lizina lieya vanasonekaho?"

²¹ Vahandekete nguavo, "Via Sezale." Ambahoni uahandekete kuli vakevo nguendi, "Haneni viuma via Sezale kuli Sezale, kaha haneni viuma via Njambi kuli Njambi."

²² Omo vovuile eci valikomoketele cikuma kaha vamusezele vaile.

*Cihula ca ha Kusanguka ku Vatsi
(Mako12:18-27; Luka20:27-40)*

²³ Ha litangua lije vene Vasanduki vezile kuli Yesu, vaje vakatsiliela nguavo kuesi kusanguka kuvatsi. Kaha vamuhuile cihula nguavo,

²⁴ Mulongisi, Mosesa uahandekela nguendi, “Nga yala atsa kuakuhona kuseza vana, kaha uje muanaye napande kuambata uje ntuluue, linga asemeneko vana vaje vanapandele kusemenako muanaye.

²⁵ Ambahoni vapuile vatanu na vavali vamuanaye, kaha uakulivanga uambatele, kaha uatsile, kaha kasezele vana kaha uasezele uje mpueyendi kuli muanaye.

²⁶ Cuma cakulifua calingiule kuli uamucivali na kuli uamucitatu, nakuli uje uamu citanu na vavali.

²⁷ Kumamanuisilo uje mpuevo uatsile.

²⁸ Kaha mukusanguka, nankuma, akapua mpuevo yeya ha vantu ava vatanu na vavali? Omuo voshe vamuambatele.”

²⁹ Vuno honi Yesu uavakumbuluile nguendi, “Yeni muapihisa, omuo kumutantekeya visoneka cipue nzili ya Njambi.

³⁰ Omuo mukusanguka ku vatsi kukukakala kuambata cipue kushombuesa, vuno honi vakapua ngue tungelo va muilu.

³¹ Kaha ngue ha kusanguka kuvatsi, nkuma kumuatandele vije viahandekela Njambi kuli yeni nguendi,

³² ‘Yange Njambi ua Avilahama, na Njambi ua Isake, na Njambi ya Yakomba.’ Keti Njambi ua vaka kutsa, vuno honi Njambi ua vaka kuyoya.”

³³ Kaha omo vivunga via vantu vovuile eci, valikomokelele cikuma ha kulongesa cendi.

Lishiko Liakama

(Mako12:28-43; Luka10:25-28)

³⁴ Vuno honi omo Vafaliseo vevuile nguavo naholuesa Vasanduki, kaha valikunguluile hamo lika.

³⁵ Kaha umo uavo, uje uapuile muka kuimanena mashiko, uamuhiule cihula cakumueseka nguendi,

³⁶ “Mulongisi, nkuma lishiko muka liakama ku mashiko oshe?”

³⁷ “Kaha Yesu uahandekela kuli ikeye nguendi, ‘Ukazanga Muene Njambi yove na mutima uove uoshe, na muono uove uoshe, na mana ove oshe.’

³⁸ Eli likelio lishiko liakama lia kulivanga.

³⁹ Kaha lia mucivali eli, ‘Zanga mukueni ngue muje muualizangela yove vavenia.’

⁴⁰ Ha mashiko aua avala hakeho hanemana mashiko oshe na tunanguizi va Njambi.”

Cihula ca hali Kilistu

(Mako12:35-37; Luka20:1-44)

⁴¹ Honi omo Vafaliseo valikunguluile hamo, Yesu uavehuile cihula,

⁴² uahandekela nguendi, “Vika musinganieka hali Kilistu? Uapua Muna iya?” Vamukumbuluile nguavo,

“Muna Ndaviti.”

⁴³ Kaha Yesu uavehuile nguendi, “Capuile vati honi, nkuma Ndaviti” vamulongesele kuli Cimbembesi, linga amusane Muene, omo uahandekela nguendi,

⁴⁴ “ ‘Muene uahandekela kuli Muene yange nguendi,

Tumama ku livoko liange lia cilio,

noho njikahaka vitozi yove muintsi lia viliato viov?’

⁴⁵ Nga Ndaviti amusana nguendi Muene, nkuma akapua vati naua munendi?”

⁴⁶ Kaha naumo uahi uasele kumutava lizi, nankuma kuhuma ha litangua lije vene naumo uahi usekele kumuihula cihula naua.

23

*Yesu Anangula hali Valongisi va Vafaliseo
(Mako12:38-39; Luka11:43-46; 20:45-46)*

¹ Ambahoni Yesu uahandekela ku civunga na kuli vandongisi vendi nguendi,

² “Valongisi va lishiko na Vafaliseo vatumama ha cituamo ca Mosesa,

³ kaha lingeni nakutala vioshe vije vampeka, vuno honi keti vije vi-valinga, omuo vakambulula vije kuvekulinga.

⁴ Vakakutu viteli via kulema vije viavikalu kuviambata, nakuvituika ha vitsili via vantu, vuno honi vakevo kuvekujundulako cipue na munie uavo ha kuvijundula.

⁵ Vioshe vije vivakalingi, vakavilingila linga vantu vavamone, omuo vakakutuliya mikanda ya visoneka ha maholo avo na ha mavoko avo, na vulaha vua tundombe tua tuzaku tuavo,

⁶ kaha vakevo vazanga cihela ca vulemu ku viuano na vitumamo viacili mu vinjivo via malombelo,

⁷ nakuvameneka nakasingimiko ku vihela via kulandesela, nakuvasana nguavo ‘Mulongisi’ ku vantu.

⁸ Vuno honi yeni keti vamisane mulongisi, omuo muli lika na mulongisi umo lika, kaha yeni voshe muva vusamba.

⁹ Kaha keti mukasaneho muntu hali uoshe ‘Tate’ hano ha mavu, omuo muli lika na Ishueni umo, uje hali muilu.

¹⁰ Naua keti vakamisane muene, omuo muli lika na muene umo, ikeye Kilistu.

¹¹ Uoshe uje uakama hhakati keni akapua ngamba yeni.

¹² Uoshe uje alijundula ikeye vavenia vaka mukehesa, kaha uoshe uje alikehesa ikeye vavenia vaka mujundula.

Yesu Avahisa ha Civembulu cavo

(Mako12:40; Luka11:39-42;44;52; 20:47)

¹³ “Vuno honi tuyando kuli yeni, valongisi va mashiko na Vafaliseo, yeni vaka civembulu! Omuo mukashoko vikolo via vumuene vua muilu ku vantu, omuo neni vavenia kumue kukovelamo, cipue kutavesa vaje vatonda linga vakovele.

¹⁴ Cisingo kuli yeni, valongisi va mashiko na Vafaliseo, yeni vaka civembulu! Omuo yeni mukapihisa vinjivo via vantuluue mukulimuesa ha kulombela malombelo alaha. Nankuma mukatambula cihiso cakama.

¹⁵ “Cisingo kuli yeni, valongisi va mashiko na Vafaliseo, yeni vaka civembulu! Omuo yeni mukendangana ku mema a kalunga naku ntunda linga mutengululeko muntu umo, kaha omo natenguluka, mukamupuisa luvali kupua muana ua ngehena ngue yeni.

¹⁶ “Cisingo kuli yeni vantuumu vatupuputua, yeni vaje mukahandeka ngueni, ‘Nga umo alisinga na njivo ya Njambi, kaha cinapu cangoco, vuno honi nga umo alisinga na ngolinde ya njivo ya Njambi, kaha vanamukutu nacingo cendi.’

¹⁷ Yeni tupuputua va vilema! Nkuma cika cakama, ngolinde indi njivo ya Njambi ije ilingisa ngolinde linga ipue yakulela?

¹⁸ Kaha mukahandeka ngueni, ‘Nga umo alisinga na mutula, kaha cinapu cangoco, vuno honi nga umo alisinga na vuana vuje vuli ha mutula, kaha vanamukutu nacingo cendi.’

¹⁹ Yeni vantu vatupuputua! Nkuma cika cakama, vuana indi mutula uje ulingisa vuana linga vupue vuakulela?

²⁰ Nankuma uoshe uje alisinga na mutula, nalisingi nauo na vioshe vije viliho,

²¹ kaha uoshe uje alisinga na njivo ya Njambi, nalisingi nayo na uoshe uje uakalamo,

²² kaha uoshe uje alisinga na lilu, nalisingi na litanda lia Njambi na uoshe uje uatumamaho.

²³ “Cisingo kuli yeni, valongisi va lishiko na Vafaliseo, yeni vaka civem-bulu! Omuo yeni mukahana cavulikumi ca viuma vije mukatovesa mu visapa sapa via minte na ndilu na kumine, nakuyengula viuma viaseho via lishiko, via vusunga na cikeketima na lutsilielo, vije vimuapandele kulinga cakuhona kuyengula vikuavo.

²⁴ Yeni vantuaama vatupuputua, mukahumisa mbulumbulu mu viakunua vieni nakuminisa kamelu!

²⁵ “Cisingo kuli yeni, valongisi va lishiko na Vafaliseo, yeni vaka civem-bulu! Omuo yeni mukakushu nganja na lilonga hambanza yavio, vuno honi mukati kavio muashulu nalizangamena nakulizanga yeni vavenia.

²⁶ Yeni Vafaliseo vatupuputua! Cakulivanga tahi kusheni mukati ka nganja na lilonga, kaha na helu liavio hakatoka.

²⁷ “Cisingo kuli yeni valongisi va lishiko na Vafaliseo, yeni vaka civem-bulu! Omuo yeni munapu ngue vihilo vije vivanakushu kaha vinatoko too, vije hambanza liavio vimoneka muacili, vuno honi mukati kavio munashulu na vitsihia via vantu vakutsa na via mazilo vioshe.

²⁸ Omu mukemo neni vene mumuli nakusholoka, hambanza musholoka ngue vaka vusunga ku vantu, vuno honi mukati keni munashulu na civembulu na vupi.

*Yesu Avaleka Kashitiku
(Luka11:47-51)*

²⁹ “Cisingo kuli yeni valongisi va lishiko na Vafaliseo, yeni vaka civem-bulu! Omuo yeni mukatungu vihilo via tunanguizi va Njambi va Njambi nakupesapesa viakumunga via vaka vusunga,

³⁰ nakuhandeka ngueni, ‘Nga tuayoyele mu matangua aje a vatatetu, ngue kutualingile vije vivalingile vakevo viakumuania maninga a tunanguizi va Njambi va Njambi.’

³¹ Nankuma mulina vukaleho hali yeni vavenia, ngueni mu vana va vaje vatsihile tunanguizi va Njambi va Njambi.

³² Nkumani shulisiseni seteko ya va ishueni.

³³ Yeni manoka, yeni vana va manoka, nkuma mukateua vati cihiso ca ngehena?

³⁴ Nankuma njimitumina tunanguizi va Njambi va Njambi na vaka mana na valongisi va lishiko, vamo vaje vamukatsihia na kushukika ha cilindakano, kaha vamo mukavapupa mu vinjivo vieni via malombelo, nakuvapakesa humu mu mbonge na kuya mbonge ikuavo.

³⁵ Kaha mukatambula kashitiku ka kutsiha vantu voshe vaje vakuhona mulonga, kuhuma ku maninga aua vusunga Avele kuya ku maninga a Zakaliya muna Mbelekiya, uje imuatsihilile mukati ka njivo ya Njambi na mutula.

³⁶ Muavusunga njimileka nguange, cihiso coshe cikeja hali vantu va ntsimbu ino.

*Cizango ca Yesu hali Yelusalema
(Luka13:34-35)*

³⁷ “Yove Yelusalema, Yelusalema, mukakutsiha tunanguizi va Njambi va Njambi nakuasha mavue vaje va vanatumu kuli yove! Nkuma vintsimbu

vingahi njakunguluile vana vove hamolika ngue cali muakavutamena vana vendi mu mambava endi, kaha yove kuuatondelemo!

³⁸ Tala, njivo yove vanaiseze kaha ili mupulungua.

³⁹ Kaha njikuleka nguange, ku ukanjimonoho naua, kuvanga noho ukahandeka nguove 'Nakuisuliua uje eja mu lizina lia Muene.' "

24

Yesu Ahandeka hakunonga ca Njivo ya Njambi

(Mako13:1; Luka21:5-6)

¹ Yesu uahumine mu njivo na kuya, kaha vandongisi vendi vezile kuli ikeye nakumumuesa vinjivo na Njambi.

² Vuno honi uavakumbuluile nguendi, "Munamono viuma vioshe evi, indi kuahi? Muavusunga njihandeka kuli yeni nguange, kukuesi cipue livue limo likasala halikuavo, lije kuvakombila ha mavu."

Tuyando na Mapakeso

(Mako13:3-13; Luka21:7-19)

³ Kaha omo Yesu uatumamene ha munkinda ua Oliveta, vandongisi vendi vezile kuli ikeye muvusueke nakuhandeka nguavo, "Tuleke ntsimbu muka eci cikalingika, kaha cimueso muka cikalingiua hakuija cove na ha ntsimbu ya kuhua ca mavu?"

⁴ Kaha Yesu uavakumbuluile nguendi, "Zangameni linga keti umo akamikuise.

⁵ Omuo vavengi vakeja mu lizina liange, nguavo, 'Yange Kilistu!' kaha vakakuisa vavengi.

⁶ Kaha mukevua vinzita nakalua ka vinzita, keti mukakomoke, omuo evi viapande kulingiua, vuno honi eci keti cikeco kukotoka ca mavu.

⁷ Omuo lifuti likatengulukila lifuti likuavo, vumuene vukatengulukila vumuene vukuavo, ku kakala njala ya liangangala na mandunduma ku mitambela ya kuliseza seza.

⁸ Evi vinapu ngue kuputuka ca mushongo uakusema.

⁹ "Ambahoni vakamituala mukuyanda, nakumitsiha, kaha vaka mafuti voshe vaka mizinda omuo ya lizina liange.

¹⁰ Kaha ambahoni vavengi lutsilielo luavo lukahua, kaha vakalienda vungungu umo na mukuavo na kulizinda umo na mukuavo.

¹¹ Kaha tunanguizi va Njambi va makuli vavengi vakeja na kukuisa vavengi.

¹² Omuo kulivuezelela ca vupi cinapu cakama, kaha cizango ca vantu vavengi cikatontola.

¹³ Vuno honi uoshe uje akakateya nankuma manusuilo a kovoka.

¹⁴ Kaha muzimbu uacili ou ua vumuene vaka uambulula ha mavu oshe, kupua ngue vukaleho ku mafuti oshe, ambahoni mamanusuilo akeja.

Cimueso ca Shuama

(Mako13:14-23; Luka21:20-24)

¹⁵ "Nankuma omo mukamona cimueso ca shuama cije cahandekela kananguizi Ndaniele cinemana mu cihela ca kulela," (Yove uli na kutanda uvuisa muvinalumbunukila!)

¹⁶ Kaha eceleni vaje vali mu Yundeya vateuele ku minkinda,

¹⁷ uoshe uje hali helu lia njivo keti ashuluke ha mavu, linga ambate vije vili mu njivo yendi,

¹⁸ kaha uoshe hali mu lihia keti ahiluke kunima nakuambata cikovelo cendi.

¹⁹ Caluvinda kuli vaje vali navana na kuli vaje vajamuesa mu matangua aje!

²⁰ Lombeleni linga keti cikalingike mu cisika cipue ha litangua lia sapalalo.

²¹ Omuo honi ha matangua aje kukakala tuyando, tuje kutuakeleko hume kuputuka ca lifuti kuheta na lelo, kuahi, kaha ku cikakalako naua.

²² Kaha nga aje matangua kauakehesese nga na muntu uahi akovoka, vuno honi omuo ya vantu vendi vaje vahanguile, matangua aje vaka akehesa.

²³ “Vuno honi, nga umo ahandeka kuli yeni nguendi, ‘Talení Kilistu uno!’ cipue ‘Uje ali kuje!’ keti mucitsilie.”

²⁴ Omuo Vakilistu va makuli na tunanguizi va Njambi va makuli vakasholoka nakulinga vitantekeyeso na vikomouesa, linga vamizimbalese, nga casiuu nakuli vaje vavanahangula.

²⁵ Vuno honi njamileke ntsimbu kanda ihete.

²⁶ “Cipue nga vahandeka kuli yeni nguavo, ‘Talení ali mu mpambo,’ keti muyeko, cipue nga vahandeka nguavo, ‘Talení, ali mu mulili ua mukati!’ keti mucitsilie.”

²⁷ Omuo ngue mulengi ukahuma ku ngangela nakatua ceke kuheta na ku kangombe ka yambi, eci cikapua kuija ca Muna Muntu.

²⁸ “Kuoshe kuje kuli civimbi kukeko kukalikunguluila makuvi.

Kuija ca Muna Muntu

(Mako13:24-27; Luka21:25-28)

²⁹ “Hanima ya tuyando hamatangua aje litangua likalava, kaha ngonde kuikatu ceke, na vintanga ntanga vikaua kuhuma kuilu, kaha nzili ya melu ikaninganga.

³⁰ Ambahoni kukasholoka cimueso ca Muna Muntu muilu, kaha miyati yoshe ya hamavu ikalila, kaha vakamona Muna Muntu eja mu mashuela amuilu na nzili na vumpau vuakama.

³¹ Kaha akatuma tungelo vendi na mutambi ua lipenga, kaha akakungulula vantu vendi vahanguile kuhuma ku vimpunzi viuana, kuhuma ku mamanusuilo a muilu nakukuavo.”

Cilongesa ca Muti ua Mukuyu

(Mako13:28-31; Luka21:9-33)

³² “Lilongeseni cilongesa ca muti ua mukuyu, omuo mintango yauo ishoshela nakuhaka maputa, kaha muatantekeya nguenu ntondue ili muyehi.

³³ Kaha omo mumona viuma vioshe evi, kaha mutantekeye nguenu ntsimbu ili muyehi, ku vikolo.

³⁴ Muavusunga njimileka nguange, vantu va ntsimbu ino kuvakatsi kuvanga vuima vioshe evi vinalingitua.

³⁵ Melu na mavu vioshe vikahita, vuno honi mezi ange kuuakahu.”

Naumo uahi Atantekeya Litangua cipue Hola

(Mako13:32-37; Luka17:26-30; 34-36)

³⁶ “Vuno honi ha litangua lije cipue hola naumo uahi atantekeya, cipue vene tungelo va muilu, cipue Muana, vuno honi kuvanga lika Tate.

³⁷ Ngue mucafuile ku matangua a Noua, mukemo vene mucikafua hakuija ca Muna Muntu.

³⁸ Omuo ngue mu matangua aje tele livazi kanda lije vantu valile na kunua, kuambata na kushombuesa, kutuala na ha litangua Noua uakovelele mu vuato,

³⁹ Kaha kuvatantekeye noho livazi liezile nakuvanongesa voshe, kaha mukemo mu cikafua akuija kua Muna Mutu.

⁴⁰ Kaha vamala vavali vakapua mulihia, kaha umo vakamuambata umo vakamuseza.

⁴¹ Kaha vampuevo vavali vakatua mucini cimo, kaha umo va kamuambata, mukuavo vakamuseza.

⁴² Zangameni omuo kumutantekeya litangua lije Muene yen i akeja.

⁴³ Vuno honi tantekeyeni eci, nga liavenia njivo akatantekeya ntsimbu muka ya vutsiki muizi akeja, kaha nga akavandamena, nakumona nguendi njivo yendi kuvaituvu.

⁴⁴ Nankuma neni naua munapande kulivuahesela, omuo Muna Muntu akeja ha hola ije kumutantekeya."

Ngamba Uakulongua cipue Uakuhona kulongua (Luka12:41-48)

⁴⁵ "Iya honi ngamba ua kulongua na mana uje muene uendi uamuhakele kuendesa vakuavo vangamba nakuvahana viakulia ha ntsimbu ya kupuamo?

⁴⁶ Nakuisuliua uje ngamba omo muene uendi omo ahiluka amuuana hali nakulinga mujevene.

⁴⁷ Muavusunga njimileka nguange, akamupuisa kupua mukuluntu ua vufuko vuendi vioshe.

⁴⁸ Vuno honi nga uje ngamba uendi uamupi ahandeka kuli ikeye vavenia nguendi, 'Muene uange neshuala kuhiluka,'

⁴⁹ kaha aputuka kupupa vangamba vakuavo, na kulia na kunua na vaka kupenda,

⁵⁰ muene ua uje ngamba akeja ha litangua olio ka movandamenene na hola ije katantekeya,

⁵¹ kaha akamuhana kashitiko na kumuhaka hamo nava kacivembulu, vantu vaje vakalila na kulishumanga ku mazo."

25

Cisimo ca Vambanda Likumi

¹ "Ha ntsimbu ije vumuene vua muilu vaka vuesekeza ngue vambanda likumi vaje vambatele vindeya viavo nakuya linga vakaliuane na liavenia vulo.

² Vuno honi ava vatanu vapuile viheve, kaha vatanu vapuile vamaana.

³ Omo vaje vambanda vakuheva vambatele vindeya viavo, kuvambatele na mazi eka naua,

⁴ vuno honi vaje vamaana vambatele mazi mu vintsazi na mu vindeya viavo.

⁵ Kaha omo uje liavenia vulo uakotokelele kuija, kaha voshe vaje vambanda vanengukile na kuya mutulo."

⁶ "Vuno honi mukati ka vutsiki vevuile mutambi nguavo, 'Talen i liavenia vulo uje hali nakuija! Tuhukeni linga muliuane nendi.'

⁷ Kaha voshe vaje vambanda vahindukile nakushukumisa vindeya viavo.

⁸ Kaha vaje vakuheva vahankekele kuli vamaana nguavo, 'Tuhaneniko amo mazi eni, omuo vindeya vietu vitonda kuzima.'

⁹ Vuno honi vaje vambanda vamaana vakumbuluile nguavo, 'Kutupuisamo kulipangelauo yetu neni, yemuye kuli vakakulandesa linga mukalilande yen i vavenia.'

¹⁰ Kaha tele vanayi mukulanda, liavenia vulo uezile, kaha vaje valivuaheselele vaile nendi ku ciuano ca vulo, kaha vashokele ku cikolo."

¹¹ "Hanima honi vaje vambanda vaviheve vezile vahandekela nguavo, 'Muene, muene, tushokolueleko.'

¹² Vuno honi uavakumbuluile nguendi, 'Muavusunga njihandeka kuli yen i nguange, kunjimitantekeya.' "

¹³ Nankuma zangameni, omuo kumutantekeya litangua cipue hola.

*Cisimo ca Vangamba Vatatu
(Luka19:11-27)*

¹⁴ "Kaha naua Yesu uavalekele nguendi, vumuene vua mui lu vukafua ngue yala omo aya mu vungenzi kaha asana vangamba vendi, naku-vasezela vupite vuendi.

¹⁵ Kuli umo uahanene makulukazi atanu a vimbazuvuila via ngolinde, kuli mukuavo makulukazi aval i a vimbazuvuila via ngolinde, kuli mukuavo likulukazi limo lia vimbazuvuila via ngolinde, kuya kuvipangi viavo kaha uaille.

¹⁶ Kaha uje uatambuile makulukazi atanu a vimbazuvuila via ngolinde uaille hajevene uakavilanduluile, kaha uakapangeleleho naua makulukazi atanu a vimbazuvuila via ngolinde.

¹⁷ Kaha naua na uje mukuavo uatambuile makulukazi aval i a vimbazuvuila via ngolinde, uapangeleleho naua makulukazi aval i a vimbazuvuila via ngolinde.

¹⁸ Vuno honi uje ngamba uatambuile likulukazi limo lia vimbazuvuila via ngolinde uaille, nakukahinda cina nakushitikamo vimbongo via muene uendi."

¹⁹ "Omo kuetile matangua amengi muene ua vaje vangamba uehilukile kaha uatandele navo vije vimbazuvuila via ngolinde.

²⁰ Kaha uje uatambuile makulukazi atanu a vimbazuvuila via ngolinde uezile, kaha uaneheleleho naua makulukazi atanu a vimbazuvuila via ngolinde, nakuhandeka nguendi, 'Muene uanji hanene makulukazi atanu a vimbazuvuila via ngolinde, kaha naua njapangelaho makulukazi atanu a vimbazuvuila via ngolinde eka naua.'

²¹ "Muene uendi uahandekela kuli ikeye nguendi, 'Ualingi muacili, ngamba uacili uakunkokama! Unapu uakunkokama a viuma via vindende, njikakupuisa mukuluntu uaviuma viavingi. Kovala mukuvuahelele ca muene yove.' "

²² "Kaha na uje uatambuile makulukazi aval i a vimbazuvuila via ngolinde uezile kuli ikeye nguendi, 'Muene uanji hanene makulukazi aval i a vimbazuvuila via ngolinde, hano njapangelaho makulukazi aval i a vimbazuvuila via ngolinde eka naua.' "

²³ "Muene uendi uahandekela kuli ikeye nguendi, 'Ualingi muacili, ngamba uacili uakunkokama! Unapu uakunkokama a viuma via vindende, njikakupuisa mukuluntu uaviuma viavingi. Kovala mukuvuahelele ca muene yove.' "

²⁴ "Kaha na uje uatambuile likulukazi limo, lia ngolinde uezile, uahandekela kuli muene uendi nguendi, 'Muene njakutantekeya nguange uapua u muntu uamukalu cikuma, ukateja vije kuuakuvile, kaha ukakungulula vije kuuashanduile,

²⁵ kaha njevuile liova, kaha njaille nakushitika ngolinde yove mu livu. Viuma viov e vi.' "

²⁶ Vuno honi muene uendi uamukumbuluile nguendi, "Yove ngamba uamupi ua cilenda! Uatantekeyele nguove njikateje kuje kunjakuville, kaha njikakungulula vije kunjashanduile?

²⁷ Ambahoni uasinganiekele kutulikisa vimbongo viange kuli vakakutulika vimbongo, kaha nga hakuija cange ngue njatambuile vije viapuile viange na kakondueso kayo.

²⁸ Mutambuleni vimbongo vije vili kuli ikeye, kaha vianeni kuli uje hali na makulukazi avimbongo likumi.

²⁹ Omuo uje alinavio vakamuvuezelelako, kaha akakala na viavingi, vuno honi uje kesi navio, cipue vene vije via vindende vialinavio vakamuniekavio.

³⁰ Nakushekela ngamba uje kesi nacimo ha mbaza ya milima, kuje vantu vakalila na kulishumanga mazo avo.'

Kusompa ca Mamanusulo

³¹ "Omo Muna Muntu akeja mu vumpau vuendi, hamo na tungelo vendi voshe, kaha akatumama halitanda liendi lia vumpau.

³² Kuli ikeye miyati yoshe ya vantu ikalikungulula, kaha akavatepesa umo ku mukuavo ngue kaniungi muakatepesa vampanga ku vampembe,

³³ Kaha akahaka vampanga ku livoko liendi lia cilio, vuno honi vampembe ku livoko liendi lia cimoshue.

³⁴ Ambahoni Muene akahandeka kuli vaje vali ku livoko liendi lia cilio nguendi, 'Ijeni, yeni vanakuisuliua kuli Tate suaneni vumuene vuje vuanamivuaheselele kuhuma ha luvula lua mavu.

³⁵ Omuo njakele na njala muanjihanene viakulia, kaha omo njakele na mpuila muanjihanene mema akunua, kaha omo njakele njimungezi muanjitambuile,

³⁶ njakele mitotototo muacizikile, njakele nakuvavala kaha muanjimekelele, njakele mu kamenga kaha muezile mukunjimona.'

³⁷ Ambahoni vaka vusunga vakamukumbulula nguavo, 'Muene, kuli tuakumuene uli na njala kaha tuakulisile, cipue unevu mpuila kaha tuakunuisile?

³⁸ Kaha kuli tuakumuene umungezi kaha tuakutambuile cipue mutotototo kaha tuakuzikile?

³⁹ Kaha kuli tuakumuene uli nakuvavala cipue uli mu kamenga kaha tuezile nakukumona?'

⁴⁰ Kaha muene akavakumbulula nguendi, 'Muavusunga njimileka nguange omo muacilingile ku vamo ava va vusamba vange, mua cilingile kuli yange.'

⁴¹ Ambahoni akahandeka kuli voshe vaje vali ku livoko liendi lia cimoshue nguendi, 'Humeni kuli yange, yeni vaka kusingua! Yeni mu tuhia tua miaka yoshe tuje tuvanavuahesela liyavolo na tungelo vendi.

⁴² Omuo njakele na njala kumuanjihanene via kulia, njakele na mpuila kumuanjihanene mema akunua,

⁴³ njakele njimungezi kaha kumuanjitambuile, njakele mitotototo kaha kumuanjizikile, njavavalele nakukala mukamenga kaha kumuacimenekelele.'

⁴⁴ Ambahoni navakevo vakakumbulula nguavo, 'Muene kuli tuakumuene uli na njala, cipue uli na mpuila, cipue umungezi, cipue mutotototo, cipue uvavala, cipue mu kamenga, kaha kutuakukuasele?'

⁴⁵ Ambahoni akavakumbulula nguendi, 'Muavusunga njimileka nguange, ngue muje kumuacilingile kuli umo uava vavandende, kumuacilingile kuli yange'

⁴⁶ Kaha vakaya mukashitiko ka miaka yoshe, vuno honi vaka vusunga vakakovala mu muono ua yaye."

26

*Vutumbe vua Kutsiha Yesu**(Mako14:1-2; Luka22:1-2; Iuano11:45-53)*

¹ Omo Yesu uamanusuile kuhandeka vuima vioshe evi, uahandekela kuli vandongisi vendi nguendi,

² “Muatantekeya ngueni omo munima ya matangua avali paseka ili na kuija, kaha Muna Muntu vaka muhana linga vakamushukike hacilin-dakano.”

³ Ambahoni vakuluntu vatusasendote na vakuluntu va vantu valikungu-luile mu lipela lia kasasendote uakama, uje ivatumbuile nguavo Kayafase,

⁴ kaha vatumbile vutumbe hamo linga vakute Yesu mu vushueke naku-mutsiha.

⁵ Vuno honi vahandekela nguavo, “Keti a ciuano, hamo vantu vakaneha mpindangano.”

*Vavuavesa Yesu ku Mbeteniya**(Mako14:3-9; Iuano12:1-8)*

⁶ Kaha omo Yesu uakele ku Mbeteniya mu njivo ya Simoni yala uje uakele na mbumba,

⁷ Omo Yesu te uakele nakulia kumesa, mpuevo umo uezile kuli ikeye na ntsazi ya mazi andando yakama hakunika luengo luacili, kaha uahetilele ha mutue ua Yesu.

⁸ Vuno honi omo vandongisi vacimuene vanienguele cikuma nakuhan-deka nguavo, “Nkuma vika apihisila mazi?”

⁹ Omuo mazi aua vapandele kuualandesa na ndando yakama, nakuana vimbongo vihutu.”

¹⁰ Vuno honi Yesu uatantekeyele vioshe evi, uahandekela kuli vakevo nguendi, “Nkuma vika muli nakushupila ou mpuevo? Omuo na lingi cuma ca cili kuli yange.

¹¹ Omuo yeni ntsimbu yoshe muakala na vihutu, vuno honi ntsimbu yoshe yeni kumukakala nange.

¹² Ha kunjitila aua mazi a muvila uange na cilingi kunjivua hesela kunjitsinda.

¹³ Muavusunga njimileka nguange, kuoshe kuje ku vakambulula muz-imbu uacili ha mavu uoshe, evi vianalingi ou mpuevo vakavihandeka mukumuvulukilaho.”

*Yundasa Atava kuenda Yesu Vungungu**(Mako14:10-11; Luka22:3-6)*

¹⁴ Kaha umo ua vaje vandongi likumi na vavali uje ivatumbuile nguavo Yundasa Isakaliote, uale kuli vakuluntu vatusasendote,

¹⁵ na kuhandeka nguendi, “Vika mukanjihana nga njiminehelaye?” Kaha vamufuetele makumi atatu a vimbongo via siliva.

¹⁶ Kaha kuhuma ha ntsimbu ije uatondesesele ngila ya kuendelamo Yesu vungungu.

*Yesu Alia na Vandongisi Vendi ku Ciuano ca Paseka**(Mako14:12-21; Luka22:7-13; 21:23; Iuano13:21-30)*

¹⁷ Ha litangua lia kulivanga lia mbolo ya kuhona cimbaluila vandongisi vezile kuli Yesu nakuhandeka nguavo, “Kuli utonda yetu nguove tukuvua-hesele linga ukalileko paseka?”

¹⁸ Uahandekela nguendi, “Yeni mu nganda kuli yala umo, kaha muka-handeke kuli ikeye ngueni, ‘Mulongisi nahandeka nguendi, ntsimbu yange

inahete, njikalinga ciuano ca paseka mu njivo yove hamo na vandongisi vange.”

¹⁹ Kaha vaje vandongisi valingile ngue muje Yesu uavalekele, kaha vavuahesele ciuano ca paseka.

²⁰ Omo vetele ku cinguezi, Yesu uatumamene kumesa na vandongisi likumi na vavali,

²¹ kaha omo vakele na kulia, uahandeketele nguendi, “Muavusunga, Njihandeka ku liyeni nguange, umo ueni akanjenda vungungu.”

²² Kaha vakele na vusiua cikuma, kaha vaputukile kuhandeka kuli umo na mukuavo nguavo, “Muene yange ndi?”

²³ Yesu uavakumbulule nguendi, “Uje akatanta hamo nange mu lilonga, ikeye vene akanjenda vungungu.

²⁴ Omuo Muna Muntu akatsa ngue muje vanacisoneka hali ikeye, vuno honi tuyando hali uje yala enda vungungu Muna Muntu! Ngue capuile cacili kuli uje yala nga kasemukile.”

²⁵ Yundasa uje uamuendekele vungungu uendekele nguendi, “Muene yange ndi?” Yesu uahandeketele kuli ikeye nguendi, “Omo vene munahandeka.”

Mesa ya Muene

(Mako14:22-26; Luka22:14-20; 1 Kolinte11:23-25)

²⁶ Kaha honi omo vakele nakulia, Yesu ua mbatele mbolo, na ku ikuisula, kaha uaipazuile, naku ihana kuli vandongisi vendi, nguendi “Ambateni mulie ou ukeuo muvila uange.”

²⁷ Kaha uambatele nganja, kaha omo uamanuisuile kusantsela uava-hanene, nguendi “Nuenimo mu vavoshe,

²⁸ omuo aua akeuo maninga ange a litavasano lihaliha, aje anamuaniena hali vavengi mukukonekela vupi.

²⁹ Njimileka nguange, kunjikanuho naua vushuka vua viniu kuvanga noho ha litangua lije omo njikanua neni vushuka vua viniu vuavuha mu vumuene vua Tate,”

³⁰ Kaha omo vamanusuile kuimba muaso, vaile ku munkinda ua Oliveta.

Yesu Ahandeka nguendi Petulu Akamuviana

(Mako14:27-31; Luka22:31-34; Iuano13:36-38)

³¹ Kaha Yesu uahandeketele kuli vandongisi vendi nguendi, “Muva voshe mukateua omuo yange vutsiki vuno vene, omuo vacisoneka nguavo, ‘Njikapupa kanuingi, kaha vutanga vua vampanga vukalishandoka!’

³² Vuno honi hanima ya kunjisangula, njikaya kulutue lueni ku Ngalileya.”

³³ Petulu uahandeketele kuli ikeye nguendi, “Cipue vene voshe vakakuteua, yange kunjikakuteue.”

³⁴ Yesu uahandeketele kuli Petulu nguendi, “Muavusunga njikuleka nguange, vutsiki vuno vene, ntsimbu kanda ndemba atambeke ukanjiviana lutatu nguove kuunjitantekeya.”

³⁵ Petulu uahandeketele kuli ikeye nguendi, “Cipue vene nga kutsa nove, kunjikakuviana.” Kaha na vandongisi vakuavo voshe vahandeketele ngoco vene.

Yesu Alombela mu Ngetesemani

(Mako14:32-42; Luka2:39-46)

³⁶ Ambahoni Yesu uale navo kumutambela uvatumbuile nguavo Ngetesemani, kaha uahandeketele kuli vandongisi vendi nguendi, “Tumameni hano ntsimbu njiciya nakulombela.”

³⁷ Kaha uaile na Petulu na vana va Zembendeo vavali, kaha hajevene uaputukile kulivua vusiuu na kulinienga.

³⁸ Kaha uahandekele kuli vakevo nguendi, “Muono uange uli muvusiua noho kukutsa, saleni hano, nakutalelela hamo nange.”

³⁹ Kaha uaile halahako cindende, uatsikamene hamavu na kulombela nguendi, “Tate, nga casiua, ecela eyi nganja injipulakane, keti kulingiue cizango cange, vuno honi kulingiue cizango cove.”

⁴⁰ Kaha uehilukile kuli vandongisi vendi uavauanene vanakosa tulo, kaha uahandekele kuli Petulu nguendi, “Nkuma kuuasa kutalelela nange cipue hola imo lika indi?”

⁴¹ Taleleni nakulombela linga keti mukovele mu vieseko, cilivene cimbe-mbesi citonda, vuno honi ntsitu inazeye.”

⁴² Uaile naua lua mucivali na kulombela nguendi, “Tate, nga kucasuia nganja eyi kunjipulaka kuvanga vene njiinuine, kaha ecela cizango cove cilingiue.”

⁴³ Kaha naua uahilukile nakuuana vanakosa tulo, omuo mesho avo alemene.

⁴⁴ Nankuma, uavasezele naua, uaile nakulombela luamucitatu, uahandekele mezi acifua cimo.

⁴⁵ Kaha uezile kuli vandongisi vendi nakuhandeka nguendi, “Nkuma hanga muacikosa na kuhiima? Taleni, hola inahete laja, kaha Muna muntu vanamuende vungungu nakumuhana ku mavoko a vaka vupi.

⁴⁶ Hindukeni tuyeni, taleni muka kunjenda vungungu uno hali hano.”

Yesu Vamukuata

(Mako14:43-50; Luka22:47-53; Iuano18:3-12)

⁴⁷ Tele Yesu acili nakuhandeka, Yundasa uezile, uje umu ua vandongisi likumi na vavali, kaha uezile na vivunga viakama vezile na mikuale na vimbueti, kuhuminina kuli vakuluntu va tusasendote na vakuluntu va vantu.

⁴⁸ Kaha honi mukakuenda vungungu uavahanene cimueso uahandekele nguendi, “Uje njikatsemba ikeye yala mukakuata.”

⁴⁹ Kaha hajevene uezile kuli Yesu nakuhandeka nguendi, “Uahinduka vati, mulongisi!” Kaha uamutsembele.

⁵⁰ Yesu uamukumbuluile nguendi “Yove kavusamba, linga vuasi vije viunezila.” Mukemo honi vezile nakumukuata nakumuvumbatela cikuma.

⁵¹ Kaha taleni, umu ua vaje vakele navo Yesu uahumisile mukuale uendi, nakuluisa ngamba ua kasasendote uakama kaha uamutetele lituitui liendi.

⁵² Ambahoni Yesu uahandekele kuli ikeye nguendi, “Haka mukuale uove mu cindalo cauo, omuo voshe vaje vakambata mukuale vakatsa ku mukuale.

⁵³ Nkuma musinganieka ngueni kunjasa kulomba kuli Tate, kaha hajevene akanjitumina masualale va tungelo likumi na vavali ndi?

⁵⁴ Vuno honi kaha vatihoni visoneka vikalishulisisa, ngeci cikafue muje?”

⁵⁵ Ha hola ijevene Yesu uahandekele ku vivunga nguendi, “Nkuma muneja ngue muakuluisa muhuza, na mikuale na vimbueti mukukuata yange ndi? Ha litangua na litangua njatumamene mu njivo ya Njambi nakulongesa kaha kumuanjikutile.

⁵⁶ Vuno honi viosehe evi vinalingiua linga visoneka via tunanguizi va Njambi va Njambi vilishulisise.”

Ambahoni vandongisi vendi voshe vamusezele nakuteua.

Vasompa Yesu ku Mesho a Mpunga

(Mako14:53-65; Luka22:54-55;63-71; Iuano18:13-14-19-24)

57 Ambahoni vaje vakutile Yesu vamutualele kuli Kayafase kasasendote uakama, kuje kuvaliku nguluilile valongisi va lishiko na vakuluntu.

58 Vuno honi Petulu uakele nakumukava halahako, halahako noho vahetele ku cipango ca kasasendote uakama, kaha omo uakovelele mukati uatumamene na vaka kuniunga linga amone vika vikalingiua.

59 Kaha honi vakuluntu va tusasendote na mpunga yoshe vahanene vukaleho vua makuli hali Yesu linga vamutsihileho,

60 vuno honi kuvauaneneho cipue vumo, cipue vene nguavo kuakele vakaleho vavengi va makuli. Kaha kumamanusulo vavali vezile kulutue,

61 nakuhandeka nguavo, "Ou mukueta uahandেকেle nguendi, 'Njasa kusiula eyi njivo ya Njambi nakuitunga naua mu matangua atatu.'"

62 Kaha uje kasasendote uakama uemanene nakuhandeka nguendi, "Nkuma kuuesi nacikumbululo ndi? Vikahoni ava vamala alinaku kuvangeya?"

63 Vuno honi Yesu uaholokele lika kuluu. Kaha kasasendote uakama uahandেকেle kuli ikeye nguendi, "Njikusinga mu lizina lia Njambi uakuyoya, tuleke nga yove Kilistu, Muna Njambi."

64 Kaha Yesu uahandেকেle kuli ikeye nguendi, "Omu vene munahandeka mukemo. Vuno honi njimileka nguange, kuhuma ha ntsimbu ino mukamona Muna Muntu natumama ku livoko liacilio lia muka Nzili yoshe, kaha akeja mu mashelua a muilu."

65 Ambahoni uje kasasendote uakama uatavuile cikovelo cendi nakuhandeka nguendi, "Nashaula Njambi. Vika naua tutondela vakaleho veka? Munevu honi kushaula cendi.

66 Nkuma musompa ngueni vati?"

Vamukumbuluile nguavo, "Napande kutsa."

67 Ambahoni vamujekuilile ku cihanga cendi nakumupupa, kaha vamo vamupupile vimbanda

68 nakuhandeka nguavo, "Kilistu, handeka vunanguizi kuli yetu! Iya nakupupu?"

Petulu Aviana Yesu

(Mako14:66-72; Luka22:56-62; Iuano18:15-18;25-27)

69 Honi Petulu uatumamene hambanza lia cipango. Kaha ngamba uampuevo uezile kuli ikeye nakuhandeka nguendi, "Nove vene uakele na Yesu uaku Ngallileya."

70 Vuno honi uavianene ku mesho avo voshe nguendi, "Kunjitantekeya evi uli nakuhandeka."

71 Kaha omo uaile hambanza lia cikolo, ngamba mukuavo uampuevo uamumuene kaha uahandেকেle ku vantu vaje vemanene kuje nguendi, "Ou yala uakele hamo na Yesu uaku Nazaleta."

72 Kaha naua uavianene nacisingo nguendi, "Kunjimutantekeya ou yala."

73 Hanima ya kantsimbu kakandende vaje vantu vemanene kuje vezile nakuhandeka kuli Petulu nguavo, "Cilivene nove naua umo uavo, omuo handekesi yove ikeyo ikujombolola."

74 Ambahoni Petulu uaputukile kuhandeka visingo hali ikeye vavenia nakulisinga nguendi, "Kunjimutantekeya ou yala." Kaha hajevene ndemba uatambekele.

75 Kaha Petulu uanukile vije viahandেকেle Yesu nguendi, "Kanda ndemba atambeke ukanjiviana lutatu." Kaha uaile hambanza nakulila cikuma.

27

Yesu Vamutuala kuli Pilato

(Mako15:1; Luka23:1-2; Iuano8:28-32)

¹ Omo cimene cahetele vakuluntu vatusasendote voshe na vakuluntu va vantu vatumbile vutumbe vuakuluisa Yesu ngeci vamutsihe.

² Kaha vamukutile nakumutuala kuli Pilato uje uapuile nguvulu.

Yundasa Alishukika

(Vilinga1:18-19)

³ Omo Yundasa uje uamuendele vungungu uamuene nguendi vana-muhisa, uatengulukile nakuhiluisa vije vimbongo via siliva makumi atatu kuli vakuluntu vatusasendote na vakuluntu,

⁴ uahandekele nguendi, “Njinalingi vupi hakuenda vungungu maninga akuhona mulonga.” Kaha vamukumbuluile nguavo, “Vikahoni ovio kuli yetu? Ouo mulonga uove.”

⁵ Kaha Yundasa uombilile vije vimbongo via siliva mu njivo ya Njambi, kaha uaille nakukalishukika.

⁶ Vuno honi vakuluntu vatusasendote omo vambatele vije vimbongo via siliva, vahandekele nguavo, “Kuya ku lishiko kucapandele kuvihaka mu mbango, omuo vinapu vimbongo via maninga.”

⁷ Nankuma valitavasanene linga vavilande lihia lia uje muka kushonga vindeho, ngeci lipue lia kutsindila vangezi.

⁸ Nankuma, nakuheta nalelo lino lije lihia valisana nguavo lihia lia maninga.

⁹ Ambahoni vialishulisilile vije viahandekele kananguizi ua Njambi Yelemaya nguendi, “Kaha vambatele vimbongo via siliva makumi atatu, a ndando yendi ije ndando ivayonguele vamo vana va Isaleli,

¹⁰ kaha vavipangesele kulanda lihia lia muka-kushonga vindeho, ngue muje Muene muavashikililemo.”

Pilato Ehula Yesu

(Mako15:2-5; Luka23:3-5; Iuano18:33-38)

¹¹ Kaha Yesu uemanene ku mesho a nguvulu ua Valoma, kaha nguvulu uamuhile nguendi, “Yove Muene ua Vayunda ndi?” Yesu uamukumbuluile nguendi,

“Omu munahandeka mukemo vene.”

¹² Vuno honi omo vamuvangeyele kuli vakuluntu va tusasendote na vakuluntu, kavakumbuluile.

¹³ Ambahoni Pilato uahandekele kuli ikeye nguendi, “Nkuma kuuesi nakuvua viuma evi vivali nakuhana vukaleho hali yove indi?”

¹⁴ Vuno honi kamukumbuluile cipue kamandende, Kaha honi nguvulu ualikomokelele cikuma.

Yesu Vamusompela Kutsa

(Mako15:6-15; Luka23:13-25; Iuano18:39; 19:16)

¹⁵ Honi ku ciuano uje nguvulu kuya ku lishiko liavo, uapandele kuhu-misila civunga umo va vinzinda uje ivatondele.

¹⁶ Kaha ha ntsimbu ije kuakele cinzinda uje uakuhona kuivua, ivatum-buile nguavo Mbalambasa.

¹⁷ Omo valikunguilile hamo Pilato uahandekele kuli vakevo nguendi, “Iya mutonda linga njimihumisile Mbalambasa indi Yesu uje ivatumbula nguavo Kilistu indi?”

¹⁸ Omuo Pilato uatantekeyele nguendi omo ya cipululu cavo mukemo vamunehelleye Yesu.

19 Oku tele Pilato natumama ha citumamo cakusompela, mpuevo yendi uatumine lizi kuli ikeye nguendi, “Keti ulinge cimo kuli ou yala ua vusunga, omuo njinayanda cikuma kumulota.”

20 Kaha vakuluntu vatusasendote na vakuluntu visindiye vantu linga valombe Mbalambasa kaha Yesu vamutsihe.

21 Kaha nguvulu uavehuile naua nguendi, “Kuli ava vantu vavali iya mutonda linga njimihumisile?” Vahandekele nguavo, “Mbalambasa.”

22 Pilato uahandekele kuli vakevo nguendi, “Amba vika honi njikalinga nou Yesu ivatumbula Kilistu?” Kaha voshe vahandekele nguavo, “Mushukike.”

23 Kaha uahandekele nguendi, “Vupi muka vuanalingi?” Vuno honi voshe vatambekele cikuma nguavo, “Vamushukike.”

24 Kaha honi omo Pilato uamuene nguendi nacimo cauanaho cahi, vuno honi mpindangano ili nakuputuka, uambatele mema na kutana ku mavoko endi ha mesho acivunga, nakuhandeka nguendi, “Yange kunjesi namulonga ha maninga ou yala, limueneni yeni vavenia.”

25 Kaha vantu voshe vamukumbuluile nguavo, “Maninga endi akale hali yetu na vana vetu!”

26 Kaha uavahanene Mbalambasa, kaha hakumanusula kupupa Yesu, uavahaneneye linga vamushukike.

Masualale Vashendumuna Yesu (Mako15:16-20; Iuano19:2-3)

27 Ambahoni masualale vanguvulu vambatele Yesu nakumutuala mulipela, kaha vakunguluile civunga coshe ca masualale kuli ikeye.

28 Vamushuluile, nakumuzika kazaku kakuvenga.

29 Kaha vavindile cilongo ca mambimbo vacakele kumutue uendi, kaha vamuakele lihongo mu livoko liendi lia cilio. Vatsikamene ku mesho endi na kumushendumuna nguavo, “Uahinduka, Muene ua Vayunda!”

30 Kaha vamujekeulile mate, kaha vambatele lihongo vamupupile ku mutue.

31 Munima ya kumushendumuna, vamushuluile kazaku, nakumuzika vuzalo vuendi nakumutuala mukumushukika.

Yesu Vamushukika ha Cilindakano (Mako15:21-32; Luka23:26-43; Iuano19:17-27)

32 Omuo vakele nakuya, valiuanene na yala uaku Silene, lizina liendi Simoni, ou yala vamusindiye kuambata cilindakano ca Yesu.

33 Kaha omo vahetele ha cihela civasana nguavo Ngolongota (Cije cilumbununa nguaco cihela ca cikola),

34 vamuhanene viniu linga anue, va vikumbasanene na niangua, vuno honi omo uamakeleleko, kavinuine.

35 Kaha omo vamanusuile ku mushukika, valipangezelele vuzalo vuendi hhakati kavo mukuta nkela,

36 ambahoni vatumamene hamavu oku vali nakumutalela.

37 Kaha helu lia mutue uendi vahakeleho cimueso caviye vamuhisile navio nguavio, “Ou ikeye Yesu, Muene ua Vayunda.”

38 Honi vamushukikile na mihuza vavali, umo kucilio umo kucimoshue.

39 Kaha vaje vakele nakuhita vamushauile, nakuningangesa mitue yavo.

40 Kaha vahandekele nguavo, “Yove uatondele kusiula njivo ya Njambi nakuitunga mu matangua atatu, liovole yove vavenia! Nga u Muna Njambi, huma ha cilindakano.”

⁴¹ Nankuma vakuluntu vatusasendote na va valongisi va lishiko na vakuluntu vamushendumuine nguavo,

⁴² "Uovuela vakuavo, vuno honi kasa kuliovola ikeye vavenia. Ikeye Muene ua Isaleli, ashuluke kuhuma hacilindakano, kaha tumutsiliela.

⁴³ Uatsiliela muli Njambi, eceni Njambi amuhielele hano vene, nga amuzanga, omuo uahandekela nguendi, 'Yange Muna Njambi!' "

⁴⁴ Kaha na mihuza vaje vavamushukikile hamo nendi vamatukile navo naua.

Kutsa ca Yesu

(Mako15:33-41; Luka23:44-49; Iuano19:28-30)

⁴⁵ Honi kuhuma mutania kutuala ha hola ya mucitatu ya mutania uacinguezi kuakele milima ha mavu hoshe.

⁴⁶ Kaha ha hola ya mucitatu ya mutania uacinguezi Yesu ualilile mukutambakana nguendi, "Eloi, Eloi, lema sambakatani?" Kulumbununa nguavo, "Njambi yange, Njambi yange, vika uanjisezela?"

⁴⁷ Kaha vamo vantu vaje vemanene kuje omo vovuile eci, vahandekela nguavo, "Ou yala alinakusana Eliya."

⁴⁸ Kaha umo uavo hajevene uashatukile nakukambata mupelo, kaha ua umbuitikile mu viniu via kushasha naku ukutilila ku lihongo kaha uamuhanene linga anue.

⁴⁹ Vuno honi vamo vahandekela nguavo, "Vandameneni, tuyeni tumone indi Eliya eja nakumuovola."

⁵⁰ Kaha Yesu ualilile nakutambakana naua, kaha uecelele cimbembesi cendi.

⁵¹ Kaha taleni, ntanga ya mu njivo ya Njambi yatavukile hhakati, kuhuma kuilu nakuheta ha mavu. Kaha mavu aningangele, kaha na mavue atavukile,

⁵² na vihilo naua navio viashokolokele, kaha mivila yaingi ya vaje vaka kulela vaje vatsile vaisanguile.

⁵³ Kaha omo vahumine mu vihilo hanima yakusanguka ca Yesu, vaile mu nganda ya kulela nakukalisholola ku vantu vavengi.

⁵⁴ Omo uje mukuluntu ua masualale na vaje vakele navo vaje vakele nakuniunga Yesu, vamuene mandunduma na vije vialingiuile, kaha vovuile liova cikuma nakuhandeka nguavo, "Muavusunga vene ou uapuile Muna Njambi!"

⁵⁵ Kuje vene kuakele naua na vampuevo vavengi, vaje vakele nakutalela alahako, vaje vakavele Yesu kuhuma ku Ngalileya oku tele vali nakumu-pangela.

⁵⁶ Vamo vavo vapuile Maliya Mangandalena, na Maliya vaina ya Tiango na Yosefa, na vaina ya vana va Zembendeo.

Vatsinda Yesu

(Mako15:42-47; Luka23:50-56; Iuano19:38-42)

⁵⁷ Omo cinguezi cahetele, kuezile yala umo ua kufuka uaku Alamatiya, lizina liendi Yosefa, uje na ikeye naua uapuile ndongisi ua Yesu.

⁵⁸ Uahile kuli Pilato nakulomba muvila ua Yesu. Ambahoni Pilato uashikile nguendi linga vamuhanueo.

⁵⁹ Kaha Yosefa uambatele muvila ua Yesu naku uzengela ha ntanga ya iha ya liniu,

⁶⁰ kaha ua ulangekele mu cihilo caciha cendi vavenia, cije cacokuele mu livue, kaha uakokelele livue liakama ku cikolo ca cihilo, kaha uaille.

⁶¹ Maliya Mangandalena na Maliya mukuavo vatumamene kuje oku vanatalesa ha cihilo.

Vaka Kuniunga ku Cihilo

⁶² Liamukuavo, hanima ya litangua liakulivuahesela lije likelio litangua lia Sapalalo, vakuluntu va tusasendote na Vafaliseo valikunguluile kuli Pilato,

⁶³ kaha vahandeketele nguavo, “Muene, tuanuka muje uje muka kukuisa uahandeketele tele aciyoya nguendi, ‘Hanima ya matangua atatu njikasanguka naua.’

⁶⁴ Nankuma shika vaje tuniungi linga vaniunge muacili cihilo noho ha litangua lia mucitatu. Ketu ngoconu hamo vandongisi vendi vakeja nakuiva muvula uendi, kaha vakaleka vantu nguove, ‘Nasanguka kuvatsi,’ kaha aua makuli akukotokela akapua amapi cikuma kupulakana aje akulivanga.”

⁶⁵ Pilato uahandeketele kuli vakevo nguendi, “Muli na mukakuniunga ua masualale, yeni mukaniunge muacili cihilo kuya muje mumuaselamo.”

⁶⁶ Nankuma vaile nakuniunga cije cihilo, kaha vaciniungile mukuhaka kasateso ku livue nakuhakako muka kuniunga.

28

Kusanguka ca Yesu

(Mako16:1-10; Luka24:1-12; Iuano20:1-10)

¹ Honi hanima ya sapalalo, ha ntsimbu yakuca ca litangua liakulivanga musondo, Maliya Mangandalena na Maliya mukuavo vaile mukumona ku cihilo.

² Kaha taleni, kuakele mandunduma akama, omuo kangelo ua Muene uashulukile kuhuma muilu, kuija nakuhumisa livue lije liakele ku cihilo kaha uatumameneho.

³ Cifua cendi cafuile ngue muhiato, kaha vuzalo vuendi vuatokele too ngue mpemba.

⁴ Omuo ya liova lia kangelo, vaje vaka kuniunga ku cihilo vajajele cikuma kaha valezumukile.

⁵ Vuno honi uje kangelo uahandeketele kuli vaje vampuevo nguendi, “Keti muvue liova, omuo njatantekeya nguange mulinakutonda Yesu, uje ivashukikile.

⁶ Uahimo muno, nasanguka, ngue muje muahandeketele. Ijeni, taleni mu cihela muje muakosele.

⁷ Ambahoni yeni vuasi vuasi, mukaleke vandongisi vendi nguenu, ‘Nasanguka ku vatsi, kaha taleni, nalivanga laja kuya ku Ngalileya, kuje kukeko kukumamumuena.’ Taleni njamileke.”

⁸ Kaha vaje vampuevo vahumine ku cihilo vuasi vuasi na liova na kujolelela cikuma, vashatukile na kukaleka vandongisi vendi.

⁹ Kaha taleni, hajevene Yesu ualiuanene navo nakuhandeka nguendi, “Tambokeni.” Kaha vezile kuli ikeye nakumukuata ku viliato viendi nakumulemesa.

¹⁰ Ambahoni Yesu uahandeketele kuli vakevo nguendi, “Keti muvue liova, yeni mukalekese vamuanetu vaye ku Ngalileya, kaha kuje kukeko vakanjimuena.”

Vukaleho vua Vaka Kuniunga

¹¹ Tele vali nakuya, taleni, vamo va masualale vaile mu nganda nakuleka vakuluntu va tusasendote viosehe vije vialinguiile.

¹² Kaha omo valiuanene hamolika na vakuluntu nakutumba vutumbe vuavo, vahanene vimbongo masualale

¹³ nakuhandeka nguavo, "Leken i vantu ngueni, 'Vandongisi vendi vanezile vutsiki nakuiva muvula uendi tele tuli mutulo.'

¹⁴ Ngahoni eci ciheta mu matuitui a nguvulu, tukamuzika zika, linga keti mukale muvukalu."

¹⁵ Ambahoni vambatele vije vimbongo kaha valingile ngue muje vavalekelese, kaha lutsimo lua muzimbu ou luashandokelele hhakati ka Vayunda kuheta na lelo lino.

Yesu Alisholola kuli Vandongisi vendi

(Mako16:14-18; Luka24:36-49; Iuano20:19-23; Vilinga1:6-8)

¹⁶ Honi vandongisi likumi na umo vaille ku Ngalileya, ku munkinda kuje Yesu uavalekele.

¹⁷ Kaha omo vamumuene vamulemesele, vuno honi vamo valikanouelele.

¹⁸ Kaha Yesu uezile nakuhandeka kuli vakevo nguendi, "Nzili yoshe yakama ya muilu na ya ha mavu vanaihana kuli yange.

¹⁹ Nankuma yeni mukapuisse mafuti oshe vandongisi, mukavambuitike mu lizina lia Tate, na lia Muana, na lia Cimbembesi Ukulela,

²⁰ valongeseni kuononoka viuma viose vije vinjinamishiki, kaha taleni, njikakala neni kutuala ku mamanusuilo a mavu."

Muzimbu Uacili uasonekele MAKO Citsindikisi

Kuambulula ca Iuano Muka Kumbuitika

(Mateu3:1-12; Luka3:1-18; Iuano1:19-28)

- ¹ Kuputuka kua muzimbu uacili ua Yesu Kilistu, Muna Njambi.
- ² Ngue omuo vacisoneka kuli kananguizi ua Njambi Isaya nguavo, "Talen, 'Njikatuma kanganda kange kulutue luove, uje akavuahesa ngila yove.'
- ³ 'Lizi liaumo hali nakutambeka mu mpambo, vuaheseni ngila ya Muene, sungameseni ngila yendi.' "
- ⁴ Kaha Iuano muka kumbuitika uasholokele mu mpambo, uambuluile kumbuitika ca kutenguluka ca kusambua ku vupi.
- ⁵ Kaha vantu voshe vaile kuli ikeye, vaje vahumine mu lifuti lia Yundeya, na vantu voshe va mu Yelusalema, valitavelele vipi vuavo kaha vavambuitikile kuli ikeye mu Ndonga ya Yundau.
- ⁶ Kaha Iuano uazalele vuzalo vua maka a kamelu, na muiva ua cilambu mu mbunda yendi, naua uakele nakulia vambimba na vuci.
- ⁷ Kaha uambuluile nguendi, "Munima yange muli nakuija uje hali na nzili kupulakana yange, cipue miva ya vinkaku viendi kunjasa kukotama na kuizitula.
- ⁸ Njamimbuitika na mema, vuno honi ikeye akamimbuitika na Cimbem-besi Uakulela."

Kumbuitika na Vieseko via Yesu

(Mateu3:13; 4:11; Luka3:21-22; 4:1-13)

- ⁹ Ha matangua aje, Yesu uahumine ku Nazaleta mu Ngalileya, kaha vamumbuitikile kuli Iuano mu Yundau.
- ¹⁰ Kaha omuo Yesu uahumine mu mema, hajevene uamuene melu ashokoloka, kaha Cimbembesi uashulukilile hali ikeye mucifua ca livembe.
- ¹¹ Kaha lizi liahumine muilu ngualio, "U Munange injazanga, muli yove njivuahelela."
- ¹² Hajevene Cimbembesi ua mutualele mu mpambo.
- ¹³ Kaha uakele mu mpambo matangua makumi auana, mukumueseka kuli Satana. Uakele nakuyoya na vikashama kaha tungelo vamusimpisile.

Yesu Asana Vandongisi Vakulivanga

(Mateu4:12-22; Luka4:14-15; 5:1-11)

- ¹⁴ Hanima yakukuta Iuano muka kumbuitika, Yesu uaile ku Ngalileya, mukuambulula muzimbu uacili ua Njambi,
- ¹⁵ kaha uahandekele nguendi, "Ntsimbu inalishulisisa, vumuene vua Njambi vuli muyehi, tengulukeni, kaha tsilieleni mu muzimbu uacili."
- ¹⁶ Kaha omo uakele nakuhita kumukulo ua cisali ca Ngalileya, uamuene Simoni na muanaye Anduleo valinakuta manda vuavo mu cisali, omuo vapuile vakakuta vantsi.
- ¹⁷ Kaha Yesu uahandekele kuli vakevo nguendi, "Njikaveni njimipuisse vakakuta vantu."
- ¹⁸ Kaha hajevene vasezele manda avo kaha vamukavele.

¹⁹ Kaha omo uatualeleleho kuenda, uamuene Tiango muna Zembendeo na Iuano muanaye, vaje vakele mu vuato vuavo nakutungulula manda avo.

²⁰ Hajevene uavasanene kaha vasezele ishavo Zembendeo mu vuato hamo na vangamba vaje va vakumuine, kaha vamukavele.

Yesu Ahumisa Cimbembesi Cacipi

(Luka4:31-37)

²¹ Yesu na vandongisi vauana vaile ku Kapenauma, kaha omo liapuile lia sapalalo uakovelele mu njivo ya malombelo na kulongesa.

²² Kaha vakomokele hakulongesa kuendi, omuo uavalongesele ngue uje hali na nzili yakama, keti ngue muvakalongsela valongisi va mashiko.

²³ Hajevene mu njivo ya malombelo muakele yala uje uakele na cimbembesi cacipi,

²⁴ kaha uatambekele nguendi, "Utonda vika kuli yetu, Yesu ua ku Nazaleta? Uneja nakutunongesa ndi? Njakutantekeya yove uje Umo Uakulela ua Njambi."

²⁵ Kaha Yesu uamutenukilile nguendi, "Holoka kuluu, huma muli ikeye!"

²⁶ Kaha cimbembesi cacipi ca mupindisile, nakulila na lizi liakutambeka, kaha cahumine muli ikeye.

²⁷ Kaha vantu voshe valikomokelele, nakulihozola umu na mukuavo nguavo, "Nkuma cika eci? Cilongesa caciha! Na nzili yakama asa kushika cipue cimbembesi cacipi, kaha cimuononoka."

²⁸ Kaha hajevene lutsimo luendi lua tsimanene kunitambela yoshe ya ku zenguluka Ngalileya.

Yesu Akanguisa Vantu Vavengi

(Mateu8:14-17; Luka4:38-41)

²⁹ Hajevene Yesu uahumine mu njivo ya malombelo, kaha uakakovelele mu njivo ya Simoni na Anduleo, hamo na Tiango na Iuano.

³⁰ Honi vaina mueno ya Simoni vakosele omuo vakele nakuvavala lisikasika, kaha hajevene valekesele Yesu kuvavala cendi.

³¹ Kaha uezile nakumukuata ku livoko, uamuhinduile, kaha masikasika amuecelele, uaputukile kuvapangela.

³² Kaha ku cinguezi, omo litangua lia lahukile Yesu vamunehелеle voshe vaka kuvavala na vaje vakele na mahamba.

³³ Kaha vantu voshe va mu nganda valikunguluile hamo ku cikolo.

³⁴ Yesu uakanguisile vavengi vaka kuvavala mishongo yakuliseza seza, nakuhumisa mahamba amengi, kaha katavesele mahamba kuhandeka, omuo vamutantekeyele.

Yesu Alombela ku Cihela Calikaliendi

(Luka4:42-44)

³⁵ Kaha ku cimene mene Yesu uahindikile, nakuya ku cihela calikaliendi lika nakulombela.

³⁶ Kaha Simoni na vaje vakele nendi, vamukavele nakumutonda,

³⁷ Vamuuanene kaha vahandekela kuli ikeye nguavo, "Muntu uoshe alinakukutonda."

³⁸ Kaha Yesu uahandekela kuli vakevo nguendi, "Tuyeni ku vimbonge via kulihata, linga njikambulule muzimbu nakuje naua, omuo eci cikeco njezilile."

³⁹ Kaha uaile muoshe mu Ngalileya, nakuambulula muzimbu uacili mu vinjivo via malombelo avo nakuhumisa mahamba.

Yesu Akanguisa Yala ua Mbumba

(Mateu8:1-4; Luka5:12-16)

⁴⁰ Kaha uje yala uakele na mbumba uzele kuli ikeye nakumulambelega, uatsikamene nakuhandeka kuli ikeye nguendi, "Nga utonda, njipuisse uakulela."

⁴¹ Yesu hakuivua ngozi, uoluele livoko liendi na kumukuata, nakuhandeka kuli ikeye nguendi, "Njitonda, lela."

⁴² Kaha hajevene mbumba yamuhumine, kaha uapuile uakulela.

⁴³ Uamunanguile cikuma, nakumuleka aye vuasi vuasi,

⁴⁴ nakumuleka nguendi, "Keti uhandeke cuma cimo kuli uoshe, vuno honi ya, linga ukalimuese yove vavenia kuli tusasendote, kaha ukahane nkombelo ije Mosesa uashikile ha kulela cove linga vupue vukaleho kuli vantu."

⁴⁵ Vuno honi uale nakuhandeka oku nazituka, kaha muzimbu uashanduokelele kuoshe, linga Yesu keti akovela mu mbonge citona muelu, vuno honi uale ku mitambela yeka ya lifuti, kaha vantu vakele nakuija kuli ikeye mu vintsimbu.

2

Yesu Akanguisa Yala ua Kalepa

(Mateu9:1-8; Luka5:17-26)

¹ Hanima ya matangua amandende, Yesu uahilukile naua mu Kape-nauma, kaha vantu vovuile nguavo Yesu nahiluka kuimbo.

² Vantu vakungulukile muvuingi, kaha kukuakele cipue mulili umo uasaleleko uahi, cipue hambanza ya cikolo, kaha uambuluile lizi kuli vakevo.

³ Vamo vamala vauana vambatele yala ua kalepa kaha vamunehela kuli Yesu.

⁴ Kaha omuo vahonouele kushuena kuli Yesu omuo ya civunga, kaha vatuvile mbengua ha ciluli mukemo vasoselele cije citala tala cije uje yala uakalepa ha kosele na kucineha ha mavu.

⁵ Kaha omuo Yesu uamuene lutsilielo luavo, uahandekela kuli uje muka kalepa nguendi, "Munange vipi vovie vanavisambuesa."

⁶ Nankuma vamo valongisi va lishiko vaje vatumamene kuje, vakele na kulihuoza mu mitima yavo nguavo,

⁷ "Vika ou yala ahandekela ngacije? Alinakushaula! Iya asa kusambuesa vipi, vuno honi Njambi lika?"

⁸ Hajevene Yesu mu cimbembesi uatantekeyele vivakele na kusinganieka mu mitima yavo, kaha uavehuile nguendi "Vikahoni muli na kulihuoza mu mitima yeni?"

⁹ Cili cinapu cacasi, kuhandeka kuli muka kalepa nguove, 'Vipi vovie vanavisambesa,' cipue kuhandeka nguove 'Katuka, ambata citala tala cove uye?'

¹⁰ Vuno honi njitonda nguange mutantekeye nguene Muna Muntu hali na nzili yakama ya kusambesa vupi hano ha mavu." Uahandekela kuli uje yala ua kalepa nguendi,

¹¹ "Njikuleka nguange, katuka, ambata citala tala cove uye kuimbo."

¹² Kaha uakutukile, hajevene uambatele citala tala cendi nakuya oku vantu voshe vamumono, kaha vakomokele nakulemesa Njambi nguavo, "Kanda tumoneho cuma cakufua ngacije!"

Yesu Asana Levi

(Mateu9:9-13; Luka5:25-32)

¹³ Yesu uaille naua ku ngenge ya cisali, kaha civunga cakama cakungu-lukile kuli ikeye, kaha uaputukile kuvalongesa.

¹⁴ Kaha omuo uahitile, uamuene Levi muna Alufeya, natumama ku njivo yakutambula lisimu, kaha Yesu uahandekele kuli ikeye nguendi, “Njikave.” Kaha Levi uakatukile nakumukava.

¹⁵ Kaha omuo uatumamene ku mesa mu njivo yendi, vuingi vuavakaku-tambula lisimu na vaka vupi vatumamene na Yesu na vandongisi vendi, omuo vavengi vamukavele.

¹⁶ Kaha valongisi va lishiko vaje vapuile Vafaliseo omo vamuene Yesu hali nakulia na vaka vupi na vakakutambula lisimu, vehuile vandongisi vendi nguavo, “Vika vialila na vakakutambula lisimu na vaka vupi?”

¹⁷ Kaha omo Yesu vovuile eci, uahandekele kuli vakevo nguendi, “Vaje kuvavavala kuvasa kutonda cimbanda, vuno honi kuvanga lika vaje vavavala, kunjezile nakusana vaje vaka vusunga, vuno honi vaka vupi.”

Cihula ca Kuluimina Kulia

(Mateu9:14-17; Luka5:33-39)

¹⁸ Omo vandongisi va Iuano na Vafaliseo valiuminine kulia, kaha vantu vamo vezile kuli Yesu nakumuihula nguavo, “Vatihoni vandongisi va Iuano na vandongisi va Vafaliseo valuimina kulia, vuno honi vandongisi vove kuva luimina kulia?”

¹⁹ Kaha Yesu uahandekele kuli vakevo nguendi, “Nkuma nga mungenzi neja ku ciuano ca vulo asa kuluimina kulia oku vavenia vulo hali navo ndi? Kuahi kuvasa kuluimina kulia nga vali na vavenia vulo.

²⁰ Vuno honi matangua akeja, omo vavenia vulo vakamuhumisa kuli vakevo, ambahoni valumine kulia.

²¹ “Naumo uahi asa kutongela citopeko ca ntanga yaiha ha kazaku kalaja, nga alinga ngoco, kaha citopeko cikataavula kazaku kalaja nakuseza mbengua.

²² Kaha naumo uahi ahaka viniu via viha mu vinjeke via vilambu via laja, nga alinga ngoco, kaha viniu vitavula vilambu, kaha na viniu vika hita, na vilambu naua navikevio vikapihia, vuno honi viniu viaviha viapande kukala mu vilambu viaviha.”

Cihula caha Litangua lia Sapalalo

(Mateu12:1-8; Luka6:1-5)

²³ Ha litangua limo lia sapalalo Yesu uahitile mu mehia a tiliku, kaha omo vakele nakuhita vandongisi vendi vaputukile kutomona mitue ya vinona.

²⁴ Kaha Vafaliseo vahandekele kuli ikeye nguavo, “Tala, vika valingila evi vivanavindika mu lishiko ha litangua lia sapalalo?”

²⁵ Kaha uahandekele kuli vakevo nguendi, “Kanda mutandeho vialingile Ndaviti, omo uatsile njala kaha uatondele kulia, ikeye navaje vakele navo,

²⁶ uakovelele mu njivo ya Nambi, omo Aviyatale uapuile kasasendote uakama ha ntsimbu ije, kaha ualile mbolo ya cikombelo ca Njambi cije kucapuile lishiko kuli muntu uoshe kuvanga lika kuli tusasendote ku vilia, kaha naua uahaneneko nakuli vaje vakele navo.”

²⁷ Kaha uahandekele kuli vakevo nguendi, “Sapalalo vaipangelele omuo muntu, keti muntu ivatangelele sapalalo,

²⁸ kaha Muna Muntu ikeye vene Muene ya sapalalo.”

3

Yala uakusekua Livoko

(Mateu12:9-14; Luka6:6-11)

¹ Naua Yesu uakovelele mu njivo ya malombelo, muje muakele uje yala uakusekua livoko.

² Kaha vamutalelele linga vamone indi amukanguisa ha litangua lia sapalalo, linga vamuuaneneho mulonga.

³ Kaha uahandekele kuli uje yala uakusekua livoko nguendi, "Tja kuno."

⁴ Kaha uahandekele kuli vakevo nguendi, "Kuya ku lishiko lia Sapalalo, nkuma cinapu cacili kulinga muacili indi kuvulumuna, kuyoyesa muono indi kutsiha?" Vuno honi vaholokele kuluu.

⁵ Uavatalele oku te naniengua, nakulivua vusua ha kukolesa mitima yavo, kaha uahandekele kuli uje yala uakusekua livoko nguendi, "Olola livoko liove." Ualioluele, kaha livoko liendi liakangukile.

⁶ Vafaliseo vatuhukilemo, kaha hajevene vakele na mpunga ya Helonde linga vauane ngila ya kumutshilamo.

Civunga ca vantu ku cisali

⁷ Yesu na vandongisi vendi vahumine ku cisali, kaha civunga cakama caku Ngalileya neci ca ku Yundeya camukavele,

⁸ naku Yelusalema naku Indumeya vamo musinia ya Yundau, vamo vahumine ku Tile na Sindone, civunga cakama omuo covuile vije vialingile vezile kuli ikeye.

⁹ Kaha Yesu ualekele vandongisi vendi linga vamuvuahesele vuato omuo ya civunga kuteua vamutseka,

¹⁰ omuo ha kukanguisa vavengi, ngeci navaje voshe vakele na mishongo vamusindakanene linga vamukuute.

¹¹ Kaha hali hoshe omo vaje vakele na vimbembesi via vipi vamumuene, vauilile ha mavu ku mesho endi nakutambeka nguavo, "Yove Muna Njambi."

¹² Kaha uavashika linga keti vamutantekeyese.

Yesu Ahangula Tunganda Likumi na Vavali

(Mateu10:1-4; Luka6:12-16)

¹³ Kaha Yesu uaille helu lia munkinda, uasanene vaje vatondele, kaha vezile kuli ikeye.

¹⁴ Kaha uahanguile likumi na vavali, linga vakale nendi, ngeci avatume kuya nakuambulula lizi,

¹⁵ na kupua na nzili yakama yakuhumisa mahamba.

¹⁶ Ava vakevo likumi na vavali vaje vahanguile, Simoni uje ya lukile Petulu,

¹⁷ Tiango muna Zembendeo, na Iuano munaina ya Tiango, vaje valukile Mboanengesi, nkumbu yalio ngualio, "Vana va cililimo."

¹⁸ Anduleo, na Filipu, na Mbatolomeo, na Mateu, na Tomasi, na Tiango muna Alufeya, na Tandeo, na Simoni uaku Kanana,

¹⁹ na Yundasa Sakaliote, uje uendele Yesu vungungu.

Yesu vamuvangeya nguavo hali na lihamba lia Mbelezembulu

(Mateu12:22-32; Luka11:14-23; 12:10)

²⁰ Yesu na vandongisi vendi vakovelele mu njivo, kaha civunga calianene hamo naua, kaha vahonouele kulia.

²¹ Kaha omo ntanga yendi yovuile ha cuma eci, vaile na kumuambata omuo vamuene nguavo, "Nazaluka."

²² Kaha valongisi va lishiko vaje vasikumukile kuhuma ku Yelusalema vahandekele nguavo, "Vali nakumupangesa kuli Mbelezembulu, muene ua mahamba ikeye namuhana nzili yakuhumisa mahamba."

²³ Kaha Yesu uavasanene linga veje kuli ikeye, kaha uahandekela kuli vakevo mu visimo nguendi, “Nkuma vati Satana asa kuhumisa Satana?”

²⁴ Nga vumuene vulipanga hhakati kavuo vavenia, kaha vumuene vuje vukanonga.

²⁵ Kaha nga njivo ilipanga hhakati ikeyo vavenia, ije njivo kuikemana.

²⁶ Kaha nga Satana aliluia ikeye vavenia kaha alipanga, kahasa kuimana, vuno honi alinakuya ku mamanusulo.

²⁷ Kaha naumo uahi akovela mu njivo ya yala ua nzili nakupukula vitenga viendi, cakulivanga kuvanga akute uje yala ua nzili, ambahoni apukule njivo yendi.

²⁸ “Cilivene, njihandeka kuli yove nguange, vupi vuoshe vua vantu vakavukonekela, nakushaula kuje kuvakahandeka,

²⁹ vuno honi uoshe uje ashaula Cimbembesi Uakulela ku vaka-mukonekela, omuo nalingi vupi vuakuhona kuhua.”

³⁰ omuo vahandekela nguavo, “Alina na Cimbembesi cacipi.”

Vaina ya Yesu na va muanaye

(Mateu12:46-50; Luka8:19-21)

³¹ Kaha vaina na vamuanaye vezile nakuimana hambanza nakumutumu muntu linga vakamusane.

³² Kaha civunga cije camuzengelekele te vatumama, vahandekela kuli ikeye nguavo, “Vanoko na vamuanoko vali hambanza, mu kukutonda.”

³³ Kaha uavakumbuluile nguendi, “Veya vanana nava muanetu?”

³⁴ Kaha omuo uatalele vaje vamuzengelekele, uahandekela nguendi, “Ava vakevo vanana na vamuanetu!”

³⁵ Uoshe uje alinga cizango ca Njambi, ikeye muanetu, na ndumbuange, na vanana.”

4

Cisimo ca Muka Kukuva

(Mateu13:1-9; Luka8:4-8)

¹ Kaha naua Yesu uaputukile kulongesa ku cikuma ca cisali. Kaha na civunga ca vantu calikunguluile kuli ikeye, kaha uakovelele nakutumama mu vuato ha cisali, kaha civunga coshe cakele ku cikuma ca cisali ha ntunda.

² Kaha uavalongesele viavingi mu visimo, kaha mu vilongesa viendi uahandekela kuli vakevo nguendi,

³ “Ivuilileni! Muka kukuva uaile nakukuva.

⁴ Kaha omo uakunine, imo mbuto yautilile kumukulo ua ngila, kaha tuzila vezile nakuilia.

⁵ Imo mbuto yautilile ha mavue aje kuuakele na mavu amengi, kaha hajevene yasokele omuo kuhakele mavu amengi,

⁶ kaha omuo litangua lia tuhukile vije vimbuto via juuamene, omuo mizi kuyakovelele cikuma mu mavu kaha yomine.

⁷ Ikuavo mbuto yautilile mu mingonga kaha mingonga yakolele nakuitua, kaha kuya hakele vinona.

⁸ Kaha vikuavo vimbuto viautilile mu mavu acili, kaha viahakele vinona viavingi, kaha viakolele nakulivuezelela kuima, vimo viemine makumi atatu, vikuavo viemine makumi atanu na limo, kaha vikuavo viemine cihita.”

⁹ Kaha Yesu uahandekela kuli vakevo nguendi, “Uoshe hali na matuitui ovue.”

Omumo vika Yesu ualikuasesele Visimo

(Mateu13:10-17; Luka8:9-10)

¹⁰ Omo uakele lika liendi, kaha vaje vakele kuyehi nendi hamo na vandongisi vendi likumi na vavali vamuhuile via ha visimo.

¹¹ Kaha uahandekele kuli vakevo nguendi, “Kuli yeni vaje vavanahana vushueke vua vumuene vua Njambi, vuno honi kuli vaje vali hambanza vioshe vili mu visimo,

¹² nankuma linga,

“Vamone

vuno honi keti vamonesese,

kaha linga vovue,

vuno honi keti vovuisise.

Omo nga valingamo vakatenguluke na kuvasambesa.”

Yesu Alumbununa Cisimo ca Muka Kukuva

(Mateu13:18-23; Luka8:11-15)

¹³ Kaha Yesu uahandekele kuli vakevo nguendi, “Nkuma kumuesi nakuvisisa eci cisimo ndi? Kaha nkuma vatihoni mukevivuisisa visimo vioshe?

¹⁴ Muka kukuva akakuvu lizi.

¹⁵ Ava vakevo vantu vanalifu ngue vimbuto vije viauilile kumukulo ua ngila, kuje lizi valikuva, kaha omo valivua, kaha hajevene Satana eja nakuambata lije lizi livanakuvu muli vakevo.

¹⁶ Kaha vamo vantu vanapu ngue vimbuto vije vivakuvile ha mavue, omo vevua lizi, kaha hajevene valitambula nanzolela,

¹⁷ kaha kuvesi na mizi muli vakevo, vuno honi kuvakasimbula nalio, kaha omo tuyando cipue mapakeso vikeja omuo ya lizi, kaha hajevene vakaua.

¹⁸ Kaha vamo vantu ngue vimbuto vije vivakuvile mu mingonga, ava vakevo vaje vevua lizi,

¹⁹ vuno honi vakevo vaniunga via mavu na kuzanga vufuko, kaha nalishungu lia viuma vieka vikovela nakutuva lizi, kaha kulimi vushuka.

²⁰ Vuno honi vije vivakuvile mu mavu acili, vanapu vaje vevua lizi nakulitambula na kuima vushuka, makumi atatu na makumi atanu na limo, na cihita.”

Ndeya ha Citumbiko cayo

(Luka8:16-18)

²¹ Kaha Yesu uahandekele kuli vakevo nguendi, “Nkuma muntu akanehe ndeya nakuihaka muntsi lia liendeko, cipue muntsa muhela ndi? Nkuma kaihaka ha citumbiko cayo ndi?

²² Omuo nacimo cahi cuma cakushueka, cihonoua kuija hakutoka, kaha naua nacimo cahi ca vushueke civahonoua kuneha ku ceke.

²³ Nga uoshe uje hali na matuitui evue.”

²⁴ Kaha uahandekele kuli vakevo nguendi, “Niungeni vimuli na kuivua, seteko muhana ikeyo vakamihana neni naua, vuno honi yeni vakamivuezelelako.

²⁵ Uoshe hali naviavingi vakamuvuezelelako, kaha uje kesi, cipue cije cali naco va kamutambulaco.”

Cisimo ca Mbutu ya Kumena

²⁶ Kaha Yesu uahandekele nguendi, “Vumuene vua Njambi vanapu ngue muntu akuvu mbutu mu mavu,

²⁷ cipue vene akosa tulo omo ahinduka vije vimbuto vimena na kukola vutsiki na mutania, vuno honi katantekeya muvili nakukolelamo.

²⁸ Cakulivanga mavu akahaka cishati, kaha mutue, kaha vinona ku mitue.

²⁹ Vuno honi omo vimbuto vinahi, hajevene uavitejele na mpoko ya kutejesa omuo ntsimbu ya kuteja yahetele.”

Cisimo ca Mbuto ya Musalata

(Mateu13:31;32;34; Luka13:18-19)

³⁰ Kaha Yesu uahandeketele nguendi, “Vumuene vua Njambi tukavusetekesa na vika, cipue cisimo muka tukalikuasesa hali vukevuo?”

³¹ Vunapu ngue nona ya musalata, ije omo vaikuva mu mavu, kaha ikeyo yapua ya indende cikuma ku vimbuto vioshe via ha mavu.

³² Vuno honi omo vaikuva kaha ikakola na kupua yakama kupulakana viputa vioshe, kaha ikahaka mintango yakama, ngeci tuzila va mulu vapangelemo mashua mu cimbembe cayo.”

³³ Omuo ya visimo viavingi evi, Yesu uahandeketele lizi kuli vakevo kuya nomu muvahaselele kulivuisisa.

³⁴ Kahandeketele kuli vakevo kuakuhona cisimo, vuno honi kumukulo uakele nakulumbunuina vandongisi vendi viuma voshe.

Yesu Aholuesa Linkimba

(Mateu8:23-27; Luka8:22-25)

³⁵ Ha litangua lije, omo capuile cinguezi, Yesu uahandeketele kuli vandongisi vendi nguendi, “Tuyeni musinia lia cisali.”

³⁶ Kaha omo vasezele civunga vaile nakukovela nendi mu vuato. Kaha na mato eka akele nendi.

³⁷ Kaha linkimba liakama lia mpunzi liezile, kaha na mankimba aputukile kukovela mu vuato, kaha na vuato vuaputukile kushula.

³⁸ Vuno honi Yesu uakele kuntongo uakosele tulo oku najendamena ha musato, kaha vamuhinduile nakuhandeka kuli ikeye nguavo, “Mulongisi, kuuazivukile nguove tutsa ndi?”

³⁹ Kaha uahindikile nakutenukila mpunzi, kaha uahandeketele ku mankimba nguendi, “Ciyulo! Holoka!” Kaha mpunzi yaholokele, kaha kuakele kuholoka cakama kuluu.

⁴⁰ Kaha uahandeketele kuli vakevo nguendi, “Vika muteua? Kumuesi na lutsilielo ndi?”

⁴¹ Kaha vakele na liova, kaha vahandeketele kuli umo na mukuavo nguavo, “Iya honi ou, cipue mpunzi na mankimba vimuivula?”

5

Yesu Akanguisa Yala ua Vimbembesi Viaviipi

(Mateu8:28-34; Luka8:26-39)

¹ Yesu na vandongisi vendi vaile musinia lia cisali, ku lifuti lia Ngelasa.

² Kaha omo uahumine mu vuato, ualiuanene na yala ha vihilo uje uakele na cimbembesi cacipi,

³ uakele nakukala ha vihilo, kaha na muntu uahi uasele kumukuta, cipue na malienge,

⁴ omuo lualuingi vakele nakumukuta na tukunju na malienge, vuno honi uakele nakuvatuzola malienge na kupokozola tukunju mu vimbazuvuila, kaha naumo uahi uakele na nzili ya ku muononuesha.

⁵ Vutsiki na mutania uakele ha vihilo na ha minkinda oku alila, nakulivetuesha ikeye vavenia na mavue.

⁶ Kaha omo uamuene Yesu kulahako, uashatukilile kuli ikeye na kumulemesa,

⁷ kaha ualilile na lizi liakutambeka nguendi, “Vika utonda kuli yange, Yesu, Muna Njambi ua Helu lia Vioshe? Njilomba mu lizina lia Njambi, keti unjiyandese.”

⁸ Omuo uahandekele kuli ikeye nguendi, “Huma muli ou yala, yove cimbembesi cacipi!”

⁹ Kaha Yesu ua muihuile nguendi, “Yove iya?” Kaha uamukumbuluile nguendi, “Yange civunga, omuo tuvavengi.”

¹⁰ Kaha vamulombele cikuma linga keti avasheke mu lifuti lije.

¹¹ Nankuma kuakele vutanga vua vangulu vakele na kulia kuje ku munkinda,

¹² kaha vije vimbembesi viavipi via mulombele nguavio, “Tushekele kuje ku vutanga vua vangulu, linga tukakovele muli vakevo.”

¹³ Kaha uavatavesele. Kaha vije vimbembesi viavipi viamuhumine, kaha viakovelele mu vutanga vua vangulu, nankuma vangulu voshe vapuile makulukazi avali, kaha vashatukile nakukakovele mu cisali muje mvakanongelegele.

¹⁴ Vaje tuniungi vateuele, kaha vakalekele vije vivamuene mu nganda na mu cifuti. Kaha vantu vezile nakumona vije vialingikile.

¹⁵ Kaha vezile kuli Yesu, kaha vamuene uje yala uakele na vimbembesi viavipi natumama kuje, nazala vuino na mana acili anahiluka muli ikeye, yala uje uakele na vimbembesi viavipi vialingikile.

¹⁶ Kaha vaje vacimuene vahandekele vije vialingikile kuli uje yala uakele na vimbembesi viavipi naku vutanga vua vangulu.

¹⁷ Kaha vaputukile kulambelega Yesu linga ahume mu cihela cavo.

¹⁸ Kaha omo uatondele ku kovele mu vuato, uje yala uakele na mahamba ua lombele linga akale nendi.

¹⁹ Vuno honi ua vianene, kaha uahandekele kuli ikeye nguendi, “Ya kuimbo kuli vavusamba vove, ukavalekese via nakulingila Muene, nomu muanakela naciikeketima hali yove.”

²⁰ Kaha uaile na kuputuka kuambulula mu Ndikapolisi (kulumbununa vinganda likumi) viuma vije viamulingilile Yesu. Kaha vantu voshe valikomokelele.

Muna Njailosi uamumbanda na Mpuevo uje uakuatele ku kazaku ka Yesu (Mateu9:18-26; Luka8:41-56)

²¹ Kaha omo Yesu uajavukile naua mu vuato kuya musinia ya cisali, civunga cakama ca vantu cakele nendi, kaha uakele kumukulo ya cisali.

²² Kaha umo mukuluntu uamu njivo ya malombelo, lizina liendi ikeye Njailosi, omo uamuene Yesu uauililile ku viliato viendi,

²³ Ua mulambelega nguendi, “Munange ua mpuevo alinakutonda kutsa. Ija ukamusaleke mavoko ove, linga akanguke na kuyoya.”

²⁴ Kaha uaile nendi. Civunga cakama ca mukavele oku vamutseka.

²⁵ Kaha kuakele mpuevo uakele na kuhita maninga ha miaka likumi naivali,

²⁶ uje uayandele cikuma ku vimbanda, uapihisile viuma viose viakele navio, vuno honi kakangukile, vuno honi mushongo uendi uatualeleho kuya kuintsi cikuma.

²⁷ Kaha omo uovuile lutsimo lua Yesu, uamukavele munima yendi mu civunga na kumukuata ku kazaku kendi.

²⁸ Omuo uahandekele nguendi, “Nga njikakuata cipue lika ku kazaku kendi kaha njikakanguka.”

²⁹ Kaha hajevene aje maninga emanene, kaha uovuile mu muvila uendi nguendi nakanguka ku mushongo uendi.

³⁰ Kaha Yesu uovuile nzili yahumine mu muli ikeye, kaha hajevene uatengulukilele ku civunga, nakuhandekele nguendi, "Iya nakuata ku kazaku kange?"

³¹ Kaha vandongisi vendi vahandekele kuli ikeye nguavo, "Unamono civunga cili nakukutseka vuno honi uhandeka nguove, Iya nanjikuata?"

³² Kaha uatalele talele linga amone uje ualingile eci.

³³ Vuno honi uje mpuevo ha kutantekeya cije calingiule kuli ikeye, uezile kuli Yesu na liova oku alina kujaja nakuuila ku viliato viendi, na kumulekesa vusunga vuoshe.

³⁴ Kaha uahandekele kuli ikeye nguendi, "Munange ua mpuevo, lutsilielo luove luakukanguisa, ya mu ciyulo kaha kanguka ku mushongo uove."

³⁵ Omo te acili nakuhandeka kuezile vantu kuhuma ku njivo ya mu kakuyula vamo vahandekele nguavo, "Munove ua mpuevo natsi. Vika uyandesela Mulongisi naua?"

³⁶ Vuno honi kahakeleko mangana kuli vije viva handekele, Yesu uahandekele kuli muka kuyula ua mu njivo ya malombelo nguendi, "Keti uteue, tsiliela lika."

³⁷ Katavesele muntu uoshe kumukava kuvanga lika Petulu na Tiango na Iuano munaina ya Tiango.

³⁸ Omo vahetele ku njivo ya muka kuyula ua njivo ya malombelo, uamuene vitanga, na vantu valila nakukangoka cikuma.

³⁹ Kaha omo uakovelele, uahandekele kuli vakevo nguendi, "Vika mukangokela na kulila? Kanike katsile vuno honi nakosa tulo."

⁴⁰ Kaha vamujolele. Kaha uavatuhisile voshe hambanza, kaha uambatele vaishe ya muana na vanaye navaje vakele navo, kaha vaile muje muakele uje kanike.

⁴¹ Umukuatele ku livoko nakuhandeka kuli ikeye nguendi, "Talita kumi." Kulumbununa, "Kanike ka mpuevo, njihandeka kuli yove nguange hinduka."

⁴² Hajevene uje kanike ka mpuevo uahindukile na kuenda (uakele na miaka likumi na ivali), kaha voshe valikomokelele.

⁴³ Kaha ua vasinkikile cikuma nguendi, keti kukale cipue umo napande kutantekeya eci, kaha uavalekele vamuhane viakulia alie.

6

Yesu Vamuviana ku Nazaleta (Mateu13:53-58; Luka4:16-30)

¹ Kaha Yesu uahumine kuje na kuya ku lifuti liendi, na vandongisi vendi vamukavele.

² Kaha ha litangua lia sapalalo uaputukile kulongesa mu njivo ya malombelo, kaha vavengi vamuivuile valikomokelele, nakuhandeka nguavo, "Ou yala kulihoni kuanauana evi vioshe? Mana muka vamuhanene ikeye? Vikomouesa muka viali nakupanga na mavoko endi!

³ Nkuma ou keti ikeye muka kushonga, muna Maliya na muanaye Tiango na Yosefa na Yundasa na Simoni ndi? Kaha vandumbueni kutuesi navo hano ndi?" Kaha vakevo vamuvianene.

⁴ Kaha Yesu uahandekele kuli vakevo nguendi, "Kananguizi kuva-musingimika mu cifuti cendi, naku vantu vendi na mu njivo yendi vavenia."

⁵ Kaha kalingile vikomoueso viakama kuje, kuvanga lika kusaleka mavoko endi ku vantu vavandende vaka kuvavala na kuvakanguisa.

⁶ Kaha ualikomokelele omuo hakuhona lutsiluelo luavo.

Yesu Atuma Vandongisi Likumi na Vavali
(Mateu10:5-15; Luka9:1-6)

Kaha uendanganene mu membo na kulongesa.

⁷ Kaha uasanene vaje likumi na vavali uaputukile nakuvatuma vaye vali na vavali, nakuvahana nzili yakama ha vimbembesi viavipi.

⁸ Uavashikile nguendi “Keti vambate cimo mu vungenzi vuavo kuvanga lika mbueti, kuakuhona mbolo, cipue njeke, cipue vimbongo mu miva yavo,

⁹ vuno honi muzale vinkaku keti kuzala vikovelo vivali.”

¹⁰ kaha mu njivo yoshe mukovela, “tumamenimo kutuala noho mukahuma mu cihela cije.

¹¹ Kaha nga cihela coshe cije kuvamitambula na kuviana kumivuulila, omo mukahumamo, litotomoneni likungu lili kuviliato vieni linga vupue vukaleho vueni hali vakevo!”

¹² Kaha vaile nakuambulula nguavo vantu vapande kutenguluka.

¹³ Kaha vahumisile mahamba vavengi, nakuvuavesa vantu vavengi vaka kuvavala na mazi nakuvakanguisa.

Kutsa kua Iuano Muka Kumbuitika
(Mateu14:1-12; Luka9:7-9)

¹⁴ Omo muene Helonde uevuile nguendi lizina lia Yesu liatsimanene cikuma. Kaha vamo vahandekele nguavo, “Iuano mukakumbuitika na sanguka kuvatsi, mukemo eyi nzili ili nakupanga muli ikeye.”

¹⁵ Vuno honi vamo vahandekele nguavo, “Ikeye Eliya.” Veka naua nguavo, “Ikeye kananguizi, ngue ua vamo va vaje tunanguizi va Njambi va laja.”

¹⁶ Vuno honi omo Helonde vovuile eci uahandekele nguendi, “Iuano uje njavatuile mutue nasanguka.”

¹⁷ Omuo Helonde uatumine linga vakuate Iuano, na kumukuta na kumutuala mu kamenga, ualingile eci omuo ya Helondiya, mpuevo ya muanaye Filipu omuo uamuambatele.

¹⁸ Omuo Iuano uahandekele kuli Helonde nguendi, “Keti lishiko kuambata mpuevo ya muanove.”

¹⁹ Kaha Helondiya uakele na citela nendi, kaha uatondele kumutsiha vuno honi uahonouele,

²⁰ omuo Helonde uateuele Iuano, omuo uatatentekeyele nguendi uapua ua vusunga na ukulela, kaha ua muniungile muacili. Omo vamuivuiile, ualikomokelele mu mutima uendi, vuno honi cipue ngoco uamutulilile.

²¹ Halitangua lije liasemukile Helonde ua uavuahesele viakulia vakakuyula na vakakushika vaje vahumine ku Ngallileya.

²² Kaha kuezile muna Helondiya ua mpuevo na kukina, uavuahesele Helonde na vangezi vendi, kaha muene uahandekele kuli uje mumbanda nguendi. “Njilombe coshe cije utonda, kaha njikakuhanaco.”

²³ Kaha ua lisingile kuli ikeye nguendi, “Coshe ulomba kuli yange njikakuhana, cipue mbazuvuila ya vumuene vuange.”

²⁴ Kaha uaile hambanza, nakuihula vaina nguendi, “Vika njikalomba?” Kaha vaina vamukumbuilile nguavo, “Lomba mutue ua Iuano mu kakumbuitika.”

²⁵ Hajevene uezile kuli muene nakulomba nguendi, “Njitonda linga unjihane mutue ua Iuano mukakumbuitika ha lilonga hano vene.”

²⁶ Kaha muene uakele na vusiua vuakama, vuno honi omuo ha kulisinga nguendi na hali vangenzi vendi, katondele kupokola mezi endi aje ahandekele kuli ikeye.

²⁷ Kaha hajevene muene uatumine lisualale uje mu ka kuniunga kaha ua mushikile linga anehe mutue ua luano. Kaha uaile nakumuteta mutue mukamenga,

²⁸ kaha vanehele mutue mulilonga, nakuhana uje mutue mumbanda, kaha uje mumbanda uauhanene vaina.

²⁹ Omo vandongisi vendi vacuvuile, vezile nakumbata muvila uendi, nakuutsinda mucihilo.

Yesu alisa makulukazi atanu

(Mateu14:13-21; Luka9:10-17; Iuano6:1-14)

³⁰ Tunganda vahilukile kuli Yesu, na kumulekesa vioshe vivalingile nevi valongesele.

³¹ Kaha uahandekile kuli vakevo nguendi, "Tuyeni ku cihela calikalietu, tukahuimeko cindende." Omuo vavengi vakele na kuija nakuya, kaha kuvauanene cipue ntsimbu ya kulia.

³² Kaha vakovelele mu vuato nakuya ku cihela cakulishueka kua likali-avo.

³³ Nkuma vavengi vavamuene oku valinakuya, kaha naua vavatan-tekeyele, kaha vashatukilile kuli ikeye kuhuma ku vinganda vioshe, kaha uavauanene kulutue luendi.

³⁴ Kaha omo muaile ha ntunda uamuene civunga cakama, kaha uavovilile ngozi, kuomu vapuile ngue vampang vakuhona kaniungi, kaha naua uaputukile kuvalongesa viuma viavingi.

³⁵ Omo kuapuile cinguezi, vandongisi vendi vezile kuli ikeye nakuhandeka nguavo, "Cino cinapu cihela ca kulishueka naua kuatoko,

³⁶ valeke vaye na kuzenguluka mu cifuti na mu membo vazenguluke linga vakalilandele viakulia vakevo vavenia."

³⁷ Vuno honi uavakumbuilile nguendi, "Vahaneni viakulia valie." Kaha vahandekile kuli ikeye nguavo,

"Tuye nakulanda vimbolo mu vimbongo viakupua vihita vivali ndinali, kaha tuvahane valie?"

³⁸ Kaha uahandekile kuli vakevo nguendi, "Muli na vimbolo vingahi? Yeni mukamone." Kaha omo vaile nakumona, vahandekile nguavo, "Kuli vimbolo vitanu, na vantsi vavali."

³⁹ Kaha ua vashikile nguendi, vatumame hamavu ha vishoni muvivunga.

⁴⁰ Kaha vatumamene hamavu muvivunga, muvihita na mumakumi atanu.

⁴¹ Kaha Yesu uambatele vimbolo vitanu na vantsi vavali kaha uatalele kuilu, na kuvivezikisa, kaha uapazuile vije vimbolo, kaha uahanene vandongisi vendi linga vahane vantu, kaha uavapangelele vaje vatsi vavali voshe.

⁴² Kaha voshe valile nakukuta.

⁴³ Vandongisi va Yesu vakunguilile vimbazuvuila via vimbolo na vatsi vije viasaleleho via kupua mitonga likumi na ivali.

⁴⁴ Kaha vantu vaje valile vimbolo vapuile vamala makulukazi atanu.

Yesu enda ha mema

(Mateu14:22-33; Iuano6:15-21)

⁴⁵ Hajevene Yesu uakele vandongisi vendi linga vakovele mu vuato vaye kulutue luendi kusinia ya Mbetesainda, te ikeye acili na kushandola civunga.

⁴⁶ Kaha omo uavasezele, uaile ku munkinda nakulombela.

⁴⁷ Kaha omo kuapuile cinguezi, vuato vuakele hhakati ka cisali kaha uakele likaliendi ha ntunda.

⁴⁸ Kaha uamuene vandongisi vendi vali mu vukalu vua mpunzi yakele na kuvaluisa. Kaha omo ntsimbu kanda kuce, uezile kuli vakevo, oku hali nakuenda ha mema. Te hali na kuvatuvakana,

⁴⁹ vuno honi omo vamumuene hali na kuenda ha cisali vasinganiekele nguavo ndumba ya muntu, kaha vatambekele cikuma,

⁵⁰ Nankuma omo vamumuene, kaha vovuile liova cikuma. Vuno honi hajevene uahandekela kuli vakevo nguendi, "Kuateni mitima, yange, keti muteue."

⁵¹ Kaha uakovelele mu vuato navo kaha na mpunzi ya holokele. Kaha valikomokelele cikuma,

⁵² omuo ku vovuisile via vije vimbolo, omuo vakolesela mitima yavo.

Yesu Akanguisa va Kakuvavala mu Ngenesaleta (Mateu14:34-36)

⁵³ Kaha omo vajavukile, vahetele ku Ngenesaleta, kaha vakutile vuato ku cikuma.

⁵⁴ Kaha omo vahumine mu vuato, hajevene vantu vmutantekeyele Yesu,

⁵⁵ kaha vashatukilile mu vihela viose kaha vaputukile kuneha vakakuvavala ha manala avo nakuvatuala kuli kuoshe kuva muivuilile.

⁵⁶ Kaha kuoshe kuje kuaile, ku membo, na muvinganda cipue mu mafuti, vakosesela vakakuvavala ha manala avo kuje ku mihela yakulandesela, vamulambelelele linga vaje vakakuvavala vamukuate kumukundilo ua kazaku kendi, kaha voshe vaje vakuateleko vakangukile.

7

Vilongesa via Vakukuluila (Mateu15:1-9)

¹ Honi omo Vafaliseo vakungulukile hamo kuli ikeye, na vamo valongisi va mashiko, vaje vahumine ku Yelusalema,

² vamuene nguavo vamo va vandongisi vendi vali na kulia na mavoko a kuhona kulela, aje akuhona kutana.

³ (Omuo Vafaliseo na Vayunda voshe, kuve kulia kuakuhona kutana ku mavoko, mukuniunga cisemua ca vakuluntu vavo.

⁴ Kaha omo vahuma ku vihela via kulandesela, kuve kulia kuvanga vavalilelesa vakevo vavenia, kaha kuli visemua viavingi vikuavo vivakaniungu, nge via kukusha vinganja na vindeho na milili.)

⁵ Kaha Vafaliseo na valongisi va mashiko vehuile Yesu nguavo, "Vika honi vandongisi vove kuve kuyoya kuya na cisemua ca vakuluntu, vuno honi vakali na mavoko akuhona kulela?"

⁶ Kaha uahandekela kuli vakevo nguendi, "Isaya uahandekela muacili ha vunanguizi vuendi hali yeni vaka civembulu nguendi, ngue muje vacisoneka nguavo,

"Vantu ava, vanjilemesa na tunua tuavo,
vuno honi mitima yavo ili kulako nange.

⁷ Vanjishangazala muangoco,
vilongesa viavo vinapu via vuntu!

⁸ "Museza lishiko lia Njambi, nakukuatelela kulinga cisemua ca vantu."

⁹ Kaha Yesu uahandekela kuli vakevo nguendi, "Munasambulula lishiko lia Njambi, linga muniungilemo cisemua ceni!

¹⁰ Omuo Mosesa uahandekela nguendi, 'Singimika isho na noko', kaha, 'Uoshe ahandeka via vipi hali ishe cipue vaina, cilivene napande kutsa',

¹¹ vuno honi muhandeka nguendi, Nga muntu aleka ishe cipue vaina nguendi, 'Viunanganiala kuli yange inapu Kombani' (kulumbununa, civanahana kuli Njambi),

¹² Kaha ku umutavesa kulinga cili coshe kuli ishe cipue vaina,

¹³ eci cinapu kuteua lizi lia Njambi mu cisemua ceni cije muakuata. Kaha na viavingi vije mukalingi."

Viuma vije vilingisa muntu kupua ua kuhona kulela
(Mateu15:10-20)

¹⁴ Kaha Yesu uasanene vantu linga veje kuli ikeye naua, kaha uahandekela kuli vakevo nguendi, "Njivuilileni, muva voshe, nakuvuisisa.

¹⁵ Nacimo cahi cihuma kumbanza ya muntu cije cikovela muli ikeye cije cihonoua kumulelesa, vuno honi viuma vije vihuma muli muntu vikevio vimupuisa linga keti apue uakulela."

¹⁶ Nga uoshe uje hali na matuitui evuilile.

¹⁷ Kaha omo uakovelele mu njivo, nakuseza vantu, vandongisi vendi vamuhuile ha cije cisimo.

¹⁸ Kaha Yesu uahandekela kuli vakevo nguendi, "Nkuma neni naua," kumuesi nakuvuisisa ndi? Nkuma kumumono nguendi, "vioshe vije vikovela mu muntu viakuhuma kumbanza kuviasa kuhona kumulelesa,

¹⁹ muomu ku cekukovela mu mutima uendi, vuno honi muzimo liendi, kaha na kutuvakana ndi?" (Nankuma mucifua eci Yesu natavesa viakulia vioshe kupua via kulela.)

²⁰ Kaha Yesu uahandekela kuli vakevo nguendi, "Vije vikahumu muli muntu vikevio kuviekulelesa muntu.

²¹ Omuo kuhuma mukati, mu mutima ua muntu, mukahumu visin-ganieka via vupi, vukoyi, kuiva, kutsiha, vupangala,

²² kuliveya, nakulinga viuma vioshe via vipi, kukuisa, na mesho mesho, cipululu, vungumba, kulihalesa, na vulema.

²³ Viuma vioshe evi via vipi vikahuminina mukati, kaha nakupuisa muntu kuhonoua kupua uakulela."

Kutsiliela kua uje mpuevo
(Mateu15:21-28)

²⁴ Kaha Yesu kuhuma kuje uakatukile nakuya ku cihela ca Tile na ku Sindone. Kaha uakovelele mu njivo, cakuhona muntu uoshe kutantekeya, vuno honi kasele kulishueka.

²⁵ Vuno honi hajevene kuakele mpuevo uakele na munendi ua mpuevo uje uakele na cimbembesi cacipi, vovuile via Yesu, kaha uezile kuli ikeye nakuuila ku viati viendi.

²⁶ Nankuma uje mpuevo uapuile Kangelengu, uasemukilile ku Fonisiya mu Siliya. Kaha ualamblelele Yesu linga ahumise lihamba muli munendi.

²⁷ Kaha Yesu uahandekela kuli ikeye nguendi, "Eceni vanike vavandende valivange kulia, omuo keti cacili kuambata mbolo ya vanike na kuyashela tutali."

²⁸ Vuno honi uje mpuevo uamukumbuluile nguendi, "Eyo Muene, cipue vene tutali vaje vavutama muintsi lia mesa valia vije vanasezeho vanike!"

²⁹ Kaha Yesu uahandekela kuli ikeye nguendi, "Omuo yakuhandeka ngacije uasa kuya, lihamba linahumu muli munove."

³⁰ Kaha uahilukile kuimbo, uauanene kanike nakosa ha muhela, na lihamba liamuhumu.

Yesu Akanguisa Yala ua Kasenda Matuitui na Kalaka

³¹ Kaha Yesu uahumine ku cihela ca Tile uahitile mu Sindone na kuya ku cisali ca Ngalileya, nakuheta mu cihela ca Ndikapolisi (kulumbununa vinganda likumi).

³² Kaha vantu vanehele yala kuli Yesu uje uapuile kasenda matuitui na kalaka, kaha valambelelele Yesu linga a musaleke mavoko endi.

³³ Kaha Yesu uamuhumisile ha civunga ca vantu nakuya nendi kua likali-avo, uakovelesele minie yendi mu matuitui endi, uajekuile, nakumukuata ha ndaka yendi,

³⁴ kaha Yesu uatalele kuilu, kaha uasisimukile, nakuhandeka kuli ikeye nguendi, "Efefata," kulumbununa nguavo, "shokoloka."

³⁵ Kaha matuitui tui endi ashokolokele, na ndaka yendi yazitukile, kaha uaputukile kuhandeka muacili.

³⁶ Kaha Yesu uashikile vantu linga keti valekeko cimo umo, vuno honi cipue uavashikile ngoco ambahoni vatualeleleho kuambulula.

³⁷ Kaha vantu vakomokele cikuma nakuhandeka nguavo, "Nalingi viuma vioshe muacili, cipue tusenda matuitui tui vovua na tuveveve vahandeka."

8

Yesu Alisa makulukazi Auana a Vantu

(Mateu15:32-39)

¹ Ha matangua aje, omo civunga cakama naua cakungulukile, kaha vahonouele viakulia, Yesu uasanene vandongisi vendi, kaha uahandekile kuli vakevo nguendi,

² "Njivua ngozi ha civunga eci, omuo vanakala nange honi matangua atatu, kuakuhona kulia,

³ kaha nga njivaleka nguange vaye na njala ku membo avo, vasa kulezumukila mu ngila, omuo vamo vanahumu kulahako."

⁴ Kaha vandongisi vendi vamukumbuluile nguavo, "Iya asa kulisa vantu ava na mbolo muno mu mpambo?"

⁵ Kaha Yesu uahandekile kuli vakevo nguendi, "Muli na vimbolo vingahi?" Vahandekile nguavo,

"Vitanu na vivali."

⁶ Kaha uashikile civunga linga vatumame ha mavu, kaha uambatele vimbolo vitanu na vivali, kaha uatsatselelele na kuvipazula kaha uahanene vandongisi vendi linga vahane vaje vantu, kaha vahanene civunga.

⁷ Kaha vakele na vantsi vavandende, kaha hanima ya kuvavezikisa, uashikile naua linga avahanevo.

⁸ Kaha valile, nakukuta, kaha vakunguluile vije vimbazuvuila vi-vasezeleho, viapuile mitonga itanu na ivali yakushula.

⁹ Voshe vantu vapuile nge makulukazi auana.

¹⁰ Kaha uavalekele linga vaye, kaha hajevene uakovelele mu vuato na vandongisi vendi, kaha vaile ku cihela ca Ndalamanuta.

Vafaliseo Valomba Citantekeyeso

(Mateu16:1-4)

¹¹ Vafaliseo vezile kuli Yesu nakuputuka kulinga nendi vimpata, vatondele ikeye linga avalingile citantekeyeso cakuhuma muilu, linga vamueseke.

¹² Kaha Yesu ualisisumuine mu Cimbembesi cendi, nakuhandeka nguendi, "Omuo vika vantu va cisemua cino vatondela citantekeyeso?"

Muavusunga, njihandeka kuli yeni nguange, na cimo cahi citantekeyeso cikalingiua ku cisemua cino."

¹³ Kaha uavasezele, uakovelele mu vuato nakuya musinia lia cisali.

Cimbaluila ca Vafaliseo na Helonde

(Mateu16:5-12)

¹⁴ Kaha vasuvile kuambata vimbolo, kaha vakele lika na mbolo imo lika mu vuato.

¹⁵ Kaha Yesu uavananguile nguendi, "Liniungeni, nakuzangama ku cimbaluila ca Vafaliseo na cimbaluila ca Helonde."

¹⁶ Kaha vakele nakuhandeka kuli umo na mukuavo nguavo, "Kutuesi na mbolo."

¹⁷ Kaha omo Yesu uacitantekeyele, uahandekela kuli vakevo nguendi, "Vika muhandekela ngueni kumuesi na vimbolo? Ku muatantekeyele cipue kuivuisisa ndi? Nkuma vati mitima yeni inakolo?"

¹⁸ Muli na mesho vuno honi nkuma kumumono, muli na matuitui nkuma kumuvu indi? Nkuma naua ku muanuka ndi?

¹⁹ Omo njapazuile vimbolo vitanu via kulisa vantu makulukazi atanu, muakunguluile mitonga ya kushula ya vimbazuvuila vingahi?"

Vakumbuluile nguavo "Likumi na ivali."

²⁰ "Kaha naua omo njapazuile vimbolo vitanu na vivali via kulisa vantu vakupua makulukazi auana, muakunguluile mitonga ya kushula ya vimbazuvuila ingahi?" Kaha vamukumbuluile nguavo, "Itanu na ivali."

²¹ Kaha uahandekela kuli vakevo nguendi, "Nkuma naku ntsimbu ino hanga ku muvuisisa?"

Yesu Akanguisa Yala ua Kapuputua ku Mbetesainda

²² Kaha vaile ku Mbetesainda. Kaha vantu vamo vanehele muntu umo kuli Yesu uje uapuile kapuputua, vambebelele Yesu linga amukuale.

²³ Kaha Yesu uakualele uje yala ua kapuputua ku livoko, kaha ua muhumisile hembu, kaha omo ua mujekuila malenzi ha mesho endi kaha uamusalekele mavoko endi, kaha ua muihuile nguendi, "Ulinakumona cimo?"

²⁴ Kaha uje yala uatalele kuilu nakuhandeka nguendi, "Njimona vantu, vuno honi valinakumoneka ngue miti ili na kuenda."

²⁵ Kaha naua uamusalekele mavoko endi ha mesho endi, kaha ua mutalele sui kaha uakangukile, kaha uamuene vioshe muacili.

²⁶ Kaha uamulekele aye kuimbo liavo, uamulekele nguendi, "Keti ukovelele cipue muimbo."

Petulu Atava ngeci Yesu ikeye Uakuvuavesa

(Mateu16:13-20; Luka9:18-21)

²⁷ Kaha Yesu uataleleho kuya na vandongisi vendi, ku membo a Sesiliya Filipu, kaha omo vaile mu ngila Yesu uehuile vandongisi vendi nguendi, "Vantu vahandeka nguavo Yange iya?"

²⁸ Kaha uamulekele nguavo, "Vamo vahandeka nguavo yove Iuano Muka kumbuitika, vamo naua nguavo yove Eliya, vamo nguavo yove umo ua vaje tunanguizi va Njambi."

²⁹ Kaha uavehuile nguendi, "Vuno honi yeni munjisana ngueni yange iya?" Petulu uamukumbuilile nguendi, "Yove Kilistu."

³⁰ Kaha uavashikile nguendi keti valekeko cipue umo muntu hali ikeye.

Yesu Ahandeka ha Tuyando tuendi na ha Kutsa kuendi

(Mateu16:21-28; Luka9:22-27)

³¹ Kaha uaputukile ku valongesa nguendi Muna Muntu napanda kuyanda mu viuma viavingi, nakumuviana kuli vakuluntu na kuli tusasendote vakama na kuli valongisi va mashiko, na kumutsiha, kaha hanima ya matangua atatu akasanguka naua.

³² Uavalumbunuine eci muacili kuli vakevo. Kaha Petulu uamutualele kuali kaliavo nakuputuka kumutenukila.

³³ Vuno honi omo uatengulukile nakumona vandongisi vendi, uatenukilile Petulu, nakuhandeka nguendi, "Hita kunima yange Satana! Omuo kuuesi kumutambela ua Njambi, vuno honi uli kumutambela ua vantu."

³⁴ Kaha Yesu uasanene civunga ca vantu hamo na vandongisi vendi linga veje kuli ikeye, kaha uahandekele kuli vakevo nguendi, "Nga kuli uoshe atonda kunjikava, napande kuliviana ikeye vavenia kaha ambate cilindakano cendi na kunjikava.

³⁵ Omuo uoshe uje ayoyesa muono uendi akauzimbalesa, kaha uoshe azimbalesa muono uendi omuo yange na muzimbu uacili aka uyoyesa.

³⁶ Cikuasa vika kuli muntu kuli kunguilila cifuti coshe na kuzimbalesa muono uendi?

³⁷ Cuma cika muntu asa kuhingisa mu muono uendi?

³⁸ Omuo uoshe uje anjivuilu shuamua, na mezi ange mu cisemua cino ca vupangala na vupi, na Muna Muntu naua akamiuvuila shuamua, omo akeja mu vumpau vua Ishe na tungelo va kulela."

9

¹ Kaha uatualeleleho kuhandeka nguendi, "Cilivene, njimileka nguange, kuli vamo vanemana hano kuvakamono kutsa kuvanga noho vanamono vumuene vua Njambi mu vuija na nzili."

Kulimpuka kua Yesu

(Mateu17:1-13; Luka9:28-36)

² Hanima ya matangua atanu na limo Yesu uambatele Petulu na Iuano na Tiango kaha vaile ku munkinda ualaha kua likaliavo, kaha Yesu uahimpukile ha mesho avo,

³ kaha na vuzalo vuendi vua viazimine, nakutoka cikuma, kaha naumo uahi ha mavu uasele ku vukusha.

⁴ Hhakati kavo kuasholokele Eliya na Mosesa, kaha vakele na kuhandeka na Yesu.

⁵ Kaha Petulu uahandekele kuli Yesu nguendi, "Muene, muacili tuli hano, tutunge vinjivo vitatu, imo yove kaha ikuavo ya Mosesa na ikuavo ya Eliya."

⁶ Omuo katantekeyele viakele nakuhandeka, omuo vateuele cikuma.

⁷ Kaha mashelua avafuikile, na lizi lia huminine mu lishelua ngualio, "Ou ikeye Munange injazanga, muivuilileni."

⁸ Kaha hajevene omo vatalele kuvamuene cipue umo kuvanga Yesu lika.

⁹ Kaha omo vakele nakusikumuka kuhuma ku munkinda, uavashikile linga keti valekeko cipue umo ha viuma vije vamuene, kuvanga noho Muna Muntu akasanguka ku vatsi.

¹⁰ Kaha valiniungilile evi vimpande vakevo vavenia, nakulihuozola nguavo kusanguka ku vatsi cilumbununa vika.

¹¹ Kaha vamuihuile nguavo, "Omuo vika valongisi va mashiko vahandeka nguavo Eliya napande kulivanga kuija?"

¹² Kaha uahandekele kuli vakevo nguendi, "Eliya alivanga kuija nakuhiluisa viuma vioshe evi, nkuma vacisoneka vati hali Muna Muntu, nguavo napande kuyanda mu viuma viavingi na kumuviana ndi?"

¹³ Vuno honi njimileka nguange Eliya neja laja, kaha vamulingile muoshe muvatondelele, nge omuo vanacisoneke hali ikeye.”

Yesu Akanguisa Kanike ua Yala ua Cimbembesi Cacipi
(Mateu17:14-21; Luka9:37-43a)

¹⁴ Kaha omo vezile kuli vandongisi vakuavo, vamuene civunga cakama cavazenguluka, kaha na valongisi va lishiko vakele nakulinga vimpata navo.

¹⁵ Kaha hajevene omo civunga coshe ca mumuene calikomokelele kaha vaile kuli ikeye nakumumeneka.

¹⁶ Kaha Yesu uavehuile nguendi, “Vika mulinakuhandeka navo?”

¹⁷ Kaha umo uavaje va civunga uamukumbuluile nguendi, “Mulongisi, njinanaha munange ua yala kuli yove, omo hali na cimbembesi ca vuveveve,

¹⁸ kaha oshe hacimu uanena cimbembesi cacipi, kaha cimuisila ha mavu, kaha a huma lifulu ku kanua na kulishumanga ku mazo kaha ominina ngoo, kaha njehuile vandongisi vove linga vacihumise, vuno honi vacihonouele kucihumisa.”

¹⁹ Kaha uakumbuluile nguendi, “Ho yeni cisemua cakuhona lutsilielo, njikakala neni ha ntsimbu yakupua hali? Vintsimbu vingahi honi njinapande kuyanda neni? Munehe kuli yange!”

²⁰ Kaha vamunehele kuli ikeye, kaha omo cimbembesi cacipi camuene Yesu, hajevene capindisile uje kanike ua yala, kaha uauililile ha mavu nakulialumuna, nakuhuma lifulu ku kanua.

²¹ Kaha Yesu uehuile ishe nguendi, “Ntsimbu yakupua hali uaputukile?”

“Kaha uahandekela nguendi, kuputuka ku vuanike vuendi.”

²² “Kaha lualuingi cimbembesi cacipi cikamuuisila mu tuhia na mu mema, linga cimunongese, vuno honi nga ulingaho cimo, tuivuileko ngozi nakutukuasa.”

²³ Kaha Yesu uahandekela kuli ikeye nguendi, “Nga uasa! Viuma vioshe vinapu via viasi kuli uje atsiliela.”

²⁴ Kaha hajevene ishe ya uje kanike uatambekele na kuhandeka nguendi, “Njitsilielia, njikuase yange uakuhona lutsilielo!”

²⁵ Kaha omo Yesu uamuene civunga cilinakuija hamo nakushatuka, kaha uatenukilile cije cimbembesi cacipi nakuhandeka kuli cikeco nguendi, “Yove cimbembesi cavuveve navusenda matuitui, njikushika, huma muli ikeye, kaha keti ukamuhilukile naua.”

²⁶ Hanima yakutambeka nakumualumuisa muakuteuesa, kaha camuhumine, kaha uje kanike ua lezumukile, kaha vavengi vasinganiekele nguavo, “Natsi.”

²⁷ Kaha Yesu uamukuatela ku livoko na kumukatula kaha uakatukile.

²⁸ Kaha omo uakovelele mu njivo, vandongisi vendi vamuihuile ku vushueka nguavo, “Vika honi tuahonouelele ku cihumisa?”

²⁹ Kaha uahandekela kuli vakevo nguendi, “Cifua ca cimbembesi eci kucasa kuhuma lika kuvanga na lilombelo lika.”

Yesu Ahandeka naua ha Kutsa Kuendi
(Mateu17:22-23; Luka9:4b-45)

³⁰ Vahumine kuje kaha vatualeleleleho noho vahitile mu Ngalileya. Kaha Yesu katondele muntu umo linga atantekeyele kuje kuvaya,

³¹ omuo uakele nakulongesa vandongisi vendi nguendi, “Muna Muntu vakamuhana mu mavoko a vantu, kaha vakamutsiha, kaha nga vanamut-sihi, hanimama ya matangua atatu a kasanguka.”

³² Vuno honi kuvevuisisile viahandekela, kaha vateuele kumuihula.

Iya Uakama Cikuma?

(Mateu18:1-5; Luka9:46-48)

³³ Kaha vezile ku Kapenauma, omo uakele mu njivo uavehuile nguendi, “Vika munakala nakuhandeka mu ngila?”

³⁴ Vuno honi vaholokele, omuo mu ngila vahandekela nguavo iya uakama cikuma.

³⁵ Kaha uatumamene nakusana vaje likumi na vavali, kaha uahandekela kuli vakevo nguendi, “Nga uoshe atonda kupua ukulivanga, apue uaku-manusuilila ku voshe na kupua ngamba ua voshe.”

³⁶ Kaha uambatate kanike, nakumuhaka mukati kavo, kaha uamuambat-ele mu mavoko endi, kaha uahandekela kuli vakevo nguendi,

³⁷ “Uoshe uje atambula kanike uamundende mu lizina liange natambula yange, kaha uoshe uje atambula yange, katambuile yange vuno honi uje uanjitumine.”

Uoshe uje Katuluisa Alihamo Netu

(Luka9:49-50)

³⁸ Kaha Iuano uahandekela kuli Yesu nguendi, “Mulongisi, tuamuene yala ahumisa mahamba mu lizina liove, kaha tuamuvindikile, omuo keti umo uetu.”

³⁹ Vuno honi Yesu uahandekela kuli ikeye nguendi, “Keti mumuvindike,” naumo uahi alinga vipangi viakukomouesa mu lizina liange uje muka ntsimbu naua ase kuhandeka via vipi hali yange.

⁴⁰ Omo uoshe katuluisa napu uetu.

⁴¹ Cilivene njimileka nguange, uoshe amihana nganja ya mema akunua omuo muli na lizina lia Kilistu, kakahonoua kuuana vuana vuendi.

Vieseko via Kutuala Kukutsa

(Mateu18:6-9; Luka17:1-2)

⁴² “Uoshe alingisa vanike vavandende vaje vanatsiliela muli yange kulinga vupi, cacili nge muntu uanga cije vamukutile livue liakama liakulolela vunga mu ntsingo yendi nakumumbila mu mema a kalunga.

⁴³ Kaha nga livoko liove likulingisa linga ulinge vupi, litete, cacili kuli yove kukovela mu muono na livoko limo kupulakana kukovela na mavoko avala aje akutuala ku ngehena, ku tuhia tuakuhona kuhua.

⁴⁴ Muje mavuno amuo ke kutsa, na tuhia tuamuo kutue kuzima.

⁴⁵ Kaha nga ciliato cove cikulingisa linga ulinge vupi citeteko, cacili kuli yove kukovela mu muono na vusualonda kupulakana kukovela na viliato vivali nakukumbila mu ngehena.

⁴⁶ Muje mavuno amuo ke kutsa, na tuhia tuamuo kutue kuzima.

⁴⁷ Kaha nga lisho liove likulingisa linga ulinge vupi, lihumisemo, cacili kuli yove kukovela mu vumuene vua Njambi na lisho limo kupulakana na mesho avala nakukumbila mungehen,

⁴⁸ kuje mavuno vavo kuve kutsa, na tuhia kutue kuzima.

⁴⁹ “Muntu uoshe vakamujelesa na muongua mu tuhia.

⁵⁰ “Muongua uacili, vuno honi nga muongua uashamuka, ukapua vati naua muongua?”

“Pueni muongua yeni vavenia, kaha kaleni na ciyulo yeni vavenia.”

¹ Kaha uahumine kuje nakuya kucihela ca ku Yundeya na kutuvakana Yondao, kaha vivunga via kungulukile kuli ikeye naua, kaha naua, kuya ku kapandi kendi, uavalongesele.

² Kaha Vafaliseo vezile nakumueseka kaha vamuihuile nguavo, "Capua lishiko yala kukulukula mpuevo yendi?"

³ Kaha uavakumbuilile nguendi, "Mosesa ua mishikile vati?"

⁴ Kaha vahandekela nguavo, "Mosesa uatavesele yala kusoneka mukanda uakulukula, nakumulekesa linga aye kuimbo liavo."

⁵ Vuno honi Yesu uahandekela kuli vakevo nguendi, "Hakukola ca mitima yeni mukemo muasonekelele eli lishiko."

⁶ Vuno honi hume hakuputuka ca kutanga, 'Njambi uatangele yala na mpuevo.'

⁷ Omuo ha cuma eci yala akaseza ishe na naye na kukali pandakana na mpuevo yendi,

⁸ kaha vaje vavali vakapua muvila umo.

⁹ Kaha cije Njambi napandakana, naumo uahi napande kucizitula."

¹⁰ Kaha omo vakele mu njivo vandongisi va Yesu vamuihuile naua a cimpande eci.

¹¹ Kaha uahandekela nguendi, "Uoshe alukulula mpuevo yendi nakuambata ueka, alinga vupangala,

¹² kaha nga mpuevo alukulula yaliendi nakukashomboka kuueka, kaha nalingi vupangala."

Yesu avezikisa vanike vomo vavandende

(Mateu19:13-14; Luka18:15-17)

¹³ Kaha vakele nakuneha vanike kuli Yesu, linga a vakuate kaha vandongisi vendi vavatenukilile.

¹⁴ Kaha omo Yesu uacimuene ualuvalele, kaha uahandekela kuli vakevo nguendi, "Ecen vanike vavandende veje kuli yange, keti muvavindike, omuo vumuene vua Njambi vunapu vuavo.

¹⁵ Cilivene, njihandeka kuli yeni, uoshe katambula vumuene vua Njambi ngue kanike uamundende ka kavukovela."

¹⁶ Kaha uavambatele mu mavoko endi na kuvavezikisa, nakuvakambeka mavoko endi hali vakevo.

Yala uakufuka

(Mateu19:16-30; Luka18:18-30)

¹⁷ Kaha omo Yesu uakele nakuya mu vungenzi vuendi, yala uashatukile na kuija na kutsikama mavuli kuli ikeye, na kumuihula nguendi, "Mulongisi uacili, njilinge vati linga njikaswane vumuene vua muono ua yaye?"

¹⁸ Kaha Yesu uahandekela kuli ikeye nguendi, "Vika unjitumbula nguove njiuacili? Naumo uahi uacili kuvanga Njambi lika liendi.

¹⁹ Uatantekeya mashiko, 'Keti utsihe, Keti ulinge vupangala, Keti uive, Keti uhane vukaleho vua makuli, Keti ukuise, Singimika isho na vanoko.' "

²⁰ Kaha uahandekela kuli ikeye nguendi, "Mulongisi, vioshe evi njavini-ungu hume ku vuanike vuange."

²¹ Kaha Yesu omo uamutalele kaha uamuzangele, kaha uahandekela kuli ikeye nguendi, "Uahono cuma cimo, ya, ukalandese viuli navio, uhane vihutu, kaha ukapua na vufuko muilu, kaha ija, linga unjikave."

²² Omuo uevuile evi uakotamesele cihanga cendi, kaha uaile na vusiuu, omuo uakele navufuko vuavuingi.

23 Kaha Yesu uatalele talele, kaha uahandekete kuli vandongisi vendi nguendi, “Capua cacikalulu kuli vaje vakakufuka kukovela mu vumuene vua Njambi!”

24 Kaha vandongisi vendi vakomokele ha mezi endi. Vuno honi Yesu uahandekete kui vakevo naua nguendi, “Vanike, cacikalulu vati kukovela mu vumuene vua Njambi!”

25 Cacasi kamelu kukovela mulisho lia nguya kupulakana mukakufuka kukovela mu vumuene vua Njambi.”

26 Kaha valikomokele cikuma, kaha vahandekete kuli vakevo nguavo, “Iya honi vakamusambesa?”

27 Yesu uavatalele kaha uahandekete kuli vakevo nguendi, “Ku vantu cacikalulu, vononi keti kuli Njambi, omuo viuma viose viaviasi kuli Njambi.”

28 Petulu uaputukile kuhandekete kuli ikeye nguendi, “Tala, tuaseze viuma viose nakukukava.”

29 Yesu uahandekete nguendi, “Cilivene,” njimileka nguange, “naumo uahi naseze njivo cipue vandumbueni cipue vumuanetu cipue vaina cipue vaishe cipue vanike na mavu, natuyando, omuo yange na muzimbu uacili,

30 iya kakatambula cihita muntsimbu ino, vinjivo navandumbu na vumuanetu na vananetu na vanike na mavu, na tuyando, na mu miaka ikeja ya muono ya yaye.

31 Vuno honi vavengi vaje vali kulutue va kapua kunima, kaha vakunima vakapua kulutue.”

*Yesu Ahandeka Ntsimbu ya Mucitatu ha Kutsa cendi
(Mateu20:17-19; Luka18:31-34)*

32 Kaha vakele nakuya mungila, kukanduka ku Yelusalema, kaha Yesu uakele na kuvatuamenena kulutue, kaha vakomokele, navaje vamukavele vovuile liova. Kaha vambatele naua vaje likumi na vavali, uaputukile kuvaleka vije vikalungiua kuli ikeye.

33 Nguendi, “Talen, tulinakukanduka ku Yelusalema, kaha muna Njambi vakamuhana kuli vakuluntu va tutasesondote na valongisi va mashiko kaha vakamuhisa nakumutuala kukutsa, nakumuhana kuli vaje keti vaje Yayunda,

34 kaha vakamushendumuna, na kumujekuila malanzi, nakumupupa, nakumutsiha kaha hanima ya matangua atatu akasanguka.”

*Cihula ca Tiango na Iuano
(Mateu20:20-28)*

35 Kaha Tiango na Iuano, vana va Zembendeo, vezile kuli ikeye, kaha vahandekete kuli ikeye nguavo, “Mulongisi, tutonda utulingile viose tutonda kuli yove.”

36 Kaha uahandekete kuli vakevo nguendi, “Vika vimutonda kuli yange kumilingila?”

37 Kaha vahandekete kuli ikeye nguendi, “Tutavese linga tutumame, umo ku livoko liove liacilio mukuavo kulia cimoshue, mu vumpau.”

38 Vuno honi Yesu uahandekete nguendi, “Kumuatantekeyele vimuhulisa. Muhasa kunua nganja ije njinua, cipue kumimbuitika mu cimbuitikilo civanjimbuitikile naco?”

39 Kaha vahandekete kuli ikeye nguavo, “Tuhasa.” Kaha Yesu uahandekete kuli vakevo nguendi, “Nganja ije njinua neni mukainua, na cimbuitikilo ci vananjimbuitika naco, cikeco vakamimbuitika naco,

40 vuno honi kutumama ku livoko liange lia cilio cipue lia cimuoshe keti yange kutava, vuno honi viavaje vanavuaheselele.”

⁴¹ Kaha omo vaje vandongisi likumi vevuile eci, valuvalelele Tiango na Iuano.

⁴² Kaha Yesu ua vasanene vaije kuli ikeye kaha uahandekela kuli ikeye nguendi, "Muatantekeya nguene vaje vanapandele kuyula vaje keti Vayunda valiyongola nguavo vali na nzili hali vantu vavo, kaha naua vantuama vavo vali na nzili yakama hali vakevo.

⁴³ Vuno honi ku cikafu ngoco hhakati keni, vuno honi uoshe atonda mukuluntu hhakati keni napande kupua ndungo yeni muvoshe.

⁴⁴ Kaha naua uoshe atonda kupua ua kulivanga hhakati keni napande kupua ndungo ua voshe.

⁴⁵ Omuo Muna Muntu kezile mukumupangela vuno honi mukupanga, nakuhana muono uendi linga apatule vantu vavengi."

Yesu atonesa mesho a kapuputua Mbatimeo

(Mateu20:29-34; Luka18:35-43)

⁴⁶ Kaha vahetele ku Yeliko, kaha omo uakele nakuhuma mu Yeliko na vandongisi vendi na civunga cakama ca vantu, Mbatimeo, uje kapuputua mukakulomba, muna Timeo, uatumamene kumukulo ua ngila.

⁴⁷ Kaha omo vovuile nguavo Yesu uaku Nazaleta, uaputukile kutambeka nguendi, "Yesu Muna Ndaviti, njivuileko ngozi!"

⁴⁸ Kaha vantu vavengi vamuvindikile, vamulekele nguavo aholoke, vuno honi uatambekele cikuma nguendi, "Muna Ndaviti, njivuileko ngozi!"

⁴⁹ Kaha Yesu uemanene kaha uahandekela nguendi, "Musaneni." Kaha vasanene uje kapuputua, kaha uahandekela kuli ikeye nguendi, "Kuata mutima, katuka, alinakukusana."

⁵⁰ Kaha uombilile vuzalo vuendi kaha uemanene nakuya kuli Yesu.

⁵¹ Kaha Yesu uahandekela kuli ikeye nguendi, "Vika utonda kuli yange linga njikulingile?"

Kaha uje yala uakapuputua uahandekela kuli ikeye nguendi, "Muene, njitonda njimone."

⁵² Kaha Yesu uahandekela kuli ikeye nguendi, "Ya, lutsilielo luove lua kukanguisa."

Kaha hajevene uatonene kaha uaputukile na kumukava.

11

Yesu Akovela na Vumpau mu Yelusalema

(Mateu21:1-11; Luka19:28-40; Iuano12:12-19)

¹ Kaha omo vatondela kuheta kuyehi na Yelusalema, ku Mbefanjanje na Mbefaniya, ku munkinda ua Oliveta, uatumine vandongisi vendi vavali,

² kaha uahandekela kuli vakevo nguendi, "Yeni ku limbo lije lili ku kulutue lueni, kaha omo mu kakovelamo mukauana muna cimulu ivanakutu, uje kanda vacimulondeho laja, kaha muzituleni mumunehe kuno.

³ Nga umo ahandeka kuli yeni nguendi, 'Vika mulingila eci?' handekeni nguene, 'Muene alina kumutonda kaha tumuhiluisako naua ololo.'

⁴ Kaha vaile, nakuuana muna cimulu vanamukutilila ku cikolo mu ngila, kaha vamuzituile.

⁵ Kaha vaje vemanene kuje vahandekela kuli vakevo nguavo, "Vika mulinga kuli ou muna cimulu?"

⁶ Kaha vavalekele muje muavalekelele Yesu, kaha vavecelele vaile nendi.

⁷ Kaha vanehele uje muna cimulu kuli Yesu, kaha vajalele vuzalo vuavo hali uje muna cimulu, kaha ua tumameneho.

⁸ Kaha vavengi vajalele vintanga viavo mungila, vamo vajalele maputa a mintango ije vatetele kumehia avo.

⁹ Kaha vaje vakele kulutue navaje vakele nakukavangeya munima vakele nakutambeka nguavo, "Hosana! Uakukuisula uje eja mu lizina lia Muene!

¹⁰ Vuakukuisula vumuene vua tatetu Ndaviti vuje vuli nakuija! Hosana ua muilu mulahako!"

¹¹ Kaha uakovelele mu Yelusalema, nakukakovela mu njivo ya Njambi, kaha omo uatalele talele ku vioshe, kaha omo naua tele kuatoko laja, kaha uaile ku Mbeteniya hamo na vandongisi vendi likumi na vavali.

Yesu Asinga Muti ua Mukuyu

(Mateu21:18-19)

¹² Liamukuavo, omo uahumine ku Mbeteniya, kaha Yesu uatsile njala.

¹³ Kaha uamuene muti ua mukuyu uje uakele kulahako uje uakele na maputa, kaha uaileko nguendi hamo akauanako vushuka. Omo uahetele kuli ukeuo, kauaneneko vushuka vuno honi maputa lika, omuo kuyapuile ntsimbu ya vushuka.

¹⁴ Kaha uahandekela kuli ukeuo nguendi, "Naumo uahi muntu akalia vushuka kuhuma kuli yove naua." Kaha vandongisi vendi vovuileko.

Yesu Avuahesa Njivo ya Njambi

(Mateu21:12-17; Luka19:45-48; Iuano2:13-22)

¹⁵ Kaha vahetele ku Yelusalema nakukovela mu Njivo ya Njambi kaha uaputukile kushaka vaje vakele na kulandesa na kulandulula mu Njivo ya Njambi, kaha uafulumikile vimesa via vaje vakele na kulandulula vimbongo na vituamo via vaje vakele na kulandesa mavembe.

¹⁶ Kaha katavesele naumo kuambata cuma mu Njivo ya Njambi.

¹⁷ Kaha uavalongesele, nakuhandeka kuli vakevo nguendi, "Nkuma ku vacisonekele nguavo, 'Njivo yange ikapua Njivo ya malombelo ya vakamafuti oshe'? Vuno honi muaipuisa muhela ua vezi."

¹⁸ Kaha vakuluntu va tusasendote na valongisi va mezi a mashiko vacuvuile kaha vatondele ngila ya kumutshilamo, omuo vamuteuele, omuo civunga coshe cakomokele ha vilongesa viendi.

¹⁹ Kaha omo cinguezi cahetele va humine mu nganda.

Cilongesa ca Muti ua Mukuyu

(Mateu21:20-22)

²⁰ Kaha omo vahitile cimene, vamuene uje muti ua mukuyu unomu naku mizi.

²¹ Kaha Petulu uavulukile kaha uahandekela kuli ikeye nguendi, "Muene, tala! Uje muti ua mukuyu ua singile unomu."

²² Kaha Yesu uavakumbuluile nguendi, "Kalen na lutsilielo muli Njambi.

²³ Cilivene njimileka nguange, uoshe ahandeka kuli ou munkinda nguendi, 'Katuka uliumbile mu mema a kalunga,' kaha nga kalingi vim-pata mu mutima uendi, vuno honi atsiliela nguendi vioshe ahandeka vikalingika, vaka mu lingila vio.

²⁴ Nankuma njimileka nguange, vioshe mulomba mu lilombelo, tsilieleni ngueni muavitambula laja, kaha cikapua ceni.

²⁵ Kaha ha ntsimbu yoshe uimana nakulombela, konekela mukueni nga uli nacimo nendi, linga ishueni ali muilu akamikonekele ku milonga yeni.

²⁶ Vuno honi nga kumukonekela, kaha na ishueni ua muilu kakamikonekela ku milonga yeni."

Cihula ca ha Nzili Yakama ya Yesu

(Mateu21:23-27; Luka20:1-8)

²⁷ Kaha vezile naua ku Yelusalema. Kaha omo uakele nakuenda mu njivo ya Njambi, tusasendote vakama, navalongisi va mezi a mashiko, na vakuluntu vezile kuli ikeye,

²⁸ kaha vahandeketele kuli ikeye nguavo, “Nzili yakama muka uli na kulikuasesa hakulinga viuma evi, cipue iya uakuhanene nzili yakama linga ulinge evi?”

²⁹ Yesu uahandeketele kuli vakevo nguendi, “Njimihula cihula, kaha munjikumbulule, kaha njimileka ha nzili yakama njili nakulikuasesa hakulinga evi viuma.

³⁰ Cimbuitiko ca Iuano cahumine muilu indi ku vantu? Njikumbululeni.”

³¹ Kaha valingile vimpata umo na mukuavo nguavo, “Nga tuhandeka ngueto, ‘Cakuhuminiine muilu,’ kaha ahandeka nguendi, ‘Vika honi muatetele ku mutsiliela?’

³² Vuno honi nga tuhandeka ngueto, ‘Cahuminiine ku vantu?’” Vateuele vantu, omuo voshe vatantekeyele nguavo Iuano uapuile kananguizi ua vusunga.

³³ Kaha vakumbuluile Yesu nguavo, “Kututantekeya.”

Kaha Yesu uavakumbulile nguendi, “Kunjimileke nzili yakama njili-nakuli kuasesa kulinga viuma evi.”

12

Cisimo ca Vaka Kupanga mu Citungu ca Mikolovozi ya Vushuka vua Viniu
(Mateu21:23-46; Luka20:9-19)

¹ Kaha uaputukile kuhandeka kuli vakevo mu visimo nguendio, “Yala uakunine citungu ca mikolovozi, kaha uazinguisileko cipatanga, kaha uahindile cina ca kukamuinamo viniu, kaha naua uatungile kaposhi, nakusezela vaka kupanga, kaha uaile ku lifuti lieka.

² Kaha omo ntsimbu yakuteja yahetele, uatumine ngamba kuli vaka kupanga, linga vambate vushuka mu citungu ca mikolovozi.

³ Kaha vamukuatetele na kumupupa, na kumusheka mavoko voko.

⁴ Kaha naua uatumine mukuavo ngamba, kaha vamuvetuesele ku mutue, nakumulinga muashuamua.

⁵ Kaha uatumine mukuavo, kaha naua vamutsihile, navakuavo naua vavalingile muje vene, vamo vavapupangele vamo vava tsihile.

⁶ Kaha kuasalele umo, muana ua yala yazangele, ha mamanusuilo uatumine kuli vakevo, nakuvalekesa nguendi, ‘Vakasingimika munange.’

⁷ Vuno honi vaje vaka kupanga vahandeketele kuli umo na mukuavo nguavo, ‘Ou ikeye muna vavenia citungu, ijeni, tumutsihe, kaha vufuko vupua vuetu.’

⁸ Kaha vamukuatetele nakumutsiha, nakumumbila kusinia lia citungu.”

⁹ Kaha Yesu uavehuile nguendi, “Vika honi, viakalinga vavenia citungu ca mikolovozi?” Kaha vamukumbuluile nguavo, “Akeja nakutsiha vaka kupanga, nakuhana citungu ca mikolovozi ku veka.”

¹⁰ Ku muatandele evi visoneka?

“Livue lije vaka kutunga vavianene
likelio linapu lia seho kuli voshe,

¹¹ eci cikeco calingile Muene,
kaha cinapu cakumokesa kuli yetu.”

¹² Kaha vesekele linga vamukute, vuno honi vateuele civunga ca vantu, omuo vasinganiekele nguavo nahandeka cisimo eci kuluisa vakevo, kaha vamusezele na kuya.

Cihula ca ha Kufueta Lisimu
(Mateu22:15-22; Luka20:20-26)

¹³ Kaha vatumine vamo Vafaliseo na vaka mpunga ya Helonde, kuli Yesu linga vamukuete kuya nomu muahandekela.

¹⁴ Kaha vezile nakuhandeka kuli ikeye nguavo, "Mulongisi, tuatantekeya nguetu uapua ua vusunga, omuo kuesi kutala hali muntu cipue uapua ua vulemu cipue kuahi kuuesi kulipesa ha muntu ha viyongola via muntu, kuuesi kutala hacituamo ca muntu, kaha naua ukalongesa via vusunga via Njambi. Capandemo kufueta lisimu kuli Sezale, indi kuahi?"

¹⁵ Tuvafuete indi, keti tuvafuete? Vuno honi Yesu hakumona visin-ganieka via vipi, uahandekela kuli vakevo nguendi, "Vika munjesekela? Njineheleni mbongo ya muuaya uaya, njiyitale."

¹⁶ Vanehele ije mbongo ya muuaya uaya. Kaha uahandekela kuli vakevo nguendi, "Cihanga ceya eci ciliho na lizina lieya liliho?"

Vahandekela kuli ikeye nguavo, "Via Sezale."

¹⁷ Kaha Yesu uahandekela kuli vakevo nguendi, "Haneni Kasezale viakun-dama kuli Kasezale, na kuli Njambi viakundama kuli Njambi."

Kaha voshe vakomokele hali ikeye.

Cihula ca ha Vulo ca Kusanguka ku Vatsi
(Mateu22:23-33; Luka20:27-40)

¹⁸ Kaha Vasanduki vezile kuli ikeye, vaje vakahandeka nguavo kukuesi kusanguka ku vatsi, kaha vamuhuile cihula nguavo,

¹⁹ "Mulongisi, Mosesa uatusonekelele nguendi, 'Nga muanaye atsa kaha naseze mpuevo, vuno honi kasezele muana, uje yala napande kuambata uje mpuevo, linga asemeneko vana vaje vanapandele kusemenako ikeye.'

²⁰ Mulizimo liavo vapuile vatanu na vavali, uakulivanga uambatele mpuevo, kaha omo uatsile kasezele vana,

²¹ Kaha ua mucivali ua muambatele, kaha nendi naua uatsile, kasezele vana, na ua mucitatu naikeye naua cifua cimo,

²² kaha voshe kuvasezele vana. Kumamanuisilo uje mpue vo uatsile.

²³ Hakusanguka uje mpuevo a kapua ueya? Vaje vatanu na vavali voshe uapuile mpuevo yavo."

²⁴ Kaha Yesu uahandekela kuli vakevo nguendi, "Nkuma ku muatan-tekeye ngueni muapihisa, omuo kumutantekeya visoneka cipue nzili ya Njambi?"

²⁵ Omo vakahinduka ku vatsi, ku vakambata cipue kushuombuesa, vuno honi vakapua ngue tungelo va muilu.

²⁶ Kaha ha kusanguka vatsi, kumuatandele mu livulu lia Mosesa, hali lije liputa, omo Njambi uahandekela kuli ikeye nguendi, 'Yange Njambi ua Avilahama, na Njambi ua Isake, na Njambi ua Yakomba'?

²⁷ Keti Njambi uavakakutsa, vuno honi Njambi ua vakakuyoya, unapi-hisa."

Lishiko Liakama Cikuma
(Mateu22:34-40; Luka10:25-28)

²⁸ Kaha umo ua valongisi va mashiko uahetele kaha ua vovuile valinga vimpata kuli umo na mukuavo, kaha hakumona ngeci Yesu uavakumbu-luile muacili, kaha vamuihuile nguavo, "Lishiko muka ku mashiko oshe lia kulivanga?"

²⁹ Yesu uavakumbuluile nguendi, “Cakulivanga eci, ‘Tolilila, Yove Isaleli! Muene Njambi yetu, uapua Muene umo,

³⁰ kaha mu kazanga Muene yeni na mitima yeni yoshe, na muono ueni uoshe, na mana eni oshe, na nzili yeni yoshe.’

³¹ Lishiko lia mu civali eli, ‘Zanga mukueni ngue muje muualizanga yove vavenia.’ Kukuesi naua lishiko liakama cikuma lipulakana aua.”

³² Kaha mulongisi ua mashiko vehuile Yesu nguendi, “Uahandeka vusunga, Mulongisi, vusunga vene uapua umo lika, kaha kukuesi ueka kuvanga ikeye lika,

³³ kaha ku muzanga na mutima uoshe, nakuvuisisa kuoshe, na nzili yoshe, nakuzanga mukueni ngue omuo ualizangela yove vavenia, viapulakana na tusitu va cikombelo na vikombelo vikuavo naua.”

³⁴ Kaha omo Yesu uamuene nguendi uakumbuluile na mana, uahandekela kuli ikeye nguendi, “Kuuesi kulahako na vumuene vua Njambi.”

Kuhuma haje naumo uahi naua uamuihuile cihula.

Uakuvuavesa uapua Muna Iya?

(Mateu22:41-46; Luka20:41-44)

³⁵ Kaha omo Yesu uakele nakulongesa mu njivo ya Njambi, uahandekela nguendi, “Cijavati honi linga vaka kulongesa mashiko vahandekela nguavo Kilistu muna Ndaviti?”

³⁶ Ndaviti vavenia, vamuuvuavesele na Cimbembesi Uakulela kaha uahandekela nguendi,

“ ‘Muene uahandekela kuli Muene yange nguendi,

tumama ku livoko liange lia cilio,

kuvanga noho njikahaka vitozi veni ku viliato vieni.’

³⁷ Ndaviti vavenia amusana nguendi ‘Muene,’ kaha cifua vati honi linga apue munendi?”

Yesu Anangula linga Vazangame kuli Valongisi va Mezi a Mashiko

(Mateu23:1-36; Luka20:45-47)

Civunga covuilile kuli ikeye nakuvuahelera.

³⁸ Kaha omo Yesu uakele nakulongesa uahandekela nguendi, “Zangameni kuli valongisi va mashiko, vaje vakai nakuenda mu tuzaku tualaha linga vavasingimike mu mihela ya kulandesela,

³⁹ na vituamo viacili via mu vi njivo ya malombelo na mihela ya kasingimiko ya ku viuano,

⁴⁰ vaje vali na kupihisa vinjivo via vantuluue mukulimuesa ha kulombela malombelo alaha. Vakatabula cihiso cakama.”

Mulambu ua Ntuluue

(Luka21:1-4)

⁴¹ Kaha Yesu uatumamene kuyehi nakuakutambuila milambu, kaha uakele nakutala vantu omo vakele na kuhaka vimbongo mu cikuama ca njivo ya Njambi. Vavengi vakakufuka vakele nakulambuila vimbongo viavingi.

⁴² Kaha ntuluue uakuhutua uezile, kaha ualambuile tuuaya uaya tuvali tua vunengu tuatundende.

⁴³ Kaha uasanene valongisi vendi linga veje kuli ikeye, kaha uahandekela kuli vakevo nguendi, “Cilivene njimileka nguange, ou ntuluue uacihutu nalambula viavingi kupulakana voshe vaje vanalambula mu cikuama.

⁴⁴ Omuo voshe vanalambuile kusetekesa na vufuko vuavo vuavuingi, vuno honi ikeye nalambuila kuya mukuhutua cendi kaha naua ualambuila vioshe vimbongo viakele navio, viaku muyoyesa mu vuyoye vuendi.”

13

*Yesu ahandeka ha kunonga kua Njivo ya Njambi
(Mateu24:1-2; Luka21:5-6)*

¹ Kaha omo Yesu uahumine mu njivo ya Njambi, kaha umo uavandongisi vendi uahandekela kuli ikeye nguendi, "Tala, Mulongisi, kuvuaha ca mavue aua na kuvuaha kua vinjivo evi!"

² Kaha Yesu uahandekela kuli ikeye nguendi, "Uli nakumona evi vinjivo viakama ndi? Na limo liahi livue likasalaho helu lia likuavo, oshe vaka ombila kuti."

*Tuyando na Mapakeso
(Mateu24:3-14; Luka21:7-19)*

³ Kaha omo Yesu uatumamene ha munkinda ua Oliveta ha lutue lua njivo ya Njambi, Petulu na Tiango na Iuano na Anduleo vamuihuile kualikaliavo nguavo,

⁴ "Tuleke eci cikalingika ntsimbu muka, kaha cimueso muka cikalingiua omo vioshe evi vikalingiua?"

⁵ Kaha Yesu uaputukile kuhandeka kuli vakevo nguendi, "Zangameni linga keti umo akamikuise.

⁶ Vavengi vakeja mu lizina liange, nguavo, 'Yange vene!' kaha vakakuise vantu vavengi.

⁷ Kaha omo mukevua vinzita na kalua ka vinzita, keti mukakomoke, evi viapande kusholoka, vuno honi keti kukotoka ca mavu.

⁸ Omuo lifuti likatengulukila lifuti likuavo, vumuene vukatengulukila vumuene vukuavo, kukakala mandunduma ku mitambela ya kuliseza seza, ku kakala njala ya liangengela. Evi vinapu ngue kuputuka ca mushongo uakusema.

⁹ "Vuno honi linuingeni yeni vavenia, omuo vakamituala ku vaka mpunga na kumisompa, kaha vakamipupa mu vinjivo via malombelo, kaha mukemana ha mesho a vanguvulu na vimiene omuo yange, linga muhane vukaleho ha mesho avo.

¹⁰ Kaha muzimbu uacili muapande ku uambulula ku mafuti oshe.

¹¹ Kaha omo vakamineha ku kumisompa, na kumikuata keti mukateue vimukahandeka. Vuno honi mukahandeka vije vioshe vije vakamihana ha ola ijevene, omuo keti yeni muka vihandeka, vuno honi Cimbembesi Uakulela.

¹² Kaha muanaye a kenda vungungu munaina naku mutuala kukutsa, kaha ishe akalinga ngoco na munendi, kaha vana vakatengulukila visemi viavo naku vatsiha,

¹³ kaha voshe vakamizinda omuo yange. Vuno honi uoshe akatuaelaho na kumamanusuilo akovoka.

*Cimueso ca Shuama
(Mateu24:15-28; Luka21:20-24)*

¹⁴ "Vuno honi nga mukamona cimueso ca shuama ca kukomouesa cije cikaneha kunonga cinemana kuje kucapandele kuimana." (Muka kutanda ovuise), kaha vaje vali mu Yundaya vateuele ku minkinda,

¹⁵ uoshe uje hali helu lia njivo keti ashuluke ha mavu, cipue kukovela mu njivo yendi, linga ambate cuma,

¹⁶ kaha uoshe hali mu lihia keti ahiluke kunima nakuambata cikovelocendi.

¹⁷ Caluvinda kuli vaje vanemita na kuli vaje vakajamuesa mu matangua aje!

¹⁸ Lombeleni linga keti cikalingike mu cisika.

¹⁹ Omuo ha matangua aje kukakala tuyando tuje kutuakeleko hume ha kutanga lifuti lije Njambi uatangele kuheta na ntsimbu ino, kaha ku tukakalako naua.

²⁰ Kaha nga Njambi kakehesele matangua, nga na muntu uahi akovoka, vuno honi omuo ya vantu vendi vaje vahanguile, uakehesele ku matangua.

²¹ "Kaha ha ntsimbu ije nga kukakala umo akamileka nguendi, 'Talen, Kilistu uno!' cipue nguavo, 'Talen, uje hali kuje!' keti mutsiliele.

²² Omuo kukasholoka Vakilistu va makuli na tunanguizi va Njambi va makuli nakulinga vitantekeyeso na vikomouesa linga vamizimbalese vaje vanahangula Njambi, nga casua na.

²³ Vuno honi zangameni njamileke vuima vioshe ntsimbu kanda ihete.

*Kuija kua Muna Muntu
(Mateu24:29-31; Luka21:25-28)*

²⁴ "Vuno honi ha matangua aje hanima ya tuyando, litangua lika zivala, kaha ngonde kuikatu ceke,

²⁵ na vintanga ntanga vikaua kuhuma kuilu, na lilu likaninganga.

²⁶ Kaha vakamona Muna Muntu eja mu mashuela, na nzili yakama na vumpau.

²⁷ Kaha akatuma tungelo vendi nakukungulula vantu vendi vahanguile na mahunzi auana, kuhuma ku mamanusulo a mavu nakumamanusulo a melu.

*Cilongesa ca Muti ua Mukuyu
(Mateu24:32-35; Luka21:29-33)*

²⁸ "Lilongesen, cilongesa ca muti ua mukuyu, omuo mintango ishoshela na kuhaka maputa, kaha muatantekeya ngueni ntondue ili muyehi.

²⁹ Kaha naua omo mumona viuma evi vilingiua, kaha mutantekeye ngueni vili muyehi, vili ku cikolo.

³⁰ Cilivene njimileka nguange, vantu ava vali na kuyoya ntsimbu ino kuvakatsi kuvanga vuima vioshe evi vinalingiua.

³¹ Melu na mavu vioshe vikahua, vuno honi mezi ange kuuakahu.

*Naumo uahi Atantekeya Litangua cipue Ntsimbu
(Mateu24:36-44)*

³² "Vuno honi ha litangua lije cipue hola naumo uahi atantekeya, cipue vene tungelo va mulu, cipue Muana, vuno honi Tate lika.

³³ Nangukeni, taleleleni, omuo ku mutantekeya hola muka akeja.

³⁴ Cinapu ngue yala nayi mu vungenzi, kaha omo ahuma hemo aseza vangamba vendi linga vaniunge, umo na umo na vipangi viendi, na kushika muka kuniunga ku cikolo linga atalelele.

³⁵ Nankuma taleleleni, omuo ku muatantekeye vavenia njivo akeja, indi ku cinguezi, cipue mukati kavutsiki, cipue ha vandemba cipue ku cimene.

³⁶ Nga eja vuasi keti akumiwane muakosa tulo.

³⁷ Kaha vinjimileka vikevio vinjileka voshe nguange, taleleleni!"

14

*Vavuavesa Yesu ku Mbeteniya
(Mateu26:6-13; Iuano12:1-8)*

¹ Kaha kuasalele lika matangua avali linga Paseka na ciuano ca mbolo yakuhona cimbaluila. Kaha vakuluntu va tusasendote na valongisi va mashiko vakele nakutonda ngila yavushueke ya kukuatelamo Yesu naku-mutsiha.

² Kaha vahandeketele nguavo, “Kutuapandele ku cilinga ha ciuano, hamo vantu vakaneha mpindangano.”

³ Kaha tele Yesu hali ku Mbeteniya mu njivo ya Simoni uje uakele na mbumba. Omo te Yesu uatumamene ku mesa na kulia, mpuevo uezile kuli ikeye na nsuua yakupanga ha livue lia kutoka ya kushula na mazi akutula nakunika na luengo luacili. Uapazuile ije nsuua kaha uetilile ku mutue ua Yesu.

⁴ Vuno honi kuakele vamo vaje vahandeketele kuli umo na mukuavo oku vaniengua nguavo, “Vika vana pihisila aua mazi?”

⁵ Ngue aua mazi vana alandesele ha ndando ya kupulakana vihita vitatu via muuaya uaya (300) ya vimbongo vije vinapande kuhana tuhutu!” Kaha vaniengetelele cikuma hali uje mpuevo.

⁶ Vuno honi Yesu uahandeketele kuli vakevo nguendi, “Mueceni, vika muli na kumupakesela? Nalingi cuma cacili kuli yange.

⁷ Omuo yeni ntsimbu yoshe muli na tuhutu, kaha naua ntsimbu yoshe mutonda, muhasa kulinga muacili kuli vakevo, vuno honi kumukakala nange ntsimbu yoshe.

⁸ Nalingi muanasela, na vuavesa muvila uange mukunjivuahelela kunjitsinda.

⁹ Kaha cilivene njimileka nguange, kuoshe kuje kuanambulula muzimbu uacili mu lifuti lioshe, ca nalingi vakacihandeka na kumuanukilahoh.

*Yundasa enda Yesu Vungungu
(Mateu26:14-16; Luka22:3-6)*

¹⁰ Kaha Yundasa Sakaliote, umo ua vaje vandongisi likumi na vavali, uaile kuli vakuluntu va tusasendote linga akamuende vungungu kuli vakevo.

¹¹ Vavuahelele hakuivua vije viahandeketele, kaha vamukulahesele kumuhana vimbongo. Kaha Yundasa uaputukile kutonda ngila yakumuen-delamo vungungu.

*Yesu Alia na vandongi vendi ku Ciuano ca Paseka
(Mateu26:17-25; Luka22:7-14;21-23; Iuano13:21-30)*

¹² Ha litangua liakulivanga lia mbolo yakuhona cimbaluila, omo valingile cikombelo ca mpanga ca ha paseka, vandongisi vendi vahandeketele kuli ikeye nguavo, “Kuli utonda linga tukakuvuahesele kuje ukalila paseka?”

¹³ Kaha uatumine vandongisi vendi vavali, kaha uavalekele nguendi, “Yeni mu nganda kaha mukauana yala nambata nsuua ya mema kaha akeja kuli yeni, kaha mukamukave,

¹⁴ kaha muje muakakovela muka handeke kuli vavenia njivo ngueni, ‘Mulongisi nguendi, ulikuli mulili uange uje ua vangenzi, muje njinapandelele kulila paseka hamo na vandongisi vange?’

¹⁵ Kaha akamimuesa mulili uakama uakuvuahesa vuino uli helu ya milili ikuavo, kukeko mukavuahesa.”

¹⁶ Kaha vandongisi vendi vaputukileko nakuya kuje ku nganda, kaha vakauanene ngue muje vene muavalekeselelemo, kaha vavuahesele paseka.

¹⁷ Kaha omo capuile cinguezi uezile na vandongisi vendi likumi na vavali.

¹⁸ Kaha omo vakele ku mesa na kulia, Yesu uahandeketele nguendi, “Muavusunga vene njimileka nguange, umo ueni akanjenda vungungu, umo uje alinakulia nange.”

¹⁹ Vaputukile kulinienga, nakuhandeka kuli umo na mukuavo nguavo, “Yange ndi?”

²⁰ Kaha uahandeketele kuli vakevo nguendi, “Umo ua vandongisi likumi na vavali, umo uje hali nakutanta mbolo yendi mu lilonga nange.

²¹ Omuo Muna Muntu akaya ngue muje muvanacisoneka hali ikeye, vuno honi luvinde hali uje yala nende vungungu Muna Muntu! Capuile muacili ngue uje yala kasemukile.”

Mesa ya Muene

(Mateu26:26-30; Luka22:14-20; 1 Kolinte11:23-25)

²² Kaha omo vakele nakulia, Yesu uambatele mbolo, na kuivezikisa, kaha uaipazuile, naku ihana kuli vakevo, kaha uahandeketele nguendi, “Ambatani, ou ukeuo muvila uange.”

²³ Kaha uambatele nganja naua, kaha muamanesele kutsatsela uava-hanene, kaha voshe vanuinememo.

²⁴ Kaha uahandeketele kuli vakevo nguendi, “Aua akeuo maninga ange a litavasano, aje anahitikila vavengi.

²⁵ Muavusunga vene njimileka nguange, kunjikanuho naua neni viniu kuvanga noho ha litangua lije omo njikanua neni viniu via viha mu vumuene vua Njambi.”

²⁶ Kaha omo vamanesele kuimba muaso, vahuminemo nakuya ku munkinda ua Oliveta.

Yesu Ahandeka ngeci Petulu Akamuviana

(Mateu26:31-35; Luka22:31-34; Iuano13:36-38)

²⁷ Kaha Yesu uahandeketele kuli vakevo nguendi, “Muva voshe mukateua, omuo vacisoneka nguavo, ‘Njikapupa kaniungi, kaha vampanga vakalis-handoka.’

²⁸ Vuno honi hanima yakunjisangula, njikaya kulutue lueni ku Ngalileya.”

²⁹ Kaha Petulu uahandeketele kuli ikeye nguendi, “Cipue voshe vakateua, vuno honi yange kunjikateue.”

³⁰ Kaha Yesu uahandeketele kuli ikeye nguendi, “Muavusunga vene njikuleka nguange, vuno vene vutsiki, ntsimbu kanda ndemba atambeke luvali, ukanjiviana lutatu.”

³¹ Vuno honi uavianene cikuma nguendi, “Nga kutsa nove kaha njikatsa, kunjikakuviana.” Kaha voshe vahandeketele cifua cimo.

Yesu Alombela mu Ngetesemani

(Mateu26:36-46; Luka22:39-46)

³² Kaha vezile ku cihela civasanene Ngetesemani, kaha Yesu uahandeketele kuli vandongisi vendi nguendi, “Tumameni hano ntsimbu njilombela.”

³³ Uambatele Petulu na Tiango na Iuano kukala nendi. Kaha uaputukile kuzeya na vusiuu.

³⁴ Kaha uahandeketele kuli vakevo nguendi, “Njivua vusiuu vuakama mu mutima uange, cipue ku kutsa, tumameni hano mutalele.”

³⁵ Uaile halahako kavundende, kaha uauililile ha mavu nakulombela nguendi, nga casiuu, eyi hola imutuvakane.

³⁶ Kaha uahandeketele nguendi, “Tate, Tate, vuima vioseha via viasi kuli yove, humisa eyi nganja kuli yange, vuno honi keti nge ku cizango cange, vuno honi cizango cove cilingue.”

³⁷ Kaha uahilukile uavauanene vakosa tulo, kaha uahandeketele kuli Petulu nguendi, “Simoni, unakosa? Nkuma kuuasa kutona cipue ha hola?”

³⁸ Toneni na kulombela linga keti mukovele mu vieseko, cimbembesi cili na kutonda, vuno honi ntsitu inazeye.”

³⁹ Kaha naua uaile na kulombela, mezi a cifua cimo.

⁴⁰ Kaha uahilukile ua vauanene vakosa tulo, omuo mesho avo alemene, kaha ku vatantekeyele mua kumukumbuilila.

⁴¹ Kaha uelukile lua mucitatu, kaha uahandeketele kuli vakevo nguendi, “Hanga muakosa na kuhuima? Munapuisamo, hola inahete, Muna Muntu vana muende vungungu na kumuhana mumavoko avaka vupi.

⁴² Indukeni, tuyeni, taleni, vakakunjenda vungungu vali muyehi.”

Yesu Vamukuata

(Mateu26:47-56; Luka22:47-53; Iuano18:3-12)

⁴³ Kaha hajevene, omo te Yesu alinakuhandeka, Yundasa uezile, uje uapuile umu ua vandongisi likumi na vavali kaha uakele na civunga cije cambatele mikuale na vimbueti, vahumine kuli vakuluntu va tusasendote na valongisi va mashiko na vakuluntu va Vayunda.

⁴⁴ Kaha honi uje muka kuenda vungungu uahanene cimueso nguendi, “Uje umu njikatsuemba ikeye yala mukakuata nakumutuala hamo nava kakunuinga.”

⁴⁵ Kaha hajevene omo uezile, uaile kuli ikeye kaha uahandeketele nguendi, “Mulongisi!” Kaha uamutsuembele.

⁴⁶ Kaha vamukuatale na mavoko avo nakumukuta.

⁴⁷ Vuno honi kuakele uje umu uemanene kumukulo uahumisile mukuale uendi nakuteta lituitui lia ngamba ua kasasendote uakama.

⁴⁸ Kaha Yesu uahandeketele kuli vakevo nguendi, “Nkuma muneja ngue muluisa muhuza, na mikuale na vimbueti mukunjikuata ndi?”

⁴⁹ Hatangua na tangua njinakala neni mu njivo ya Njambi nakulongesa, kaha ku muanjikuatale. Vuno honi linga visoneka vilishulisise.”

⁵⁰ Kaha vandongisi vendi voshe vamusezele, na kuteua.

⁵¹ Kaha mukuenje umu uamukavele, na cimo cahi cakele naco kuvanga lika cikovelu ca linui cazalele, kaha vatondele kumukuata,

⁵² vuno honi uasezele ije ntanga ya linui nakuteua mutoto toto.

Vasompa Yesu ku Mesho a Mpunga

(Mateu26:57-68; Luka22:54-55;63-71; Iuano18:13; 14; 19:24)

⁵³ Kaha vatualele Yesu kuli kasasendote uakama, kaha vakuluntu va tusasendote na vakuluntu, na valongisi va mezi a mashiko vakungulukilile hamo.

⁵⁴ Kaha Petulu uamukavele halahako, ku cipango ca kasasendote uakama, kaha uatumamene na vaka kunuinga nakuota tuhia.

⁵⁵ Kaha honi vakuluntu vatusasendote na mpunga yoshe vatondele vukaleho hali Yesu linga va mutsihe, vuno honi ku vavuuanele vuahi.

⁵⁶ Omuo vavengi vahandeketele vukaleho vua makuli hali Yesu, vuno honi vukaleho vuavo ku vualitombuele.

⁵⁷ Vamo vemanene nakuhandeka vukaleho vua makuli hali ikeye, nguavo,

⁵⁸ “Tua muivuile ahandeka nguendi, ‘njikapihisa eyi njivo ya Njambi ya kutunga na mavoko, kaha mu matangua atatu nji katunga ikuavo naua, ije keti ya kutunga na mavoko.’”

⁵⁹ Kaha cipue ngoco vene vukaleho vuavo kuvua litombuele.

⁶⁰ Kaha uje kasesondote uakama uemanene hhakati kavo, kaha uehuile Yesu nguendi, “Nkuma kuuesi naviakuvakumbulula? Nkuma cuma muka eci vantu vali nakukuvangeya hakuhana vukaleho vua makuli hali yove?”

⁶¹ Vuno honi Yesu uaholokele kulu kaha kahanene cikumbululo. Ceka naua kasasendote uakama uamuihuile nguendi, “Nkuma yove Kilistu, Muana uakukuisulilia ndi?”

⁶² Kaha Yesu uahandeketele nguendi, “Yange vene, kaha mukamona Muna Muntu natumama ku livoko liacilio lia nzili, kaha akahuminina muilu mu mashelua.”

⁶³ Kaha uje kasasendote uakama uatavuile cikovelo cendi, kaha uahandeketele nguendi, “Nkuma vika tutondela naua vakaleho vukuavo?”

⁶⁴ Munevu muanashaula. Nkuma visinganieka vieni vika?” Kaha voshe valitavasanene nguavo napande kutsa.

⁶⁵ Vamo vaputukile ku mujekuila, nakumufuika ku mesho, nakumupupa, nakuhandeka kuli ikeye nguavo, “Nangula!” Kaha vaka kunuinga vamupupile vinkome.

Petulu Aviana Yesu

(Mateu26:69-75; Luka22:56-62; Iuano18:15-18;25-27)

⁶⁶ Omo Petulu te acili mucipango umo ngamba ua mpuevo ua kasasendote uakama uezile kuyehi nendi.

⁶⁷ Kaha omo uamuene Petulu hali nakuota tuhia, uamutalele sui, kaha uahandeketele kuli ikeye nguendi, “Nove, vene, uakele na Yesu uaku Nazaleta.”

⁶⁸ Vuno honi uavianene nguendi, “Kunjimutantekeya, kaha kunjitan-tekeya nevi uli nakuhandeka,” kaha uatuhukile nakuya. Kaha hajevene ndemba uatambekele.

⁶⁹ Kaha uje ngamba ua mpuevo uamumuene kaha ualekesele vaje vemanene nendi nguendi, “Nendi vene ua umo uavo!”

⁷⁰ Vuno honi Petulu uavianene naua.

Ha kantsimbu kakandende lika vaje vemanene kuje vahandeketele kuli Petulu naua nguavo, “Kuuasa kuviana nguove nove umo uavo, omuo cilivene, uhuma ku Ngalileya.”

⁷¹ Kaha Petulu uaputukile kuhandeka visingo hali ikeye vavenia nguendi, “Njilisinga nguange kunjimutantekeya ou yala muli nakuhandeka!”

⁷² Kaha hajevene ndemba uatambekele lua mu civali, kaha Petulu uanukile muahandeketele kuli ikeye nguendi, “Ntsimbu kanda ndema atambeke luvali, ukanjiviana lutatu nguove ku unjitantekeya.” Kaha ualilile.

15

Yesu vamutuala kuli Pilato

(Mateu27:1-2;11-14; Luka23:1-5; Iuano18:28-38)

¹ Omo te cimene vakuluntu va tusasendote na vakuluntu, na valongisi va mezi a mashiko, na vaka mpunga voshe valiuanene nakukutata Yesu nakumutuala kuli Pilato.

² Kaha Pilato uamuihuile nguendi, “Yove Muene ua Vayunda?” Kaha uamukumbuile nguendi, “Omo vene munahandeka.”

³ Kaha vakuluntu vatusasendote vamuvangeyele vuma viavingi.

⁴ Kaha Pilato uamuihuile naua nguendi, “Kuuesi na cikumbululo ca kuhandeka ndi? Tala vuma vali nakukuvangeya.”

⁵ Vuno honi Yesu kamukumbuile, kaha Pilato ualikomokelele.

Yesu Vamusompela Kutsa

(Mateu27:15-26; Luka23:13-25; Iuano18:39; 19:16)

⁶ Kaha ha ciuano uakele nakuvahumisila umo mukamenga uje vakele na kutonda vantu.

⁷ Kaha hhakati ka vinzinda vaje vakele mu kamenga, vaje vaka kutsiha vantu omuo ya mpindangano, hakele yala ivatumbuile nguavo Mbalambasa.

⁸ Kaha civunga cezile nakuputuka kulomba Pilato linga alinge ngue muje muakalingila kuli vakevo ntsimbu yoshe.

⁹ Kaha Pilato uavakumbuluile nguendi, "Mutonda njimihumisile Muene ua Vayunda ndi?"

¹⁰ Omuo uatantekeyele nguendi capuile kutonda lika kua vakuluntu vatusasendote linga vatuale Yesu kuli ikeye.

¹¹ Vuno honi vakuluntu vatusasendote vashongangeyele civunga linga pilato ahumise Mbalambasa.

¹² Kaha Pilato uahandekela kuli vakevo naua nguendi, "Kaha njilinge vika nou yala ou umutumbula ngueni Muene ua Vayunda?"

¹³ Kaha vatambekele cikuma naua nguavo, "Mushukike."

¹⁴ Kaha Pilato uahandekela kuli vakevo nguendi, "Vika, vupi muka vuanalingi?" Vuno honi vatambekele cikuma nguavo, "Mushukike."

¹⁵ Kaha omo Pilato uatondele kuvuahelesa civunga, uavahumisile Mbalambasa. Kaha uapupile Yesu na kuvahanaye linga vamushukike.

Masualale Vashendumuna Yesu

(Mateu27:27-31; Iuano19:2-3)

¹⁶ Kaha masualale vamutualele mu lipela (mu cipango ca Nguvulu). Kaha vasanene voshe masualele.

¹⁷ Kaha vamuzikile ntanga ya vunengu, nakuzenga cilongo ca vimbimbo nakumuzika.

¹⁸ Kaha vaputukile kumumeneka nguavo, "Haaa, Muene ua Vayunda!"

¹⁹ Kaha vamupupile ku mutue na lihongo, nakumujekuila, kaha vat-sikamene nakumulemesa.

²⁰ Kaha hanima ya kumushendumuna, vamushuluile ije ntanga ya vunengu, nakumuzika vuzalo vuendi. Kaha vamutualele nakumushukika.

Yesu Vamushukika ha Cilindakano

(Mateu27:32-44; Luka23:26-43; Iuano19:17-27)

²¹ Kaha valiuanene na yala umo ua lizina lia Simoni uaku Silene, uje uezile mu lifuti uapuile ishe ya Elekizanda na Lufuse, kaha vamusindiye linga ambate cilindakano.

²² Kaha vamutualele ku cihela vatumbuile nguavo Ngolongota (kulum-bununa nguavo cihela ca cikola).

²³ Kaha kuje vamuhanene viniu viakupandakana na miila, vuno honi Yesu kavinuine.

²⁴ Kaha vamushukikile ha cilindakano, nakulipangezela vuzalo vuendi hhakati kavo, na kuta nkela linga vauane muntu na muntu ambataho cika.

²⁵ Kaha yapuile hola ya mu citatu na viuana ku cimene, omo vamushukik-ile.

²⁶ Kaha vasonekeleho canukiso ca kumuvangeya nguavo, "Muene ua Vayunda."

²⁷ Kaha vashukikile vezi vavali hamo na Yesu umo ku livoko lia cilio mukuavo ku livoko lia cimoshue.

²⁸ Mu ngila eyi vene visoneka viapuilemo vije vihandeka nguavio, "Vamushukikile hamo na vaka vupi."

²⁹ Kaha vaje vakele nakuhita vomushauile, na kuningangesa mitue yavo, na kuhandeka nguavo, "Aha! Yove uasa kupihisa njivo ya Njambi na kuitunga naua mu matangua atatu,

³⁰ liyoyese yove vavenia, kaha shuluka ha cilindakano!"

³¹ Kaha naua cifua cimovene vakuluntu vatusasendote na valongisi ya mezi a mashiko vamushendumuine, na kuhandeka nguavo, “Uayoyesele vakuavo vuno honi kasa kuliyoyesa ikeye vavenia,

³² eceleni ou Kilistu, Muene ua Isaleli linga ashuluke ha cilindakano linga tumumone nakutsiliela.” Vaje vavamushukikile hamo nendi navakevo naua vamutengulukilile nakumushaula.

Kutsa ca Yesu

(Mateu27:45-56; Luka23:44-49; Iuano19:28-30)

³³ Kaha omo yapuile hola ya likumi na vivali ya mutania, kuakele milima ha mavu hoshe kutuala ha hola ya mucitatu ya mutania.

³⁴ Kaha ha hola ya mucitatu ya mutania Yesu uasanene na lizi liaku-tambeka nguendi, “Eloi, Eloi, lama sambakatani?” Kulumbununa nguavo, “Njambi yange, Njambi yange, vika uanjisezela?”

³⁵ Kaha vamo vaje vakele nakuhita omo vevuile eci vahandেকেle nguavo, “Talen, alinakusana Eliya.”

³⁶ Kaha umo uambuitikile mupelo mu viniu, naku haka ku lihongo na kumuhana linga anue, kaha uahandেকেle nguendi, “Vandameneni, tumone indi Eliya eja nakumushuluisa.”

³⁷ Kaha Yesu uatambekele na lizi liakama, kaha uatsile.

³⁸ Kaha ntanga ya mu njivo ya Njambi ya tavukile hhakati kuhuma kuilu nakuheta kuintsi.

³⁹ Kaha mukuluntu ua masualale omo uevuile te alinakulila kaha uezile nakumona muje muatsililile kaha uahandেকেle nguendi, “Cilivene ou yala uapuile Muna Njambi!”

⁴⁰ Kuakele vampuevo vamo naua vaje vakele nakutalelela kulahako, hhakati kavo kuakele Maliya Mandalena, na Maliya vaina ya Tiango shongo ya Yosefa na Salome,

⁴¹ vaje omo te hali mu Ngaleleya vamukavele nakumukuasa kaha naua na vampuevo vavengi vezile nendi ku Yelusalema.

Yesu Vamutsinda

(Mateu27:57-61; Luka23:50-56; Iuano19:38-42)

⁴² Kaha omo cinguezi cahetele, naua liapuile litangua lia kulivuahesela, litangua lije ntsimbu kanda sapalalo ihete,

⁴³ kaha Yosefa uaku Alamatiya, uasingimikile vaka mpunga, kaha naua uavandamenene kuija ca vumuene vua Njambi, uasimpile nakuya kuli Pilato nakulomba movila ua Yesu.

⁴⁴ Kaha Pilato ualikomokelele indi nga Yesu natsi laja, kaha uasanene mukuluntu ua masualale nakumuihula ndi Yesu natsi laja.

⁴⁵ Kaha omo uovuile kuli mukuluntu ua masualale nguendi natsi laja, uahanene movila kuli Yosefa.

⁴⁶ Kaha ualandele ntanga ya liniu, nakuneha movila ha mavu, kaha uamuzengelele muje mu ntanga ya liniu nakuutsinda mu cihilo cije ka kucokola mu livue, kaha uasindumuinineko livue ku cikolo ca cihilo.

⁴⁷ Maliya Mandalena na Maliya vaina ya Yosefa vamuene kuje va mutsindile.

16

Kusanguka ca Yesu

(Mateu28:1-8; Luka24:1-12; Iuano20:1-10)

¹ Kaha omo sapalalo yahitile, Maliya Mandalena, na Maliya vaina ya Tiango, na Salome, kaha valandele nkundu linga vakavuavese Yesu.

² Kaha omo capuile cimene mene ca litangua liakulivanga ha calumingu vaile ku cihilo omo litangua liatuhukile.

³ Kaha vahandekete kuli umo na mukuavo nguavo, "Iya honi akasa kukatuhumisila lije livue liakulema lije lili ku cikolo ca cihilo?"

⁴ Kaha vatalele kuilu, vamuene lije livue valihumisako, liapuile liakama.

⁵ Kaha vakovelele mu cihilo, kaha vamuene yala natumama ku cilio, nazala kazaku ka kutoka kalaha, kaha valikomokelele.

⁶ Kaha uahandekete kuli vakevo nguavo, "Keti muli komokele, mulinaku-tonda Yesu ua Nazaleta, uje vashukikile. Nasanguka, uahimo, mu cihela muvamuutindile.

⁷ Vuno honi yeni, mukaleke vandongisi vendi na Petulu nguenu alivanga kulutue lueni ku Ngaliyea, kuje mu kamumona, nge omo muamilekelele."

⁸ Kaha vahuminemo nakuteua, nakujaja nakulikomokela, kaha na cimo cahi civahandekete kuli muntu uoshe, omuo vovuile liova.

Yesu Alisholola kuli Maliya Mandalena

(Mateu28:9-10; Iuano20:11-18)

⁹ Honi omo Yesu uasangukile ha litangua liakulivanga cimene ca calumingu, ualisholuele ha kulivanga kuli Maliya Mandalena, uje yahumisile mahamba vatanu na vavali.

¹⁰ Kaha uaile nakuleka vaje vakele navo, vakele na vusua na kulila.

¹¹ Vuno honi cipue omo vovuile nguavo hali nakuyoya kaha na ikeye uamumuene, vuno honi kuvamuutindilele.

Yesu Alisholola kuli vamo Vandongisi vendi vavali

(Luka24:13-35)

¹² Hanima yeci ualisholuele mucifua ceka naua kuli vamo vantu vavali, omo vakele nakuenda muli lifuti.

¹³ Kaha vahilikile nakuleka voshe, vuno honi kuvavatsindilelele.

Yesu Alisholola kuli vaje Likumi Naumo

(Mateu28:16-20; Luka24:36-49; Iuano20:19-23; Vilinga1:6-8)

¹⁴ Hanima yevi Yesu ualisholuele kuli vandongisi vendi likumi na umo omo vatumanene ku mesa, kaha uavatenukilile omuo hakuhona lutsilielo na kukola ca mitima yavo, omuo kuvatsindilelele vaje vamuene te nasanguka.

¹⁵ Kaha uahandekete kuli vakevo nguendi, "Yeni mu lifuti lioshe nakuambulula muzimbu uacili kuli muntu voshe.

¹⁶ Uoshe uje atsiliela nakumumbuitika akovoka, vuno honi uje katsiliela vakamuhisa.

¹⁷ Kaha vitantekeyeso vikakala na vaje vakatsiliela mu lizina liange, vakahumisa mahamba kaha vakahandeka na mu vindaka vieka,

¹⁸ vakakuata manoka, kaha cipue vakania cuma ca kutsiha ku cikavavulumuna, vakasaleka mavoko avo hali vaka kuvavala, kaha vakakanguka."

Yesu Vamutuala Muilu

(Luka24:50-53; Vilinga1:9-11)

¹⁹ Kaha hanima yakuhandeka navo, Muene Yesu vamutualele muilu, nakutumama ku livoko lia cilio lia Njambi.

²⁰ Kaha vaile nakuambulula kuoshe, kaha Muene uapangele navo nakushulisa mezi a vitantekeyeso vije vivalingile. Amen.

Muzimbu uacili uasonekele LUKA Citsindikisi

Muzimbu ua Luka, unapu umo ua mikanda iuana ya Mulitavasano Lialihia uje ulumbununa vuyoye vua Yesu Kilistu. Umo na umo ua mikanda eyi vaitumbula nguavo “muzimbu.” kulumbununa nguavo “mizimbu ya cili.” Vaisonekele hanima ya kutsa kua Yesu kuli Mateu, Mako, Luka na Iuano. Luka kasonekele lika vimpande via vuyoye vua Yesu, vuno honi ua sonekele naua na vilinga vivalingile va ndongisi va Yesu hanima ya kutsa na kusanguka cendi, uavisonekele mu mukanda ua Vilinga via Tunganda. Naumo uahi atantekeya ntsimbu vene Muzimbu ua Luka vausonekele cipue ku vausonekelele, vuno honi vavengi vakakulilongesa cikuma valivuasana nguavo kumoneka vausonekele mu muaka ua 70 AD. Mukanda ua Luka vausonekele kuli ikeye Luka ou naua uapuile ndotolo. Mucifua mua u sonekelelemo nomu muanalikuaseselamo muyati cimonesa nguavo uapuile yala uakulilongesa cikuma. Luka uatondele kulumbununa muacili, kuhandeka vilinga omo mu vialingiuilemo, linga yakuavo vauaneneho vukuasi omo vautanda (Luka 1: 1-3). Kapuile ka Yunda (Makolose 4: 10-14) kaha uasonekele linga nava keti ma Yunda vovuisise. Eci camoneka hakutoka to muana lumbunuinamo cisemua ca ma Yunda (Luka 1: 8). Muzimbu ua Luka ua lifu cikuma na mikanda ya Mateu na Mako, omuo ilumbununa viuma vimo via kulifua. Hamikanda itatu eyi, Luka ikeye lika yana handekaho cikuma ha kusemuka kua Iuano mu kakumbuitika. Luka nahandeka naua ha lukonekelo (Kapetulu 3: 3, 11:4, 17: 3-4, 23:34, 24:47) na lilombelo (3: 21, 5:16, 6:12, 11:1-12, 22:32).

Muanatumbikilamo mukanda muvuihi:

Cinimbu 1: 1-4, Luka ahandeka ha Muzimbu uendi na kulumbununa vika linga ausoneke.

Kaha alumbununa kusemuka kua Yesu nomu muva muvuaheselele cipangi cendi (1:5;4:13).

Kaha mutambela ua kama uoshe ua Muzimbu (4:14; 21:38), Luka ahandeka ha vipangi vije Yesu ualingile, cikumani ha vikomouesa via lingile na viuma via longesele.

Mukumanesa, havinimbu via kumanesela vivali (22-24), hali nakulumbununa omo Yesu muatsile, muva mutsindile, nomu masangukile kuvatsi.

Majui akulivanga

¹ Vantu vavengi vanesekele kusoneka vukaleho vua viuma vije vialishulisilile hhakati ketu.

² Vantu vamo vamuene vukaleho vua viuma evi hume hambangelo. Vapangelele Njambi mukulekesa vantu Muzimbu uendi. Vantu ava vahanene vimpande vije viapangahalele kuli yetu.

³ Nankuma, nange njinayongola nguange njapande kukusonenavio yove mukuluntu Telefilo muvialikavelele, omuo njinavivuisisa vioshe hume havia putukilile.

⁴ Njapanga evi linga utantekeye vusunga vuacili vua viuma vije vivakulongesele.

Vambulula kusemuka kua Iuano Muka kumbuitika

⁵ Ha matangua a Helonde, muene ua Nganda ya Yundeya, kuakele kasasendote lizina liendi Zakaliya, ua kumuyati ua tusasendote va Aviya. Lizina lia mpuevo yendi liapuile Elizaveta, nendi naua uapuile uaku ntanga ya Alone.

⁶ Voshe vapuile vaka vusunga ku mesho a Njambi, vendele muacili na kuononoka Mashiko oshe a Muene Njambi.

⁷ Vuno honi vakevo kuvakele na muana omuo Elizaveta uapuile ntsimpi, kaha voshe vavali vapuile vakulukazi.

⁸ Ha litangua limo Zakaliya uakele nakupanga vipangi viendi via vusasendote mu njivo ya Muene Njambi, omuo yapuile ntsimbu yendi yahete ya kupanga.

⁹ Ngue kucilika civakavele tusasendote, Zakaliya vamuhanguile hakuta nkela linga akovele Kumutambele Uakulela cikuma mu njivo ya Muene Njambi nakutsimika insense ha mutula.

¹⁰ Ha ntsimbu Zakaliya uakele na kutsimika insense, civunga ca vantu vakele hambanza na kulombela,

¹¹ kaha kuamusholokelele kangelo ka Muene Njambi, uemanene kucilio ca mutula uakutsimikila insense.

¹² Omo Zakaliya uamumuene uaniangumukile, kaha uovuile liova.

¹³ Vuno honi Kangelo uahandekela kuli ikeye nguendi, “Keti uvue liova Zakaliya! Njambi novu lilombelo liove. Mpuevo yove Elizaveta akakusemena muana ua yala, kaha ukamuluka lizina liendi luano.

¹⁴ Ukavuahelela na kujolela, kaha vavengi vakalisamba ha kusemuka cendi!

¹⁵ Ou muana akapua uakama ku mesho a Muene Njambi. Kakanu viniu cipue viuma viakushasha vije vipendesa. Hume kanda asemuke na ha kusemuka cendi Cimbembesi ca Kulela cika mutuamenena.

¹⁶ Kaha akahiluisila vantu vavengi va Isaleli kuli Muene Njambi yavo.

¹⁷ Akaya kulutue lua Muene, ngue ku nzili na cifua ca vilinga via Eliya kananguizi ua Njambi. Akahiluisa vaishavo na vana vavo hamolika. Akatengulula vaka kuhona kuononoka na kuvahiluisila naua kungila yakuyongola ngue vaka vusunga. Akavuahelela vualumo vantu linga vavandamene Muene.”

¹⁸ Kaha Zakaliya uehuile kangelo nguendi, “Njikatantekeya vatihoni nga cuma eci mucikapua? Omuo yange njinakolo laja, kaha naua mpuevo yange nakolo laja.”

¹⁹ Kaha kangelo uamukumbuluile nguendi, “Yange Ngambiliyele njine-mana ku mesho a Njambi. Nanjitumu kuhandeka nove nakukunehela muzimbu ou uacili.

²⁰ Tolilila honi ukapua u kaveveve omuo kuua kulahелеle mezi ange, aje akapua a vusunga omo ntsimbu yauo ikaheta. Ukaholoka kuluu noho litangua lije likulaheso liange kuli yove likapua lia vusunga.”

²¹ Vantu vavandamena Zakaliya hambanza kaha valikomokelele cikuma omo uasimbuile cikuma mu Njivo ya Muene Njambi.

²² Omo Zakaliya uatuhukilemo kasele kuhandeka kuli vakevo. Kaha hakuhona kuhandeka lizi limo, uapangesele vitantekeyeso na mavoko endi, kaha vantu vakele hambanza vatantekeyele nguavo namono cimona mu Njivo ya Muene Njambi.

²³ Zakaliya omo uamanesele vipangi viendi mu Njivo ya Muene Njambi, kaha uahilukile kunjivo yendi.

²⁴ Munima yeve mpuevo yendi Elizaveta uakele na lizimo, uakele mu njivo vingonde vitanu.

²⁵ Kaha Elizaveta uahandekela nguendi, “Hakukotoka Muene Njambi nanjimuesa kavumbi, nanjihumisa shuamua ku mesho a vantu.”

Kangelo Ngambiliyele ambulula kusemuka kua Yesu

²⁶ Omo Elizaveta uakele na vingonde vitanu na imo via lizimo, Njambi uatumine kangelo Ngambiliyele aye ku Nazaleta mu nganda ya Ngalileya.

²⁷ Kangelo uakele na lizi kuli muana mpuevo umo kanda alimone na yala lizina liendi Maliya. Uje uapuile uakulama kuli yala lizina liendi Yosefa, uaku ntanga ya muene Ndaviti.

²⁸ Kaha kangelo uezile kuli Maliya uamumenekela na kuhandekela nguendi, “Muene hali nove, kaha nakukuisula cikuma!”

²⁹ Maliya uakele na citanga ha lizi lije liahandekela kangelo, uasinganiekela mu mutima uendi nguendi, “Majui aua analumbunuka vika?”

³⁰ Kaha kangelo uahandekela kuli ikeye nguendi, “Keti uvue liova Maliya, omuo unauana kavumbi kuli Njambi.

³¹ Tala, ukakala na lizimo, kaha ukasema muana ua yala, ukamuluka lizina liendi Yesu.

³² Ou muana akapua uakama, kaha vakamutumbula Muna Njambi ua helu lia vioshe. Kaha Muene Njambi akamupuisa muene, ngue muapuile kukuyendi Ndaviti.

³³ Kaha akapua muene ua miyati ya Yakomba kumiaka yoshe, na vumuene vuendi kuvukahu!”

³⁴ Kaha Maliya uahandekela kuli kangelo nguendi, “Eci cikapua vati? Omuo yange njimuana mpuevo uje kanda alimone na yala.”

³⁵ Kaha kangelo uamukumbuile nguendi, “Cimbembesi ca Kulela cikeja hali yove, na nzili ya Njambi Uakuhiana ikakufuika. Nankuma, ha cuma eci uje muana Uakulela vakamutumbula Muna Njambi.

³⁶ Tala! Munanoko Elizaveta na ikeye nemita muana ua yala muvukuluntu vuendi. Kaha ino inapu ngonde ya mucitanu na imo ya lizimo liendi cipue vene vamutumbuile nguavo ntsimpi.

³⁷ Omuo cuma nacimo cahi cahona Njambi kulinga.”

³⁸ Kaha Maliya uakumbuile kangelo nguendi, “Yange njinapu njingamba ya Muene Njambi, cilingiue kuli yange ngue munahandekela.” Kaha munima yevi kangelo uamusezele.

Maliya Ameneka Elizaveta

³⁹ Hanima ya matangua amandende, Maliya ualivuaheselele na kuya ku mbonge ya mu minkinda ya mu nganda ya Yundeya.

⁴⁰ Omo uahete kaha uakovelele mu njivo ya Zakaliya, kaha uahinduisile Elizaveta.

⁴¹ Omo Elizaveta uovuile kuhinduisa ca Maliya, kaha kakeke uaniangumukile muzimo liendi. Kaha Elizaveta uashulile na Cimbembesi ca Kulela,

⁴² kaha uahandekela na lizi liakama nguendi, “Yove uakukuisula hhakati ka vampuevo voshe, nakuisulua muana uje iukasema!”

⁴³ Omuo vikahoni cuma cakama eci cilingiua kuli yange, ngeci vaina ya Muene yange veje kuli yange?

⁴⁴ Tala! Omo vene njovuile lizi liakuhinduisa kuove, haje vene kakeke muzimo liange uaniangumukile na kujolela.

⁴⁵ Yove uuakukuisula omuo uakutsiliela ngeci lizi lia Muene Njambi kuli yove likapua lia vusunga!

Muaso ua vishangala ua Maliya

⁴⁶ Maliya uahandekela nguendi,

“Mutima uange ushangazala vukama vua Muene Njambi,
⁴⁷ Muono uange unavuahelela omuo Njambi Muyoyesi uange,
⁴⁸ Omuo nanuka yange ngamba yendi uamundende! Kuhuma hano nakuya kulutue, vantu voshe vakanjitumbula nguavo njimukakuvezika,
⁴⁹ Omuo Njambi muka nzili yoshe nanjilingila viakama. Lizina liendi lia kulela.
⁵⁰ Ikeye akamuesa cikeketima kuli voshe vamusingimika, kuhuma kucisemua cimo kutuala ku cisemua cikuavo.
⁵¹ Ikeye nolola livoko liendi lia nzili, nashandula vaka viyongola via kulihalesa.
⁵² Nahumisa vamiene vakama ha matanda avo, kaha nahaka vaje vavandende kuvukama.
⁵³ Nalisa vaje vali na njala na viakulia viacili, kaha vaka kufuka navasheke mavoko voko.
⁵⁴ Ikeye naniungu likulaheso lije lia lingile na vakuluntu vetu, kaha neja nakukuasa ngamba yendi Isaleli.
⁵⁵ Nanuka kumuesa cikeketima kuli Avilahama naku vikota viendi vioshe ku miaka yoshe!”
⁵⁶ Kaha Maliya usikamene na Elizaveta vingote vitatu, kaha uahilukile kuimbo liavo.

Kusemuka kua Iuano muka kumbuitika

⁵⁷ Ntsimbu ya Elizaveta yakutota yahete kaha uapapele muana uayala.
⁵⁸ Vandambo na vavushoko vendi vovuile muje Muene Njambi muana-mumuesa ngozi yakama, kaha voshe vavuahelelele hamo nendi.
⁵⁹ Kaha ha litangua lia mucitanu na atatu, vezile nakutuhula muana ku mukanda, vatondele kumuhindula ishe Zakaliya.
⁶⁰ Vuno honi vaina vahandekela nguavo, “houe! Mulukeni Iuano.”
⁶¹ Vamukumbuluile nguavo, “Kukuesi kavushoko kove ivaluka lizina eli!”
⁶² Kaha vaniatele ishe na kulinga vitantekeyeso na mavoko avo ku muihula nguavo, “Lizina muka utonda kuluka munove?”
⁶³ Caha Zakaliya ualombeke citale asonekeho, omo vacinehele uasonekeleho nguendi, “Lizina liendi Iuano.” Kaha voshe vali komokelele cikuma!
⁶⁴ Ha ntsimbu ijevene Zakaliya uasele kuhandeka naua, kaha uaputukile kushangazala Njambi.
⁶⁵ Vandambo voshe vakele na liova, kaha muzimbu ua uatsimanene ku mutambela uoshe ua minkinda mu nganda ya Yundeya.
⁶⁶ Voshe vaje vovuile muzimbu ou vasinganiekeleho, kaha valihozuele nguavo, “Ou kanike akafua vati?” Omuo casholokele muacili ngeci nzili ya Muene Njambi yakele hali ikeye.

Muaso ua Zakaliya

⁶⁷ Ishe ya Iuano, Zakaliya, uashulile na Cimbembesi ca kulela, kaha uahandekela vimpande vije Njambi uamusholuelele nguendi,
⁶⁸ “Kalemeso kuli Muene Njambi ya Isaleli! Neja nakukuasa vantu vendi na kuvapatula.
⁶⁹ Natuhana muyoyesi ua nzili, mutekulu ua ngamba yendi Ndaviti.
⁷⁰ Uakulahesele laja muli tunanguizi va Njambi vendi va kulela
⁷¹ linga vakatuamene ku nzili ya vitozi vetu voshe vaje vatuzinda.
⁷² Ualingile eci kumuesa cikeketima kuli vakukulula vetu na kushulisilila litavasano liendi lia kulela.
⁷³ Eci cikeco cisingo cije ca lisingile na cisemi cetu Avilahama.

⁷⁴ Uakulahesele kutuohiela ku mavoko avitozi vetu, linga tukamupangele cakuhona liova,

⁷⁵ linga tupue vakulela na vaka vusunga ku mesho endi ku matangua oshe a muono uetu.

⁷⁶ “Kaha yove munange, vakakutumbula kananguizi ka Njambi uahelu lia vioshe. Kaha ukatuama kulutue lua Muene muku vuahesa ngila yendi,

⁷⁷ nakuleka vantu vendi ngeci vakavovola haku vakonekela ku vupi vuavo.

⁷⁸ Omuo Njambi yetu uakala na cikeketima cakama akatumenekela ngue litangua lituhuka kuhuminina kuilu.

⁷⁹ Akatuila ceke kuli voshe vaje vanatumama mu milima na mucimbe-mbe ca kutsa, nakutuamenena mikono yetu mu ngila ya ciyulo.”

⁸⁰ Iuano uakolele mu muvila na mu Cimbembesi. Uakele mu mpambo noho litangua liendi lia kulisholola lia hete ku vantu va Isaleli.

2

Kusemuka kua Yesu

(Mateu1:18-25)

¹ Capuile ngacije ha ntsimbu ije, kuli Sezale Angushitu kua humine lizi lia kushika, linga vasonekese voshe vantu mu vumuene vua Maloma.

² Eci kusoneka cije ca katete civa lingile omo Kiliniu uapuile nguvulu ua Silia.

³ Kaha voshe vaile ku membo avo, va kavasonekeleko.

⁴ Kaha Yosefa uahumine ku mbonge ya Nazaleta mu nganda ya Ngilileya, uaile ku mbonge ya Mbeteheha mu Yundeya ku limbo lia semukilile Muene Ndaviti, muomu uapuile muka muyati ua Ndaviti.

⁵ Uaile nakumusoneka hamo na Maliya uje ya lamene ikeye, uje uakele na lizimo.

⁶ Capuile ngacije omo vakele kuje matangua endi a kutota a hete.

⁷ Kaha uapapele munendi ua ntuatua ua yala, kaha ua muzengelele ha ntanga, kaha uamu hakele mu cikasa ca kulila vangombe muomu kukuakele cihela cavo cakukala.

Tungelo vasholoka kuli Tunungi

⁸ Ku mutambela uje vene kuakele tuniungi mucana, vakelenakuniuka vampanga vavo vutsiki.

⁹ Kangelo ua Muene uasholokele kuli vakevo, kaha vumpau vua Muene vuatuile ceke hhakati kavo. Vovuile liova liakama cikuma.

¹⁰ Kangelo uahandekela kuli vakevo nguendi, “Keti muvue liova! Omo njinaneha Muzimbu Uacili kuli yeni, uje ukaneha kujolela cakama kuli vantu voshe.

¹¹ Vutsiki vunovene mu mbonge ya Ndaviti munasemuka Muyoyesi ueni, ikeye Kilistu Muene!

¹² Kaha eci cikapua cizivukiso ceni, mukauana kakeke vanamuzengela ha vintanga vana mulangeka mu cikasa caku lila vangombe.”

¹³ Hajevene kuasholokele civunga cakama ca masualale ca tungelo va muilu vemanene hamo na kangelo uje uanehele muzimbu, vembile na kulemesa Njambi nguavo,

¹⁴ “Vumpau kuli Njambi ua muilu,

ciyulo cikale hano ha mavu kuli vantu vaje valemala!”

¹⁵ Omo tungelo vahilukile muilu kuhuma kuli tuniungi, kaha tuniungi valihandekesele umo na mukuavo nguavo, “Tuyeni honi ku Mbeteheha linga tuka mone eci cuma cinalingiuako, cije cana tusholuela Muene.”

¹⁶ Nankuma, vaile hajevene vuasi vuasi vakauanene Maliya na Yosefa na kakeke vana mulangeka mucikasa caku lila vangombe.

¹⁷ Omo tuniungi vamumuene, vambuluile mezi aje avalekele kangelo hali kakeke.

¹⁸ Kaha voshe vaje vovuile valikomokelele ha viuma vije vivahandeketele tuniungi.

¹⁹ Vuno honi Maliya uaniungile mezi oshe aje naku uayongola mu mutima uendi.

²⁰ Kaha tuniungi vahilukile na kushangazala na kulemesa Njambi ha viuma vioshe voviule, na vije vamuene. Viuma vioshe vialingiuile ngue vene muje muavalekele kangelo.

Yesu vamuluka lizina

²¹ Omo kunahiti matangua atanu na atatu, omo ntsimbu yahete yaku-tuhula kakeke ku mukanda, kaha vamulukile lizina liendi Yesu, lizina lije lia mulukile kangelo ntsimbu kanda amuimite.

Yesu Vamutuala mu Njivo ya Muene Njambi

²² Kaha omo matangua apuilemo akulilelesa, Yosefa na Maliya valingile ngue ku Lishiko lia Mosesa. Nankuma, vatualele kanike ku Yelusalema linga vaka mukundike kuli Muene Njambi,

²³ ngue muvanasoneka mu Lishiko lia Muene Njambi, “Muana uoshe ua ntuatua ua yala vaka mukundike kuli Muene Njambi.”

²⁴ Mu Lishiko lia Muene Njambi naua lihandeka ngualio visemi vana-pande kukumbelela nkombelo ya tute vavali cipue vana va mavembe vavali, eci cikeco civalingile Yosefa na Maliya.

²⁵ Kaha honi kuakele yala umo mu Yelusalema lizina liendi Simoni. Uapuile muka vusunga kaha naua uazangele Njambi, uavandamanene kuovoka kua Isaleli. Cimbembesi cakulela cakele hali ikeye,

²⁶ Kaha vavisholuele kuli ikeye kuli Cimbembesi uakulela kakatsi kuakuhona kumono Kilistu Muene.

²⁷ Simoni ha kumutuamenena kuli Cimbembesi ca kulela, uakovelele mu Njivo ya Muene Njambi. Omo visemi vanehele kakeke Yesu mu Njivo ya Muene Njambi va mulinge ngue ku Lishiko vatumbikile lia Mosesa.

²⁸ Simoni uatambuile kakeke mu mavoko endi, uatsatselele kuli Njambi na kuhandeka nguendi,

²⁹ “Vuavuno Muene Njambi unaniungu likulaheso liove kuli yange, vuavuno tava yange ngamba yove njije nakukala nove mu ciyulo,

³⁰ omuo mesho ange anamono Muyoyesi iunatumu.

³¹ Vantu voshe vakamono kuamena cije ciunavuahesa.

³² Cipakua ceke cakusholola kuli vaje keti Vayunda, nakuneha vumpau kuli vantu vove va Isaleli.”

³³ Ishe na vaina vali komokelele hali vije via handeketele Simoni hali Yesu.

³⁴ Kaha Simoni uavakuisuile na kuhandeka kuli Maliya vanaye nguendi, “Tala! kakeke ou vamuhanguile kuli Njambi mukunongesa na kuamena vavengi mu Isaleli. Akapua cimueso ca kuhuma kuli Njambi, cije vantu vavengi vaka muluisa.

³⁵ Cimueso cije vantu vavengi cikamuesa viyongola viavo via kushueka. Kaha yove Maliya vusiua vukatuva mutima uove ngue mukuale uakuhomona.”

³⁶ Kuakele umo kananguizi uamukuluntu ua mpueyo ua ntuluue, lizina liendi Ana muna Fanuele uaku muyati ua Ashele. Uashomboketele ha miaka itanu na ivali,

³⁷ kaha honi uapuile ntuluue. Uakele na miaka makumi atanu na atatu na miaka iuana. Ikeye kahumine mu njivo ya Muene Njambi, mutania na vutsiki uakele nakulemesa Njambi ha kuliumina kulia na kulombela.

³⁸ Ha ntsimbu ijevene uahete kuli Maliya na Yosefa uahanene cikandelela kuli Njambi. uahandekela hali uje muana kuli voshe vaje vavandamenene Njambi mukupatula Yelusalema.

Vahiluka ku Nazaleta

³⁹ Omo Yosefa na Maliya vamanesele vioshe ngue ku Lishiko lia muene Njambi, vahilukile kuimbo liavo ku Nazaleta mu Ngalileya.

⁴⁰ Kaha muana ukolele uakele na nzili. Ukolele mu mana, kaha vikuisulo via Njambi viakele hali ikeye.

Yesu hali mu Njivo ya Muene Njambi ha miaka likumi na ivali

⁴¹ Ha muaka na muaka visemi va Yesu vakele nakuya ku Yelusalema ku Ciuno ca Paseka.

⁴² Omo Yesu uakele na miaka likumi na ivali, kaha vaile nendi ku Yelusalema ku cilika ca ciuno ngue ntsimbu yoshe.

⁴³ Omo matangua aje a ciuno ahuile, kaha vaputukile kuya kuimbo, vuno honi Yesu uasalele munima mu Yelusalema. Visemi vendi kuvatan-tekeyele,

⁴⁴ vayonguele nguavo hamo hali ha cendo, nankuma vendele vungezi vua litangua limo, kaha vaputukile kumutonda hhakati kava vushoko vuavo nava vusamba vavo,

⁴⁵ vuno honi kuva muuanene. Nankuma, vahilukile naua ku Yelusalema na kumutonda.

⁴⁶ Kaha ha litangua lia mu citatu vamuuanene mu Njivo ya Muene Njambi, natumama hhakati ka valongisi va mashiko a Njambi, na kuvovuilila naku vehozola vihula.

⁴⁷ Kaha voshe vaje vovuile vali komokelele cikuma mangana endi nakukumbulula cendi.

⁴⁸ Visemi vendi omo vumumuene valikomokelele, kaha vaina vahan-dekele kuli ikeye nguavo, "Munange, vika unatulingilamo? Tala! Isho nange tunaliniengele na kukutonda cikuma ngeci tukuwane."

⁴⁹ Kaha Yesu uavakumbuluile nguendi, "Vika munanjitondela? Nkuma kumuatantekeyele ngueni njinapande kukala mu njivo ya tate ndi?"

⁵⁰ Vuno honi vakevo kuvatantekeyele kulumbunuka cakukumbulula cendi.

⁵¹ Kaha Yesu uaille navo ku Nazaleta, kaha kuje uatualeleleho ku-vononoka. Vaina vaniungile vioshe evi mu mutima uavo.

⁵² Kaha Yesu ukolele mu muvila, na mu mana, uauanene kavumbi kakama kuli Njambi na vantu.

3

Iuano muka Kumbuitika avuahesa ngila ya Kilistu

(Mateu3:1-12; Mako1:1-8; Iuano1:19-28)

¹ Evi vioshe vialingiuile omo Sezale Timbeliase te hanga aciyula ha miaka likumi na itanu mu vumuene vua Loma. Ha ntsimbu ije Pontiyu Pilato uapuile nguvulu uamu Yundeya, na Helonde uasuanene mu Ngalileya, munaina Filipu uasuanene mu nganda ya Ituleya na nganda ya Talakoniti, Lisaniya uasuanene mu nganda ya Ambilene,

² na Anase na Kayafase vapuile Tusasendote Vakama. Ha ntsimbu ijevene Njambi uahandekela kuli Iuano muna Zakaliya omo uakele mu mpambo.

³ Kaha Iuano uaille ku cihela na cihela ca Ndonga ya Yundau na kuambulula nguendi, "Tengulukukeni ku vupi vueni vamimbuitike, kaha Njambi akamisambesa ku vupi vueni."

⁴ Ngue muvana soneka mu livulu lia Isaya kananguizi ua Njambi nguavo, "lizi lia umo atambeka mu mpambo nguendi,

'Vuaheseni tapalo ya Muene Njambi,
sungameseni ngila yendi linga akuhitilemo!

⁵ Vimbongo vioshe vanapande ku viofuela,
minkinda yoshe yakama neyi yaindende vaka viniekumuna,
na vingila via kuhenga vanapande kuviolola visungame,
na vingila via kuzika vanapande kuvilambesa.

⁶ Vantu voshe vakamona kuamena ca Njambi.' "

⁷ Kaha Iuano ualekele vije vivunga via vantu vezile kuli ikeye nakuvam-buitika nguendi, "Eni manoka! Iya honi naminangula linga muteue vukalu vua Njambi vuje vuli nakuija?"

⁸ Nga mutonda kuteua kuvukalu vua Njambi lingeni viuma vije vimuesa ngeci munatenguluka ku vupi vueni. Ketu mu lihandekese mu mitima yenu ngueni 'Tuli na cisemi cetu Avilahama.' Mua vusunga njimileka nguange Njambi asa kutengulula mavue aua naku uapuisa vatekulu va Avilahama!

⁹ Ngimbu vanaihaka laja kumizi ya muti, muti uoshe kuuimi vushuka vua cili vaka uteta nakuumbila mu tuhia."

¹⁰ Vantu vamuihuile nguavo, "Kaha honi tulinga vati?"

¹¹ Uavakumbuluile nguendi, "Ou hali na vikovelo vivali ahaneko cimo uje kesi naco, kaha nou alina via kulia ahaneko vakuavo."

¹² Vaka kutambula lisimo vezile linga avambuitike, kaha vamuihuile nguavo, "Mulongisi, yetu tunapande kulinga vika?"

¹³ Kaha uavalekele nguendi, "Keti mukatambule kupulakana omo mu-memika."

¹⁴ Masualale vamo naua vamuihuile nguavo, "Netu naua tunapande kulinga vika?" Kaha uavalekele nguendi, "Keti muka pukule viuma via vakueni, cipue kuvangela, simpeni na fueto yenu."

¹⁵ Vantu vakele nalikulahelo lia kuvandamena nguavo Kilistu eja honi, voshe vakele na kulihozola mu mutima yavo hali Iuano nguavo hamo ikeye Kilistu.

¹⁶ Kaha Iuano uahandekese kuli voshe nguendi, "Njimimbuitika mu mema, vuno honi ouo akeja napu uakama kupulakana yange. Ku njapan-dele cipue kuzitula mikole ya ha vinkaku viendi. Ikeye akamimbuitika na Cimbembesi ca kulela na mu tuhia.

¹⁷ Lisehua lili mu livoko liendi, ikeye akapekula na kulelesa muacili vinona vioshe kulijunguilo liendi, kaha tiliku akaitulika mu cishete cendi, vuno honi mujungu uoshe akautsimika na tuhia tuakuhona kuzima!"

¹⁸ Ha kuvasindiya cikuma Iuano uambuluile Muzimbu ua Cili ku vantu.

¹⁹ Naua Iuano uatenukilile muene Helonde, omo Helonde uambate Helondiya mpuevo ya munaina Filipu, kaha naua uamutenukilile omuo ualingile viuma vieka via vipi.

²⁰ Cuma cacipi cikuma ca lingile naua Helonde ca kuhaka Iuano mu kamenga.

Yesu Vamumbuitika

(Mateu3:13-17; Mako1:9-11)

²¹ Kaha omo Iuano uakele nakumbuitika vantu voshe na Yesu naua vamumbuitikile. Ha ntsimbu ijeneve Yesu omo uakele na kulombela, lili liashokolokele.

²² Kaha Cimbembesi ca kulela ca shulukile hali ikeye mucifua ca livembe. Kaha muilu mua humine lizi ngualio, "Yove munange injazema, njili na kuvuahelala hali yove."

*Vakukulula va Yesu
(Mateu1:1-17)*

²³ Yesu uaputukile kuambulula na kulongesa kucivunga te hali na miaka makumi atatu. Kaha vantu vamu tantekeyele nguavo ikeye muna Yosefa. Yosefa uapuile muna Heli,

²⁴ Heli uapuile muna Matati, Matati uapuile muna Levi, Levi uapuile muna Meleki, Meleki uapuile muna Njanayi, Njanayi uapuile muna Yosefa,

²⁵ Yosefa uapuile muna Matiyasi, Matayasi uapuile muna Amose, Amose uapuile muna Nashumi, Nashumi uapuile muna Eseli, Eseli uapuile muna Nangai,

²⁶ Nangai uapuile muna Maate, Maate uapuile muna Matatiya, Matatiya uapuile muna Semehine, Semehine uapuile muna Yoseke, Yoseke uapuile muna Yonda,

²⁷ Yonda uapuile muna Youanane, Youanane uapuile muna Lehesa, Lehesa uapuile muna Zelumbambele, Zelumbambele uapuile muna Sheyaletiyele, Sheyaletiyele uapuile muna Neli.

²⁸ Neli uapuile muna Meleki, Meleki uapuile muna Andi, Andi uapuile muna Kosame, Kosame uapuile muna Elemandame, Elemandame uapuile muna Ele,

²⁹ Ele uapuile muna Yoshiua, Yoshiua uapuile muna Ezazale, Ezazale uapuile muna Yolime, Yolime uapuile muna Matata, Matata uapuile muna Levi,

³⁰ Levi uapuile muna Simioni, Simioni uapuile muna Yunda, Yunda uapuile muna Yosefa, Yosefa uapuile muna Njoname, Njoname uapuile muna Eliakime,

³¹ Eliakime uapuile muna Meleya, Meleya uapuile muna Mena, Mena uapuile muna Matata, Matata uapuile muna Natane, Natane uapuile muna Ndaviti,

³² Ndaviti uapuile muna Njesi, Njesi uapuile muna Ovende, Ovende uapuile muna Mbouasi, Mbouasi uapuile muna Salemone, Salemone uapuile muna Naheshoni,

³³ Nashone uapuile muna Aminandave, Aminandave uapuile muna Andemine, Andamine uapuile muna Aleri, Aleri uapuile muna Izeloni, Izeloni uapuile muna Peleze, Peleze uapuile muna Yunda,

³⁴ Yunda uapuile muna Yakomba, Yakomba uapuile muna Isake, Iseke uapuile muna Avilahama, Avilahama uapuile muna Tela, Tela uapuile muna Nahole,

³⁵ Nahole uapuile muna Selunge, Selunge uapuile muna Leu, Leu uapuile muna Pelenge, Pelenge uapuile muna Hevele, Hevele uapuile muna shela,

³⁶ Shela uapuile muna Kainane, Kainane uapuile muna Alepakeshande, Alepakeshande uapuile muna Shemi, Shemi uapuile muna Noua, Noua uapuile muna Lameki

³⁷ Lameki uapuile muna Matusela, Matusela uapuile muna Enoki, uapuile muna Njalende, Njalende uapuile muna Maalalele, Maalalele uapuile muna Kenane

³⁸ Kenane uapuile muna Enoshe, Enoshe uapuile muna Sete, Sete uapuile muna Andama, Andama uapuile muna Njambi.

4

*Yesu va mueseke**(Mateu4:1-11; Mako1:12-13)*

¹ Yesu hakushula na Cimbembesi ca kulela, uahumine ku Ndonga ya Yundau, kaha Cimbembesi camutuamenenene mu mpambo,

² kuje Satana uakamuesekele matangua makumi auana. Ha ntsimbu ije yoshe Yesu kalile nacimo cahi, omo matangua aje ahuile, kaha uovuile njala.

³ Kaha Satana uahandেকে kuli ikeye nguendi, “Nga u Muna Njambi shika livue eli linga lilihimpule mbolo.”

⁴ Vuno honi Yesu uamukumbuile nguendi, “Vanavisoneka mu Visoneka nguavo, ‘Muntu kasa kuyoya na mbolo lika kuahi.’ ”

⁵ Kaha Satana ualondesele Yesu helu lia munkinda ualaha, kaha uamu-mueseke muka ntsimbu kakandende vumuene vuoshe vuahano ha mavu.

⁶ Kaha Satana uahandেকে kuli ikeye nguendi, “Njikakuhana vumuene ovu na vufuko vuoshe vilimo, omuo vanjihanavio, kaha njikavihana kuli uoshe uje injitonda.

⁷ Nga unjilemesa, kaha vioshe evi vikapua viove.”

⁸ Yesu uahandেকে kuli ikeye nguendi, “Vanavisoneka mu Visoneke nguavo, ‘Ukalemesa Muene Njambi yove, ikeye lika iukapangela!’ ”

⁹ Kaha Satana uamutualele ku Yelusalema, uamuhakele ha kashongua ka njivo ya Muene Njambi, uahandেকে kuli ikeye nguendi, “Nga u Muna Njambi, liumbile ha mavu kuhuma kuno kuilu,

¹⁰ omuo vanavisoneka mu Visoneka nguavo, ‘Njambi akashika tungelo vendi na kukuniunga.’

¹¹ Kaha vanavisoneka mu Visoneka naua nguavo, ‘Vakakukuata, linga viliato viove keti vikatsutsuke ku livue.’ ”

¹² Vuno honi Yesu uahandেকে kuli ikeye nguendi, “Vanavisoneka mu Visoneka nguavo, ‘Keti useke Muene Njambi yove.’ ”

¹³ Omo Satana uamanesele kueseke Yesu mu vingila vioshe, kaha uamusezele noho hakauana ntsimbu ikuavo.

*Yesu aputuka vipangi viendi mu Ngalileya**(Mateu4:12-17; Mako1:14-15)*

¹⁴ Kaha Yesu uahilukile ku Ngalileya, na nzili ya Cimbembesi ca kulela yakele muli ikeye. Kaha muzimbu uendi uatsimanene mu nganda yoshe ya Ngalileya.

¹⁵ Yesu uavalongesele mu vinjivo viavo via malombelo, kaha voshe vamushangazalele.

*Yesu vamuviana mu Nazaleta**(Mateu13:53-58; Mako6:1-6)*

¹⁶ Yesu uaile ku Nazaleta, kuje kuakolelele, kaha uakovelele mu njivo ya malombelo ha litangua lia Sapalalo ngue ku cilika cendi. Kaha uemanene na kutanda Visoneka.

¹⁷ Vamuhanene livulu lia sonekele Isaya Kananguizi ua Njambi. Kaha uazengunuine lije livulu liakuzenga, uauanene ha mutambela uje uaton-dele kutanda. Kaha uatandele nguendi,

¹⁸ “Cimbembesi ca Muene Njambi cili muli yange, omuo nanjihangula kuambulula Muzimbu ua Cili kuli vihutu. Nanjitumu kuambulula linga vinzinda vaka vapatule, nakuambulula linga tupuputua vakamone, nakun-jituma kupatula vaje vavali nakuyandesa,

¹⁹ nakunjituma kuambulula ngeci ntsimbu inahete ya kavumbi ka Muene Njambi ku vantu vendi.”

²⁰ Yesu uazengele lije livulu, ualihanene naua kuli muka kuniunga, kaha uatumamene. Vantu voshe vakele muje mu njivo ya malombelo vamutalele ntooma,

²¹ kaha uahandekete kuli vakevo nguendi, “Visoneka evi lelo vina-puisamo ku mesho eni, ngue omo munovu vanakele nakulitanda.”

²² Kaha voshe vamushangazalele, valikomokelele ku mezi endi acili aje ahandekete, vahandekete nguavo, “Ou ikeye uje muna Yosefa ndi?”

²³ Kaha uahandekete kuli vakevo nguendi, “Mua vusunga mukanjitela cisimo eci ngueni, ‘Ove cimbanda likanguise yove vavenia!’ Cimukalum-bununa cikapua ngueni, ‘Yove linga viuma vioshe muno muimbo liove, vijevene vituovuile viualingile mu Capenama.’

²⁴ Mua vusunga njimileka, naumo uahi kananguizi ua Njambi ivakatava muimbo liendi.

²⁵ Vuno honi muavusunga njimileka mu lifuti lietu lia Isaleli muakele vantuluue vavengi ha matangua a Eliya kananguizi ua Njambi, omo kalunga kanokele miaka itatu na vingonde vitanu na imo naua honi kuakele njala mu lifuti lioshe.

²⁶ Eliya kuvamutumine kuli voshe, vuno honi kuli ntuluue uje keti Kayunda uje uakele mu limbo lia Zelefani kuyehi na mbonge ya Sindone.

²⁷ Kuakele vantu vavengi vakele nakuvavala mbumba mu Isaleli ha ntsimbu ya Elisha kananguizi ua Njambi, vuno honi naumo uahi yakan-guisile kuvanga lika Namane keti Kayunda uaku Silia.”

²⁸ Omo vantu vaje vakele mu njivo ya malombelo vazivile evi, vakele na litoto.

²⁹ Vakatakile, kaha vakokelele Yesu hambaza ya nganda, vamutualele kuntsongo ya munkinda haje ha vatungile nganda yavo. Vatondele ngeci vakamumbile mu cimbongo.

³⁰ Kaha uahitile mukati kavo nakuya.

Yala muka Cimbembesi ca kujuala

(Mako1:21-28)

³¹ Yesu uaile ku Kapenama, mbonge ya mu Ngaleleya, kuje uakalongesele vantu lia Sapalalo.

³² Vantu voshe vakomokele cikuma kuambulula nguendi, omuo mezi endi akele na nzili.

³³ Kaha mu njivo ya malombelo muakele yala umo uakele na Cimbembesi ca kujuala, catambekele cikuma.

³⁴ “Haa! Yove Yesu uaku Nazaleta utonda kulinga vika kuno netu? Uneja nakutunongesa ndi? Nja kutantekeya yove uapua umo Uakulela ua Njambi!”

³⁵ Kaha honi Yesu uashikile Cimbembesi ca kujuala nguendi, “Kuluu huma muli muntu ou!” Kaha cije Cimbembesi ca kujuala cauisilile uje yala ha mavu ku mesho avo voshe, kaha ca humine muli ikeye kuakuhona kumuvetuesa.

³⁶ Vantu voshe valikomokelele cikuma vaputukile kulihandekesa umo na mukuavo nguavo, “Majui muka aua? Muntu ou hali na nzili ya kushika vimbembesi via kujuala kaha vimuivula.”

³⁷ Kaha vialingile vioshe viovuikile mu cihela ca lifuti lije.

Yesu Akanguisa vantu vavengi

(Mateu8:14-17; Mako1:29-34)

³⁸ Kaha Yesu uahumine mu njivo ya malombelo uaile ku njivo ya Simoni. Uauanene vainamuene ya Simoni vavavala lisika sika liakama cikuma. Valombele Yesu linga amukangule.

³⁹ Kaha Yesu uaile kuli ikeye nakumukotamena, kaha uashikile lije lisika sika kuhua kaha uakangukile na kuimana nakuputuka kuvapangela via kulia.

⁴⁰ Hakulahuka kua litangua, voshe vaje vakele na mishongo yakuli seza-seza vavanehele kuli Yesu, voshe uavahakele mavoko na kuvakanguisa.

⁴¹ Kaha vimbembesi via kujuala naua via huminemo mu vantu vavengi na kutambeka nguavio, "Yove u Muna Njambi!" Vuno honi ikeye uashikile vimbembesi via kujuala ngeci keti vihandeka nacimo cahi naua, omuo vikevio viamutantekeyele nguavio ikeye Kilistu.

Yesu Ambulula mu Vinjivo via Malombelo (Mako1:35-39)

⁴² Omo kuacele Yesu uatuhukile, nakuya kuali kaliendi lika. Vantu vaputukile kumutondezeka, omo vamuuanene vatondele kumuvindika ngeci keti ahume kuli vakevo.

⁴³ Vuno honi uahandekile kuli vakevo nguendi, "Njapande kuambulula Muzimbu Viacili via vumuene vua Njambi mu vimbonge vieka naua, omuo evi vikevo via njitumine kulinga Njambi."

⁴⁴ Uakele na kuambulula mu vinjivo via malombelo via Njambi vioshe viamu Yundeya.

5

Yesu asana Vandongisi va kulivanga (Mateu4:18-22; Mako1:16-20)

¹ Litangua limo Yesu uemanene ha ntunda ya cisali ca Ngenesaleta te vantu vakele nakulisindika kuya kuli ikeye linga vovue lizi lia Njambi.

² Kaha uamuene mato avali vanaatutika ku mukulo ua cisali. Vaka kuta vatsi vahumine mu mato na kukusha manda avo.

³ Yesu uakovelele mu vuato vumo, vuakele vua Simoni, kaha uamu-lombele ngeci avusindikile alahako kamandende na hantunda. Yesu uatumamene mu vuato, kaha ualongesele cije civunga.

⁴ Omo Yesu uamanesele kuhandeka, kaha uahandekile kuli Simoni nguendi, "Sindikila vuato haje ha mema a kulova, kaha yove na vakueni teni manda eni linga mujevele vantsi."

⁵ Simoni uamukumbuluile nguendi, "Muene, tunapanga cikuma vutsiki vuoshe vuno honi nakamo tunakuata kahi. Vuno honi omuo ukahandeka ngoco, kaha tuta manda."

⁶ Kaha omo vate manda vakuate vatsi vavengi cikuma, kaha manda aputukile kutavuka.

⁷ Nankuma, vaniatele vavusamba vavo vakele mu vuato vukuavo veje vaku vakuase. Vezile vashulisile mato oshe na vatsi mukemo vaputukile kuvombela.

⁸ Omo Simoni Petulu uamuene vije vialinguiile, uatsikamene ha mavuli ku mesho a Yesu na kuhandeka nguendi, "Muene, huma kuli yange, omuo yange njimuka vupi!"

⁹ Simoni na vakuavo vali komokelele cikuma ha kumona vatsi vavengi vava kuatele.

¹⁰ Simoni uakele navavusamba vendi vavali mazina avo apuile Yakomba na luano vana va Zembendeo, nava kevo naua vali komokele cikuma.

Yesu uahandekela kuli Simoni nguendi, “Keti uzive liova, hume hano ukata vantu.”

¹¹ Vatutikile mato avo ku ntunda, vasezele viose, kaha vakavele Yesu.

Yesu akanguisa muka mbumba

(Mateu8:1-4; Mako1:40-45)

¹² Litangua limo Yesu uakele mu mbonge imo muje muakele yala umo uakele nakuyanda na mushongo ua mbumba. Omo uamuene Yesu, uauile naciha cendi ha mavu amulambelele nguendi, “Muene, nga utonda, uasa kunjikanguisa!”

¹³ Yesu uoluele livoko liendi uamukuate uahandekela nguendi, “Njitonda, kanguka!” Hajevene uakangukile.

¹⁴ Yesu uamushikile nguendi, “Keti ulekeko muntu umo cuma eci kuahi, vuno honi ya ukalisholole kuli kasasendote linga vantu voshe vatantekeye nguavo vakukangula, ambahoni ukakombelele nkombelo ije yashikile Mosesa.”

¹⁵ Vuno honi muzimbu uahali Yesu uakele nakushanduokela kuoshe, kaha vivunga via vantu vezile nakumuivuilila na kuvakanguisa ku mishongo yavo.

¹⁶ Vuno honi Yesu kakengi uakele nakuvaseza nakuya kuali kaliendi lika na kulombela.

Yesu akanguisa muka kalepa

(Mateu9:1-8; Mako2:1-12)

¹⁷ Litangua limo omo Yesu uakele nakulongesa, Vafaliseo vamo na valongisi va mezi a Lishiko lia Mosesa vatumamene kuje, vahumine mu membo a ku Ngaliya na ku Yundeya na ku mbonge yakama ya Yelusalema. Nzili ya Muene Njambi yakele hali Yesu mukukanguisa vantu.

¹⁸ Kaha vamala vamo vanehele yala muka kalepa vamulangeka ha citalatala, vesekele kumukovelesa mu njivo linga vamulangeke ku lutue lua Yesu.

¹⁹ Omuo civunga ca vantu, kuvauanene ngila yaku mukovelesela mukati. Nankuma, vamutualele helu lia njivo, vatuvile mbengua mu mateya, kaha vamusoselele na citalatala cendi ha mavu mukati ka civunga kulutue lua Yesu.

²⁰ Omo Yesu uavamuene lutsilielo luavo, uahandekela kuli uje yala nguendi, “Kavusamba kange, vipi vovie vana visambesa.”

²¹ Valongisi va mezi a Lishiko lia Mosesa na Vafaliseo vaputukile kusinganika nguavo, “Iya ou yala alinakushaula Njambi? Njambi lika ikeye muka kusambuesa vupi!”

²² Yesu uazivukile viyongola viavo, kaha uahandekela kuli vakevo nguendi, “Vikahoni mulina kuyongueta viuma via ngacije?”

²³ Cacasi cika, kuhandeka nguange, ‘Vipi vovie vana visambesa,’ indi kuhandeka nguange, ‘Katuka uende?’

²⁴ Njimimuesa linga mutantekeye ngueni Muna Muntu hali na nzili hano ha mavu ya kusambuesa vipi.” Kaha uahandekela kuli uje muka kakalepa nguendi, “Njikuleka nguange katuka, ambata citalatala cove, uye ku njivo yove!”

²⁵ Kaha hajevene uakatukile hhakati kavo, uambate citalatala cendi uaile ku njivo nakushangazala Njambi.

²⁶ Kaha voshe valikomokelele cikuma! Vovuile liova, vashangazalele Njambi vahandekela nguavo, “Lelo tunamono viuma via kukomokesa!”

Yesu asana Levi

(Mateu9:9-13; Mako2:13-17)

²⁷ Munima yevi, Yesu uatuhukile, kaha uamuene muka kutambula lisimu, lizina liendi Levi, natumama mu njivo yendi ya kutambuila lisimu. Kaha Yesu uahandekela kuli ikeye nguendi, "Njikave."

²⁸ Kaha Levi uakatukile, usezele viose na kumukava.

²⁹ Kaha Levi calingiule Yesu ciuano cakama cakulia mu njivo yendi, kaha hhakati kavaje vavalaniene hakele vaka kutambula lisimu na vantu veka vavengi.

³⁰ Vafaliseo vamo na valongisi va mezi a Lishiko lia Mosesa vaje vakundamene ku mpunga yavo valiniengelele kuli vandongisi va Yesu. Vehuile nguavo, "Vikahoni mulia na kunua hamo na vaka kutambula lisimu na vaka vupi?"

³¹ Yesu uavakumbuluile nguendi, "Vakangule kuvekutonda cimbanda kuahi, kuvanga vaka kuvavala lika.

³² Ngoco vene yange kunjezile mukusana vantu vaje vanalimono vakevo vavenia nguavo vaka vusunga linga vatenguluke, vuno honi vantu vaje vaka vupi."

*Cihula caha kulikela kulia
(Mateu9:14-17; Mako2:18-22)*

³³ Vantu vamo vahandekela kuli Yesu nguavo, "Vandongisi va Iuano vakalikela kulia vintsimbu viavingi na kulombela, na vandongisi va Vafaliseo naua vakalingi cuma cimo, vuno honi vandongisi vove vakali na kunua ntsimbu yoshe."

³⁴ Kaha Yesu uavakumbuluile nguendi, "Nkuma yeni mutalelela vangenzi ku ciuano ca vulo linga vaye na njala ndi? Muavusunga vene kuahi! Omo vavenia vulo acili navo kuvapandele kulinga ngacije.

³⁵ Vuno honi litangua likeja omo vakahumisa vavenia vulo hhakati kavo, ambahoni vakalikela kulia."

³⁶ Yesu uavatelele naua cisimo eci nguendi, "Kuuasa kutavula cikamba ku kazaku kakaha na kucitongela ha kazaku ka laja. Nga ulingamo, kaha utavula kazaku kakaha, cikamba caciha kucilitombola na ntanga yalaja.

³⁷ Naua vene kuvekulongela viniu viavihia mu vinjeke via vilambu vialaja. Nga ulingamo vije vinjeke via vilambu vitavuka kaha viniu vihitikila muangoco.

³⁸ Vuno honi viniu viavihia vaka vilongela mu vinjeke via vilambu viavihia.

³⁹ Kuuasa kunua viniu viavihia omo unanu laja viniu vialaja. Uhandeka nguove, 'Viniu vialaja viacili.' "

6

*Yesu ikeye Muene ua Litangua lia Sapalalo
(Mateu12:1-8; Mako2:23-28)*

¹ Ha litangua limo lia Sapalalo Yesu na vandongisi vendi vakele nakuhita mu mehia a tiliku. Vandongisi vendi vaputukile kushututozola mitue ya tiliku, vaitsenene mu mavoko avo, kaha valile vinona.

² Kaha Vafaliseo vamo vakele kuje vavehuile nguavo, "Omo vika muli-nakulingila evi kuvekulunga ha litangua lia Sapalalo kuya mu Lishiko lia Mosesa?"

³ Yesu uavakumbuluile nguendi, "Nkuma kanda mutande vije vialingile Ndaviti na vaje vakele hamo nendi omo vazivile njala ndi?

⁴ Uakovelele mu njivo ya Muene Njambi, kasasendote uamuhanene lisesa lia kunona ije mbolo ivakombelele kuli Njambi, ualile, na kuhanako naua

vantu vendi. Mbolo ije kuyapandele ku ilia kuli muntu uoshe kuvanga tusasendote lika.”

⁵ Kaha Yesu uamanesele nguendi, “Muna Muntu ikeye Muene ua Litangua lia Sapalalo.”

Yesu akanguisa yala uakusekua livoko
(Mateu12:9-14; Mako3:1-6)

⁶ Ha litangua lia Sapalalo likuavo Yesu uakovelele mu njivo ya malombelo, kaha ualongesele. Muakele yala umo uakusekua livoko lia cilio.

⁷ Kaha valongisi va mezi a Lishiko lia Mosesa na Vafaliseo vamo vatondele kashuilo hali Yesu linga vamu uaneneho mulonga, nankuma, vamutalele ntoma muyehi yehi linga vamone nga ikeye akanguisa uje muntu ha litangua lia Sapalalo.

⁸ Vuno honi Yesu uazivukile viyongola viavo, kaha uahandekete kuli uje yala uakusekua livoko nguendi, “Katuka uije hano hhakati.” Kaha uje yala uakatukile uemanene mukati.

⁹ Nankuma, Yesu uahandekete kuli vakevo nguendi, “Njimihula nguange, cuma muka vanatutavesa ha Lishiko lietu kucilinga ha litangua lia Sapalalo? Kupanga viacili indi kupanga viavipi? Kuamena muono ua muntu indi kuunongesa?”

¹⁰ Uatalele kuli vakevo voshe noku noku, kaha uahandekete kuli uje yala nguendi, “Olola livoko liove.” Uoluele livoko liendi, kaha liakangukile.

¹¹ Ha cuma eci valongisi va mezi a Lishiko lia Mosesa na Vafaliseo vakele na matoto, kaha valihandekesele hhakati kavo vivapandele kulinga kuli Yesu.

Yesu ahangua tunganda likumi na vavali
(Mateu10:1-4; Mako3:13-19)

¹² Ha ntsimbu ije Yesu ualondele ku munkinda na kulombela, kaha uakele nakulombela vutsiki vuoshe kuli Njambi.

¹³ Omo litangua liatuhukile, kaha uasanene vandongisi vendi linga veje kuli ikeye, kaha uahanguileho likumi na vavali hhakati kavo, vaje vatumbuile tunganda.

¹⁴ Aua akeuo mazina avo: Simoni uje yalukile Petulu na munaina Anduleo, Yakomba na Iuano, Filipu na Mbatolomeo,

¹⁵ Mateu na Tomasi, Yakomba muna Alufeya, na Simoni (uje ivatumbuile “Zelote.”)

¹⁶ Yundasa muna Yakomba, na Yundasa Sakaliote uje uamuendelevungungu.

Yesu Alongesa na Kukanguisa
(Mateu4:23-25)

¹⁷ Yesu na vandongisi vendi vahumine ku munkinda kaha vemanene ku mutambela uaku jalamanena. Na civunga ceka cakama ca vandongisi vakele kuje nakumuvandamena. Naua civunga cakama ca vantu cahumine ku Yundeya kuoshe na ku Yelusalema, naku vimbonge via ku cikuma ca Tile na ku Sindone.

¹⁸ Vezile nakumuvuilila na kuvakanguisa ku mishongo yavo. Voshe vaje vakele nakuyanda na vimbembesi via kujuala vezile, kaha uavakanguisile.

¹⁹ Kaha civunga coshe ca vantu vesekele kumukambeka mavoko, omuo nzili yahumine kuli ikeye na kuvakanguisa voshe.

Vikuisulo na Vinangulo
(Mateu5:1-12)

²⁰ Yesu uatalele vandongisi vendi, kaha uahandekete nguendi,

"Muavezika yeni vaka kuhutua,
omuo Vumuene vua Njambi vunapu vueni!"

21 "Muavezika yeni muli na njala vuavuno,
omuo mukakuta!"

"Muavezika yeni mulinakulila vuavuno,
omuo mukajolelela!"

22 "Muavezika omuo vantu vamizinda na kumiviana na kumishaula na kumitumbula nguavo muva vapi, vioshe evi omuo mukavangeya Muna Muntu!"

23 Joleleni omo eci cilingiua, kineni na kujolela, omuo Njambi namivua-hesela cikandelela ceni cakama muilu. Omuo vakuluntu vavo valingile ngacije kuli tunanguizi va Njambi va Njambi.

24 "Vuno honi tuyando kuli yeni munafuku laja,
omuo muatambula laja kuyoya kuacili!"

25 "Tuyando tueni yeni munakuta vuavuno,
omuo mukaziva njala!"

"Tuyando tueni yeni muli nakujolela,
omuo muka pihilila na kulila!"

26 "Tuyando tueni omuo vantu voshe vali nakumishangazala, omuo vakuluntu vavo valingile ngacije kuli tunanguizi va Njambi va makuli.

Zangeni vitozi veni (Mateu5:38-48; 7:12a)

27 "Vuno honi njimileka yeni vaka kunjitolilila nguange, zangeni vitozi veni, lingeni muacili kuli vaje vamizinda,

28 vezikiseni vaje vamisanga, kaha lombeleleni vaje vali nakumiyandesa.

29 Nga muntu akupupa ku litama limo, kaha mutenguluile akupupe ku litama likuavo naua, nga muntu akunieka kazaku kove, muhane naua na cikovele cove.

30 Muntu uje amilomba muhaneni cuma cije canamilombo, omo muntu ambata cuma cove, kaha keti ucihule naua.

31 Viuma vioshe vimutonda ngeci vakueni vamingilevio, mukemuo vene, neni naua valingilenavio.

32 "Nga muzanga lika vaje vamizanga, vikahoni mutambuila vishangalo? Cipue vaka vipi vakazanga vaka kuvazanga!"

33 Nga mulinga lika muacili kuli vaje vakamilingi muacili, vikahoni mutambuila vishangalo? Cipue vaka vupi mukemuo muvakalingi!

34 Nga mukumuisa lika vaje muavandamena nguenu vamihiluisila, vikahoni mutambuila vishangalo? Cipue vaka vupi naua vakalikumuisa, linga vatambule ngue muje muvanahana.

35 Vuno honi zangeni vitozi veni, kaha lingeni muacili kuli vakevo, vakumuiseni vuno honi keti muvandamene nguenu mukavitambula naua. Kaha cikandelela ceni cikapua cakama, mukapua vana va Njambi ua Helu lia Helu. Omuo ikeye akevuila ngozi vaje kuveikumukandelela na vaje vaka vupi.

36 Pueni vaka cikeketima ngue Ishueni uapua muka cikeketima.

Kuhisa Vakueni (Mateu7:1-5)

37 "Keti muhise, kuteua neni vakamihisa, keti mupaye, kuteua neni vakamipaya, sambeseni, kaha neni vakamisambesa.

38 Haneni, kaha neni vakamihana. Cikapua nge muka kulandesa uje akuhana seteko ya vinona, akaizindangeya nakui niekumuna kaha

akashulilisaho cikuma noho ishulisa muvimbango via cisetekelo na kumuanianga kaha honi akakuhanavio vioshe. Seteko ije museteka nayo vakueni, ikeyo naua vakamiseteka nayo."

³⁹ Kaha Yesu uavatelele cisimo eci nguendi, "Kapuputua umo kasa kutuamenena kapuputua mukuavo, nga alingamo voshe vavali vakauila mucina.

⁴⁰ Kukuesi ndongisi atuvakana mulongisi uendi vuno honi ndongisi uoshe, omo namanesa kulilongesa cendi, ikeye naua akapua hamo na mulongisi uendi.

⁴¹ "Vikahoni umona kacishoni kali ha lisho lia mukueni, vuno honi ku uyongola mukambo uli mulisho liove?

⁴² Vatihoni uhandeka na mukueni nguove, 'Mukuetu, teua njikuhumise kacishoni kali ha lisho liove,' omo yove uli na mukambo mu lisho liove? Ove muka civembulu! Ha kulivanga humisa mukambo uli mu lisho liove, kaha umone muacili hakuhumisa kacishoni kali ha lisho lia mukueni.

Muti na Vushuka vuavo

(Mateu7:16-20; 12:33-35)

⁴³ "Muti uacili kuuasa kuima vushuka vuavupi, cipue muti uaupi kuuasa kuima vushuka vuacili.

⁴⁴ Muti uoshe vauzivukila ku vushuka vuauo, omuo kuuasa kuhela vushuka vua mukuyu na mikolovozi ya viniu ku muti ua mambimbo.

⁴⁵ Muntu uacili ikeye muka kusholola viuma via viacili via ku mutima uendi, muntu ua mupi akasholola viuma viavipi via ku mutima uendi omuo kanua kakahandeka vije viashula mu mutima.

Vaka kutunga vinjivo Vavali

(Mateu7:24-27)

⁴⁶ "Vika munjitumbuila ngueni, 'Muene, Muene', vuno honi kumulingi vinjimileka?

⁴⁷ Njimileka cifua cendi uoshe uje eja kuli yange na kuvuilila mezi ange na kuuononoka.

⁴⁸ Napu ngue yala uakutungila njivo yendi, uahindile nakulovesa luvula ha livue. Livazi liezile liapupile kuje ku njivo, vuno honi kuyaningelege, omuo luvula luaije njivo luakele ha livue.

⁴⁹ Vuno honi uoshe aziva mezi ange kuakuhona kuuononoka napu ngue yala uatungile njivo yendi kuakuhona kuhinda luvula. Omo livazi liapupile kuje ku njivo, kaha yasiukile hajevene, kuua kuayo kuapuile kuakupi cikuma!"

7

Lutsilielo lua Mukuluntu ua Loma

(Mateu8:5-13)

¹ Omo Yesu uamanesele kuhandeka viuma vioshe evi ku vantu, kaha uaile ku Kapenama.

² Mu mbonge ije muakele mukuluntu ua masualale va Loma uje uakele na ngamba yendi uaseho cikuma kuli ikeye. Uje muntu uavavalele uatondele kutsa.

³ Omo uje mukuluntu uovuile lutsimo lua Yesu, uatumine vamo vakuluntu va Vayunda kuli ikeye nakumulomba eje mukukanguisa ngamba yendi.

⁴ Vezile kuli Yesu vamulambelelele cikuma nguavo, "Ou yala napande kumukuasa.

⁵ Ikeye uazanga vantu vetu, naua uatutungilile njivo ya malombelo yetu."

⁶ Yesu uaille navo, vuno honi omo uahete kuyehi na njivo, uje mukuluntu ua masualale uatumine vavusamba vendi kuli Yesu nakumuleka nguavo, "Muene, keti ukaluuise mutima uove omuo kucanjipandele yove ukakovele mu njivo yange.

⁷ Ngecivene nange naua kucanjipandele kuheta kuli yove. Handeka lika lizi, kaha ngamba yange akakanguka.

⁸ Njitantekeye eci omuo nange njili muitsi lia nzili yakama, na masualale vali muitsi liange, njishika umo nguange, 'Ya!' kaha aya, kaha naua njishika mukuavo nguange, 'Tja!' kaha eja. Njihandeka kuli ngamba yange nguange, 'Linga evi!' kaha acilinga."

⁹ Yesu ualikomokelele omo uovuile evi, kaha uatengulukilile kuli cije civunga camukavele, uahandeketele nguendi, "Njimileka nguange, nakumo kuahi kunjinuana lutsilieloliakama ngue eli, cipue mu Isaleli luahimo."

¹⁰ Omo vaje vamala vavatumine vahilukile ku njivo ya uje mukuluntu vaka uanene uje ngamba nakanguka.

Yesu asangula muna ntuluue ua yala

¹¹ Munima yevi Yesu uaille ku mbonge ya Naine, vandongisi vendi na civunga cakama vamukavele.

¹² Omo ikeye uahete kuyehi na cikolo ca mbonge, kaha vantu vatuhuile civimbi ha mbanza, uje yala uatsile uapuile muana umolika uaumo ntuluue, kaha civunga cakama cahumine muje mu limbo cakele hamo nauje ntuluue.

¹³ Omo Muene Yesu uamumuene, kaha uamuivuilile cikeketima, kaha uahandeketele kuli ikeye nguendi, "Keti ulile."

¹⁴ Ambahoni Yesu uaille uakakuate ku citala tala, kaha vaje tufunde vemanene. Yesu uahandeketele nguendi, "Ove kankalava, njikuleka nguange, hinduka!"

¹⁵ Kaha uje yala uatsile uasangukile uatumamene na kuputuka kuhandeka, kaha Yesu uamuhanene kuli vaina.

¹⁶ Vantu voshe vovuile liova, kaha vashangazalele Njambi, vahandeketele nguavo, "Kananguizi ua Njambi uakama neja kuli yetu na Njambi neja nakuovola vantu vendi!"

¹⁷ Kaha lutsimo olu lua Yesu luashandeketele mu Yundeya muoshe na ku vinganda vioshe via kulihata.

Iuano muka kumbuitika atuma vantu vavali kuli Yesu (Mateu11:2-19)

¹⁸ Omo vandongisi va Iuano vamulekele viuma vioshe evi, kaha uasaneneko vandongisi vendi vavali.

¹⁹ Uavatumine kuli Muene Yesu nakumuihula nguavo, "Yove vene uija? Indi tuvandameneko ueka naua."

²⁰ Omo vamala vezile kuli Yesu vahandeketele nguavo, "Iuano muka kumbuitika natutumu kuli yove nakuihula nga yove uje eja indi tucivan-dameneko ueka naua."

²¹ Ha ntsimbu ijevene Yesu uakanguisile vantu vavengi ku kuvavala kuavo, naku mishongo yavo nakuhumisa mahamba na kumuesa tupuputua vavengi.

²² Kaha uatavele vandongisi va Iuano nguendi, "Yemuye mukahandeketele kuli Iuano vimunamono nevi vimunevu. Tupuputua vamona, vilema venda, vaka mbumba vanalele, tusinda matuitui vaziva, vatsi vasanguka, kaha muzimbu uacili vauambulula kuli tuhutu.

²³ Vanavezika vaje kuvakecela lutsilielo luavo muli yange."

²⁴ Omo vandongisi va Iuano vahilukile, kaha Yesu ualekele cije civunga hali Iuano nguendi, “Omo muaile kuli Iuano mu mpambo muatondele kukamona muntu ua vati? Indi muaile mukumona yala uakufua ngue vishoni via laha viakutepuzoka na mpunzi?”

²⁵ Muaile nakumona vika honi? Muntu nazala vuzalo vuasenga ndi? Vantu vakakuzala muacili na kukala muasenga vakakala mu mihela ya muene.

²⁶ Njilekeni muatondele kukamona vikahoni? Muatondele kukamona kananguizi ua Njambi ndi? Eyo, ikeye vene naua ikeye kananguizi ua Njambi uakama.

²⁷ Ou ikeye Iuano uje visoneka vihandeka nguavio, ‘Njikatuma kanganda kange kulutue luove. Akavuahesa ngila yove.’

²⁸ Njimileka nguange, ku vantu voshe vaje vanakeleko, naumo uahi napulaka Iuano. Vuno honi uje uamundende kumaneselela mu vumuene vua Njambi ikeye napulakana Iuano.”

²⁹ Vantu voshe hamo na vaka kutambula lisimo vononokele vusunga vua Njambi, kaha vavambuitikile kuli Iuano.

³⁰ Vuno honi Vafaliseo na valongisi va Mashiko a Mosesa vavianene vilinga vua Njambi hali vakevo, mukemo kuva vambuitikile kuli Iuano.

³¹ Yesu uahandekele nguendi, “Kuliveya njasa kusetekesa vantu va matangua ano? Vanapu ngue vika?”

³² Vakevo vanapu ngue vanike vanatumama kumuhela uakulandesela viuma, kaha valitambakana umo na mukuavo, ‘Tunamimbilile miaso ya vushombolua, vuno honi kumuakinine! Tuamimbilile miaso ya vusiua vuno honi kumua lilile!’

³³ Omo Iuano muka kumbuitika uezile, kalile mbolo cipue kunua viniu, kaha muahandekele ngueni, ‘Ali na mahamba!’

³⁴ Kaha omo Muna Muntu uezile, ikeye ualile nakunua, kaha muahandekele ngueni, ‘Talení ou yala! Uapua mukamutupu na kupenda, kaha kavusamba ua vaka kutambula lisimu na vaka vupi!’

³⁵ Ngoco vene mana vana amuesa kupua acili kuvuyoye vua vaje vauakava.”

Mpuevo ua vupi va musambesa

³⁶ Litangua limo umo ua Vafaliseo ualizanga lia Simon ualaniene Yesu kulia nendi, kaha uakovelele mu njivo Yakafaliseo nakutumama ku mesa.

³⁷ Kuakele mpuevo ua mu mbonge ije, uapuile muka vupi. Omo uovuile nguendi Yesu hali na kulia mu njivo ya Kafaliseo, uanehele kantsazi kacili ka mazi aluengo luacili.

³⁸ Kaha uemanene kunima ya viliato via Yesu, na kulila kaha uaputukile kujulisa viliato via Yesu na misozi yendi, kaha uavihundile navi nkambu viendi naku tsuamba ku viliato viendi, kaha uamutilile mazi kumikono.

³⁹ Omo Kafaliseo uje uamusanene uamuene eci, uahandekele kuli ikeye vavenia nguendi, “Nga ou yala uapuile kananguizi, nge natantekeya nacifua muka cou mpuevo na mukuata. Nge natantekeya nguendi uapua muka vupi.”

⁴⁰ Yesu uamulekele nguendi, “njili na cuma cimo njitonda kukuleka.”

Kaha uatavele nguendi, “Cikahoni Mulongisi?”

⁴¹ Yesu uamutilile nguendi, “Kuakele vamala vavali vakumuine vim-bongo kuli muka kukumuia. Umo uakumuine vimbongo via Siliva viakupua vihita vitanu, mukuavo naua uakumuine vimbongo via Siliva makumi atanu.

⁴² Omo vahonouele kuvihiluise, uava konekelele voshe vavali. Hakati kavo iya uje akamuzanga cikuma?"

⁴³ Simoni uamukumbuluile nguendi, "Njasinganieka nguange uje yakonekelele cikuma."

Kaha Yesu uahandekela kuli ikeye nguendi, "Una yulu muacili."

⁴⁴ Tala ou mpuevo, kaha lisikanieke yove vavenia. Kaha uatengu-lukilile kuli mpuevo na kuhandekela kuli Simoni nguendi, "Uamumono ou mpuevo? Njakovelele mu njivo yove, kuuanjihanene mema akutana ku viliato viange, vuno honi najulisa viliato viange na misozi yendi na kunjihunda na vinkambu viendi."

⁴⁵ Unahonouele cipue kunjitsuemba, vuno honi kuhuma ntsimbu njakovelele muno mu njivo yove kecelele kutsuemba viliato viange.

⁴⁶ Kuuanjitambuile mukunjitila mazi ku mutue uange, vuno honi ikeye nanjitila mazi aluengo kuviliato viange.

⁴⁷ Njimileka, vanamukonekela vupi vuavuingi mukemo uakala nacizangango cikuma, vuno honi uje vanakonekela muvundende, uazanga via vindende."

⁴⁸ Kaha Yesu uahandekela kuli uje mpuevo nguendi, "Vipi vuove vana vanavikonekela."

⁴⁹ Kaha vaje vakele nendi ku mesa vaputukile kusinganieka nguavo, "Iya ou, asa kukonekela vipi?"

⁵⁰ Kaha uahandekela kuli mpuevo nguendi, "Lutsilielo luove lua kusambuesa. Ya mu ciyulo."

8

¹ Hanima yevi, Yesu uakele nakuendangana mu vimbonge na mu membo, nakuambulula muzimbu uacili ua vumuene vua Njambi. Vavandongisi vendi likumi na vavali vaile hamo

² Navampuevo vamo vaile hamo nendi. Yesu uahumisile mahamba muli vakevo na kuvakanguisa ku mishongo yavo. Umo uavo uapuile Maliya mangandalena muli ikeye uahumisile mahamba atanu na avala.

³ Mukuavo uapuile Njuana mpuevo ya Kuza, mukuluntu uakulama vitenga via mu njivo ya Helonde, Mukuavo uapuile Susana na vakuavo vavengi. Ava vampuevo vakele nakukuasa Yesu na vandongisi vendi navukuasi vua vimbonge viavo.

*Cisimo ca Muka Kukuva
(Mateu13:1-9; Mako4:1-9)*

⁴ Litangua limo vantu vavengi vezile nakukunguluka amo. Vahumine kuli mbonge via vingi via kuli sezaseza kua kuivuilila Yesu. Uavatelele cisimo eci:

⁵ Muka kulima uaile na kukuna vimbuto viendi. Omo uakele nakukuna vimbuto viendi, imo yauililile kumukulo ua ngila kaha vantu valiatangeleleho na tuzila vailile.

⁶ Imo yauililile ha mavue kaha omo yamenene, yomine omuo kuya uanene mema.

⁷ Imo ya vimbuto yauililile ha mingonga, ha kukola kuayo vaituvile ku mingonga.

⁸ Vikuavo vimbuto via uililile ha mavu a vuilo, mbuto imo lika ya tuihuile cihita cavimbuto. Kaha Yesu uamanesele kuhandeka nguendi, "Uje uoshe hali na matuitui, azive!"

*Vutumbe vua Visimo
(Mateu13:10-17; Mako4:10-12)*

⁹ Vandongisi va Yesu Kilistu vamuihuile nguavo, Yesu, eci cisimo cilumbununa vika?

¹⁰ Uavakumbuluile nguendi, “Njambi namihangula linga mutantekeye vushueka vua vumuene vuendi, vuno honi kuli vamo njihandeka mu visimo linga, ‘Cipue vamaona, vuno honi kuvamonesesa, cipue vovua vuno honi kuvovuisisa.’ ”

Yesu alumbununa cisimo ca muka Kukuva

(Mateu13:18-23; Mako4:13-20)

¹¹ “Eci cikeco cilumbununa ca cisimo: mbuto ikeyo lizi lia Njambi.

¹² Vimbuto vije via uililile kumukulo ua ngila vili ngue vantu vevua lizi lia Njambi. Kaha satana eja na kuambata lizi mu mitima yavo, linga keti vakulahele na kuyoyesua.

¹³ Vimbuto viauililile ha mavu a mavue vinapu ngue vantu vaje vatambula lizi nakuvuahelelele omo valivua, vuno honi kuvesi na mizi. Ha ntsimbu ya vieseko vahilukila munima.

¹⁴ Vimbuto viauililile ha mingonga vinapu ngue vantu vaje vevua lizi lia Njambi, vuno honi kulinienga, vufuko na senga via vuyoye via vatuvile. Kaha kuviakolele na kuima vushuka.

¹⁵ Vuno honi vimbuto vije via uililile ha mavu acili vinapu ngue vantu vacili vaje vali na mitima yacili, vovua lizi lia Njambi na kuliniunga na kukolesa ngo noho vema vushuka.

Ndeya ya muintsi lia Liendeko

(Mako4:21-25)

¹⁶ “Naumo uahi a shuameka ndeya na kuishueka muintsi lia liendeko cipue kuyaka muintsi lia muhela. Vuno honi vaihaka helu lia citumbiko linga uoshe akovela amone ceke.

¹⁷ Vioshe vije vanashueke hano vikajomboloka na vioshe vije via kushueka hano vakavitantekeya, na kuvineha ha ceke.

¹⁸ Mukemo muapande kuivuulila muacili kuvilongesa viange. Vaje vali navimo vakatambula viavingi vuno honi voshe kuvesi nacimo vakavanieka cipue vije viavindende vivasinganieka nguavo valinavio.”

Vaina ya Yesu na Vamuanaye

(Mateu12:46-50; Mako3:31-35)

¹⁹ Kaha vaina ya Yesu na vamuanaye vezile kuli ikeye na kumumona, vuno honi vahonouele kushuena kuli ikeye omuo ya vantu vuingi.

²⁰ Umo ua vantu vaje vakele kuje uamulekele nguendi, “Vanoko na vamuanoko vanemana hambanza, vatonda ku kumona.”

²¹ Yesu uamukumbuluile nguendi, “Vanana na vamuanetu vaje vaziva mezi a Njambi na kuakavangeya.”

Yesu aholuesa Linkimba liakama

(Mateu8:23-27; Mako4:35-41)

²² Litangua limo Yesu uakovelele mu vuato na vandongisi vendi kaha uahandekela nguendi, “Tuyeni musinia lia cisali.” Kaha vaputukile kuya.

²³ Omo vakele nakujavuka Yesu uaille mutulo. Linkimba liaputukile mu cisali, ngeci na vuato vuaputukile kushula na mema, kaha vakele muvukalu.

²⁴ Vandongisi vaile nakumuhindula, nguavo, “Muene, Muene, tuli nakunonga!” Uahindikile kaha uashikile mpunzi na mankimba, kaha vioshe vialikelele na kuholoka.

²⁵ Uavehuile nguendi, “Lutsilielo lueni luli kuli?” Mu liova na mukukomoka valihuezele umo na mukuavo nguavo, “Iya ou? Ashika mpunzi na mema, kaha vimuononoka.”

Yesu akanguisa yala ua Lihamba

(Mateu8:28-34; Mako5:1-20)

²⁶ Yesu na vandongisi viendi vajavukilile ku cihela kuje vantu va Ngalasene vakele nakuyoya, cije cakele musinia lia cisali kuhuma ku Ngalileya.

²⁷ Omo Yesu uahete ha ntunda, uali uanene na yala uje uakele na lihamba uamuje mbonge. Ntsimbu yailaha ou yala kakele nakuzala vuzalo cipue kukala hembu, vuno honi uakele nakukala lika ku vihilo.

²⁸ Omo uamuene Yesu ualilile cikuma na kuula ku mikono yendi, kaha uatambakanene nguendi, “Utonda kulinga vika kuli yange, Yesu Muna Njambi Uakuhiana? Njikulomba keti unjiyandese!”

²⁹ Uje yala uahandekele evi omuo Yesu uahandekele kuli lije lihamba linga lihume muli uje yala. Vintsimbu viavingi viakele nakumuyandesa. Vantu vakele na kumukuta na malienge ku mavoko na ku mikono naku muniunga, vuno honi uakele nakuvatula kaha lihamba liakele nakumutula mu musenge.

³⁰ Yesu uamuihuile nguendi, “Lizina liove yove iya?” Kaha uamukumbu-luile nguendi, “Tuvavengi,” omuo mahamba vavengi vakovelele muli ikeye.

³¹ Kaha mahamba vamulombe kushuakumo nguavo keti avatuale mu cina ca kuhona cimbaluila.

³² Kuakele vangulu vavengi vakele na kulia kumukulo ua munkinda. Kaha mahamba valombe Yesu nguavio vika kovele muli vaje vangulu, kaha uavitavesele.

³³ Omo mahamba ahumine muli uje yala, aile muli vaje vangulu, kaha vaje vangulu vahumine ha munkinda vashatukilile mu cisali na kunonga.

³⁴ Omo vaje vaka kuniunga vangulu vamuene vije vialingiuile, vashatukile naku kambulula mu mbonge na mu membo akulihata.

³⁵ Kaha vantu vaile na kumona ovio vialingiuile. Omo vahete kuli Yesu, vamuene uje yala yahumisile mahamba natumama ku viliato via Yesu, nazala na visinganieka viendi viakele muacili, kaha vateuele.

³⁶ Vaje va vimuene valekele vantu muje uje yala uakele na mahamba muamu kangusile.

³⁷ Kaha vantu voshe vamu mbonge ya Ngalasa na vakumihela yakulihata valombe Yesu nguavo, ahume kuli vakevo omuo vateuele cikuma. Kaha Yesu uakovelele mu vuato na kulivuahesela linga aye.

³⁸ Uje yala ya humisile mahamba ualombe Yesu nguendi, “Njikukave!” Vuno honi Yesu uavianene ua handekele nguendi,

³⁹ “Hiluka kumbo ukavaleke viakama viana kulingila Njambi.” Kaha uje yala uale na kuleka vantu mu mbonge vije Yesu namu lingilavio.

Muna Njailusi ua mumbanda na mpuevo uje uakuate ku cikovelo ca Yesu
(Mateu9:18-26; Mako5:21-43)

⁴⁰ Omo Yesu uahilukile ku Ngalileya, vantu vavengi vamutambuile, omuo voshe vakele naku muvandamena.

⁴¹ Kaha yala umo uezile kuli Yesu. Lizina liendi Njailusi mukuluntu ua njivo ya malombelo. Uauile ku viliato via Yesu na kumulomba nguendi, aye ku njivo yendi,

⁴² omuo munendi umo lika ua miaka likumi na ivali, uatondele kutsa.

Yesu uale hamo nendi. Omo vakele nakuya civunga ca vantu vakele nakusindakana Yesu.

⁴³ Mu civunga cije vene muakele mpuevo uakele na mushongo uakuhita maninga ha miaka likumi na ivali vuno honi naumo uahi uamukanguisile.

⁴⁴ Uezile munima ya Yesu kaha uakuate ku mukunduilo ua vuzalo vuendi, kaha hajevene kuhita maninga kuemanene.

⁴⁵ Yesu uehuile nguendi, “Iya nanjikuata?” Omo voshe vavianene Petulu uahandekele nguendi, “Muene vantu va kuzengeleka kaha naua vakusindakana.”

⁴⁶ Vuno honi Yesu uahandekele nguendi, “Umo nanjikuata, omuo njatan-tekeya nguange nzili yahumu muli Yange.”

⁴⁷ Kaha uje mpuevo ha kumona nge vanamutantekeya. Uezile nakujaja na kuuila ku viliato via Yesu. Kaha ku mesho a civunga ca vantu uahandekele omuo vika uakuatele Yesu nomu muana kangukila mu vuasi.

⁴⁸ Kaha Yesu uahandekele kuli ikeye nguendi, “Munange, lutsilielo luove lua Kukuangisa. Ya na ciyulo.”

⁴⁹ Tele Yesu uakele nakuhandeka, umo uezile kuhuma ku njivo ya Njailusi, Uahandekele nguendi, “Munove ua mpuevo natsi keti uyandese mulongisi naua.”

⁵⁰ Ha kuivua eci, Yesu uahandekele kuli Njailusi nguendi, “keti uzive liova, kulahela lika, akayoya naua.”

⁵¹ Omo Yesu uahete ku njivo ya Njailusi, katavesele muntu kukovela nendi kuvanga Petulu, na luano, na Yakomba, na vaishe na vaina vauje mumbanda.

⁵² Ha ntsimbu ije, vantu voshe vakele nakulinienga na kulila. Kaha Yesu uahandekele nguendi, “Eceleni kulila, katsile vuno honi nakosa tulo.”

⁵³ Vamujolele, omuo vatantekeye nguavo natsi.

⁵⁴ Kaha Yesu uaile kuje kumuhela kuakele uje mumbanda kaha uamuku-ate ku livoko na kumusana nguendi, “Kanike, hinduka!”

⁵⁵ Muono uendi uahilukile kaha ha ntsimbu ijevene uemanene. Kaha Yesu ualekele visemi linga vamuhane viakulia alie.

⁵⁶ Visemi vendi vali komokelele, kaha Yesu uavashikile keti valeke cipue umo via lingiule.

9

Yesu atuma Vandongisi likumi na vavali

(Mateu10:5-15; Mako6:7-13)

¹ Yesu uasanene vandongisi likumi na vavali veje kuli ikeye, kaha uavahanene nzili yakama ya kuhumisa mahamba voshe na kukanguisa mishongo.

² Kaha uavatumine kuya na kuambulula Vumuene vua Njambi na kukanguisa vaka kuvavala.

³ Uavalekele nguendi, “Keti muambate cuma cimo ha vungenzi vueni, cipue mbueti, cipue cola, cipue viakulia, cipue vimbongo, cipue vikovelo vivali.

⁴ Kuoshe kuje kuvaka mitambula muacili, tumameni ku njivo ijevene noho mukahuma mu mbonge ije.

⁵ Kuoshe kuje vaka viana kumitambula, kaha humeni mu mbonge ije, kaha totononeni likungu ku viliato vieni. Eci cikapua cinangulo ku vantu vamuje mu mbonge nge Njambi akavasompesa.”

⁶ Kaha vandongisi vaile, vaihitanganene mu membo oshe na kuambulula Muzimbu Uacili na kukanguisa vantu uoshe.

Citanga ca Helonde

(Mateu14:1-12; Mako6:14-29)

⁷ Omo Helonde, muka kusuana mu Ngalileya, uovuile viuma vioshe vi-alingiule, kaha uakele na citanga, omuo vantu vamo vakele nakuhandeka nguavo, "Iuano muka kumbuitika nasanguka ku vatsi."

⁸ Kaha vamo nguavo, kananguizi ua Njambi Eliya nasholoka, vamo nguavo, "Umo ua tunanguizi va Njambi veka va Njambi valaja nasanguka naua."

⁹ Kaha Helonde uahandekela nguendi, "Iuano njamutapele mutue, vuno honi iya honi ou yala injili nakuvua viendi?" Kaha uatondele cikuma kumumona Yesu.

Yesu Alisa Vantu vakupua makulukazi atanu

(Mateu14:13-21; Mako6:30-44; Iuano6:1-14)

¹⁰ Tunganda va Yesu vahilukile vamulekele vioshe vije vivalingile. Kaha uaile hamo navo uavatualele kualikaliavo lika ku mbonge ivatumbuile Mbetesainda.

¹¹ Omo civunga ca vantu vovuile evi, kaha vamukavele. Uavatambuile na kuvalongesa via Vumuene vua Njambi na kukanguisa vaje vakele nakuvavala.

¹² Omo kuapuile cinguezi, vandongisi vaje likumi na vavali vezile kuli ikeye vahandekela nguavo, "Shandola vivunga evi linga vaye ku membo na ku mehia aua amuyehi vaka liuaneneko viakulia vakevo vavenia noku kuakukosa, omuo muno munapu mu musenge uangoco."

¹³ Vuno honi Yesu uahandekela kuli vakevo nguendi, "Yeni vene vahaneni viakulia linga valie." Kaha vamukumbuluile nguavo, "Kutuesi na viakulia vieka kuvanga vimbolo vitanu na vatsi vavali. Nkuma yove utonda tuye na kulanda viakulia via civunga coshe eci ndi?"

¹⁴ Kuakele vamala vakupua makulukazi atanu kuakuhona vampuevo na vanike kuje. Yesu uahandekela kuli vandongisi vendi nguendi, "Leken i vantu vatumame ha mavu mu vimunga, munga na munga mukale vantu makumi atanu."

¹⁵ Vandongisi valingile ngacije na vantu voshe vatumamene ha mavu.

¹⁶ Kaha Yesu uatambuile vije vimbolo vitanu na vatsi vavali, uatalele muiulu, kaha uatsatselele kuli Njambi, kaha uavipazuile, uavihanene kuli vandongisi vendi linga vavipangezele vivunga via vantu.

¹⁷ Voshe valile, vakutile, kaha vandongisi vakunguluile vimbazuvuila vije viasaleleho, vashulisile mitonga likumi na ivali.

Petulu atava nguendi Yesu ikeye Kilistu

(Mateu16:13-20; Mako8:27-30)

¹⁸ Litangua limo omo Yesu uakele nakulombela kualikaliendi lika, vandongisi vendi vakele kuyehi nendi. Kaha uavehuile nguendi, "Vantu vali nakunjitumbula nguavo yange iya?"

¹⁹ Vamukumbuluile nguavo, "Vamo vali nakuhandeka nguavo yove Iuano Muka kumbuitika, veka naua nguavo yove Eliya, vakuavo naua nguavo yove umu ua tunanguizi va Njambi va Njambi valaja uje nasanguka."

²⁰ Kaha Yesu uavehuile nguendi, "Yeni honi munjitumbula ngueni yange iya?" Petulu uakumbuluileko nguendi, "Yove Kilistu ua Njambi."

²¹ Ambahoni Yesu uavashikile nguendi keti valekeko muntu umu cuma eci.

Yesu Ahandeka ha Tuyando na Kutsa cendi

(Mateu16:21-23; Mako8:3-9)

²² Kaha uahandekela naua kuli vakevo nguendi, “Muna Muntu napande kuyanda cikuma, vakuluntu na vakuluntu va vasasendote, na valongisi va mezi a Lishiko lia Mosesa vaka muviana. Kaha vakamutuala ku kutsa, vuno honi munima ya matangua atatu, akasanguka.”

Kupua Ndongisi ua Vusunga
(Mateu16:24-28; Mako8:34; 9:1)

²³ Kaha Yesu uahandekela naua kuli vantu voshe vaje vakele kuje nguendi, “Nga muntu atonda kunjikava, napande kuliviana ikeye vavenia, ambate cilindakano cendi ha litangua na litangua, kaha anjikavangeye.

²⁴ Omuo muntu uje uoshe atonda kuniunga muono uendi auzimbalesa, vuno honi muntu uje voshe azimbalesa muono uendi omuo lizina liange akauuana.

²⁵ Nga muntu afuka mavu oshe, vuno honi alinongesa ikeye vavenia na kuzimbalesa muono uendi vika akauanaho?

²⁶ Nga muntu anjuvuila shuamua na vilongesa viange, kaha Muna Muntu naua nendi akamiuvuila shuamua omo akeja mu vumpau vuendi na mu vumpau vua Ishe na mu vumpau vua tungelo vakulela.

²⁷ Mua vusunga njimileka nguange, kuli vamo kuno, vaje kuvakatsi kuvanga vanamono Vumuene vua Njambi.”

Kulimpuka kua Yesu
(Mateu17:1-8; Mako9:2-8)

²⁸ Munima ya matangua atanu na atatu omo uahandekela viuma evi, Yesu uaiile hamo na Petulu, na Iuano, na Yakomba ku munkinda nakulombela.

²⁹ Ntsimbu uakele nakulombela, cihanga cendi cahimbukile, kaha vuzalo vuendi vuatokele too ngue ceke.

³⁰ Hajevene vamala vavali vasholokele vaputukile kuhandeka nendi, vapuile Mosesa na Eliya.

³¹ Vakele mu misha ya muilu. Vakele nakuhandeka na Yesu ha kuija kua kutsa cendi mu Yelusalema muje muakashulisililamo vutumbe vua Njambi.

³² Petulu na vaje vakele navo vakele mu tulo, vuno honi omo vahindukile vamuene misha ya Yesu na vamala vavali vaje vemanene navo.

³³ Omo Mosesa na Eliya vatonde kuya, kaha Petulu uahandekela kuli Yesu nguendi, “Muene, cacili kuli yetu nga tukala kuno! Tutunga vintsingi vitatu, imo yove, imo ya Mosesa na imo ya Eliya.” Kazivukile vije viakele nakuhandeka.

³⁴ Ntsimbu Petulu uakele nakuhandeka, lishelua liezile na kuvafuika, kaha vandongisi vazivile liova omo lishelua liavafuikile.

³⁵ Kaha lizi liahumine mu lishelua liahandekela kuli vakevo ngualio, “Ou ikeye Munange injinahangula, muivuilileni!”

³⁶ Omo lizi liaholokele, Yesu uakele halikaliendi lika. Kaha vandongisi vaholokele kuluu ha viuma viosevi, kaha ha ntsimbu ije kuvalekeleko muntu umu viuma vije vivamuene.

Yesu akanguisa kanike ka yala uje uakele na Lihamba
(Mateu17:14-21; Mako9:14-29)

³⁷ Omo kuacele Yesu na vandongisi vendi vatatu vashulukile ku munkinda, civunga cakama caluanene na Yesu.

³⁸ Yala umo ua haje ha civunga uatambakanene nguendi, “Mulongisi, njikulomba tala munange, omuo ikeye lika umolika.

³⁹ Evi vikevio vikalingika lihamba nga limu uana, kaha atambeka na kushinia na kututumuna lifulu ku kanua, umuvetuesha cikuma kaha kuumuecela vuasi.

⁴⁰ Njalambebelele vandongisi vove nguange vamuhumise vuno honi kuvasele."

⁴¹ Kaha Yesu uakumbuluile nguendi, "Yeni vaka kujeneka kutsiliela na vantu vaka vupi! Lungahi honi njikakala neni? Lungahi honi mukeseka kusimpa kuange?" Kaha uahandekela kuli uje yala nguendi, "Neha kuno munove."

⁴² Omo kanike uakele nakuija, kaha lihamba liamu uisilile ha mavu na kumushiniisa cikuma. Kaha Yesu uashikile lije lihamba, uje kanike ka yala uakangukile kaha uamuhanene kuli ishe.

⁴³ Kaha vantu voshe vali komokelele ha nzili yakama ya Njambi.

Yesu ahandeka naua ha kutsa cendi

(Mateu17:22-23; Mako9:30-32)

Tele vantu voshe vakele nakulikomokela ha vioshe vije Yesu uapangele, kaha uahandekela kuli vandongisi vendi nguendi,

⁴⁴ "Ivuilileni keti musuve evi njimileka! Muna Muntu vuavuno amuhana ku nzili ya vantu."

⁴⁵ Vuno honi vandongisi kuvatantekeyele mucalumbunukile cuma eci. Vavashuekelele linga keti vacitantekeye, vovuile liova liakumuihula vije viahandekela.

Uje napu uakama kupulakana

(Mateu18:1-5; Mako9:33-37)

⁴⁶ Kuaputukile vimpata hhakati ka vandongisi linga iya honi uakama kupulakana hhakati kavo.

⁴⁷ Yesu uatantekeyele viyongola via mu mitima yavo, nankuma, uasanene kanike uamundende, uamuimikile kunionga yendi,

⁴⁸ kaha uahandekela kuli vakevo nguendi, "Uoshe atambula kanike ou mu lizina liange, kaha natambula yange vene, uoshe uje anjitambula, natambula naua uje uanjitumine. Omuo uoshe uje napu uamundende hhakati keni muvavoshe, ikeye napu uakama kupulakana."

Uoshe uje kamiluisa ikeye hali hamo neni

(Mako9:38-40)

⁴⁹ Iuano uahandekela nguendi, "Muene, tuamuene yala umo uakele nakuhumisa mahamba mu lizina liove, kaha tuamulekele linga alikele, omuo ikeye keti uamu munga yetu."

⁵⁰ Yesu uahandekela nguendi, "Keti mumuvindike, omuo uoshe uje kamiluisa ikeye hali hamo neni."

Vamo vaka Samaliya vaviana kutambula Yesu

⁵¹ Omo matangua ashuenene kuyehi linga Yesu vamutuale muilu, uatenguluile viyongola viendi, nakuya ku Yelusalema.

⁵² Uatumine vamo va vandongisi vendi kulutue, kaha vaile na kukovela mu limbo lia muka Samaliya linga vaka muvuahelele vualumo kuakuhetela.

⁵³ Vuno honi vantu vakele kuje kuva mutambuile, omuo vungenzi vuendi vuakele vuakuya ku Yelusalema.

⁵⁴ Omo vandongisi vendi Yakomba na Iuano vamuene evi, vahan-dekele nguavo, "Muene, utonda linga tusane tuhia tua muilu tuije na kuvanongesa?"

⁵⁵ Vuno honi Yesu uatengulukile kuli vakevo na kuvavindika.

⁵⁶ Kaha vaile ku limbo likuavo.

*Vaje vatonda kukavangeya Yesu
(Mateu8:18-22)*

⁵⁷ Omo Yesu na vandongisi vendi vakele nakuya mu ngila, yala umo uahandekele kuli Yesu nguendi, “Njikakukava kuoshe kuuya.”

⁵⁸ Yesu uahandekele kuli ikeye nguendi, “Vambanje vali na vina, na tuzila vali na mashua, vuno honi Muna Muntu kesi naha ha kusatela mutue uendi.”

⁵⁹ Kaha Yesu uahandekele kuli yala mukuavo nguendi, “Njikave.” Vuno honi uje yala uahandekele nguendi, “Muene, ha kulivanga njitave njihiluke njikatsinde tahi tate.”

⁶⁰ Yesu uamukumbuluile nguendi, “Seza vaka kutsa valitsinde vakevo vavenia. Yove ya na kuambulula via Vumuene vua Njambi.”

⁶¹ Yala mukuavo uahandekele nguendi, “Njikakukava Muene, vuno honi ha kulivanga njitave njiye njikasalese tahi vavushoko vuanje.”

⁶² Yesu uahandekele kuli ikeye nguendi, “Nga umo naputuka kulima na vangombe kaha atala kunima vipangi viendi kuvikapu viaseho. Mucifua cimo vene nga umo anjikava kaha atenguluka kunima kuvipangi viendi vialaja kakapu uaseho kupanga vipangi mu Vumuene vua Njambi.”

10

Yesu Atuma Vandongisi Makumi atanu na avalu

¹ Hanima yevi Muene Yesu uahanguile vandongisi makumi atanu na avalu vakuavo. Kaha uavatumine kulutue luendi vavali na vavali vaye mu vimbonge namu vihela kuje vavenia uatondele kuya.

² Tele kanda vaye uahandekele kuli vakevo nguendi, “Kuteja kuakama, vuno honi vaka kuteja vavandende. Kaha ihuleni Muene ua kuteja atume vaka kuteja mu lihia liendi.

³ Yeni! Njimituma kupua ngue vampanga mukati ka tungunga.

⁴ Ketu muambate vikuama cipue vingonga cipue vinkaku, kaha ketu mumeneka muntu uoshe mu ngila.

⁵ Ntsimbu yoshe nga mukovela mu njivo, cakulivanga handekeni nguendi, ‘Ciyulo cikale mu njivo ino.’

⁶ Nga muli muntu uayulo mu njivo ije, ciyulo ceni cikakala hali vakevo, nga ketu ngoco kaha cikamihilikila.

⁷ Tumameni mu njivo ije, nueni na kulia vioshe vamihana, omuo muka kupanga napande kutambula fueto yendi. Ketu muendangane ku njivo na njivo.

⁸ Nga mukovela mu mbonge na vantu vamo vamitambula, lienii vivana mivuahesela.

⁹ Kanguiseni vaka kuvavala valimo, kaha handekeni kuli vakevo nguendi, ‘Vumuene vua Njambi vuneja muyehi neni.’

¹⁰ Vuno honi nga mukovela mu mbonge ku vamitambula, kaha yeni mu vingila muhandeke nguendi,

¹¹ ‘Cipue likungu lia mu mbonge yeni lili kumikono yetu tulitotomona linga limilemise. Vuno honi tantekeyeni eci: Vumuene vua Njambi vuneja.’

¹² Njimileka, ha litangua lia Cisompelo vukalu vua vantu vamu Sondoma vukapua nahongano kupulakana vantu vamu mbonge ije!

*Yesu anangula Vantu vakuhona kutava
(Mateu11:20-24)*

13 “Tuyando kuli yeni vantu vamu Kolazini! Tuyando kuli yeni naua vantu vamu Mbetesainda! Nga evi vikomoueso vivalingile mu vimbonge vieni, nge njavipangele mu vinganda via vaje keti Vayunda va mu Tile na Sindone vakevo vaje vantu nge vatengulukile laja ha kuzala vijeke naku likuita muto.

14 Ha litangua lia Cisompelo, vukalu vua vantu vamu Tile na Sindone vukapuako nahongano kupulakana vueni.

15 Yeni Vantu va mu Kapenama mutonda vaka mijundule kuheta na kuilu ndi? Houe, vaka mineha ha mavu nakuya mu Ngehena!”

16 Yesu ualekele vandongisi vendi nguendi, “Ou evuilila yeni novuilila yange, omuo ou aviana yeni naviana naua yange, kaha nou aviana yange naviana naua nauje ua njitumine.”

Kuihiluka kua vandongi makumi atanu na avali

17 Vaje makumi atanu na avali vahilukile nakuvuahelela, na kuhandeka nguavo, “Muene mu lizina liove na mahamba a tuvuililile omo tuakele nakuuahumisa!”

18 Kaha Yesu uahandekele kuli vakevo nguendi, “Eyo! Njamuene Satana aua kuilu ngue muhiato.

19 Taleni, njamihana nzili ya kuliata manoka na manieue, na nzili yoshe ya citozi, kaha na cimo cahi cika mivetuesa.

20 Cipue ngocovene, keti muvuahelele hali eci lika, ngueni na mahamba amivuililile, vuno honi vuahaleleni cikuma ngueni mazina eni vana asoneka muilu.”

Yesu Avuahelela

(Mateu 11:25-27; 13:16-17)

21 Ha ntsimbu ijevene Yesu ua vuahelelele mu Cimbembesi ca Kulela kaha uahandekele nguendi, “Njikusatsela Tate, Muene ua muilu na mavu, omuo unashukeka viuma evi ku vaka mana na vaka kuzangama kaha uavisholola ku vanike vavandende, cili Tate, eci cikeco ca kuvuaheselele naco.

22 “Tate nanjihana viuma vioshe. Naumo uahi atantekeya Muana kuvanga Ishe cipue naumo uahi atantekeya Ishe kuvanga Muana. Na Muana akasholola Ishe kuli vaje vatonda.”

23 Kaha uatengulukile kuli vandongisi vendi na kuhandeka kuli vakevo ku mukulo nguendi, “Avezika aje mesho amona vije vimu mona!

24 Njimileka nguange vavengi tunanguizi va Njambi va Njambi na vamiene vazangele kumona vimumona, vuno honi kuva vimuene, naua vatondele kuivua vimuli na kuivua, vuno honi kuva vivuile.”

Cisimo ca muka Samaliya Uacili

25 Hajevene mulongisi ua mashiko uemanene kueseka Yesu nguendi, “Mulongisi,” “Njilinge vati njikakale na muono ua yaye?”

26 Yesu uamuihuile nguendi, “Vika vanasoneka mu Lishiko lia Mosesa? Vika ukatandamo?”

27 Uamukumbuluile nguendi, “Zanga Muene Njambi yove na mutima uove uoshe, na muono uove uoshe, na nzili yove yoshe, na visinganika viose vioshe, kaha zanga mukueni ngue omo nalivanga yove vavenia.”

28 Kaha Yesu uahandekele kuli ikeye nguendi, “Uahandeka muacili, linga eci, kaha ukakala muono ua yaye.”

29 Vuno honi uje mulongisi uatondele kulimuesa ikeye vavenia, uehuile Yesu nguendi, “Mukuetu ikeye iya?”

30 Yesu uamukumbuluile mu cisimo nguendi, “Litangua limo kuakele yala umo uahumine ku Yelusalema nakuya ku Yeliko, kaha ua liuanene

na vezi. Vamuivilile vuzalo vuendi, na kumuveta na kuteua, na kumuseza na lezumuka.

³¹ Kaha capuile nge cakukasumuka, kasasendote uaile mu ngila ijevene, kaha omo uamuene ou yala, uamuongolokele kumukulo.

³² Na Kalevi naua omo uahete kucihela cije uamumuene nendi naua kaha uamuongolokele.

³³ Kaha ka Samaliya umo uakele nakuhita mu ngila ije, omo uahete kucihela cije kuakosele uje yala kaha ua mumuene, kaha ua muivuilile cikeketima.

³⁴ Uashuenene kuyehi na kumuzenga ha vimbandu, kaha uamuhakeleho mazi na viniu. Kaha uamuhakele ha Cimulu cendi na kumutuala ku njivo ya vangenzi, naku kamuniungilako.

³⁵ Hakuca ca litangua uambate vimbongo viamu uayauaya vivali na kuhana muka kuniunga njivo ya vangenzi, kaha uahandekela kuli ikeye nguendi, 'Umuniunge muacili,' kaha omo njikahiluka nja kukufueta vioshe vije viulinakulikuasesa."

³⁶ Hanima yevi Yesu uehuile uje mulongisi ua mezi a mashiko a Mosesa nguendi, "Iya hhakati ka vantu ava vatatu uje uapuile ngue mukuavo ou yala, uje uauililile mu mavoko a vezi?"

³⁷ Kaha uahandekela nguendi, "Uje uamumueseles ngozi."

Kaha hanima yevi Yesu uahandekela kuli ikeye nguendi, "Eyo, ya ukalinge ngoco."

Yesu Ameneka Mata na maliya

³⁸ Omo Yesu na vandongisi vendi vaile mu ngila, vahete hembo haje hakele mpuevo ua lizina lia Mata ikeye uamutambuile mu njivo yendi.

³⁹ Uakele na munaina Maliya, ou ua tumamene ku viliato via Yesu na kuivuilila viakele na kuhandeka.

⁴⁰ Vuno honi Mata uakele nakulinga vipangi viavingi, kaha uezile kuli Yesu na kumuihula nguendi, "Muene, kuumono munanana na njecelala vipangi vioshe likaliange? Muleke anjikuaseko."

⁴¹ Vuno honi Yesu uamukumbuile nguendi, "Mata, Mata, yove ua lijujukila na kunienguela vipangi viavingi.

⁴² Vuno honi cuma cimo citondeka. Maliya na hangula cuma cacili, oco ku cikahumisila kuli ikeye."

11

Yesu Avalongesa Kulombela

(Mateu6:9-13; 7:7-11)

¹ Litangua limo Yesu uakele kumuhela umo na kulombela kuli Njambi. Omo uamanesele kulombela, umo ua vandongisi vendi uamuhandekesele nguendi, "Muene tulongese kulombela, ngue luano muka kumbuitika muana longeselele vandongisi vendi."

² Yesu uavalekele nguendi, "Omo mulombela kuli Njambi lombeleni ngueni,

"Tatetu

valemese lizina liove lia kulela

vumuene vuove vuije.

³ Tuhani cakulia cije tutonda litangua na litangua.

⁴ Tukonekele ku vipi vuetu,

omuo netu tukakonekela vantu vaka kutuvulumuina,

keti ututuamenene muvieseko."

⁵ Kaha uahandekela nguendi, “Singaniekeni nge uli na kavusamba kove kaha uyako mukati kavutsiki na kumuhandekesa na kumulomba nguove, ‘Kavusamba, njantsantela njilombako vimbolo vitatu lika,

⁶ Kavusamba kange neja muvungezi vua kunjimenekela kaha kujesi naviakulia viaku mujumbula!’

⁷ Kaha uje kavusamba kove oku hali mu njivo akutava, ‘Keti unjitan-ganese njapata laja ku njivo kaha yange na vana vange tuakoso laja, Kunjasa kuhinduka na kukuhana cimo naua.’

⁸ Njimileka nguange, cipue ngocovene kakahinduka na kukuhana viaku-lia omuo uapua kavusamba kove, vuno honi akahinduka na kukuhana vioshe vije viutonda omuo akaziva shumua kuakuhona kukuhana.

⁹ Kaha njimileka nguange, lombeni, kaha vakamihana, tondeni kaha mukauana, toteni kaha vaka mishokoliela.

¹⁰ Uoshe uje alomba akatambula, kaha uoshe uje atonda akauana, kaha kuli uje atota vaka mushokoluela.

¹¹ Iya ishe hhakati keni, nga munendi amulomba itsi, kaha ikeye amuhana linoka?

¹² Cipue nga amulomba mayaki amuhana linieue?

¹³ Nga yeni, vaka vupi mutantekeya kuhana viacili kuli vana veni, kaha honi Ishueni ua muilu akahanavene Cimbembesi ca Kulela kuli vaje vamulomba!”

Yesu na Mbelezembulu

(Mateu12:22-30; Mako3:20-27)

¹⁴ Litangua limo Yesu uakele nakuhumisa lihamba lije vialingikile muntu kupua kaveveve. Omo lije lihamba lihamine kaha uje yala uaputukile kuhandeka. Omo vantu vamuene evi valikomokelele.

¹⁵ Vuno honi vamo vavo vahandekela nguavo, “Nahumisa lihamba mu nzili ya Mbelezembulu mukuluntu ua mahamba.”

¹⁶ Kaha vamo vatondele kumueseka, lingahoni vamulombe le linga apange cikomoueso cije cimuesa nge Njambi ikeye namutumu.

¹⁷ Vuno honi Yesu ua tantekeyele vili mu mitima yavo, kaha uahandekela kuli vakevo nguendi, “Nga vantu vavumuene vumo valiluisa hhakati kavo vumuene vuje vukahua. Nga vantu vanjivo imo valiluisa hhakati kavo kaha ije njivo ikaua.

¹⁸ Nga vumuene vua Satana vuli navimunga vililuisa vikevio vavenia, kaha vumuene vuendi vukakola vatihoni? Njinehula eci omuo yeni muhandeka ngueni, njikahumisa mahamba mu nzili ya Mbelezembulu.

¹⁹ Honi nga njihumisa mahamba mu nzili ya Mbelezembulu, kaha vandongisi veni vaka likuasesa nzili yeya omo muvakahumisa mahamba? Eci cikeco vandongisi veni vaka mihisa.

²⁰ Nga njihumisa mahamba mu nzili ya Njambi, kaha vumuene vua Njambi vuneja kuli yeni.

²¹ “Omo nga yala ua nzili nalivua hesela laja vitua viendi aniunga njivo yendi, kaha vupite vuendi vuoshe vukaniungua muacili.

²² Nga uje hali na nzili ya kupulakana eje nakuluisa mukuavo na kumuhiana kaha akambata vitua vioshe via uje via kulahalele. Kaha akalipangezela na vakuavo vije vioshe vianambata.

²³ “Kaha uoshe uje kesi kumutambela uange, muavusunga ikeye anjiluisa, kaha uoshe uje kakunguluka nange akashandola.

Kuhiluka kua lihamba

(Mateu12:43-45)

²⁴ “Omo lihamba lihuma muli muntu, kaha liendakana mu mpambo kutalezeka muhela uakuhiimina. Nga kuliasa kuuana muhela kaha lilihandekesa likelio vavenia ngualio, ‘Njihiluka kuli muntu kuje njahumine.’

²⁵ Kaha omo lihiluka liuana muhela uje uakulela vanauhaka muacili.

²⁶ Kaha liya na kuneha vatanu na vavali mahamba veka vakupihia cikuma kupulakana likelio kaha vakovelamo na kukalamo. Kaha kupihia kua muntu uje kuakukotokela kupulakana kuje kua kuli vanga!”

Vikuisulo via vusunga

²⁷ Omo Yesu uakele nakuhandeka vije, mpuevo umo uamuje mu civunga uje uakele nakuivuilila evi uatambakanene cikuma na kuhandeka nguendi, “Uakukuisula uje mpuevo uakusemene na kukulela!”

²⁸ Vuno honi Yesu uamukumbuluile nguendi, “Vakukuisula cikuma vaje vovua lizi lia Njambi naku likava!”

Valomba Yesu cikomoueso

(Mateu12:38-42)

²⁹ Omo civunga ca vantu calivuezelelele, Yesu uahandekela nguendi, “Vantu vavapi va matangua ano vatonda lika cikomoueso vuno honi kuvacimono, kuvanga lika cikomoueso ca Yona.

³⁰ Ngue Yona uapuile cimueso ca vantu vamu Nanive, kaha Muna Muntu akapua cimueso ca vantu va matangua ano.

³¹ Muene uampuevo uaku Sheva akemana nakuluisa vantu va matangua ano ha litangua lia cisompelo na kuvahisa. Uahuminine kulahako kuakuivua mana a Solomoni. Kaha honi taleni! Umo uakupulakana Solomoni hali kuno, vuno honi muviana kumuivuilila.

³² Vantu vaku Nanive vaka katuka nakuluisa vantu vamatangua ano ha litangua lia cisompelo naku vahisa. Vantu vaku Nanive vatengulukile ku vilinga viavo via vipi omo vovuile kuambulula kua Yona. Taleni honi! Uakama cikuma kupulakana Yona halikuno vuno honi muviana kumuivuilila!

Ceke ca muvila

(Mateu5:15; 6:22-23)

³³ “Naumo uahi asa kushuameka ndeya yendi naku ishueka cipue kuifuika na liendeko vuno honi ihaka haci tumbiko, kaha linga uoshe uje akovela mu njivo amone ceke.

³⁴ Mesho ove akeuo ceke ca muvila uove. Nga mesho ove amona muacili kaha muvila uoshe ukashula na ceke, vuno honi nga mesho ove avavala kaha muvila uoshe ukapua na milima.

³⁵ Kaha tantekeya muacili nguove ceke cili muli yove keti cipue milima.

³⁶ Nga muvila uove uoshe uashulu na ceke, kua kuhona kapenga kamilima, kaha ukashula na ceke ngue muje ndeya muikaneha misha hali yove.”

Yesu atenukila Vafaliseo na Valongisi va mezi a Mashiko a Mosesa

(Mateu23:1-36; Mako12:38-40)

³⁷ Omo Yesu uamanesele kuhandeka, Kafaliseo umo uamulaniene linga akalie nendi. Kaha Yesu uakovelele na kutumama nakulia hamo nendi.

³⁸ Kafaliseo ualikomokelele omo uamuene Yesu katanene ku mavoko endi mukulia.

³⁹ Kaha Yesu uahandekela kuli ikeye nguendi, “Talen yeni Vafaliseo muka lelesa hambanza na lilonga helu, vuno honi mukati keni muashulu na lizangamena na vupi.

⁴⁰ Yeni vilema! Kumutantekeya ngueni, Njambi uatangele helu lieni, ikeye naua uatangele mukati ndi?

⁴¹ Haneni ku tuhutu muje mumuzivukila mu mitima yeni ngueni tunapande kuviana, kaha mukapua vakulela kuli Njambi cipue kuakuhona kutana ku mavoko eni.

⁴² “Tuyando kuli yeni Vafaliseo! Yeni mukahana kuli Njambi camulikumi ha viuma mukatepesa kuvia kulia ngue minte, na luku, na visapa-sapa vikuavo, vuno honi kumuekulinga muacili vantu naua kumuazangele Njambi. Evi munapande kuvilinga kuakuhona kulikela kuli vije vikuavo.

⁴³ “Tuyando tueni, Vafaliseo! Yeni muazanga kutumama ha vituamo viacili mu vinjivo via malombelo, kaha muzanga vantu kumikandelela na kumihana kasingimiko mu mihela yakulandesela.

⁴⁴ Tuyando tueni, omuo yeni muapua ngue vihilo vije viakuhona kumoneka. Vantu vakendeho nakupua vaka vupi kuakuhona kutantekeya.”

⁴⁵ Kaha umo ua valongisi va mezi a mashiko a Mosesa uahandekete kuli Yesu nguendi, “Mulongisi, omo uli na kuhandeka evi, uli nakushaula yetu naua.”

⁴⁶ Kaha uahandekete kuli vakevo nguendi, “Tuyando tueni, yeni naua valongisi va mezi a mashiko a Mosesa! Omuo mukatuika vantu vituika via kulema vuno honi yeni vavenia kumuekukakulako cipue na munie umo kukuasa vaje vajundula vije viteli.

⁴⁷ Tuyando tueni, omuo mukavuahesa ha vihilo via tunanguizi va Njambi va Njambi vaje vavatsihile vakukuluila veni.

⁴⁸ Nkuma yeni mulinavukaleho vuje mutava vije vivalingile vaje vakukuluila veni. Vatsihile tunanguizi va Njambi va Njambi na yeni muatungile vihilo viavo.

⁴⁹ Kaha cuma eci mana a Njambi ahandeka nguauo, ‘Njikavatumina tunanguizi va Njambi va Njambi na tunganda kaha vakatsihaho vamo vavo na vamo naua muka vayandesa cikuma.’

⁵⁰ Nkuma vantu va ntsimbu ino vaka vazangamesa ha kutsiha tunanguizi va Njambi va Njambi voshe hume hakutanga kua lifuti,

⁵¹ hume hakutsiha Avele nakuheta ha kutsiha Zakaliya uje vatsihilile mukati ka mutula ha Muhela Uakulela. Njmileka nguange, vantu va ntsimbu ino vaka vazangamesa voshe hali evi.

⁵² “Tuyando tueni, valongisi va mezi a mashiko a Mosesa! Omuo munanieke vantu sapi yakushokoluesha ku cikolo ca mangana, vuno honi yeni vavenia kumue kukovelamo, cipue vaje veseka kukovelamo kumue kuvatavesa!”

⁵³ Omo Yesu uamanesele kuhandeka evi, uahumine kucihela kuje. Valongisi va mezi a Lishiko lia Mosesa na Vafaliseo vaputukile kumuluisha cikuma na kumuihula vihula viavingi vakumunienguesa.

⁵⁴ Vavandamenene indi nga ahandeka via vipi linga vamukuateho.

12

Cinangulo ha civembulu (Mateu10:26-27)

¹ Ha ntsimbu ije vene vivunga viakama via vantu vavengi viakungu-lukile hamo, vapuile vavengi mukemuo vakele na kuliliatangela umo na mukuavo, Yesu uaputukile kuhandeka kuli vandongisi vendi nguendi, “Liniungeni ku cimbaluila ca Vafaliseo, cije cikeco civembulu cavo.

² Keti mupue ngue vakevo omuo nacimo cahi ca kufuika ku cikafukuliua, cipue ca kushueka kuci kajomboloka.

³ Viunahandeka mu milima vaka viziva mu mutania, nevi uayevetela kumuhela vaka vihandeka hambanza.”

*Uje uakuteua
(Mateu10:28-31)*

⁴ “Njimileka vavusamba keti muteue atsiha muvula kaha kuhumaho kasa naua kulinga cuma cimo.

⁵ Vuno honi njimileka uje imunapande kuteua. Muteue uje nga namanesa kutsiha muvula, hanga hali na nzili yaku miumbila mu ngehena. Eyo, njimileka muteueni.”

⁶ “Singaniekeni tumpiasa, kutuesi naseho cipue tutanu vatulanda ha vimbingo vivali. Vuno honi nauamo uahi uavo vakamusuva kuli Njambi.

⁷ Vuno honi cipue vinkambu viaku mutue uove vana vitanda. Keti muteue, muli naseho yakama cikuma kupulakana tumpiasa vavengi.

*Kutava Yesu cipue Kumuviana ku mesho a Vantu
(Mateu10:32-33; 12:32; 10:19-20)*

⁸ “Njimileka nguange uoshe uje ahandeka hacivunga nguendi uakundama kuli yange, na Muna Muntu naua aka muhandeka ku tungelo va Njambi.

⁹ Vuno honi uoshe uje anjiviana hakati ka civunga ca vantu, nange njikamuviana ku tungelo va Njambi.

¹⁰ “Uoshe ashaula Muna Muntu vaka musambesa, vuno honi uoshe atuka Cimbembesi Uakulela ku vaka musambesa.

¹¹ “Omo vakamituala mu vinjivo via malombelo kuli vaka kuyula na vaka nzili mukumieseka, keti mukalinienge mu mukaliluila yeni vavenia, kuli vimukahandeka na muje mu mukavakumbuiluila,

¹² omuo Cimbembesi Uakulela cikamilongesa ha ntsimbu ije vimuapande kukahandeka.”

Cisimo ca muka Kufuka ua Cilema

¹³ Muntu umo uakele muje mu civunga uehuile Yesu nguendi, “Mulongisi, leka muanetu linga tulipangele vitenga vije tate uatusezelelele.”

¹⁴ Vuno honi Yesu uamukumbuluile nguendi, “Kavusamba, iya nanjhangula kupua muka kuyula cipue muka kuimanena hhakati keni?”

¹⁵ Kaha uahandekela kuli vakevo nguendi, “Liniungeni! Zangameni ku miyati ya lizangamena lioshe: vuyoye vua muntu kuvuesi mu vufuko vuendi.”

¹⁶ Kaha uavatelele cisimo eci nguendi, “Kuakele muntu umo uakufuka mu lihia liendi muakele viakuteja viavingi.

¹⁷ Kaha uasinganiekele ikeye vavenia nguendi, ‘Njikalinga vati, omuo kunjesi na vishete viakama via kutulikila viakuteja viange?’

¹⁸ Kaha naua uahandekela nguendi, ‘Njikalinga eci, njikasiula vishete viange na kutunga viakama, muje mukemo njikahaka vimbuto viange na viuma viange vioshe.

¹⁹ Kaha njikahandeka ku muono uange nguange, Muono, uli na viuma viavingi unalitumbikila ha miaka yaingi, huima, lia, nua na kuvuahelele.’

²⁰ Vuno honi Njambi uahandekela kuli ikeye nguendi, ‘Yove cilema! Vutsiki vuno vene muono uove vauambata. Kaha vije viuma viuna livuahesela vikapua vieya?’

²¹ “Omu mukemuo mucikapua kuli muntu uje, vikakala navaje vakalitulikila vufuko vakevo vavenia vuno honi kuva fukile ku mesho a Njambi.”

Keti Mulinienge
(Mateu6:25-34)

²² Kaha Yesu uahandekela kuli vandongisi vendi nguendi, “Nankuma njimileka nguange, keti mulinienge ha vuyoye vueni vimukalia, cipue via muvila ueni vimukazala.

²³ Omuo vuyoye vunapu vuaseho kupulakana viakulia, na muvila kupulakana vuzalo.

²⁴ Singaniekeni makololo kuve kulima cipue kuteja, kuvakele na cishete cipue muakutulikila viakulia, vuno honi Njambi alina kuvalisa. Yeni muvaseho cikuma kupulakana tuzila.

²⁵ Iya hhakati keni mu kulinienga asa kuhakelako cipue ka ntsimbu kakandende ku vuyoye vuendi?

²⁶ Nga kumuasa kulinga eci cuma cacindende, kaha vika muliniengela ha vioshe?

²⁷ Singaniekeni vintemo muvikakolela: Kuvie kupanga cipue kulizika. Vuno honi njimileka nguange, cipue vene muene Solomoni mu vufuko vuendi vuoshe kazalele ngue vuzalo ngue vua evi.

²⁸ Nga omu mukemo Njambi akazikilamo vishoni via musenge, vije vikalako lika lelo kaha imene vavintsimika mu tuhia, yeni akamizika cikuma, keti mukale nalikulahelo lialindende ngacije.”

²⁹ “Keti mutualeleleho kulinienge hali vimu kalia cipue vimu kanua.

³⁰ Vaka lifuti vakevo vakatondo evi vioshe viuma. Vuno honi yeni Ishueni azivuka nguendi muvitonda.

³¹ Vuno honi tondeni tahi vumuene vua Njambi, kaha navioshe evi vaka mihanavio naua.”

Vufuko vua Muilu
(Mateu6:19-21)

³² “Keti muvye liova yeni mpunga yaindende, Ishueni navuahelela kumihana vumuene.

³³ Landeseni vufuko vueni nakuvuhana vimbongo kuli tuhutu. Livuahe-seleni vikuama vieni vavenia vije kuvikapihia, vukevuo vufuko vua muilu vuje kuvuekuhua cipue vezi kuvasa kuvushuena na tuntembulu kuvasa kuvupihisa.

³⁴ Oko kuli vufuko vuove, kukeko kukakala mutima uove.”

Ngamba uakutalelela

³⁵ “Livuaheseleleni vipangi na vindeya vieni vishuame.

³⁶ Pueni ngue vangamba vavandamena Muene uavo ahuma ku cilika cavulo. Omo nge eja nakutota ku cikolo ohovene kaha va mushokuelela.

³⁷ Vanavezika vaje vangamba omo Muene uavo akavauana vatona na kulivuahelela nge eja. Njimileka muavusunga, Muene uavo akalizitika muiva uendi na kuvalania vatumame ku mesa na kuvahana viakulia.”

³⁸ Vavezika vangamba vaje nga Muene uavo eja avauana vanalivuahelela vualuno cipue eje hhakati ka vutsiki cipue akasholoka hanima.

³⁹ Naua Yesu ualekele vandongisi vendi nguendi tantekeyeni eci, “Nga vavenia njivo akatantekeya ntsimbu ije muizi akeja, nge kekuseza njivo yendi vaituve.

⁴⁰ Neni naua muapande kuli vuahelela, omuo Muna Muntu akeja ha ntsimbu kumua livuaheselele.”

Ngamba uakulongua na Uakuhona kulungua
(Mateu24:45-51)

⁴¹ Petulu uehuile nguendi, “Muene, uli nakutulekesa eci cisimo yetu lika indi na voshe?”

⁴² Muene Yesu uamukumbuluile nguendi, “Kuakele ngamba ua mana na lutsilielo. Muene uendi uamuhakele kuendesa vakuavo vangamba nakukahana viakulia ha ntsimbu yatelamo.

⁴³ Uakukuisula uje ngamba omo Muene uendi ahiluka amuuana hali laja kuvipangi.

⁴⁴ Njimileka muavusunga, Muene uendi akamupuisa kupua mukuluntu ua vufuko vuendi vioshe.

⁴⁵ Vuno honi vije vikalingika nga uje ngamba halihandekesa ikeye vavenia nguendi, ‘Muene uange nakotokela ha kuhiluka,’ kaha akaputuka kupupa vangamba vakuavo, va vamala nava va vampuevo na kulia na kunua na kupenda?

⁴⁶ Nga Muene ua uje ngamba akahiluka ha litangua olio kamuvandamene na ola ije katantekeyele, akamutetanga vimpindi na kumuhaka hamo nava kakuhona kutava.

⁴⁷ “Nga ngamba uje atantekeya viatonda Muene uendi, vuno honi kuvivuahesa kuahi cipue kalingi viatonda Muene uendi vaka mupupa na vimbanda viavingi.

⁴⁸ Vuno honi uje katantekeya Muene uendi viatonda, kaha alinga viuma viafuila kashitiku vaka mupupa vimbanda viavindende. Kuli uoshe vana-hana viavingi, viavingi naua vakatonda, kuli uje vanatulikisile viavingi, viavingi cikuma vakamuihula.

Vantu valiangununa omuo Yesu

(Mateu10:34-36)

⁴⁹ “Njezile nakuneha tuhia ha mavu, njatondo nge tunakuata laja!

⁵⁰ Ha kulivanga njapandele kuhita mu cimbutikilo ca tuyando tuatuingi, njinazeye kuvanga cinahiti!

⁵¹ Muasinganieka ngueni njinezile mukuneha ciyulo ha mavu? Houe, njimileka vuno honi njinanene kulitepa.

⁵² Kuhuma hano ntanga ya vantu vatanu vakalitepa, vatatu valiluisa na vavali kaha vavali valiluisa na vatatu.

⁵³ Vakalipanga, vaishe valuisa vana va vamala, na va vamala kuluisa vaishavo, vaina kuluisa vana yavo va vampuevo kaha na vana va vampuevo kuluisa vainavo, vaina mueno kuluisa vaniotomueno yavo, vaina mueno kuluisa vaniotomueno yavo.”

Kulumbununa vitantekeyeso via vintsimbu

(Mateu16:2-3)

⁵⁴ Yesu uahandekela ku civunga nguendi, “Nga mumona lishelua lihumina kuli katokela litangua, vuasi vuasi muhandeka ngueni, ‘Ikanoka’, kaha inoka.

⁵⁵ Kaha nga muvua mpunzi ihumina mu mbuela, muhandeke ngueni, ‘Kukayukuma’, kaha mukemo vene.

⁵⁶ Yeni vaka civembulu! Muatantekeya kulumbununa cifua ca mavu cipue ca melu, vuno honi vika kumutantekeyela kulumbununa viuma vije Njambi alina kulinga ha vintsimbu vino tulimo?

Kulisambesa na Muka Nkole

(Mateu5:25-26)

⁵⁷ “Vika muhonoua kuli yula yeni vavenia hakulinga viuma viacili?

⁵⁸ Nga uya na citozi cove kunzango, eseka cikuma kulivuasana nendi mu ngila. Nga kuahi akakutuala kuli muka kuyula, kaha muka kuyula akakutuala kuli mukuluntu ua kamenga kaha akakutuala mu kamenga.

⁵⁹ Njimileka yeni nguange kumukahumumo kuvanga noho mukafueta vimbongo viama maneselelo via mukuli."

13

Kutengulukeni kuvupi vueni

¹ Ha ntsimbu ije kuakele vantu vamo valekele Yesu via Vangalileya vaje Pilato uatsihile te valinakulinga vinkombelo viavo kuli Njambi.

² Yesu uavehuile nguendi, "Omuo Vangalileya vaje vavatsihile mu ngila ije vene, kaha yeni muayongola ngueni vapuile vaka vupi kupulakana Vangalileya voshe ndi?"

³ Njimileka nguange, kuahi! Vuno honi nga kumutenguluka mukanonga ngue vakevo naua.

⁴ Singaniekeni vaje vantu likumi na vatanu na vatatu vaje vatsile omo kaposhi ka mu Siloame kavauililile. Musinganieka ngueni vapuile vaka vupi kupulakana voshe vaje vakele mu Yelusalema ndi?"

⁵ Njimileka nguange, kuahi! Vuno honi kuvanga mutenguluke keti ngoconi mukanonga ngue vakevo naua."

Cisimo ca muti ua Mukuyu uakuhona kuima

⁶ Kaha Yesu uavatele cisimo eci, "Kuakele yala umo uakunine muti ua mukuyu mu lihia liendi. Kaha uaille nakumonako vushuka vuno honi kavuuaneneko.

⁷ Kaha uahandekela kuli ndimi yendi nguendi, 'Tala, mu miaka itatu njinakele nakuija nakutondako vushuka oku ku muti ua mukuyu, hanga nakamo kanjinauanako kahi. Uteke! Vikahoni utualelelaho kushamuisa livu eli?"

⁸ Vuno honi uje ndimi uamukumbuluile nguendi, 'Muene, acitaleleleniko muaka umo naua, njikahindako kuuzengeleka nakuhakako vuilo.

⁹ Nga ukema vushuka mungolosika, kaha muacili, vuno honi nga kuukemi, ambahoni njikauteka."

Yesu akanguisa mpuevo ua cilema ha Litangua lia Sapalalo

¹⁰ Ha litangua limo lia Sapalalo Yesu uakele nakulongesa mu njivo ya malombelo.

¹¹ Kaha kuakele mpuevo muje uakele na lihamba lije liamu vavalesele miaka likumi na itanu na itatu. Kaha ikeye uakotamene kasele kuhetuka kuahi.

¹² Omo Yesu uamumuene, uamusanene nakuhandeka kuli ikeye nguendi, "Mpuevo, njikukangula ku kuvavala kuove."

¹³ Kaha Yesu uakambekele mavoko endi hali ikeye, hajevene uolokele na kuputuka kushangazala Njambi.

¹⁴ Vuno honi mukuluntu ua mu njivo ya malombelo uanienguele omuo Yesu uakanguisile muntu ha litangua lia Sapalalo, uakele na kuhandeka ku vantu nguendi, "Kuli matangua atanu na limo aje tunapande kupanga vipangi. Ijeni mu matangua aje linga vamikanguise, keti ha litangua lia Sapalalo, kuahi."

¹⁵ Vuno honi Muene Yesu uamukumbuluile nguendi, "Eni vaka civem-bulu! Nkuma yeni kumue kuzitula vangombe yeni cipue vimulu ceni nakumutuala ku mema ha litangua lia Sapalalo ndi?"

¹⁶ Taleni ou Mpuevo! Ikeye mutekulu ua Avilahama uje yakutile Satana miaka likumi na itanu na itatu. Nkuma kuvapandele kumuzitula ha litangua lia Sapalalo ndi?"

¹⁷ Kukumbulula nguendi kuazivisile vitozi vendi voshe shuamua, kaha vantu voshe vajolelelele ha viuma viakukomokesa viacili vije vialingile.

Cisimo ca mbuto ya musalata
(Mateu13:31-32; Mako4:30-32)

¹⁸ Kaha Yesu uavehuile nguendi, "Vumuene vua Njambi vunapu ngue vika? Njivuesekeka na vika?"

¹⁹ Vunapu ngue muje, muntu anona kanona kamo kambuto ya musalata nakukakuna mu lihia citungu. Kaha kakakola kapua muti uakama, kaha tuzila veja vakutungila mashua avo ku mintango yauo."

Cisimo ca Cimbaluila
(Mateu13:33)

²⁰ Kaha naua Yesu uavehuile nguendi, "Vumuene vua Njambi njivuesekeka na vika?"

²¹ Vunapu ngue cimbaluila cije mpuevo uanonele na kuutsingasana na vunga vua vuingi vua tiliku mu lilonga, noho mukasha uoshe uafutunukile."

Cikolo ca Cindende
(Mateu7:13-14; 21; 23)

²² Yesu uahitile mu Vinganda na mu membo, ualongesele vantu oku hali mu vungenzi vuakuya ku Yelusalema.

²³ Kaha umo uamuhuile nguendi, "Muene, nkuma vavandende lika vakovoka ndi?" Yesu uamukumbuluile nguendi,

²⁴ "Licikininini mukovele mu cikolo ca cindende, muavusunga omuo vavengi vakatonda ku kovelamo vuno honi kuvakasa.

²⁵ Omo vavenia njivo akemana na kushoka lipito, kaha mukemana hambanza na kutota ha lipito ngueni, 'Muene, tushokolueleko!' Kaha akamikumbulula nguendi, 'Kunjitantekeya oku kumuhuma.'

²⁶ Kaha mukaputuka kuhandeka ngueni, 'Tualile na kunua nove, kaha ualongesele mu nganda yetu.'

²⁷ Vuno honi akahandeka naua nguendi, 'Kunjitantekeya oku muhuma. Humeni kuli yange, yeni voshe vaka kulinga viavipi!'

²⁸ Mukalila na kulishumanga ku mazo omo mukamona Avilahama, na Isake na Yakomba na tunanguizi va Njambi va Njambi voshe mu Vumuene vua Njambi, vuno honi yeni vakamiumbila hambanza.

²⁹ Vantu vakahuma mu ngangela na mu kangombe ka yambi, ku kunto na mu mbuela, vakatumama ku ciuano mu Vumuene vua Njambi.

³⁰ Cilivene vaka kukotokela vakapua vaka kulivanga, kaha vaka kulivanga vakapua vakevo vaka kukotokela."

Cizango ca Yesu ha Yelusalema
(Mateu23:37-39)

³¹ Ha ntsimbu ijevene kuezile Vafaliseo vamo kuli Yesu na ku handeka nguavo, "Unapande kuhuma kuno uye kueka, omuo Helonde atonda kukutsiha."

³² Yesu uavakumbuluile nguendi, "Yeni mukamuleke ouo mbanje ngueni, 'Njicili nakuhumisa mahamba na kukanguisa vantu kumavezi avo ku litangua lialelo na imene, kaha ha litangua lia mucitatu ambahoni njikamanesa vipangi viange.'

³³ Cipue ngoco njinapandele kuenda lelo na imene na imenuavuze, omuo keti cacili kuli kananguizi ua Njambi kutsila kueka vuno honi kuvanga mu Yelusalema.

³⁴ Yelusalema, Yelusalema, yove mu kakutsiha tunanguizi va Njambi va Njambi nakuasha mavue kuli vaje vavakutumina! Vintsimbu viavingi njatondele kukungulula vantu vove hamolika ngue cali muakavutikiya vana vendi mu mambava endi, vuno honi yove kuuanjitavele!

³⁵ Tala, njivo yove ikasala ya mupulungua. Njikuleka nguange, kuukanjimonu naua kuvanga noho ntsimbu ikeja omo ukahandeka nguove, 'Uakuvezika ou eja mulizina lia Muene.' "

14

Yesu akanguisa yala uakuvavala

¹ Ha ntsimbu imo omo Yesu uaile ku njivo ya mukuluntu ua Vafaliseo na kulia via kulia ha litangua lia Sapalalo, voshe vaje vakele mu njivo vakele na kumutalela muyehi.

² Ha lutue luendi hakele yala uakele nakuvavala kuzimba mikono uezile kuli Yesu.

³ Yesu uehuisile Vafaliseo na valongisi va mezi a mashiko a Mosesa nguendi, "Cinapu cacili kuli Lishiko lietu ku kanguisa vantu ha litangua lia Sapalalo, indi kuahi?"

⁴ Vuno honi vaholokele. Kaha Yesu uamuambate uje yala uakuvavala na kumukanguisa, nakumuecela aye.

⁵ Kaha uahandekela kuli vakevo nguendi, "Nga hhakati keni hali umo hali na muana cipue ngombe uje nauila mulisima, kumuasa ku muhumisamo ha litangua lia Sapalalo ndi?"

⁶ Kaha vahonouele kumukumbulula eci.

Kulikehesa na kutambula vangenzi

⁷ Omo Yesu uamuene vangenzi vanahangula vihela via vituamo viakama, uavatelele cisimo nguendi,

⁸ "Omo nga vanakulaniako ku cilika cavulo, keti ukatumame ha cituamo ca kasingimiko, omuo hamo kuli umo ua kasingimiko kupulakana yove ivanalanina.

⁹ Kaha uje uamilaniene muvavoshe a kahandeka kuli yove nguendi, 'Njimilomba mutumameko kuje linga ou yala atumameko ha cihela ceni.' Kaha mushuamua ukambata cituamo ca cindende kumaneselela.

¹⁰ Vuno honi nga vanakulania, ya ukatumame ha cituamo ca cindende ca kumaneselela, nga vavenia cilika akeja, akahandeka kuli yove nguendi, 'Kavusamba, tumama ku cituamo ca kasingimiko,' kaha uka tumama na kasingimiko kuli voshe ukatumama navo ku mesa.

¹¹ Kaha voshe vaka lijundula vakevo vavenia va kavaneha ha mavu, kaha voshe vakalikehesa vakevo vavenia vakajundula."

¹² Kaha Yesu uahandekela kuli uje uamilaniene nguendi, "Nga uhana viakulia ha ciuano, keti lika ulanie vavusamba cipue va ndumbuevo cipue vavushoko vove cipue vakufuka vamua lihata navo, hamo vakamisana navakevo naua, kaha cikamuesa ngue vali nakumifueta.

¹³ Vuno honi nga uana viakulia ha ciuano, lania vihutu, na visualonda, na vilema na tupuputua.

¹⁴ Nga ulinga muje ukapua uakuvezika, omuo kuvakasa kukufueta, kaha vaka kufueta ha kusanguka ca vaka vusunga."

Cisimo ca ciuano cakama

(Mateu22:1-10)

¹⁵ Umo mungenzi ivalaniene kukulia omo uovuile eci, uahandekela kuli Yesu nguendi, "uakukuisula uje akatumama ku ciuano mu vumuene vua Njambi!"

¹⁶ Kaha Yesu uahandekela kuli ikeye nguendi, "Kuakele muntu umo uje ualingile ciuano cakama kaha ualaniene vantu vavengi.

¹⁷ Ha ntsimbu ya ciuano uatumine vangamba kuli vaje valaniene nguendi, 'Ijeni, omuo vioshe vinavua honi.'

¹⁸ Kaha umo na umo uakele nakuhandeka nguendi nazenzama. Uakuliwanga ua handekela nguendi, 'Njinalanda lihia, kaha njitonda njikalimone, tambula kulomba kuange.'

¹⁹ Mukuavo uahandekela nguendi, 'Njinalanda vangombe likumi, kaha njili nakuya na kuveseka, tambula kulomba kuange.'

²⁰ Mukuavo naua uahandekela nguendi, 'Njinambata mpuevo vene, kaha kunjasa kuija.'

²¹ Kaha uje ngamba uahilukile na kuambulula kuli Muene yendi. Kaha vavenia njivo uanienguele kaha uahandekela kuli ngamba yendi nguendi, 'Ya hano vene muvingila na mu vitapalo via mbonge unehe vihutu, na visualonda, na tupuputua na vilema.'

²² Omo ngamba yendi uahilukile uahandekela nguendi, 'Muene, viu-nashikile via lingiua, vuno honi kuhucili muhela.'

²³ Kaha Muene uahandekela kuli ngamba yendi nguendi, 'Ya mu vingila via mumikulo na mu vitapalo via mumikulo, usindiye vantu veje vakovele mu njivo yange linga ishule.'

²⁴ Kaha njikuleka nguange naumo uahi kuli vaje vanjinalaniene a kevua ku viakulia viange! "

Ndongisi napande kulivuahesela kuyandela Yesu

(Mateu10:37-38)

²⁵ Litangua limo omo vantu vavengi vaile na Yesu, kaha ualulukile na kuhandeka kuli vakevo nguendi,

²⁶ "Uoshe uje eja kuli yange vuno honi kazindi va ishe na vaina, mpuevo yendi na vana vendi, na vandumbuendi na vamuanyaye va vampuevo, cilivene, cipue ukeuo muono uendi, kasa kupua ndongisi uange.

²⁷ Uoshe uje kambata cilindakano cendi na kunjikava kasa kupua ndongisi uange.

²⁸ Nga utonda kutunga njivo yakama, kaha utumama ha mavu na kumona vije vitondeka, kumona nga uasa kuimanusula.

²⁹ Vuno honi nga uaputuka kuhinda luvula kaha uonoua kuimanesa, voshe vakaimona kaha vakakujola

³⁰ na kuhandeka nguavo, 'Uje mukueto uaputukile kutunga vuno honi nahonoua.'

³¹ Cipue muene, nga aya ku nzita na kulua na mukuavo muene, kaha atumama ha mavu na kumona nga asa kulua na vantu va kupua makulukazi likumi na uje mukuavo eja na vantu vakupua makulukazi makumi avali.

³² Nga kasa, kaha omo mukuavo acili kulahako, akatumako vantu vakahandeka via ciyulo.

³³ Mucifua cimo vene," "naumo uahi hali yeni apua ndongisi uange nga kaseze vioshe vianafuku.

Muongua ua kushamuka

(Mateu5:13; Mako9:50)

³⁴“Muongua uapua uacili, vuno honi nga uashamuka kaha kutovala caco cihiluka vati?”

³⁵Kuukapu uacili ku mavu cipue ku vuilo, vaka umbila kuti. Uoshe hali na matuitui, napande kuivua evi!”

15

Cisimo ca Mpanga ua kuzimbala

(Mateu8:12-14)

¹Litangua limo omo vaka kutambula lisimu na vaka vupi vezile na kuivuilila Yesu,

²kaha Vafaliseo na valongisi va mezi a mashiko a Mosesa vakele nakuningozola na kuhandeka nguavo, “Ou yala linakutambula vaka vupi na kulia navo.”

³Kaha Yesu uava telele cisimo eci nguendi,

⁴“Iya hali yeni nga hali na Vampanga cihita kaha azimbalesaho umo, nkuma kaseze vaje makumi atanu na auana na vatanu na vauana (99) mu musinge na kuya nakutonda uje nazimbala kuvanga noho na muuana?”

⁵Nga namuana, avuahelela na kumuhaka ha vitsili viendi,

⁶omo ha kuya kuimbo, kaha akasana vavusamba vendi nava va lihata navo kaha akahandeka nguendi, ‘Vuaheleleni hamo nange omuo njinauana mpanga uange uje uazimbalele.’

⁷Njimileka nguange, mucifua cimo vene kukapua kuvuahelela kuakama muilu hali muka vupi umo nga natenguluka kupulakana vaje makumi atanu na auana na vatanu na vauana vantu vaje kuvatondo kutenguluka.”

Cisimo ca mbongo ya kuzimbala

⁸Yesu uatuaeleleleho kuleka vantu cisimo eci nguendi, “Nga mpuevo umo ali na vimbongo via mu uayauaya likumi, nga hazimbala imo, nkuma kashuameka ndeya yendi, nakukomba mu njivo na kutonda vuino kuvanga noho hakaiuanena?”

⁹Nga aiwana, kaha asana vavusamba vendi nava valihata navo na kuvaleka nguendi, ‘Vuaheleleni hamo nange omuo njinauana mbongo yange ije njazimbalesele.’

¹⁰Njimileka nguange, mucifua cimo vene, muli kuvuahelela hakati katungelo va Njambi hali umo muka vupi uje atenguluka.”

Cisimo ca muana ua kuzimbala.

¹¹Yesu uatuaeleleleho kuhandeka nguendi, “Kuakele yala uakele navana va vamala vavali.

¹²Ua kanike uahandekela kuli ishe nguendi, ‘Tate, njihaneko mutambela ua vufuko vuange,’ kaha ishavo uavapangelele vufuko vuendi hakati kavo vana vendi vavali.

¹³Kukuahitile ntsimbu yailaha kuhuma haje, ua kanike ua mbate vioshe uakele navio na kuya ku lifuti lilahako na kupihisa viuma viendi vioshe kusenga.

¹⁴Muamanusuile kupihisa viuma viendi vioshe, kaha kuakele njala mu lifuti lioshe, kaha uaputukile kutsa njala na vuhutu.

¹⁵Kaha uaile na kutonda vipangi kuli muntu umo uamu lifuti lije kaha ua mutualele ku lihia naku lisa vangulu.

¹⁶Uatondele kulia vije vakele na kulia vangulu, vuno honi naumo uahi uamuhaneneko cimo ca kulia.

¹⁷ Omo mana ahilukile muli ikeye, uahandekete kuli ikeye vavenia nguendi, 'Vaka kupanga va vatate vali na viakulia viavingi, yange kuno njili nakutsa njala!'

¹⁸ Njikuta vungenzi njihiluke kuli tate kaha njikahandeka kuli ikeye nguange, "Tate, njapihisila Njambi nove,

¹⁹ kunjapandele naua kunjisana munove, njipuisse kupua umo uava Vaka kupanga vove."'

²⁰ Kaha uakatukile nakuya kuli ishe.

"Omo uakele nakuendela kulako, ishe ua mumuene kaha ua muivuilile cikeketima kaha ishe uamushatukilile, uamuvumbatele na kumutsuema.

²¹ Muana uahandekete kuli ikeye nguendi, 'Tate njapihisila Njambi nove. Kunjapandele naua kunjisana munove.'

²² Vuno honi ishe uahandekete kuli vangamba vendi nguendi, 'Zambu- leni! Neheni cikovelo cacili mumuzike nakumuzika kanzeya ku munie uendi na vinkaku ku viliato yendi.

²³ Neheni muna ngombe uakuhindala mumutsihe, kaha tulieni na kuvuahelela,

²⁴ omuo munange ou uatsile vuno honi nahinduka naua, uazimbalele vuno honi nauaniua.' Kaha vaputukile kulia na kuvuahelela.

²⁵ "Ha ntsimbu ijevene, muana ua mukuluntu uakele mulihia. Omo uezile hayehi na njivo, uovuile miaso na vakakukina.

²⁶ Kaha uasanene umo ua vangamba na kumuihula vika 'vili nakulingika.'

²⁷ Umakumbuluile nguendi, 'Ndumbuove neja kaha isho natsihi muana ngombe uakuhindala omuo nahiluka oku alimuacili.'

²⁸ Muana ua mukuluntu ua nienguele na kuviana kukovela mu njivo. Kaha ishe uatuhukile na kumulambelega akovele mu njivo.

²⁹ Vuno honi uakumbuluile ishe nguendi, 'Tala! Ha miaka yoshe njinakupangela ngue ndungo kaha kunjashauile mashiko ove. Vuno honi kuanjihanekeo cipue muna mpembe linga njivuahelele na vavusamba vange.

³⁰ Vuno honi omo ou munove nahiluka, uje na pihisa vufuko vuove na vukoyi kaha neja kuimbo, kaha una mutsihila muana ngombe uakuhin- dala!'

³¹ Ishe uahandekete kuli ikeye nguendi, 'Munange, ntsimbu yoshe unakele nange, kaha vioshe njilnavio vinapu vovie.

³² Vuno honi tuapande kuvuahelela na kujolela, omuo shongoyove ou uatsile kaha nayoyo naua, uazimbalele vuno honi nauaniua.' "

16

Cisimo ca muka Kutulika uakuzangama

¹ Kaha Yesu uahandekete kuli vandongisi vendi nguendi, "Kuakele yala umo ua kufuka uje uakele na muka kutulika vufuko vuendi. Muka kufuka uje vamulekele nguavo muka kutulika vitenga vovie hali nakupihisa vimbongo vovie.

² Kaha uamusanene na kuhandeka nguendi, 'Vika evi njili nakuivua hali yove? Njihane vukaleho vua viuma vioshe muje munatulikilamo vufuko vuange, omuo kukapu naua muka kutulika uange.'

³ Muka kutulika ualihandekesele ikeye vavenia nguendi, 'Nga muene uange anjhumisa vipangi, njilinga vatihoni? Kunjesi na nzili yakuhinda vina, nganjihuma vipangi kuno, kaha naua njili na shuamua yakulomba.

⁴ Kaha honi njatantekeya vinjikalinga linga vantu vakanjitambule mu vinjivo viavo! Omo vipangi viange vikahua.'

⁵ Kaha uasanene vantu vaje vakele na mikuli kuli muene uendi. Uehuile uakulivanga nguendi, 'Vungahi uakonguele kuli muene uange?'

⁶ Kaha uamukumbuluile nguendi, 'Vihita vitanu na vitatu via mingomo ya mazi a olive.' Kaha uje muka kutulika uahandekele naua nguendi, 'Livulu liove eli lije limuesa makongo ove, tumama ha mavu sonekamo viseteko via vihita viuana via mingomo.'

⁷ Kaha uehuile mukuavo ua mucivali nguendi, 'Uakonguele cingahi?' Kaha uamukumbuluile nguendi, 'Cihita cimolika ca masaka a tiliku,' kaha uamulekele nguendi, 'Ambata livulu liove eli sonekamo makumi atanu na atatu a masaka a tiliku.'

⁸ Kaha uje muene uendi uashangazalele uje muka kutulika uakuhona kulungua hakukala na mana, omuo vantu va lifuti lino vatantekeya muakukela navakuavo kupulakana vana vamu ceke."

⁹ Njimileka nguange, pangeseni vufuko vua ha mavu kulinga vusamba kuli yeni na tuhutu. Kaha omo vufuko vueni vukahua, omo mukatsa vaka mitambula mu vihela via kuhona kuhua.

¹⁰ Uoshe akala na vusunga muvia vindende na mu viakama akakala na vusunga, kaha uje kakala na vusunga muvia vindende kaha kakakala na vusunga mu viakama.

¹¹ Kaha nga kuuakele na vusunga na vufuko vua ha mavu, iya honi akutsiliela na vufuko vua vusunga?

¹² Kaha nga kuuakele na vusunga ha vitenga via muntu, iya akakuhana vufuko vuje vuakupande?

¹³ "Uahi ngamba asa kupangela vamiene vavali omuo uje ngamba akazindaho umo naku zangaho mukuavo, cipue halianako kuli umo na kushaula mukuavo. Kuuasa kupangela Njambi na vimbongo."

Vihandeka vimo via Yesu

(Mateu11:12; 13; 5:31-32; Mako10:11-12)

¹⁴ Vafaliseo vaje vapuile vaka kuzanga vimbongo, omo vovuile vioshe evi, kaha vashendumuine Yesu.

¹⁵ Kaha uahandekele kuli vakevo nguendi, "Yeni vaje vaka limuesa kupua vaka vusunga ku vantu, vuno honi Njambi atantekeya mitima yeni, omuo coshe cije vashangazala hakati ka vantu, ku mesho a Njambi cinapu ca ngoco ngoco.

¹⁶ "Lishiko lia Mosesa na tunanguizi va Njambi va Njambi vatuamenene vantu noho Iuano muka kumbutika uezile. Kuhuma oho naha ntsimbu ino muzimbu uacili ua vumuene vua Njambi vauambulula. Muntu uoshe alinakueseka cikuma kukovela omu mu vumuene.

¹⁷ Vuno honi cacasi melu na mavu kuhita kupulakana ka lizi kakande kamu mukanda ua Lishiko lia Mosesa kuhua.

¹⁸ "Uoshe akondola mpuevo yendi na kuambata ueka nalingi vupangala, kaha uoshe ambata mpuevo uakukondola kuli yala liendi alinga vupangala.

Yala ua kufuka na Lazalu

¹⁹ "Kuakele yala umo uakufuka uje uakele nakuya vuzalo vua vunengu vuandando yakutula, uakele na ciuano ca kulia cakama halitungua na tangua.

²⁰ Kuakele yala uacihutu lizina liendi Lazalu uje ivakele nakuneha ku cikolo ca muka kufuka, uje uakele na vimbandu muvila uoshe.

²¹ Lazalu uakele nakuvandamena kulia viakele na kuua ku mesa ya uje yala uakufuka, na tutali vakele nakuija na kuliasa ha vimbandu viendi.

²² Uje yala uacihutu uatsile kaha tungelo vamuambate kukakala na Avilahama. Kaha na uje yala uakufuka naikeye uatsile kaha vamutsindile.

²³ Uakele mu ngehena na kuyanda. Uatalele kuilu kaha uamuene Avilahama kulahako hali na Lazalu ku mukulo uendi.

²⁴ Kaha uasanene nguendi, 'Tate Avilahama, njizivileko cikeketima tuma Lazalu ambuitike munie uendi mu mema anjifontuese ha ndaka yange, omuo njili na kuvua kuvavala muno mu tuhia.'

²⁵ Vuno honi Avilahama uamukumbuluile nguendi, 'Munange, anuka ha ntsimbu yove uakele nakuyoya uakele nakutambula viuma viove via cili, na ntsimbu ya Lazalu uatambuile via vipi, vuno honi hali nakuyoya muacili yove uli na kuyanda.'

²⁶ Kaha naua mukati kove netu hali cina cakama, ngeci uoshe atonda kujavuka kuhuma kuli yetu kuija oko keti ase, kaha naumo uahi asa kujavuka kuhuma oko kuija kuno kutuli.'

²⁷ Kaha yala ua kufuka uahandekete nguendi, 'Honi, tate, njilomba yove utume Lazalu ku njivo ya tate,

²⁸ omuo njili na vandumbuange vatanu. Ecela Lazalu aye nakuvanangula linga keti vakeje naua kuno kucihela ca tuyando.'

²⁹ Kaha Avilahama uakumbuluile nguendi, 'Vali na visoneka via Mosesa na tunanguizi va Njambi va Njambi, vanapande kuvovuila.'

³⁰ Uje yala ua kufuka uahandekete nguendi, 'houe, tate Avilahama, vuno honi nga umo akasanguka kuvatsi aya kuli vakevo kaha vakatenguluka.'

³¹ Avilahama uamukumbuluile nguendi, 'Nga kuvevuila ku visoneka via Mosesa na tunanguizi va Njambi va Njambi, kaha cipue muntu uakuhuma ku vatsi ku vakatava.' "

17

Vupi

(Mateu18:6-7; 21; 22; Mako9:42)

¹ Yesu uahandekete kuli vandongisi vendi nguendi, "Viaseko via vupi mua vusunga vihita, vuno honi tuyando kuli uje avineha!

² Cacili kuli ikeye nga vaka mukutilila livue liakama muntsingo na kumumbila mu cisali, kuhona akovelese umo ua vanike vavandende mu vupi.

³ Zangameni ku vije muli nakulinga. Nga mukueni alinga vupi munan-gule nga halitavela mukonekele.

⁴ Kaha nga muntu umo vene akupihisila lutanu na luvali ha litangua limo, kaha eja kuli yove lutanu na luvali na kuhandeka nguendi, 'njatenguluka,' unapande kumukonekela."

Lutsilielo

⁵ Kaha tunganda vahandekete kuli Muene Yesu nguavo, "Vuezelela lutsilielo luetul!"

⁶ Kaha Muene Yesu uahandekete nguendi, "Nga muli nalutsilielo lualun-dende ngue mbuto ya musalata, nge muasa kuhandeka ku muti ou uakama ua mizi yaingi ngueni, 'Tukuka uka shimbame ha mema a kalunga!' Kaha ukeuo ukamiononoka.

Vipangi via ngamba

⁷ “Nga ulina ngamba muka kulima cipue muka kuniunga vampanga uasa kuhandeka kuli ikeye nga ahuminina ku mehia nguove, ‘Ija hano vene uakutumame na kulia’?”

⁸ Houe! Ukahandeka kuli ikeye nguove, ‘Vuahesa viakulia viange via cinguezi, Naua lizitikile vualumo muiva uove nakunjipangela noho njikalia na kunua, nga njamanesa ambahoni ulie na kunua!’

⁹ Honi ngamba kuveku mutsatsela hakulinga vije vivamushikile kulinga ndi? Mua vusunga kuahi!

¹⁰ Neni naua vene, omo mualingile vioshe vije vivamishikile kulinga, handekeni ngueni, ‘Tuva ngamba vangoco, tunalingi lika vipangi vietu.’”

Yesu akanguisa vamala likumi

¹¹ Yesu hakuya ku Yelusalema uahitile mukati ka Samhaliya na Ngalileya.

¹² Kaha uakovelele muimbo muje vamala vambumba likumi vamuane, vemanene kulahako.

¹³ Vatambakanene cikuma na kuhandeka nguavo, “Yesu, Muene tuvuileko cikeketima!”

¹⁴ Omo Yesu uavamuene, uahandekile kuli vakevo nguendi, “Yeni mukalimuese yeni vavenia kuli tusasendote.”

Omo vakele nakuya vavalelesele.

¹⁵ Kaha umo uavo omo uamuene nguendi nakanguka, uahilukile na kushangazala Njambi na lizi liakama,

¹⁶ Uauile na cihanga cendi ku viliato ya Yesu na kumutsatsela. Ikeye uapuile Kasamaliya.

¹⁷ Kaha Yesu uahandekile nguendi, “Kuvapuile likumi vanakanguka? Ava vatanu na vauana vali kulihoni?”

¹⁸ Vikahoni cipue umo kuija nakuhana cisantsela kuli Njambi kuvanga lika ou keti kayunda?”

¹⁹ Kaha Yesu uahandekile kuli ikeye nguendi, “Katuka uye, lutsilielo liove lua kukanguisa.”

Kuija kua vumuene vua Njambi

(Mateu24:23-28;37-41)

²⁰ Kaha Yesu vamuihuile kuli Vafaliseo nguavo, “Ntsimbu muka vumuene vua Njambi vukeya?” Kaha uavatavele nguendi, “Vumuene vua Njambi kuvukeja mungila ije muasa kuvumona na mesho eni kuahi.

²¹ Kukuesi akahandeka nguendi, ‘Tala, vuno vulikuno!’ Cipue ‘Talen, vuje vuli kujel!’ Omuo vumuene vua Njambi muli navuo hakati keni.”

²² Kaha honi Yesu uahandekile kuli vandongisi vendi nguendi, “Matangua akeja omo mukatonda kumona litangua limo lia Muna Muntu, vuno honi kumukasa kuli mona.

²³ Kaha kukakala vamo vakahandeka kuli yeni nguavo, ‘Talen ali kujel!’ Cipue, ‘Talen ali kuno!’ Keti muyeko, keti muvakavangeye.

²⁴ Ngue muhiato mukahiatula muilu, kaha vaumona uhuma kumuhela umo ua lilu nakuya ku muhela ukuavo ua lilu, mukemove ne naua Muna Muntu muakafua ha litangua liendi liakuhiluka.

²⁵ Vuno honi napande kuyanda cikuma na kumuyengula kuli vantu va ntsimbu ino.

²⁶ Nge mucapuile ku matangua a Noua mukemove ne mucikapuilamo naku matangua a Muna Muntu.

²⁷ Vantu vakele nakulia na kunua, na kuliambata na kushombuesa, noho Noua uakovelele mu vuato. Kaha livazi liezile nakuvanongesa voshe.

²⁸ Nge mucapuile ku matangua a Lote: vantu voshe vanuine, valile, valandesele na kulandulula, vakunine na kutunga,

²⁹ vuno honi ha litangua lije Lote uahumine mu Sondoma, tuhia na mavue vianokele ngue mema a kuhuma muilu, kaha via vanongesele voshe.

³⁰ Cikapua ngue mujevene ha litangua liakasholoka Muna Muntu.

³¹ "Ha litangua lijevene, uoshe uje yala hali helu lia njivo keti akovele mu njivo na kuambata viuma viendi, naua na uje hali mu lihia liendi keti ahiluke ku njivo yendi.

³² Singaniekeni hali mpuevo ya Lote.

³³ Voshe vaje vatonda kuniunga muono uavo vavenia vaka uzimbalesa, vuno honi vaje vazimbalesa muono uavo vakau uana.

³⁴ Njimileka, ha vutsiki vuje kukakala vantu vavali ha muhela umo, umo vakamuambata ou mukuavo vakamuseza.

³⁵ Kaha kukakala vampuevo vavali vali mukutua hamo mucini cimo, mukuavo vaka muambata na mukuavo vakamuseza."

³⁶ [Vamala vavali vakapanga mu lihia, umo vakaya nendi mukuavo vakamuseza.]

³⁷ Kaha vandongisi vendi vamuihuile nguavo, "Kulihoni kuvikalingika, Muene?"

Kaha Yesu uavatavele nguendi, "Kuoshe kuje kuli civimbi kukeko kuka-likunguluila makuvi."

18

Cisimo ca Ntuluue na muka Kuyula

¹ Yesu ualekele vandongisi vendi cisimo eci kuvalongesa nguendi, vande kulumbela ntsimbu yoshe cakuhona kuecela.

² Uahandekele nguendi, "Mu mbonge imo muakele muka kuyula uje kateuele Njambi cipue kusingimika vantu.

³ Kaha naua mu mbonge ijevene muakele ntuluue uje uakele nakuija kuli ikeye vintsimbu viavingi na kuhandeka nguendi, 'njihaneko kapandi kange ha vitozi vange!'

⁴ Ha ntsimbu yaindende uje muka kuyula uavianene, hajevene uahandekele kuli ikeye vavenia nguendi, 'Cipue kunjiteue Njambi cipue kusingimika vantu,

⁵ vuno honi ou ntuluue nanjishupu cikuma, njapande kumuhana kapandi kendi, omuo nga atualelelaho kuija kaha aka njihonesa!'"

⁶ Kaha Muene Yesu uahandekele nguendi, "Ivuilileni vije viahandeka uje muka kuyula uakuhona vusunga!

⁷ Nkuma Njambi kasa kuyula mu vusunga ku vantu vendi vaje vali-nakulilila kuli ikeye vutsiki na mutania? Nkuma ngueni akasimbula mukuvakuasa ndi?"

⁸ Njimileka nguange, hajevene akavahana kapandi kavo. Vuno honi omo Muna Muntu akeja, akauanaho vantu vali nalutsilielo hano ha mavu ndi?"

Cisimo ca Kafavaliseo na muka kutambula lisimu

⁹ Yesu uate cisimo eci naua kuli vantu vaje vaka kutsiliela vusunga vuavo vavenia nakushaula vakuavo,

¹⁰ Uahandekele nguendi, "Vamala vavali vayile ku njivo ya Njambi nakulomba, umo Kafaliseo, mukuavo muka kutambula lisimu.

¹¹ Kafaliseo uemanene na kulomba nguendi, 'Njikutsantsela Njambi, yange kunjafuile ngue vakueto vantsintsa, vaka kuhona vusunga, vaka

vupangala. Yange kunjafuile ngue uje muka kutambula lisimu nemana kuje.

¹² Njikalumina kulia ha matangua avali mu simano, njikahana cimo kulikumi ca vioshe vinjikauana.'

¹³ Vuno honi uje muka kutambula lisimu uemanene ku lahako, kaha kasele cipue kutala kuilu, vuno honi ualivete ha ntulo na kuhandeka nguendi, 'Njambi, civuile cikeketima yange muka vupi.'

¹⁴ Njimileka," nguange, "uje muka kutambula lisimu uaile kuimbo liendi mu vusunga kupulakana uje Kafaliseo, voshe vaje valijundula vakevo vavenia vaka vakehesa, vuno honi voshe vaje valikehesa vakevo vavenia vakava jundula."

Yesu akuisula vanike vavandende
(Mateu19:13-15; Mako10:13-16)

¹⁵ Vantu vanehelelele Yesu vanike vavandende linga avasaleke mavoko, kaha omo vandongisi vendi vacimuene, vesekele kuvindika vaje vantu.

¹⁶ Vuno honi Yesu uasanene vanike vavandende veje kuli ikeye, uahandekele nguendi, "Eceleni vanike vavandende veje kuli yange keti muvavindike, omuo vumuene vua Njambi vuli ku vantu ngue ava vanike vavandende.

¹⁷ Mua vusunga njimileka nguange, uoshe uje katambula vumuene vua Njambi ngue kanike uamundende, kakakovela mu vumuene vua Njambi."

Yala ua kufuka
(Mateu19:16-30; Mako10:17-31)

¹⁸ Litangua limo umo mukuluntu ua Vayunda uehuile Yesu nguendi, "Mulongisi uacili, vika njinapande kulinga linga njikauane muono uakuhona kuua?"

¹⁹ Yesu uamukumbuluile nguendi, "Vika unjitumbuila nguove uacili?" Naumo uahi "uacili kuvanga Njamba lika.

²⁰ Uatantekeya mashiko a Njambi nguauo, 'Keti ulinge vupangala, keti utsihe, keti uive, keti uvangeye mukueni vukaleho vua makuli, singimika isho na noko.' "

²¹ Kaha uje yala uakumbuluile Yesu nguendi, "Mashiko oshe aua njaononoka laja hume kuvuanike vuange."

²² Kaha omo Yesu uevuile evi, uahandekele kuli ikeye nguendi, "Kunasupila cuma cimo ciunapande ku linga. Ya ukalandese vioshe viulinavio kaha ukahane vimbongo vioshe kuli tuhutu, kaha ukakala na vufuko muilu, kaha uije, uakunjikave."

²³ Vuno honi uje yala omo uevuile evi, kaha uanienguele, omuo ikeye uakele navufuko vua vuingi.

²⁴ Omo Yesu uamuene nguendi naniengua, kaha uahandekele nguendi, "cinapu cacikalu kuli vaka kufuka kukovela mu vumuene vua Njambi!

²⁵ Cacikalu kuli kamelu kukovela mu lisho lia nguya vuno honi cacikalu cikuma kuma muntu muka kufuka kukovela mu vumuene vua Njambi."

²⁶ Kaha vaje vantu vovuile, vamuihuile nguavo, "Iya honi akovoka?"

²⁷ Kaha Yesu uavakumbuluile nguendi, "Kuli viuma vije vantu kuvasa kulinga vuno honi Njambi asa kulinga coshe."

²⁸ Kaha Petulu uahandekele nguendi, "Tala! Yetu tunaseza vioshe vituli navio, nakukukava."

²⁹ Kaha Yesu uahandekele kuli vakevo nguendi, "Eyo, mua vusunga njimileka uoshe uje naseza njivo yendi, cipue mpuevo yendi, cipue munaina, cipue visemi vendi, cipue vana vendi, omuo vumuene vua Njambi,

³⁰ akatambula viavingi cikuma mu muono ou na muono ua yaye mu miaka ije ikeja kulutue.”

Yesu ahandeka ntsimbu ya mucitatu a kutsa cendi
(Mateu25:14-30)

³¹ Yesu uatuaelele vandongisi vendi likumi na vavali kuavo lika, kaha uahandekela kuli vakevo nguendi, “Evuilileni! Tulinakuya mu Yelusalema kuje viuma viose vije vivasonekele kuli tunanguizi va Njambi va Njambi hali Muna Muntu linga vika lishulisise.

³² Muna Muntu vakamuhana ku mavoko a Maloma vaje vaka mushendumuna na kumutuka na kumujekuila malenzi.

³³ Vaka muveta, kaha vaka mutsiha, vuno honi munima ya matangua atatu akasanguka.”

³⁴ Vuno honi vandongisi vendi kuvovuisisile nacimo cahi ha viuma evi, omuo kulumbunuka kua mezi aua vavashuekeleleuo linga keti vatantekeye vije via handekela Yesu kuli vakevo.

Yesu akanguisa yala ua kapuputua
(Mateu20:29-34; Mako10:46-52)

³⁵ Omo Yesu uahete kuyehi na Yeliko, kuakele yala umo ua kapuputua uakele kumukulo ua ngila nakulomba.

³⁶ Kaha omo uevuile civunga ca vantu cili nakuika, kaha uehuile nguendi “Vika vili nakulingika?”

³⁷ Kaha vamulekele nguavo, “Yesu uaku Nazaleta hali nakuhita.”

³⁸ Kaha uatambakanene nguendi, “Yesu! Muna Ndaviti! Njivuileko cikeketima!”

³⁹ Kaha vantu vaje vakele kulutue lia civunga, vamulekele linga aholoke. Vuno honi ikeye uatambakanene cikuma nguendi, “Ove Muna Ndaviti! Njivuileko cikeketima!”

⁴⁰ Yesu uemanene nakushika nguendi, “Muneheni kuno”. Omo uje yala uashuenene kuyehi, Yesu uamuhulisile nguendi,

⁴¹ “Vika utonda linga njikulingile?”

Kaha uamukumbuluile nguendi, “Muene njitonda linga njimone naua.”

⁴² Kaha Yesu uahandekela kuli ikeye nguendi, “Mona! Lutsilielo luove luna kukanguisa.”

⁴³ Kaha hajevene uaputukile kumona, uakavele Yesu, na kushangazala Njambi. Omo vantu vacimuene, kaha voshe vashangazalale Njambi.

19

Yesu na Sangeo

¹ Hanima yeve Yesu kukovela mu Yeliko na kuputuka kuhitanganamo.

² Muakele yala umo mu mbonge ije, uje uapuile mukuluntu ua vaka kutambula lisimo lizina liendi Sangeo, uje uapuile muka kufuka.

³ Uatondele kumona Yesu, vuno honi kasele kumumona omuo uapuile uamuihi, kaha naua kuakele civunga cakama.

⁴ Kaha uashatukilile kulutue lia civunga, ualondele ku muti ua linongo linga amone Yesu uje uahitilile mu ngila ljevene.

⁵ Omo Yesu uahete ha mutambela uje, uatalele kuilu, kaha uahandekela kuli Sangeo nguendi, “shuluka vuasi Sangeo, omuo lelo njapande kuija ku njivo yove.”

⁶ Sangeo uashulukile vuasi na kumutambula na kuvuahelala cikuma.

⁷ Vantu voshe vaje vamuene vialingiuile vaninguile nguavo, "Ou Yala nai kupua mungezi ku njivo ya muka vupi!"

⁸ Kaha Sangeo uemanene na kuhandeka kuli Muene Yesu nguendi, "Muene ivuilila njihana mutambela ua vufuko vuange kuli tuhutu, nga njambate cimo kuli umo mu ngila ya makuli, kaha njika mufueta vintsimbu viwana."

⁹ Yesu uahandekete nguendi, "Kuovoka ku neja mu njivo muno lelo, omuo yala ou nalimuesa kupua muana ua vusunga ua Avilahama."

¹⁰ Mua vusunga Muna Muntu uezile nakutonda na kuovola vaje vana zimbala."

Cisimo ca mbongo ya Ngolinde

¹¹ Tele vantu vakele nakuivuilila vije Yesu uakele nakuhandeka, uavatele cisimo omuo uakele kuyehi na Yelusalema, kaha vasinganiekele nge vumuene vua Njambi hajevene vuavuno vusholoka.

¹² Kaha Yesu uahandekete nguendi, "Kuakele muntu uaku vumuene uje uaile ku lifuti lia kulahako linga vakamupuisse muene, hanima yevi uasinganiekele kuhiluka linga akuendese vantu vendi."

¹³ Tele kanda aye, uasanene vangamba vendi likumi kaha uahanene umo na umo mbongo ya ngolinde na kuvaleka nguendi, 'Landululeni noho njikeja.'

¹⁴ Vuno honi vantu vamu lifuti liendi vamuzindile cikuma, kaha vatumine tunganda vamukave munima yendi na kukahandeka nguavo, 'Ou yala kutumutondo linga apue Muene yetu kuahi.'

¹⁵ "Omo uje yala uahilukile, hanima ya kumuhaka kupua muene, uashikile vaje vangamba vahanene vimbongo linga veje kuli ikeye linga atantekeya cingahi vana landuluilaho."

¹⁶ Kaha uakulivanga uezile nakuhandeka nguendi, 'Muene, mbongo imolika ije iuanjihanene yasemuininahoni vimbongo likumi vikuavo.'

¹⁷ Kaha uahandekete kuli ikeye nguendi, 'Unalingi muacili cikuma, ngamba uacili! Kaha muene uahandekete kuli ikeye nguendi, omuo unakala nalutsilielo mu viuma viavindende, njikakuhana nzili yakama ya kutuamenena vimbonge likumi.'

¹⁸ Kaha uamucivali naua uezile uahandekete nguendi, 'Muene, mbongo yove imolika ije iuanjihanene yasemuinina vimbongo vitanu.'

¹⁹ Kaha naua muene uahandekete kuli ikeye nguendi, 'Njikakupuisa muka kutuamenena vimbonge vitanu.'

²⁰ Kaha mukuavo ngamba uezile uahandekete nguendi, 'Muene, mbongo yove eyi, hanga njaitulikilile akantanga kakandende.'

²¹ Njakutinine, omuo yove uapua muntu uavutenu. Ukambata cije keti cove na kuteja vije kuuakuvile.'

²² Kaha muene uahandekete kuli ikeye nguendi, 'Yove ngamba uamupi! Njikakuhisa na mezi akuhuma mu kanua kove! Utantekeye nguove yange nji yala uavutenu, njikambata vije keti viange na kuteja vije kunjakuvile?'

²³ Vikahoni kuua yakele kuli vaka kusekasana mbongo yange? Omo yange njineja nge njinauana mbongo yange hamo na kakondueso kayo.'

²⁴ Kaha muene uahandekete kuli vaje vemanene kumukulo nguendi, 'Muniekeni oyo mbongo, muhane kuli uje hali na vimbongo likumi.'

²⁵ Vuno honi vakevo vahandekete kuli ikeye nguavo, 'Muene, hali laja na vimbongo likumi!'

²⁶ Kaha ikeye uavatavele nguendi, ‘Muavusunga njimileka nguange, uje hali naco, vakamuhakelako viavingi, vuno honi uje kesi navio, cipue vene vije viavindende viali navio vakamuniekavio.

²⁷ Kaha honi ku vitozi vange, vaje kuvatondele linga yange njipue muene uavo, vaneheni kuno nakuvatsihila ha mesho ange.’”

Yesu akovela na vumpau mu Yelusalema

(Mateu21:1-11; Mako11:1-11; Iuano12:12-19)

²⁸ Omo Yesu uamanesele kuhandeka evi, kaha uaille kulutue luavo nakuya ku Yelusalema.

²⁹ Omo Yesu uahete kuyehi na Mbetefenje na Mbeteniya ku munkinda ua Oliveta, kaha uatumine vandongisi vavali kulutue,

³⁰ Uavalekele nguendi, “Yeni ku limbo lije lili kulutue lueni, omo mukakovelamo mukauana muna cimulu vanamukutu, uje kanda muntu alondeho. Kaha muzituleneni mumunehe kuno.”

³¹ Nga muntu umo amihula nguendi vika mumuzituila, mulekeni ngueni Muene amutonda.

³² Kaha vaje vatumine vaile vakauanene muje muahandeketelele Muene.

³³ Tele vali nakuzitula uje muna cimulu, kaha vavenia cimulu uavehuile nguendi, “Vika mumuzituila ou muna cimulu?”

³⁴ Kaha vavutavele nguavo, “Muene hali nakumutonda.”

³⁵ Kaha vatualele uje muna cimulu kuli Yesu. Kaha vajalele tuzaku tuavo ha muongo ua cimulu, kaha valondeseleho Yesu.

³⁶ Omo uakele nakuya ha cimulu, vantu vajalele tuzaku tuavo mu ngila kulutue lua Yesu.

³⁷ Omo Yesu uahete kuyehi na Yelusalema, kucikulo ca munkinda ua Oliveta, kaha civunga cacingi ca vandongisi vendi vaputukile kuvuahelala na kulemesa Njambi na mezi akama ha vikomoueso vioshe viakama vivamuene vije Yesu ualingile,

³⁸ nguavo “Uakukuisula muene uje akeja mu lizina lia Muene Njambi! Ciyulo cikale muilu na vumpau kuli Njambi!”

³⁹ Kaha Vafaliseo vamo vaje vakele mu civunga vahandeketele kuli Yesu nguavo, “Mulongisi, shika vandongisi vove vaholoke”

⁴⁰ Yesu uavatavele nguendi, “Njimileka nguange, nga ava valikela kulemesa kaha aua mavue akaputuka kutambakana.”

Yesu alilila Yelusalema

⁴¹ Omo Yesu uahete kuyehi na kumona Yelusalema, uailililile,

⁴² uahandeketele nguendi, “Nga uatantekeyele lika lelo nguove vika vitondeka linga kukale ciyulo! Vuno honi vuavuno vacishuekesa ku mesho ove!

⁴³ Ntsimbu ikeja hali yove, omo vitozi vove vaka kutungila cimpaka, nakukuhaka mukati kavo, na kukushetuilamo mukati ku mitambela yoshe.

⁴⁴ Kaha vakevo vakakunongesa hamo na vantu vove vaje vali mu vivumbe viove, kuvakaseze livue limo mu muhela ualio, omuo yove kuuatantekeyele ntsimbu omo Njambi uezile nakukuovola.”

Yesu aya mu njivo ya Njambi

(Mateu12:12-17; Mako11:15-19; Iuano2:13-22)

⁴⁵ Yesu uakovelele mu njivo ya Njambi, na kuputuka kushekamo voshe vaje vakele na kulandesa,

⁴⁶ uahandeketele kuli vakevo nguendi, “Vanasoneka mu visoneka nguavio, ‘Njivo yange ikapua njivo ya Malombelo’, vuno honi yeni muaipuisa muhela ua vizi!”

⁴⁷ Yesu uakele nakulongesa mu njivo ya Njambi ha litangua na litangua. Vakuluntu va tusasendote na valongisi va mezi a Lishiko lia Mosesa na vantuama va vantu vatondele kumutsiha,

⁴⁸ vuno honi kuvauanene ngila yaku cilingila, omuo vantu voshe vakele naku muvuilila linga keti vasezeho cipue lizi limo.

20

Cihula caha nzili ya Yesu

(Mateu21:23-27; Mako11:27-33)

¹ Litangua limo Yesu uakele nakulongesa mu njivo ya Njambi na kuambu-lula muzimbu uacili ku vantu, kaha vakuluntu va tusasendote na valongisi va mezi a Lishiko lia Mosesa, hamo na vakuluntu vezile.

² Kaha vahandekela kuli ikeye nguavo, "Tuleke, nzili muka ukalikuasesa nayo kulinga viuma evi? Iya nakuhana nzili eyi?"

³ Yesu uavakumbuluile nguendi, "Nange naua njimihula cihula cimo. Njilekeni,

⁴ nzili ya likuasese Iuano muka kumbuitika ya humine kuli Njambi indi kuli vantu?"

⁵ Vaputukile vimpata hhakati kavo nguavo, "Vika tuhandeka? Nga tuhandeka nguetu, 'ya humine kuli Njambi,' kaha akatuihula nguendi, 'Vikahoni kumua mukulahelele Iuano?"

⁶ Vuno honi nga tuhandeka nguetu, 'Ihuminina ku vantu,' Kaha civunga coshe ca vantu vakatutsiha mukutuasha mavue, omuo vovuisisile nguavo Iuano uapuile Kananguizi ua Njambi."

⁷ Kaha vakumbuluile Yesu nguavo, "Kututantekeya kuje kuya humine."

⁸ Kaha Yesu uahandekela nguendi, "Nange naua kunjimileke kuihuminina nzili injili nakulikuasesa kulinga viuma evi."

Cisimo ca vaka kupanga mu citungu ca Viniu

(Mateu21:33-46; Mako12:1-12)

⁹ Kaha Yesu uaputukile kuleka vantu cisimo eci nguendi, "Kuakele yala umo uakele na citungu ca mikolovozi ya vushuka vua viniu, kaha uacikumuisile kuli vandimi vamo, kaha uaile vungezi vuendi ha ntsimbu yalaha.

¹⁰ Omo ntsimbu ya kuteja vushuka yahete, uatumine ngamba uendi kuli vaje vandimi, muku katambulako mutambela uendi kuli vije vanateje. Vuno honi vaje vandimi vapupile uje ngamba, na kumuhiluisa mavoko voko.

¹¹ Kaha uje vavenia citungu uatumineko naua ngamba mukuavo, vuno honi vaje vandimi vamupupile na kumulinga mua mupi, kaha uamuhiluisile mavoko voko.

¹² Uatumineko naua ngamba uamu citatu, kaha vaje vandimi vamu vulumuine naua nakumumbila hambaza lia citungu.

¹³ Kaha honi vavenia citungu uahandekela nguendi, 'Njilinga vati? Njikatuma munange injazanga, hamo vaka musingimika!'

¹⁴ Vuno honi omo vandimi vamumuene, kaha valihandekesele hhakati kavo nguavo, 'Ou ikeye muna uje vavenia citungu. Ijeni tumutsihe, kaha tukafungulula vufuko vuendi!'

¹⁵ Nkuma, vamumbilile hambaza lia citungu, kaha vamutsihile." Yesu uavehuile nguendi, "Vika akalinga uje vavenia citungu kuli vaje vandimi?"

¹⁶ Akeja na kutsiha vaje vantu na kuhana cije citungu kuli vandimi veka." Kaha omo vantu vavuile evi, vahandekela nguavo, "Mua vusunga vene keti ngoco kuahi!"

¹⁷ Yesu uavatalele nakuvehula nguendi, “Visoneka vilumbunuka vika omo vihandeka nguavio, ‘Livue lije livavianene vaka kutunga ngue kuliesi na seho likelio vuavuno linapu liaseho kupulaka mavue oshe’?”

¹⁸ Kaha uoshe uje akauila ha livue lije akapokoka, vuno honi nga lije livue lika uila hali muntu umo, likamusaniuna.”

Cihula ca kufueta lisimo

(Mateu22:15-22; Mako12:13-17)

¹⁹ Kaha valongisi va mezi a Lishiko lia Mosesa na tusasendote vayonguele kukuata Yesu haje vene, omuo vatantekeyele nguavo cisimo eci nacetela vakevo, vuno honi vateuele vantu.

²⁰ Nankuma, vatatele ntsimbu ya cili. Kaha vahanene lizika kanua kuli vantu vamo valipuisse nge vaka vusunga, kaha va vatumine kuli Yesu linga vakamueseke na vihula linga vamuhane ku mavoko a Nguvulu ua Maloma.

²¹ Kaha vaje vavatumine vehuile Yesu nguavo, “Mulongisi tuatantekeya ngueto yove ukahandeka vusunga na kulongesa vusunga naua kuue kutala hali muntu cipue uapua ua vulemu, cipue keti ua vulemu vuno honi ntsimbu yoshe ukalongesa vantu vusunga muje muatondela Njambi vayoyemo.

²² Tuleke, nkuma Lishiko lietu litutavesa kufueta lisimo kuli Sezale indi kuahi?”

²³ Vuno honi Yesu uatantekeyela kuzangama kuavo, kaha uahandekela kuli vakevo nguendi,

²⁴ “Njimueseni mbongo ya siliva. Cihanga ceya na lizina lieya viliho?” Kaha vamukumbuluile nguavo “via Sezale!”

²⁵ Kaha Yesu uahandekela kuli vakevo nguendi, “Muacili, haneni kuli Sezale vije viapande kuli Sezale, kaha haneni kuli Njambi vije viapande kuli Njambi.”

²⁶ Kaha kuvasele kumu uanenaho mulonga ha mezi aua ku mesho a vantu. Valikomokelele ku kukumbulula cendi kaha vaholokele kuluu.

Cihula ca kusanguka ku vatsi

(Mateu22:23-33; Mako12:18-27)

²⁷ Kaha Vasanduki vamo, vaje vakulahela nguavo vantu kuvakasanguka ku vatsi, vezile kuli Yesu nakumuihula nguavo,

²⁸ “Mulongisi, Mosesa uatusonekelele Lishiko eli nguendi, ‘Nga yala atsa, kaha aseza mpuevo yendi vuno honi kesi na vana, kaha munaina ambate uje ntuluue linga vakase kukala na vana va uje natsi.’”

²⁹ Kuakele vamuanyaye vatanu na vavali, kaha uje uamukuluntu uambate mpuevo, uatsile kuakuhona vana.

³⁰ Kaha uje ua mucivali uambate uje mpuevo naua uatsile kuakuhona vana

³¹ kaha mucitatu naua. Cuma cimo cafuile mujevene kuli voshe vatanu na vavali, voshe vatsile kuakuhona vana.

³² Kaha kukumanusuila uje mpuevo uatsile.

³³ Nankuma, ha litangua lije omo vatsi vaka sanguka, uje mpuevo akapua ueya hhakati kavaje voshe vamuambate vatanu na vavali?”

³⁴ Yesu uavakumbuluile nguendi, “Vantu va lifuti lino vakambata na kushombuesa naua,

³⁵ vuno honi vampuevo na vamala vaje vapande kusanguka ku vatsi na kuyoya mu ntsimbu ije ikeja kulutue kuva kambata cipue kushomboka.

³⁶ Vakevo vakapua ngue tungelo kuvakasa naua kutsa omuo vanapu vana va Njambi, omuo vanasanguka kuvatsi.

³⁷ Mosesa nahana vukaleho linga vatsi vaka sanguka. Mu visoneka vije vihandeka via lifo liakele nakuuema Mosesa ahandeka hali Muene Njambi ikeye vene 'Njambi ya Avilahama, Njambi ya Isake, na Njamba ya Yakomba.'

³⁸ Ikeye uapua Njambi ua vaka kuyoya, keti ua vaka kutsa kuahi, omuo ku mesho a Njambi voshe vantu vendi vayoya."

³⁹ Kaha vamo valongisi va mezi a Lishiko lia Mosesa vahandekela nguavo, "Mulongisi, uakumbulula muacili!"

⁴⁰ Kuhuma ha ntsimbu ije kuvasele naua kuihula Yesu vihula vieka.

Cihula hali Kilistu

(Mateu22:23-33; Mako12:18-27)

⁴¹ Yesu uavehuile nguendi, "Vatihoni vali nakuhandeka nguavo, Kilistu akapua ua ku ntanga ya muene Ndaviti?"

⁴² Ndaviti vavenia nahandeka mu livulu lia miaso nguendi, 'Muene Njambi uahandekela kuli Muene uange nguendi, Tumama ku livoko liange lia cilio,

⁴³ noho njikapuisa vitozi vove ngue cituamo caku viliato viove.'

⁴⁴ Ndaviti ikeye vavenia uamutumbuile nguendi, 'Muene,' vatihoni Kilistu apua mutekulu lia Ndaviti?"

Yesu anangula linga vazangame kuli Valongisi va mezi a Lishiko lia Mosesa

(Mateu23:1-36; Mako12:38-40)

⁴⁵ Kaha omo civunga ca vantu vakele nakuvuilia, kaha Yesu uakele nakuhandeka kuli vandongisi vendi nguendi,

⁴⁶ "Zangameni kuli valongisi va mezi a Lishiko lia Mosesa, vaje vazanga kuenda na vikovel viavo via laha viandando na kutsetsela na kasingimiko mumihela yakulandesela na kuhangula vituamo viacili mu vinjivo via Njambi via malombelo na mihela ya vantu va vulemu ku viuano.

⁴⁷ Vakevo vakakuisi vantuluue na kuvevira vinjivo viavo, kaha vashueka vilinga viavo na malombelo alaha! Kaha nakuzangamesa kuavo kukapu kuakama cikuma!"

21

Mulambu ua ntuluue

(Mako12:41-44)

¹ Litangua limo omo Yesu uakele nakutalazeka, uamuene vaka kufuka vali nakuhana mulambu uavo mu njivo ya Njambi,

² kaha naua uamuene ntuluue umo ua cihutu uahanene tumbongo tuvali.

³ Kaha Yesu uahandekela nguendi, "Mua vusunga njimileka nguange, ou ntuluue ua cihutu nahana viavingi kupulakana voshe vaje vantu vakufuka,

⁴ njahandeka evi omuo veka vanakala nakulambuila via kusalaho ku vufuku vuavo, vuno honi ou mpuevo nalambuila vioshe vianakele navio via kulikuasa navio."

Yesu ahandeka ha kunonga kua Njivo ya Njambi

(Mateu24:1-2; Mako13:1-2)

⁵ Vamo va vandongisi va Yesu vakele nakuhandeka ha njivo ya Njambi, ha vucili vua mavue aje vaitungisile, na vuana vuje vakele nakuhana mukuivuahesa, kaha Yesu uahandekela nguendi,

⁶ "Maneni njimileke ha viuma vioshe evi munamono. Ntsimbu ikaheta omo vitozi veni vaka humisa livue lioshe lia njivo mu muhela uhalio, kaha mavue oshe a ka siuka."

Tuyando na Mapakeso

(Mateu24:3-14; Mako13:3-13)

⁷ Vandongisi va Yesu vamuihuile nguavo, “Mulongisi, muaka muka evi viuma vikalingika?” Na cimueso muka tukatantekeya naco ngueto ntsimbu inahete ya viuma vioshe evi vilingiue.

⁸ Yesu uahandekela kuli vakevo nguendi, “Zangameni keti vamikuisse. Vantu vavengi vakeja mu lizina liange na kuhandeka nguavo, ‘Yange vene ikeye!’ Kaha naua nguavo, ‘Ntsimbu inahete vuavuno!’ Vuno honi keti mukava kavangeye.

⁹ Omo mukevua vizita na kulitengulukila, keti mukateue, viuma evi vinapande kulingika tahi, vuno honi kuvilumbunuka nge kuhua kua mavu kunahete.”

¹⁰ Kaha Yesu uahandekela naua nguendi, “lifuti likalua nzita na lifuti likuavo, kaha vumuene vukalua na vumuene vukuavo.

¹¹ Kukala mandundumua, na njala yakama, na mishongo ya kuli-tambuisa kuoshe, kukakala viuma viakuteuesa na vitantekeyeso viaku komouesa vikahuminina muilu.

¹² Omo ntsimbu kanda viuma evi visholoke. Vakamikuata na kumiyandesa, vakamituala kuvi njivo via malombelo avo naku kamiyula naku mihaka mutumenga, kaha vakamituala ku vimiene naku vanguvulu mukunieseka omuo lizina liange.

¹³ Ikapua ntsimbu yacili kuli yeni ya kuambulula Muzimbu ua Cili.

¹⁴ Nankuma, vihakeni mu mitima yeni keti muvisinganiekeleye vualumo nguveni vika tukahandeka,

¹⁵ omuo njikamihana mana akutantekeya vije vimukahandeka linga vitozi veni kuvakasa kumihisa cipue kuviana vimukahandeka.

¹⁶ Cipue visemi vieni, na vamuano, na vavushoko veni na vavusamba veni vakamienda vungungu. Kaha vamo hhakati keni vaka vatsiha.

¹⁷ Kaha voshe vakamizinda omuo lizina liange.

¹⁸ Vuno honi cipue cinkambu cimo ca kumutue ueni ku cikazimbala.

¹⁹ Takameseni, kaha mukohiela miono yeni.

Yesu ahandeka ha kunonga kua Yelusalema

(Mateu24:15-21; Mako13:14-19)

²⁰ “Omo mukamona Yelusalema vana izengeleka ku civunga ca masualale, tantekeyeni nguveni kunonga kuayo kuli muyehi.

²¹ Nankuma, vaje vali mu Yundeya vapande kuteuela ku minkinda, kaha vaje vali mu mbonge vapande kuhumamo, kaha Vaje vali hambaza ya mbonge naku mehia vapande keti vakovelemo mu mbonge.

²² Aua akeuo matangua akuzangamesa, vivahandekela mu visoneka linga vilishulisise.

²³ Luvinda ku vampuevo vaje vakakala na mazimo na vampuevo vaje vaka jamuesa ha ntsimbu ije! Tuyando tuakama tukeja ha lifuti eli, na vukalu vua Njambi vukeja hali vantu ava.

²⁴ Kaha vamo vaka vatsiha na mukuale, kaha vakuavo vakavutuala ku vunzinda ku mafuti eka, kaha vaje keti Vayunda vaka pihisa Yelusalema noho ntsimbu yavo ikaheta.

Kuija kua Muna Muntu

(Mateu24:29-31; Mako13:24-27)

²⁵ “Kaha viuma via kukomouesa vikapangiua ku litangua naku ngonde naku vingongonosi. Vantu voshe vaha mavu vakevua liova lia kuohia kua mema a kalunga na kukuma kua mankimba kaha kuvakatantekeya vivakalinga.

²⁶ Vantu vaka lezimuka kuliova omo vakatatela vije vikasholoka hano ha mavu oshe, omuo viuma vioshe via muilu vikalininganga.

²⁷ Kaha vakamona Muna Muntu akeja mu mashuelua na nzili na vumpau vuakama.

²⁸ Omo viuma evi vikaputuka kupangia, katukeni nanzili na kutala kuilu, omuo kuohela kueni kuli hayehi.”

Cilongesa ca muti ua mukuyu
(Mateu24:32-35; Mako13:28-31)

²⁹ Kaha Yesu uavatelele cisimo eci nguendi, “Singaniekeni ha muti ua mukuyu na miti yeka yoshe.

³⁰ Omo mumona mafo auo aputuka kuzovelela, muapande kutantekeye ngueni ntondue ili muyehi.

³¹ Kaha mucifua aci vene, omo mukamona viuma evi vipangia mutantekeye ngueni vumuene vua Njambi vuli muyehi.

³² “Muavusunga njimileka, viuma vioshe evi vikipangia oku vantu voshe va ntsimbu ino vaciyoa.

³³ Melu na mavu vikahta, vuno honi mezi ange kuakahiti.

Muapande kutalelela

³⁴ “Zangameni! Keti mushoshomue cikuma mitima yeni ha ciuano viakulia na kunua na kulinenga ha viuma vije via lifuti. Nga muvilinga litangua lije lika miniangumuna ngue mukapiluka muheto.

³⁵ Litangua lije likeja ku vantu voshe vali hano ha mavu.

³⁶ Livuaheseleni na kulombela ntsimbu yoshe linga mukakale na nzili yakuhiana vioshe vije vikipangia na kuimana ku mesho a Muna Muntu.”

³⁷ Yesu uakale na kulongesa mu njivo ya Njambi ha matangua aje, kaha kuheta ku ntsimbu ya cinguezi, uakele nakuhumamo na kuya ku munkinda ua Oliveta kukakalako vutsiki vuoshe.

³⁸ Kucimenemene coshe vantu voshe vakele nakuya mu njivo ya Njambi na kumuivuilila.

22

Vutumbe vua kutsiha Yesu
(Mateu26:1-5; Mako14:1-2; Iuano11:45-53)

¹ Omo ntsimbu yahete kuyehi ya ciuano ca kulia mbola ya kuhona cimbaluila, civasana nguavo Ciuano ca Paseka.

² Kaha vakuluntu vatusasendote na valongisi va mezi a Lishiko lia Mosesa vatondele ngila ya vushueke ya kutsilamo Yesu omuo vakele na liova lia vantu.

Yundasa atava kuenda Yesu vungungu
(Mateu26:14-16; Mako14:10-11)

³ Kaha Satana uakovelele muli Yundasa ivasana Sakaliote, umo uavaje likumi na vavali ua vandongisi.

⁴ Kaha Yundasa uaille na kukahande kuli vakuluntu vatusasendote na vaka kuniunga Njivo ya Njambi, uavamuesela ngila yakuendela Yesu vungungu.

⁵ Kaha vakevo vavuahelelele cikuma, valitaivatumbuile nendi kumuhana vimbongo.

⁶ Yundasa uatavele, kaha uatalazekele ngila imo ya kuendelamo Yesu vungungu kua kuhona vantu kutantekeya.

*Yesu alivua hesela kulia kua ciuano ca Paseka
(Mateu 26:17-25; Mako 14:12-21; Iuano 13:21-30)*

⁷ Litangua liete ha ntsimbu ya ciuano ca mbolo ya kuhona cimbaluila, omo vatsihile vana va vampanga vakulia ha Ciuano a Paseka.

⁸ Yesu uatumine Petulu na Iuano nguendi “Yemuye muka vua hesese vualumo mutu kalila Ciuano ca Paseka.”

⁹ Kaha vamuihuile nguavo, “Kuli ku utonda linga tuka civuaheleseko?”

¹⁰ Kaha uavakumbuluile nguendi, “Omo mukakovela mu mbonge, muka uana muntu nambata njava ya kutekuila mema. Mukaveni noho akaheta mu njivo ya kakovela.

¹¹ Handekeni kuli vavenia njivo ngueni, ‘Mulongisi natutumu kukuihula nguendi, cilikuli cihela cituakulila yange na vandongisi vange Ciuano ca Paseka?’

¹² Kaha akamimuesa cihela cakama helu lia njivo, vanauvua hesa vualumo, kuje mukavua hesa viakulia.”

¹³ Kaha vaile vauanene viuma vioshe nge muavalekelele Yesu, vavua hesese viakulia via Ciuano ca Paseka.

Mesa ya Muene

(Mateu 26:26-30; Mako 14:22-26; 1 Kolinte 11:23-25)

¹⁴ Kaha omo ntsimbu ya hete Yesu uatumamene ku mesa hamo na tunganda vendi.

¹⁵ Kaha uahandekela kuli vakevo nguendi, “Njatondele cikuma kulia eci Ciuano ca Paseka hamo neni ntsimbu kanda njiyande,

¹⁶ omo njimileka nguange, kuhuma lelo kunjikacili naua kuvanga noho calishulisilila muacili mu Vumuene vua Njambi.”

¹⁷ Kaha Yesu uanonele hambanza ya viniu, kaha uahandekela kuli Njambi, na kuhandeka kuli vandongisi vendi nguendi, “Ambateni hambanza eyi mulishumuine hhakati keni.

¹⁸ Njimileka nguange, kuhuma lelo kunjikanu naua neni viniu kuvanga noho vumuene vua Njambi vuneja.”

¹⁹ Kaha uambate naua mbolo uakandelele kuli Njambi, kaha uaitavuile uava haneneyo nguendi, “Ei inapu muvila uange uvanahana ha yeni. Lingelingeni eci mukunjivuluka yange.”

²⁰ Omo vamanesele kulia uambate kambanza uahandekela nguendi, “Eyi kambanza inapu litavasano lihaliha lia Njambi livanakutu na maninga ange aje ahitikila hali yeni.

²¹ “Vuno honi taleni! Ou anjenda vungungu hali hamo nange kuno ku mesa!

²² Muna Muntu akatsa nge muje muasinganiekelele Njambi, vuno honi tuyando tuendi uje akamuenda vungungu!”

²³ Kaha vandongisi vendi vapatukile kulihozola hhakati kavo nguavo, iya honi akalinga cuma eci.

Vimpata hali uje napu uakama kupulakana

²⁴ Kaha kuapatukile vimpata hhakati ka vandongisi va Yesu nguavo, iya umo hhakati kavo napu uakama kupulakana.

²⁵ Kaha Yesu uandekela kuli vakevo nguendi, “Vamiene va vaje keti Vayunda vali na nzili ha vantu vavo. Kaha vaje vaka kushika vavatumbola vakuasi va vantu.”

²⁶ Vuno honi ei keti ikeyo ngila hhakati keni, vuno honi uoshe uje uakama hhakati keni napande kupua uamundende, kaha ntuama yeni napande kupua ngue ngamba.

²⁷ Iya uakama kupulakana? Uje natumama kukulia cipue uje hamuhana viakulia? Nguetu uje natumama kukulia ikeye uakama ndi? Vuno honi yange njili hakati keni nguange muka kuhana viakulia.

²⁸ Yeni munakala nange mu tuyando tuange tuoshe.

²⁹ Nge mua nanjihanena Tate nzili ya kuyula, neni naua njikamihana nzili yakuyula.

³⁰ Linga yeni mukalie na kunua mu vumuene vuange, kaha mukatu-mama ku vituamo vua vumuene na kuyula miyati likumi na ivali ya Isaleli.

*Yesu ahandeka nge Petulu akamuviana
(Mateu26:31-35; Mako14:27-31; Iuano13:36-38)*

³¹ Simoni, Simoni! Ivuilila, Satana atonda linga amieseke yeni mu vavoshe, ku hangununa vacili ku vavapi nge muka kulima muaka hangununa tiliku ku mujungu.

³² Vuno honi yange njakulombelela linga lutsilielo luove keti luhue. Kaha omo ukatenguluka na kuhiluka kuli yange, unapande kukolesa vumuanoko.

³³ Kaha Simoni Petulu uamukumbuluile nguendi, "Muene, njalivuahesela laja kuya mu kamenga nove na kukatsa nove!"

³⁴ Kaha Yesu uamukumbuluile nguendi, "Muavusunga, Petulu" njikuleka nguange, "vutsiki vuno vene kanda ndemba atambeke, ukanjiviana lutatu."

Cikuama, Ngonga na Mukuale

³⁵ Yesu uehuile vandongisi vendi nguendi, "Muje njamitumine cakuhona cikuama, ngonga cipue vinkaku muahonoueleko cuma cimo ndi?"

Kaha vamukumbuluile nguavo, "houe!"

³⁶ Kaha Yesu uahandekele kuli vakevo nguendi, "Vuno honi" ntsimbu ino, "Ou hali na cikuama cipue ngonga napande kuambata, kaha uoshe nahonoua mukuale napande kulandesa kazaku kendi alande mukuale.

³⁷ Muomu vanacisoneka nguavo, 'Vamutandelele kumo na vaka kushaula Lishiko.' Kaha njimileka nguange eci cinapande kulishulisisa hali yange. Eyo vioshe vije vivanasoneka hali yange vili nakulishulisisa."

³⁸ Kaha vandongisi vahandekele nguavo, "Muene tala! Kuli mikuale ivali ei!"

Kaha uavakumbuluile nguendi, "Mukemo vene!"

*Yesu Alombela ha munkinda ua Oliveta
(Mateu26:36-46; Mako14:32-42)*

³⁹ Kaha Yesu uahumine mu mbonge, kaha uaile ku munkinda ua Oliveta nge muakele nakulingilamo. Kaha vandongisi vendi vamukavele.

⁴⁰ Omo uahete kuje uavalekele nguendi, "Lombeleni linga keti mukovele muvieseko."

⁴¹ Kaha uahumine kavundende kuli vakevo kaha uatsikamene na kulombela,

⁴² nguendi, "Tate nga mutonda hambanza eyi ya tuyando ihite kulahako nange. Ketu nge ku cizango cange kuahi, vuno honi cizango cove cilingiue.

⁴³ Kangelo uahumine kuilu uasholokele kuli ikeye na kumusimpisa.

⁴⁴ Omuo ha tuyando tuakama ua lombelele cikuma, kaha ntuima yendi yapuile ngue mambase a maninga anduekelele ha mavu."

⁴⁵ Kaha omo uakatukile kuhuma ku kulombela, uaile kuli vandongisi vendi uavauanene vanakosa tulo, omuo vazeyele na vusua.

⁴⁶ Kaha uahandekele kuli vakevo nguendi, "Vikahoni muakosela? Hin-dukeni mu lombele, linga keti mukovela muvieseko."

Yesu vamukuata

(Mateu26:47-56; Mako14:43-50; Iuano18:3-11)

⁴⁷ Kaha te Yesu uakele nakuhandeka navo, hajevene civunga ca vantu cahete. Yundasa Sakaliote uje uava likumi na vavali uatuamene kulutue luovo. Kaha uashuenene kuli Yesu na kumuntsuimba.

⁴⁸ Kaha Yesu uahandekela kuli ikeye nguendi, "Yundasa nkumani yove uenda Muna Muntu vungungu na kumutsuimba ndi?"

⁴⁹ Kaha omo vandongisi vaje vakele hamo na Yesu vamuene vije via-pangikile vahandekela nguavo, "Muene tulikuasese mikuale ndi?"

⁵⁰ Kaha umu ua vandongisi va Yesu uavatuile lituitui lia ngamba ua kasasendote uakama.

⁵¹ Vuno honi Yesu uamu vianesele nguendi, "Ecela" kaha uakuate lituitui lia uje yala nakulihiluisilako naua.

⁵² Kaha Yesu uahandekela kuli vaje vakuluntu va tusasendote na vamo vakuluntu va vaka kuniunga njivo ya Njambi na vakuluntu vaje vezile na kumukuata nguendi, "Nkumani muneja namikuale na vimbueti ngue njimuizi ndi?"

⁵³ Njinakele neni mu njivo ya Njambi ha matangua oshe vikahoni kumuanjikuate. Vuno honi eyi ikeyo ntsimbu yeni yakuipanga, omo nzili ya milima ili nakuhiana."

Petulu aviana Yesu

(Mateu26:57-58;69;75; Mako14:53;54;66;72; Iuano18:12-18;25-27)

⁵⁴ Vakuate Yesu kaha vamutualele ku njivo ya Kasasendote uakama, kaha Petulu uamukavele munima uakele kulahako.

⁵⁵ Vamo vavukele tuhia mukati ka cipango vatumamene nakuota, kaha Petulu uatumamene navo.

⁵⁶ Omo ngamba umu uampuevo uamuene Petulu natumama kuje ku tuhia, uamutalele ntoma, kaha uahandekela nguendi, "Yala ou naua uakele hamo na Yesu."

⁵⁷ Vuno honi Petulu uavianene nguendi, "Yove mpuevo yange kunjimu-tantekeya!"

⁵⁸ Kaha omo kuahitile ka ntsimbu kakandende, yala ueka naua uamuene Petulu, kaha uahandekela nguendi, "Nove naua ua umo vendi" Vuno honi Petulu uamukumbuluile nguendi, "Yala, kuahi, keti yange!"

⁵⁹ Omo kuahitile ola lika, kaha yala mukuavo naua uahandekela nanzili nguendi, "Ou yala cilivene uakele hamo na Yesu, nendi naua Kangalileya!"

⁶⁰ Vuno honi Petulu uamukumbuluile nguendi, "Yove yala yange kunjita-tantekeya evi ulinakuhandeka!"

Hajevene te acili nakuhandeka kaha ndemba uatambekele.

⁶¹ Kaha Yesu uatengulukile uatalele kuli Petulu, kaha Petulu uavulukile vije via mulekele Yesu nguendi, "Ntsimbu kanda ndemba atambenge vutsiki vunovene ukanjiviana lutatu"

⁶² Kaha Petulu uatuhukile hambanza na kulila cikuma.

Yesu Vamushendumuna na Kumupupa

(Mateu26:67-68; Mako14:65)

⁶³ Vamala vaje vaniungile Yesu vamushendumuine na kumupupa.

⁶⁴ Vamukitile tanga ha mesho, kaha vahandekela kuli ikeye nguavo, "Nga ukananguizi, tuleke! Iya na kupupu?"

⁶⁵ Vahandekela viuma viavingi via kumushaula.

Vasompesa Yesu ku mesho a mpunga

(Mateu26:59-66; Mako14:55-64; Iuano18:19-24)

⁶⁶ Kaha omo kuacele vakuluntu voshe va vantu valiuanene hamolika. Vakuluntu va tusasendote, na valongisi va mezi a Lishiko lia Mosesa voshe kuvakele, kaha vanehele Yesu ku mpunga yavo.

⁶⁷ Kaha vamuihuile nguavo, “Tuleke, yove Kilistu ndi?”

Kaha Yesu uavakumbuluile nguendi, “Cipue nga njimileka nguange yange, kumukanjikulahela.”

⁶⁸ Kaha naua nga njimihula cihula, kumukasa kunjitava.

⁶⁹ Vuno honi hume lelo nakutuala kulutue Muna Muntu akatumama ku livoko lia cilio lia Njambi muka nzili yoshe.

⁷⁰ Kaha voshe vamuihuile nguavo, “Nkuma yove u Muna Njambi ndi?”

Ikeye uavakumbuluile nguendi, “Mumu nahandeka mukemo vene.”

⁷¹ Kaha vahandekela nguavo, “Vikahoni tutondela naua vukaleho vueka? Yetu vavenia tualivuila laja muanacihandeka.”

23

Yesu vamutuala kuli Nguvulu Pilato

(Mateu27:1-2;11-14; Mako15:1-5; Iuano18:28-38)

¹ Kaha mpunga yoshe yakatukile na kutuala Yesu kuli Nguvulu Pilato.

² Kaha vaputukile kumuvangya nguavo, “Tuauana ou yala aleka vantu vetu linga valuisse Fulumende yetu, alina kuvavindika kufueta lisimu kuli Sezale na kulihandeka ikeye vavenia nguendi ikeye Kilistu Muene uetu.”

³ Kaha Pilato uamuhulisile nguendi, “Yove Muene ua Vayunda ndi?” Yesu uamukumbuluile nguendi, “Munahandeka mukemo vene.”

⁴ Kaha Pilato uahandekela ku tusasendote vakama na civunga nguendi, “Yange kunjauanene mulonga kuli ou muntu.”

⁵ Vuno honi vakevo vahandekela na nzili nguavo, “Ikeye alinakulinga mpindakano ku vantu na vilongesa viendi linga valuisse Yundeya yoshe. Uaputukilile mu Ngalileya, kaha hano vene nejakuno.”

Yesu vamutuala kuli Muene Helonde

⁶ Omo Nguvulu Pilato uevuile eci, kaha uevuile nguendi, “Nkuma ou yala ka Ngalileya ndi?”

⁷ Omo Pilato uatantekeyele nge Yesu uahumine ku nganda ije yakele nakuyula Muene Helonde naua mukemo muakele, kaha uamutumine kuli Muene Helonde, uje uakele mu Yelusalema ha ntsimbu ije.

⁸ Muene Helonde uavuahelele cikuma omo uamuene Yesu, omuo uovuile viendi na laja uakele nakutondela cikuma kumumona. Uakele nalishungu lia kumona Yesu alinga vakomouesa.

⁹ Kaha Muene Helonde uevuile Yesu vihula viavingi, vuno honi Yesu katavele cipue lizi limo.

¹⁰ Kaha vakuluntu va tusasendote na valongisi va mezi a Lishiko lia Mosesa vaile kulutue nakuvangya Yesu muakama.

¹¹ Kaha Muene Helonde na masualale vendi vamushendumuine naku mupanga mua mupi, kaha vamuzikile mukanjo uandando, kaha Helonde vamuhulisile kuli Pilato.

¹² Kaha ha litangua lije vene Helonde na Pilato valikuate vusamba, te kanda lievi vapuile muntu na citozi cendi.

Yesu vamusompela kutsa

(Mateu27:15-26; Mako15:6-15; Iuano18:39; Iuano19:16)

¹³ Pilato uasanene hamo vakuluntu va tusasendote na vantuaama na vantu,

¹⁴ Kaha uahandekela kuli vakevo nguendi, “Muanehe ou yala kuli yange na kuhandeka nguendi alinakulekesa vantu linga valuisse Fulumende. Ivuilileni, yange njamuihuile ku mesho eni, kaha kunjauanene mulonga ua cuma cimo cacipi cimunamuvangeya.

¹⁵ Cipue Helonde kauanene mulonga muli ikeye mukemo namuhiluia kuli yetu. Ou yala kukuesi cuma canalangi linga va muuaneneho mulonga ua kutsa.

¹⁶ Njikamupupa lika kaha njikamuecela linga aye.”

¹⁷ Kuakele cilika cavo cije Pilato uatondele kuhumisila vantu cinzinda umo mu kamenga uje ivatondele ha ntsimbu ya Ciuano ca Paseka.

¹⁸ Kaha civunga coshe ca vantu ca tambakanene nguavo, “mutsihe!” Tuzituile Mbalambasa.

¹⁹ (Mbalambasa vamuhakele mu kamenga omuo uakele nakuluisa Fulu-kunde mu mbonge na kuntsiha vantu.)

²⁰ Vuno honi Pilato uatondele kuecela Yesu, kaha uahandekela naua ku civunga.

²¹ Vuno honi vakele nakutambeka nguavo, “Mushukike ha cilindakano! Mushukike ha cilindakano!”

²² Kaha Pilato uahandekela naua lua mucitatu nguendi, “Vupi muka vuanapanga? Yange kunjauanene cuma cimo ca kumutshila! Njimupupa lika na kumuecela aye.”

²³ Vuno honi vantu vatualeleleho kutambeka nguavo Yesu vamushukike ha cilindakano, kaha hakutambeka nguavo uavahaneneye.

²⁴ Nankuma, Pilato uatete cije cimpande, ngue muvalombeke vakevo.

²⁵ Kaha Pilato uecelele Mbalambasa muntu ivatondele, uje uakele mu kamenga ha mulonga ua kuluisa Fulumende na kutsiha vantu. Kaha uavahanene Yesu linga vamulinge muje muvatondelele vavenia.

Yesu va mushukika ha cilindakano

(Mateu27:32-44; Mako15:21-32; Iuano19:17-27)

²⁶ Kaha masualale vatualele Yesu mukumushukika te vali nakuya vali-uanene na yala umo ua lizina lia Simoni uaku Silene, uje uezile mu mbonge kuhuma ku mehia. Kaha vamukuate nakumutuika cilindakano ca Yesu kaha vamulekele linga akave Yesu munima.

²⁷ Civunga cakama ca vantu ca mukavele, hhakati kavo hakele vampuevo vaje vakele nakulilila ikeye cikuma.

²⁸ Yesu uatengulukile kuli vakevo nakuhandeka nguendi, “Yeni vampuevo vamu Yelusalema! Keti mulile yange vuno honi lilileni yeni vavenia na vana veni.

²⁹ Kaha matangua alina kuija omo vantu vakahandeka nguavo, ‘Vanakuisuliua vaje vantsimpi, vaje kuvasemene tukeke na vaje kuvalelele.’

³⁰ Ikapua ntsimbu ije vantu vakahandeka ku minkinda nguavo, ‘Tuuileni! Naku malundu nguavo, tufuikeni!’

³¹ Nga valinga viuma evi ku muti uakutontola, kaha honi cikafua vati ku muti uakuma?”

³² Kaha naua kuakele mihuza vavali va vamala vavatualele hamo na Yesu na kuvashukika.

³³ Omo vahete kumuhela vatumbuile nguavo, “Cikola,” kaha vashukikile Yesu ha cilindakano na vaje mihuza vavali umo ku livoko lia cilio mukuavo ku livoko lia cimoshue.

³⁴ Yesu uahandekela nguendi, “Tate vakonekele! Omuo kuvatantekeya cije civali nakulinga.” Kaha masualale valipangezelele vuzalo vuendi na kuta nkela.

³⁵ Kaha vantu vemanene kuje nakutalela te vantuama va Vayunda vamushendumuine nguavo, "Uovuele vakuavo, nendi aliovole ikeye vavenia nga ikeye Kilistu uje ya nahangula Njambi!"

³⁶ Kaha masualale vamushendumuine naua vezile hayehi kuli ikeye vamuhanene viniu via kushasha.

³⁷ Vahandekele kuli ikeye nguavo, "Liovole yove vavenia nga u Muene ua Vayunda!"

³⁸ Helu lia cilindakano cendi hakele mezi aua nguavo, "Ou ikeye Muene ua Vayunda."

³⁹ Kaha muhuza umo ivamushukikile hamo nendi uahandekele lizi lia kumushaula nguendi, "Nkumani keti yove Kilistu ndi? Liovole yove vavenia netu naua utuovolo!"

⁴⁰ Kaha uje mukuavo muhuza uamutenukilile nguendi, "Nkuma yove kuuteue Njambi ndi? Yove unambata cihiso ngue ikeye.

⁴¹ Cihiso cetu cinatupande, omuo tunambata fueto ya vilinga vuetu, vuno honi yala ou kesi na vupi."

⁴² Kaha uahandekele kuli Yesu nguendi, "Yesu njivuluke omo ukeja mu vumuene vuove."

⁴³ Yesu uamukumbuluile nguendi, "Mua vusunga njikuleka nguange lelo vene ukakala hamo nange mu vumuene vua mulu."

Kutsa ca Yesu

(Mateu27:45-56; Mako15:33-41; Iuano19:28-30)

⁴⁴ Omo ntsimbu yapuile hhakati ka litangua, kaha litangua liazivalele kuakekele milima mu lifuti lioshe ije yakeleko noho ha ola ya citatu ya cinguezi.

⁴⁵ Kaha ntanga ije yakele mu njivo ya Njambi yatavukile hhakati kuhuma kuilu na mavu.

⁴⁶ Kaha Yesu uatambekele na lizi liakama nguendi, "Tate! Njihaka muono uange mu mavoko ove." Hanima yakuhandeka mezi aua uatsile.

⁴⁷ Omo mukuluntu ua masualale uamuene vije via lingiule, ualemelese Njambi nakuhandeka nguendi, "Mua vusunga yala ou uapuile muka vusunga."

⁴⁸ Omo vantu vaje vakungulukilile kuje ku muhela vamuene viuma vije valingiule, kaha vahilukile ku vinjivo viavo vali pupangele ha vintulo viavo mu vusiua.

⁴⁹ Kaha voshe vaje vatantekeyele Yesu ha mutuntu uendi hamo na vampuevo vaje vamukavele kuhuma ku Ngallileya vemanenene kulahako nakutala viuma evi.

Vatsinda Yesu

(Mateu27:57-61; Mako15:42-47; Iuano19:38-42)

⁵⁰ Kuakele yala uamu lizina liendi Yosefa uaku mbonge ya Alamatiya mu nganda ya Yunda. Uapuile yala uacili ua kasingimiko,

⁵¹ uje uakele nakutalelela kuija kua vumuene vua Njambi. Cipue vene uapuile umo uamu mpunga, katavele ku vutumbe vuavo vua kuluisa Yesu na vilinga viavo.

⁵² Uaile kuli Pilato nakulomba muvila ua Yesu.

⁵³ Uahumisile muvila ua Yesu ha cilindakano, kaha uauzengelele ha ntanga ya liniu, kaha ualangekele muvila ua Yesu mu cihilo cije civa cokuele mu livue lije kanda vantsindemo muntu kuyehi na munkinda uauundene.

⁵⁴ Liapuile litangua lia mucitanu cinguezi omo litangua lia Sapalalo kanda lihete.

⁵⁵ Vampuevo vaje vakavele Yesu kuhuma ku Ngalileya vaile hamo na Yosefa, vakamuene cihilo cije na kumona muje muvalangekelelemo muvila ua Yesu.

⁵⁶ Kaha vaile ku vinjivo viavo nakukavuahesa mukundu na mazi aluengo luacili linga vaka vuahese muvila ua Yesu. Kaha ha litangua lia Sapalalo vahuimine kuya ku Lishiko lia Mosesa.

24

Kusanguka kua Yesu

(Mateu28:1-10; Mako16:1-8; Iuano20:1-10)

¹ Omo kuacele lia calumingo vampuevo vaile ku cihilo, vambate mazi avavuahelele.

² Kaha vauanene livue liakama vana lihumisa ku cikolo ca cihilo.

³ Kaha vakovelelemo vuno honi kuuanenemo muvila ua Muene Yesu.

⁴ Vemanene kuje te valikomokela, kaha hajevene kuasholokele vamala vavali mu vuzalo vuakuviakuma kuli vakevo.

⁵ Vaje vampuevo vovuile liova cikuma kaha vakotamene ha mavu, vaje vamala vavehuile nguavo, "Vika mutondela muka muono ku vantsi?"

⁶ Uahiko kuno nasanguka laja. Vulukeni muje muahandekela kuli yeni tele ali ku Ngalileya.

⁷ 'Muna Muntu vaka muhana mu mavako a vantu vavupi, kaha vaka mushukika, a kasanguka hanima ya matangua atatu.' "

⁸ Kaha vampuevo vavulukile mezi endi.

⁹ Kaha vahumine kuje ku cihilo vakalekele viuma vioshe vivamuene kuli vaje likumi na umo lia vandongisi na vakuavo voshe.

¹⁰ Vaje vampuevo vapuile Maliya Mangandalena, na Njuana, na Maliya vaina ya Yakomba na vampuevo vakuavo valekele evi viuma kuli tunganda va Yesu.

¹¹ Vuno honi tunganda vasinganiekele nge vije vivahandekela vampuevo keti viaseho kaha kuva vakulahelele.

¹² Vuno honi Petulu uakatukile na kushatukila ku cihilo, uakotamenenemo kaha uamuenemo lika vintanga na ceka cahi. Kaha uahilukile kuimbo na kulikomokela ha viuma vije via lingiule.

Kuenda kuya kulimbo lia Emausi

(Mako16:12-13)

¹³ Ha litangua lijevane vandongisi vavali va Yesu vendele kuya ku limbo lije liivatumbuile nguavo Emausi, ntunda yakele matambo likumi na imo kuhuma ku Yelusalema.

¹⁴ Vakele nakuhandeka ha viuma vioshe vije vialingiule.

¹⁵ Tele vacili nakuhandeka na kuliyongola, Yesu uezile hayehi navo nakuenda navo.

¹⁶ Vamumuene vuno honi kuvamutantekeyele.

¹⁷ Yesu uahandekela kuli vakevo nguendi, "Vimpande muka muli nakuhandeka oku muenda?" Vemanene kaha vihanga viavo viasolokele mu vusiua.

¹⁸ Kaha umo uavo lizina liendi Kolopase, uamukumbuile nguendi, "Yove lika mungezi muno mu Yelusalema uje katantekeya vinapangika ha matangua ano."

¹⁹ Kaha uavehuile nguendi, "Viuma muka?"

Vamutavele nguavo, "Via Yesu uaku Nazaleta. Yala ou uapuile kananguizi ka Njambi na vantu voshe vamutavele kupua muka nzili mu viuma vioshe uahandekela na vije via lingile na Njambi uamu kulahalelele.

²⁰ Kaha tusasendote vakama na vakakuyula vamuhanene kuli Nguvulu ua Maloma linga vamutsihe, kaha vamushukikile ha cilindakano.

²¹ Tuakele na likulahelo ngueta ikeye akapatula Isaleli! Kaha lelo linapu litangua lia mucitatu kuhuma haje vialingiuile viuma evi.

²² Vampuevo vamo hhakati ketu vatukomokesele, vamenekesele ku cihilo cimenemene,

²³ vuno honi kuvakauanene muvula uendi. Kaha vahilukile nguavo vakamuene cimona ca tungelo vaje vavalekele nguavo hali nakuyoya.

²⁴ Kaha vamo hakati ketu vaileko ku cihilo, kaha vakauanene nge muje muvahanekesele vaje vampuevo, vuno honi kuvamumuene."

²⁵ Kaha Yesu uahandekesele kuli vakevo nguendi, "Yeni vilema, vaka kusimbula kutsiliela vije vioshe vivahandekesele tunanguizi va Njambi va Njambi!

²⁶ Nkumani Kilistu kapande kuyanda ha viuma evi nakukovela mu vumpau vuendi ndi?"

²⁷ Kaha Yesu uaputukile kuvalumbuina vioshe viuma vije vahandekesele mu visoneka hali ikeye, kuputuka na mavulu a Mosesa na kutuala ku visoneka via tunanguizi va Njambi va Njambi vosh.

²⁸ Kaha omo vahete kuyehi na limbo kuje vakele nakuya, Yesu ualingile ngue atuvakana kamandende kuya kulutue,

²⁹ Vuno honi vamulombele na kuhandeka nguavo, "Tumama netu omuo cinguezi na litangua liatoko." Kaha uaile na kukala navo.

³⁰ Uatumamene navo mukulia kaha uambatele mbolo naku ikuisula uaipazuile na kuvahana.

³¹ Kaha mesho avo ashokolokele vatantekeyele nguavo nkumani ikeye, vuno honi ualavukile ku mesho avo.

³² Kaha valihandekesele umo na mukuavo nguavo, "Nkumani mukemo mitima yetu yovuile kuvuahela cikuma omo uakele nakuhandeka netu mu ngila na kutulumbunuina viuma viumu visoneka."

³³ Vakutukile ba ntsimbu ijevane vahilukile ku Yelusalema, vauanene vandongisi likumi na umo vanalikungulula na vaje vakuavo veka naua.

³⁴ Vahandekesele nguavo, "Mua vusunga vene Muene Yesu nasanguka! Nalisholola kuli Simoni!"

³⁵ Kaha vaje vavali vambuluile vije vialingiuile mu ngila, nomu vatan-tekeyele nguavo nkuma ikeye Muene Yesu omo uatavuile mbolo.

Yesu alisholola kuli vandongisi vendi

(Mateu28:16-20; Mako16:14-18; Iuano20:19-23; Vilinga1:6-8)

³⁶ Tele ntsimbu vaje vavali vakele nakuvaleka viuma evi, vuasi vuasi Yesu vavenia uemanene hakati kavo uahandekesele nguendi, "Ciyulo cikale neni."

³⁷ Kaha vovuile liova cikuma, omuo vasikaniekele nguavo vanamono ndumba ya muntu.

³⁸ Vuno honi uahandekesele kuli vakevo nguendi, "Vikahoni munalijujuk-ila? Omo vika muli na vimpata mu mitima yeni?"

³⁹ Taleni mavoko ange na mu viliato viange. Taleni yange vene. Njikuateni, kaha mutantekeya omuo nduma ya muntu kakele na ntsitu na vitsiha ngue evi muomono njili navio."

⁴⁰ Uahandekesele evi na kuvamuesa mavoko na viliato viendi.

⁴¹ Cipue ngoco kuva kulahela omuo vavuahelele cikuma na ku-likomokela kaha Yesu uavehuile nguendi, "Muli na viakulia linga njilie ndi?"

⁴² Kaha vamuhanene mbazuvuila ya intsi uakuoca.

⁴³ Kaha uaitambuile na kulia ha mesho avo.

⁴⁴ Kaha uahandekela kuli vakevo nguendi, “Evi vikevio viuma vije njamilekele omo njakele neni nguange viuma viose vije vasonekele hali yange mu Lishiko lia Mosesa, na visoneka via tunanguizi va Njambi va Njambi na mu miaso viapande kulishulisisa.”

⁴⁵ Kaha uashokoluele mana avo linga vovuisise visoneka

⁴⁶ na kuhandeka kuli vakevo nguendi, “Visoneka viahandeka nguavio, Kilistu napande kuyanda kaha akasanguka hanimu ya matangua afatu.”

⁴⁷ Visoneka viahandeka naua nguavio linga kualuluka na lukonekelo lua vipi vaka viambulula mu lizina liendi ku mafuti oshe, kuputukila mu Yelusalema.

⁴⁸ Yeni munapu muvakaleho ha viuma evi.

⁴⁹ Kaha yange njikatuma Cimbembesi Cakulele kuli yeni cije cakulahesele Tate. Muapande kuvandamena mu mbonge noho mukatambula nzili ei kuhuminina muilu.

Yesu vamutuala muilu

(Mako16:19-20; Vilinga1:9-11)

⁵⁰ Kaha uahumine navo mu mbonge uavatualele kuyehi na Mbeteniya kuje uajunduile mavoko endi naku vakuisula.

⁵¹ Tele hali nakuvakuisula, ualisezele navo nakumutuala muilu.

⁵² Vamushangazalele kaha vahilukile mu Yelusalema na kuvuahela cikuma.

⁵³ Kaha vakele ntsimbu yoshe mu njivo ya Njambi na kusantsela Njambi.

Muzimbu Uacili uasonekele IUANO Citsindikisi

Muzimbu ua Iuano unapu umo ua mavulu auana amu Litavasano Lialiha uje ulumbununa vuyoye vua Yesu Kilistu. Limo ku limo lia mavulu aua vaka atumbula nguavo “Muzimbu.” uje ulumbununa “muzimbu uacili.” Va asonekele hanima ya kutsa ca Yesu kuli Mateu, Luka na Iuano. Muzimbu ua Iuano cilivene vauseonekele kuli Kanganda Iuano ha miaka ya makumi atanu na iuana (90) AD. Cipuevene nguavo eli livulu kulimuesa ngeci Iuano ikeye ualisonekele, vuno honi kusoneka calio cinalifu cikuma ngue kusoneka ca mikanda ya Iuano uakulivanga, na Iuano uamucivali na Iuano uamucitatu. Vamo vaje vaka kusoneka valaja vahandeka nguavo Iuano uakele nakukala mu nganda ya Efeso ha ntsimbu ije, nankuma cilivene cimuesa ngeci eli livulu valisonekelele mu Efeso.

Iuano cilivene ahandeka vika viasonekelele eli livulu, ualisonekelele kukuasa vantu linga vatsilieles ngeci Yesu ikeye Kilistu, Muna Njambi Ukuyoya (20:31). Ha kutsilieles eci, kaha tukakala na muono mu lizina liendi. Eli livulu valisonekelele ku voshe, Vayunda na vaje keti Vayunda. Muzimbu ua Iuano kuvimo unalisez ku mizimbu ikuavo itatu. Ikeye uatalele cikuma kusoneka ha vikomoueso vije vialingile Yesu kaha kasonekele cikuma ha visimo viendi. Vilinga vimo via seho viakulifua ngue kumbuitika ca Yesu, na vieseko vije via mu mpambo viose evi kuvavisonenekele mu muzimbu ou.

Muvanautumbikilamo:

1. Iuano aputuka muzimbu mu kapetulu (1:1-18).
2. Ambahoni uasonekele viavingi ha vikomoueso vije Yesu ualingile mu kapetulu (1:19; 12:50).
3. Cakuhatako, ualumbunuine vilinga viavingi via vuyoye vua Yesu vije viamutualele ku kutsa naku kusanguka cendi mu kapetulu (13:1; 20:31).
4. Iuano amanusula muzimbu mu kapetulu 21, muje ahandeka ntsimbu imo Yesu uasholokele ku vantu munima yakusanguka ku vatsi kaha naua uahandekela vika vije viasonekelele livulu eli.

Lizi lia litenguluile kupua Muntu

¹ Hambangelo kuakele Lizi, kaha Lizi liakele hamo na Njambi, kaha Lizi liapuile vene Njambi.

² Hume hambangelo, lizi liakele hamo na Njambi.

³ Muli ikeye Njambi uatangele viuma viose, kukuesi cuma civatangele kuakuhona ikeye.

⁴ Muli ikeye muakele muono, kaha muono uapuile ceke ca vantu voshe.

⁵ Ceke catuile mu milima, kaha na milima kuyasele kucihiana.

⁶ Kuakele yala ivatumine kuli Njambi, lizina liendi liapuile Iuano.

⁷ Uezile ngue mukaleho, mukuhandeka vukaleho vua ceke, linga voshe vatsilieles kuhitila muli ikeye.

⁸ Ikeye kapuile ceke, vuno honi uezile nakuambulula vukaleho vua ceke.

⁹ Ceke ca vusunga cije cikatuila hali muntu uoshe cezile ha mavu.

¹⁰ Lizi liakele ha mavu, kaha na mavu va atangele kuhitila muli ikeye, vuno honi cipue ngoco vene mavu ka amutantekeyele.

¹¹ Uezile ku lifuti liendi, vuno honi vantu vendi kuvamutambuile.

¹² Vuno honi kuli voshe vaje vambutambuile, vaje vatsilielele mu lizina liendi, uavahanene nzili yakupua vana va Njambi,

¹³ vaje vasemukile keti ku maninga cipue ku mashungu a yala, cipue ku cizango ca kusemuka ku yala, vuno honi Njambi ikeye vavenia uapuile Ishavo.

¹⁴ Kaha lizi lihimpukile muntu nakukala hhakati ketu, uashulile na kavumbi na vusunga, tunamono vumpau vuendi, vumpau vuje hakupua Muana umolika ua Ishe.

¹⁵ Iuano uahandekela vukaleho hali ikeye nakutambeka nguendi, "Ou ikeye uje injahandekela nguange, 'Ou eja munima yange napu uakama kupulakana yange, omuo ikeye uakeleko te kanda yange!'"

¹⁶ Hakushula cendi, yetu voshe tunatambula kavumbi ha kavumbi.

¹⁷ Omuo lishiko cilivene valihanene kuhitila muli Mosesa, vuno honi kavumbi na vusunga viezile kuhitila muli Yesu Kilistu.

¹⁸ Naumo uahi uamonaho Njambi, kuvanga lika Muana uje umolika, uje ali kuyehi na mutima ua Ishe, uje ikeye namutantekeyesa.

*Vukaleho vua Iuano Muka Kumbuitika
(Mateu3:1-12; Mako1:1-8; Luka3:1-18)*

¹⁹ Ovu vukeyo vukaleho vuahanene Iuano omo Vayunda vatumine tusasendote na Valevi kuhuma ku Yelusalema mukumuihula nguavo, "Yove iya?"

²⁰ Iuano uahandekela vukaleho, kavianene kuvakumbulula, vuno honi uahandekela kuli vakevo nguendi, "Keti yange Kilistu.*"

²¹ Vamuhuile nguavo, "Honi yove iya? Yove Eliya ndi?"

Vuno honi Iuano uavakumbuluile nguendi, "Houe, keti yange!"

Vamuhuile naua nguavo, "Yove kananguizi ua Njambi ndi?"

Iuano uavakumbuluile nguendi, "Houe keti yange."

²² Kaha vamuhuile nguavo, "Indi yove iya honi? Tuleke linga tukaleke vaje vanatutumuli kuli yove. Ulitumbula nguove yove iya?"

²³ Iuano uavakumbuluile nguendi,

"Yange lizi liaumo atambeka mu mpambo nguendi,

'Sungameseni ngila ya MUENE,' ngue muahandekela kananguizi ua Njambi Isaya."

²⁴ Honi omo vavatumine kuli Vafaliseo,

²⁵ vehuile Iuano nguavo, "Vikahoni ulinakumbuitikila nga keti yove Kilistu, cipue Eliya, cipue kananguizi ua Njambi?"

²⁶ Iuano uavakumbuluile nguendi, "Yange njimbuitika na mema, vuno honi hhakati keni hanemana umo uje kumutantekeya.

²⁷ Ikeye umo uje eja munima yange, yange kunjafuulilele cipue kuzitula miva yaha vinkaku viendi."

²⁸ Vioshe evi vialingiulile mu Mbeteniya musinia lia ndonga ya Yundau kuje kuakele nakumbuitikila Iuano.

Yesu Muna Mpanga ua Njambi

²⁹ Liamukuavo Iuano uamuene Yesu alinakuija kuli ikeye, kaha uahandekela nguendi, "Talen, Muna Mpanga ua Njambi uje akambata vupi vua vaka mavu!"

* **1:20** Lizina lia Kilistu likeliyovene limolika na Mesiya vuno honi vialitepesa lika ngue Kilistu mu Cingelengu kaha Mesiya mu Cihevelu.

30 Ou ikeye uje ijahandekela nguange, 'Munima yange mukeja yala uakama kupulakana yange omuo ikeye uakeleko hambangelo yange tele kanda njisemuke.'

31 Yang'e kunjamutantekeyele nguange ikeye, vuno honi njezile nakumbuitika na mema linga vaka Isaleli vamutantekeye."

32 Iuano uambuluile vukaleho ovu nguendi, "Njamuene Cimbembesi cishuluka kuhuma muilu ngue livembe, na kutonkama hali ikeye.

33 Yang'e kunjatantekeyele nguange ikeye, vuno honi uje uanjitumine kumbuitika na mema ikeye uahandekela kuli yange nguendi, 'Hali uje ukamona Cimbembesi cikashulukila nakumutonkama ikeye vene akambuitika na Cimbembesi Ukulela.'

34 Yang'e vene vavenia njacimono nakuhandeka vukaleho nguange ou ikeye vene Muna Njambe."

Vandongisi va Yesu Vakulivanga

35 Liamukuavo naua Iuano uemanene na vandongisi vendi vavali,

36 omo uamuene Yesu uakele nakuhita, uahandekela nguendi, "Talen! Uje Muna Mpanga ua Njambe!"

37 Vaje vandongisi vavali vovuile Iuano ahandeka evi, kaha vakavele Yesu.

38 Omo Yesu uatengulukile, kaha uavamuene valinakumukava, kaha uahandekela kuli vakevo nguendi, "Muli nakutonda vika?"

Vamukumbuluile nguavo, "Lambi" (Eli lizi lilumbunuka "Mulongisi"). "Uakala kuli?"

39 Uahandekela kuli vakevo nguendi, "Ijeni mumone." Vezile nakumona kuje kuakele nakukala, vakele nendi litangua lije. Omuo capuile mutania ua cinguezi ua hola ya likumi na vitanu na imo (16: 0 0).

40 Umo ua vaje vavali vovuile Iuano ahandeka nakumukava uapuile Anduleo, munaina ya Simoni Petulu.

41 Hajevene Anduleo uauanene munaina Simoni, kaha uamulekele nguendi, "Tunauana Mesiya." lizi eli lilumbunuka ngualio Kilistu.

42 Ambahoni Anduleo uatuaelele munaina Simoni kuli Yesu.

Yesu uamutalele, kaha uahandekela kuli ikeye nguendi, "Yove Simoni muna Iuano, vuno honi vakakutumbula Kefase." (Lije lilumbunuka Petulu).

Yesu Asana Filipu na Natanele

43 Liamukuavo cimene Yesu uayonguele kuya ku Ngaleya. Tele ali nakuya uauanene Filipu kaha uahandeka kuli ikeye nguendi, "Njikave!"

44 Honi Filipu uahuminine ku Mbetsa, ku nganda kuje ku vakele Anduleo na Petulu.

45 Filipu uauanene Natanele, kaha uamulekele nguendi, "Tunauana uje yasonekele Mosesa mu livulu lia Lishiko naua uje na tunanguizi va Njambe va Njambe ivasonekele, ikeye Yesu uaku Nazaleta, muna Yosefa."

46 Natanele uamuile nguendi, "Nkuma ku Nazaleta kuasa kuhuma cuma cacili ndi?"

Filipu uamukumbuluile nguendi, "Ija ukamone."

47 Omo Yesu uamuene Natanele alinakuija kuli ikeye, uahandekela hali Natanele nguendi, "Ou ikeye Kaisaleli ua vusunga, uje muli ikeye kumuesi makuli!"

48 Natanele uamuile nguendi, "Unanjatantekeyela kuli?"

Yesu uamukumbuluile nguendi, "Njakumuene uatumama muintsi lia muti ua mukuyu tele kanda Filipu akusane."

⁴⁹ Natanele uamukumbuluile nguendi, “Mulongisi, yove unapu Muna Njambi! Yove Muene ua Isaleli!”

⁵⁰ Yesu uamukumbuluile nguendi, “Unatsiliela omuo njinakuleke nguange njakumuene uatumama muintsi lia muti ua mukuyu ndi? Uka-mona viuma viakama kupulakana evi!”

⁵¹ Kaha naua Yesu uahandekela kuli ikeye nguendi, “Muavusunga njim-ileka nguange, mukamona lilu liashokoloka, kaha na tungelo va Njambi valonda na kushuluka hali Muna Muntu.”

2

Ciuno ca Vulo mu Kana

¹ Ha litangua lia mucitatu kuakele ciuno ca vulo ku Kana mu Ngalileya, na vaina ya Yesu vakeleko.

² Yesu na vandongisi vendi navo naua vavalaniene ku ciuno cije.

³ Omo viniu viahuile, vaina ya Yesu vahandekela kuli ikeye nguavo, “Viniu vinahu.”

⁴ Kaha Yesu uahandekela kuli ikeye nguendi, “Yove mpuevo, keti unjileke viakulinga, ntsimbu yange kanda ihete.”

⁵ Vaina ya Yesu valekele vaje vangamba nguendi, “Lingeni vioshe vije viamileka.”

⁶ Kuje kuakele vinjava via mavue viakutekuila mema vitanu na imo via Vayunda ngue ku muyati uavo ua kulilelesa, imo na imo yasele kukala na malita a mema akupua vihita (100).

⁷ Yesu ualekele vaje vangamba nguendi, “Shuliseni evi vinjava na mema.” Kaha vavishulisile vioshe naku kanua.

⁸ Uavalekele nguendi, “Honi tekulenimo amo mutuale kuli mukuluntu ua ciuno.” Nankuma vamutualelele.

⁹ Omo uje mukuluntu ua ciuno uamakelele aje mema aje atengulukile kupua viniu, ikeye katantekeyele kuje kuviahumine vije viniu (cipue vene vaje vangamba vatekuile aje mema vatantekeyele), nankuma mukuluntu ua ciuno uasanene vavenia vulo

¹⁰ kaha uahandekela kuli ikeye nguendi, “Muntu voshe akalivanga kuhana viniu viacili, ambahoni ahana via vishamu munima ya vaje vavanalania vanapende laja. Vuno honi yove hanga uatulika viniu viacili kuheta na kuntsimbu ino.”

¹¹ Yesu ualingile eci citantekeyeso cendi ca kulivanga ku Kana mu Ngalileya, nakusholola vumpau vuendi, na vandongisi vendi vatsilielege muli ikeye.

¹² Munima yeve, Yesu uaile ku Kapenauma na vaina, na vamuanaye, na vandongisi vendi, vakele kuje matangua amandende lika.

Yesu Aya ku Njivo ya Njambi

(Mateu21:12-13; Mako11:15-17; Luka19:45-46)

¹³ Omo Ciuno ca Paseka ca Vayunda cakele muyehi, nankuma Yesu uaile ku Yelusalema.

¹⁴ Mu vimbalaka via njivo ya Njambi uauanene vantu vaje vakele naku-landeselamo vangombe, na vampanga, na mavembe na vaka kulandulula vibongo vatumamene ku vimesa viavo.

¹⁵ Nankuma uapangele likote, voshe uavashekelele hambanza lia vimbalaka via njivo ya Njambi, hamolika na vampanga na vangombe, kaha uomibilile vibongo via muuaya uaya via vaje vakele nakulandulula kaha uafulumikile vimesa viavo.

¹⁶ Kaha ualekele vaje vakele nakulandesa mavembe nguendi, “Tuhuiseni evi viuma muno! Keti mupuisse Njivo ya Tate mutambela uakulandesela!”

¹⁷ Vandongisi vendi vanukile ngeci vanavisoneka mu visoneka nguavo, “Cizango cange ha Njivo ya Tate cishukuma ngue tuhia muli yange.”

¹⁸ Vayunda vamuhiile nguavo, “Cimueso muka uasa kutumuesa ngeci uli na nzili yakama yakulinga eci?”

¹⁹ Yesu uavakumbuluile nguendi, “Siuleni eyi Njivo ya Njambi, kaha mu matangua atatu njikaitunga naua.”

²⁰ Kaha Vayunda vahandekele nguavo, “Eyi Njivo ya Njambi vanaitungile mu miaka yakupua makumi auana na miaka itanu na umo (46), kaha yove ukaitunga vati mu matangua atatu?”

²¹ Vuno honi uakele nakuhandeka Njivo ya Njambi ya muvila uendi.

²² Hanima ya kusanguka ku vatsi, vandongisi vendi vanukile nguavo vikevio viahandekele evi, kaha vatsilielegele visoneka na lizi lije liahandekele Yesu.

Yesu Atantekeya via mu Mutima ua Muntu

²³ Honi omo Yesu uakele mu Yelusalema ku ciuano ca Paseka, vavengi vatsilielegele mu lizina liendi omuo vamuene vitantekeyeso vije vialingile.

²⁴ Vuno honi Yesu kalihanene ikeye vavenia kuli vakevo,

²⁵ omuo uatantekeyele vantu voshe kaha katondele muntu umo amuleke vukaleho vua hali mukuavo, omuo ikeye vavenia uatantekeyele vije viakele muli muntu uoshe.

3

Yesu na Nikondemo

¹ Honi kuakele Kafaliseo ualizina lia Nikondemo, ntuama ua Vayunda.

² Uaile kuli Yesu vutsiki nakuhandeka kuli ikeye nguendi, “Mulongisi, tuatantekeya ngueto u mulongisi uakuhuminina kuli Njambi, omuo naumo uahi asa kulinga vitantekeyeso evi vi ulinakulinga kuakuhona nzili ya Njambi.”

³ Yesu uamukumbuluile nguendi, “Muavusunga njikuleka, naumo uahi asa kumona vumuene vua Njambi kuakuhona kusemuka luvali.”

⁴ Nikondemo uahandekele kuli ikeye nguendi, “Vatihoni muntu asa kusemuka luvali munima yakukola laja? Nkuma muntu asa kukovela muzimo lia vaina luvali na kusemuka naua ndi?”

⁵ Yesu uamukumbuluile nguendi, “Muavusunga vene njikuleka nguange, naumo uahi asa kukovela mu vumuene vua Njambi kuakuhona kusemuka ku mema na ku Cimbembesi.

⁶ Uje uasemuka ku muntu uapua muntu na uje uasemuka ku Cimbembesi uapua Cimbembesi.

⁷ Keti ukomoke nga njikuleka nguange unapande kusemuka luvali.

⁸ Mpunzi ikapekumuka kuoshe kuje kuikatondo, kaha mukevu cililimo cayo, vuno honi kuuasa kutantekeya kuje kuihuminina cipue kuje kuiya. Nankuma, omu mukemo vene mucinapu na kuli uoshe uje asemuka ku Cimbembesi.”

⁹ Nikondemo uamuhiile nguendi, “Evi vikalingiua vatihoni?”

¹⁰ Yesu uamukumbuluile nguendi, “Keti yove mulongisi ua Isaleli, nkuma naua kuuvitantekeya evi viuma ndi?”

¹¹ Muavusunga vene njikuleka, tukahandeka vije vitutantekeya nakuambulula vukaleho vua vije vitukamono, vuno honi yeni kumue kutambula vukaleho vuetu.

¹² Njamilekele viuma via ha mavu, vuno honi kumua njitsiliela, kaha vatihoni mukanjitsiliela nga njikamileka viuma via muiulu?

¹³ Naumo uahi uaya muiulu kuvanga Muna Muntu lika uje uezile kuhuma muiulu.

¹⁴ Ngue Mosesa muje muajunduire linoka mu vindinda, mucifua cimo vene vakajundula na Muna Muntu,

¹⁵ linga uoshe akatsiliela muli ikeye akakale na muono uayaye.

¹⁶ Omuo Njambo uazangele vaka mavu cikuma ngeci uahanene Munendi umolika, linga uoshe atsiliela muli ikeye keti akanonge vuno honi akale na muono uayaye.

¹⁷ Omuo Njambo katumine Munendi hano ha mavu mukuhisa vaka mavu, vuno honi linga mavu ovoke kuhitila muli ikeye.

¹⁸ Uje natsiliela muli ikeye kuvakamuhisa, vuno honi uje katsiliela vanamuhisa laja, omuo katsilieelele mu lizina lia Muna Njambo umolika.

¹⁹ Nankuma eci cikeco cisompelo, ceke cezile ha mavu, vuno honi vantu vazangele milima kupulakana ceke omuo vilinga viavo viapuile via vupi.

²⁰ Omuo uoshe uje muka kulinga vupi uazinda ceke nakuhona kuija ku ceke, linga vilinga viendi keti vilisholole.

²¹ Vuno honi uoshe uje muka kulinga via vusunga akeja ku ceke, linga cilimuese cilivene vilinga viendi viakundama kuli Njambo.

Yesu na Iuano Muka Kumbuitika

²² Munima yeve, Yesu na vandongisi vendi vaile ku cihela ca Yundeya, kuje kuakele navo ka ntsimbu lika nakuvambuitika.

²³ Iuano naua uakele nakumbuitika ku Aenone kuyehi na Salime omuo kuakele mema amengi kuje, na vantu vakele nakuya nakuvambuitika.

²⁴ Ha ntsimbu ije Iuano tele kanda vamuhake mu kamenga.

²⁵ Vamo vandongisi va Iuano vakele nakulinga vimpata na Kayunda umo ha futisi ya kulilelesa.

²⁶ Vaile kuli Iuano nakumulekesa nguavo, “Mulongisi, yala uje uakele nove musinia lia ndonga ya Yundau uje iualingilile vukaleho, kuno ali nakumbuitika, na vantu voshe valinakuya kuli ikeye.”

²⁷ Iuano uavakumbuluile nguendi, “Naumo uahi asa kutambula cuma kuvanga vanamuhanaco kuilu.

²⁸ Yeni muvakaleho vange ngue muje munjahandekela nguange, ‘Keti yange Kilstu, vuno honi vananjitumu kulutue luendi.’

²⁹ Uje ali na shombolua ikeye vavenia vulo, vuno honi kavusamba ua vavenia vulo uje nemana nakumuivuilila, avuachelela cikuma omo evua lizi lia vavenia vulo. Nankuma, mukemo mucikafua kuvuachelela cange.

³⁰ Ikeye napande kuvuezelela, vuno honi yange njapande kuhumisa.”

Uje Ahuma Muiulu

³¹ Uje ahuma muiulu nahiana voshe, uje ahuma hano ha mavu nakundama kuvia ha mavu nakuhandeka viuma via hano ha mavu. Vuno honi uje ahuma muiulu ali helu lia voshe.

³² Akahandeka vukaleho vua vije viakamono na kuivua, vuno honi naumo uahi akatambula vukaleho vuendi.

³³ Uoshe uje natambula vukaleho vuendi amuesa ngeci Njambo uapua ua vusunga.

³⁴ Uoshe uje yanatumu Njambo akahandeka mezi a Njambo, omuo Njambo mukakuhana Cimbembesi kuakuhona kuseteka.

³⁵ Ishe uazanga Muana, kaha nahana viuma vioshe mu mavoko endi.

³⁶ Uoshe atsiliela muli Muana ali na muono ua yaye, kaha uoshe kononoka Muana kakakala na muono, vuno honi vutenu vua Njambi vukakala hali ikeye.

4

Yesu na Mpuevo uaku Samaliya

¹ Honi omo Muene uatantekeyele nguendi Vafaliseo vanovu nguavo Yesu alinakuuana nakumbuitika vandongisi vavengi kupulakana Iuano

² (cipuevene nguavo keti Yesu uje uakele nakumbuitika vuno honi vandongisi vendi vacilingile.)

³ Omo Yesu uevuile vije vivakele nakuhandeka, kaha uahumine ku Yundeya nakuhilukila ku Ngalileya.

⁴ Vuno honi mu vungenzi vuendi vuakuya kuje uahitile mu Samaliya.

⁵ Nankuma, mu Samaliya uahetele ku nganda ivatumbuile Sikali, muyehi na lihia lije Yakomba uahanene kuli munendi Yosefa.

⁶ Lisima lia Yakomba liakele kuje, Yesu uatumamene kuyehi na lisima omuo uahonene cikuma kuenda. Ntsimbu yapuile hhakati ka mutue.

⁷ Mpuevo ua Kasamaliya uezile nakutekula mema, kaha Yesu uahandekele kuli ikeye nguendi, "Njihaneko mema njinue." (

⁸ Vandongisi vendi vaile mu nganda nakulanda via kulia.)

⁹ Mpuevo ua Kasamaliya uamukumbuile nguendi, "Cija vatihoni yove Kayunda ulombe mema akunua kuli mpuevo ua Kasamaliya?" (Vayunda kuvekulitambosona viuma hamolika na vaka Samaliya.)

¹⁰ Yesu uamukumbuile nguendi, "Nga uatantekeyele vuana vuje Njambi vualinavuo hali yove, nou ali nakuhandeka kuli yove nguendi, 'Njihaneko mema akunua,' ngue unamulombo, kaha ngue nakuhana mema a muono."

¹¹ Mpuevo uahandekele kuli ikeye nguendi, "Muene, kuuesi na cuma cakutekuisa mema, na lisima lialovo. Kulihoni ukauana mema a muono?"

¹² Nkuma yove uuakama kupulakana kuku yetu Yakomba, uje uatuhanele lisima eli, nakunuinamo ikeye vavenia na vana vendi na vimuna vendi vaje vanuinininemo ndi?"

¹³ Yesu uamukumbuile nguendi, "Uoshe anua ku mema aua akevua naua mpuila,

¹⁴ vuno honi voshe vakanua ku mema aje anjikavahana kuvakevu naua mpuila. Mema aje anjikamuhana akapua lisima lia livuelu vuelu muli vakevo lije likavahana mema a muono na kuvahana muono ua yaye."

¹⁵ Mpuevo uahandekele kuli ikeye nguendi, "Muene, njihaneko ouo mema, linga keti njikeye naua mpuila cipue keti njikeje eje naua kuno nakutekula mema."

¹⁶ Yesu uahandekele kuli ikeye nguendi, "Ya ukasane yala liove, kaha uhiluke kuno."

¹⁷ Mpuevo uamukumbuile nguendi, "Kunjesi na yala." Yesu uahandekele kuli ikeye nguendi, "Ukahandeka muacili omo ukahandeka nguove, 'Kuuesi na yala',

¹⁸ omuo unashomboka ku vamala vatanu, honi ou yuli nendi hano keti yaliove. Viunahandeka via vusunga!"

¹⁹ Mpuevo uahandekele kuli ikeye nguendi, "Muene, njamono nguange u kananguizi ua Njambi.

²⁰ Vakukulula vetu valemeselele ha munkinda ou, vuno honi yeni muhandeka ngueni cihela cije vantu vanapande lika kulemeselani mu Yelusalema."

21 Yesu uahandekela kuli ikeye nguendi, “Ove mpuevo, njitsilie, ntsimbu ilinakuija omo kumukalemesela Tate ha munkinda ou cipue mu Yelusalema.

22 Yeni mukalemesa uje kumutantekeya, vuno honi yetu tukalemesa uje itutantekeya, omuo kuovoka cahuma kuli Vayunda.

23 Vuno honi ntsimbu ilinakuija, naua inahete laja, omo vaka kulemesa va vusunga vakalemesa Tate mu Cimbembesi na mu vusunga, omuo Tate uatonda vantu ava kumulemesa.

24 Njambi ikeye vene Cimbembesi, na voshe vaje vamulemesa vanapande kulemesa mu Cimbembesi na mu vusunga.”

25 Mpuevo uahandekela kuli ikeye nguendi, “Njatantekeya nguange Mesiya ali nakuija” (uje ivatumbula Kilistu) “Omo akeja, akatuleka viuma viosehe.”

26 Yesu uamukumbuluile nguendi, “Yange vene ikeye, uje ali nakuhandeka nove.”

27 Hajevene vandongisi va Yesu vezile. Valikomokelele cikuma hakuuana Yesu ali nakuhandeka na mpuevo, vuno honi naumo uahi uahandekela kuli ikeye nguendi, “Uli nakutonda vika?” Cipue kuihula Yesu nguavo, “Vika uli nakuhandekela nendi?”

28 Ambahoni uje mpuevo uasezele njava yendi nakuhiluka ku nganda. Uakalekele vantu kuje nguendi,

29 “Ijeni mukamone yala uje nanjileka viuma viosehe vinjalingile! Asa kupua Kilistu ndi?”

30 Kaha vahumine mu nganda nakuya kuli Yesu.

31 Tele vandongisi vakele nakumulambelela nguavo, “Mulongisi, liako viakulia.”

32 Vuno honi uahandekela kuli vakevo nguendi, “Njilina viakulia vije kumutantekeya.”

33 Nankuma, vandongisi vaputukile kulihula umo na mukuavo nguavo, “Nkuma kuli umo namunehela viakulia ndi?”

34 Yesu uahandekela kuli vakevo nguendi, “Viakulia viange vinapu kupanga cizango cendi uje uanjitumine nakumanesa cipangi cendi.

35 Nkuma kumue kuhandeka nguendi, “Kuasala lika vingonde viuana, kaha tukateja ndi?” Vuno honi njimileka nguange, taleseseni muacili, taleni muje vimbuto muvinahilamo linga vaviteje.

36 Muka kuteja natambula laja fueto yendi, naua ali nakukungulula vushuka vua muono uayaye, linga muka kukuna na muka kuteja voshe vavuahelele hamolika.

37 Nankuma, lizi eli liapua lia vusunga ngualio, “Umo akuna kaha mukuavo akateja.”

38 Njinakutumu kuteja vije kuuapangele. Vakueni vapangele, kaha yove unauanenamo vimo ha vipangi viavo.”

39 Vaka Samaliya vavengi vamu nganda ije vatsiliehele kuli Yesu omuo uje mpuevo uahandekela nguendi, “Nanjileka viuma viosehe vinjalingile.”

40 Nankuma, omo vaka Samaliya vezile kuli ikeye, vamulombele linga akale navo, kaha Yesu uakele kuje matangua avali.

41 Vavengi vatsiliehele kuli ikeye omuo ya mezi endi.

42 Vantu valekele uje mpuevo nguavo, “Keti nguavo omuo viunahandeka viatunehesa linga tutsiliehele, vuno honi tualiuvuila yetu vavenia, tuatan-tekeya ngueto ou mua vusunga vene ikeye Muyoyesi ua vaka mavu.”

⁴³ Omo Yesu uakele kuje matangua avali, kaha uahumineko uaile ku nganda ya Ngalileya

⁴⁴ (omuo ikeye vavenia uahandeketele nguendi naumo uahi kananguizi ua Njambi ivasingimika mu lifuti liendi).

⁴⁵ Omo uahete mu nganda ya Ngalileya, vaka Ngalileya vamutambole muciili, omuo vakamuene viose vije vialingile mu Yelusalema ku ciuano, omuo navakevo vaile ku ciuano.

⁴⁶ Ambahoni Yesu uahilukile ku Kana mu nganda ya Ngalileya, kuje uatenguluile mema kupua viniu. Kuje kuakele mukuluntu ua vaka kusuana uakele na munendi ua yala uje uakele na kuvavala mu Kapenauma.

⁴⁷ Omo uevuile ngeci Yesu nahumu ku Yundeya neja ku nganda ya Ngalileya, uaile kuli ikeye nakumulomba ngeci eje ku Kapenauma nakukanguisa munendi, uje uatondete kutsa.

⁴⁸ Kaha Yesu uahandeketele kuli ikeye nguendi, "Naumo uahi hhakati keni atsiliela kuvanga mumone vitantekeyeso na vikomoueso."

⁴⁹ Uje mukuluntu uahandeketele nguendi, "Muene tuye mumo ntsimbu kanda munange atse."

⁵⁰ Yesu uahandeketele kuli ikeye nguendi, "Ya, munove akayoya!"

Uje yala uatsilielele mezi a Yesu, kaha uaile.

⁵¹ Omo uakele nakuya kuimbo, ualiuanene na vangamba vendi vaje vamulekele nguavo munove ali nakuyoya.

⁵² Nankuma, uavehuile ntsimbu muka munendi uayoyele, kaha vamukumbuluile nguavo, "Izau tele mutania, lisika sika lia muhumine."

⁵³ Ishe aanukile ngeci ikeyo ntsimbu ije Yesu uamulekele nguendi, "Munove akayoya." Nankuma, ikeye hamo na ntanga yendi voshe vatsilielele muli Yesu.

⁵⁴ Eci cikoko citantekeyeso ca mucivali cije ca lingile Yesu omo uahumine ku nganda ya Yundeya kuija ku nganda ya Ngalileya.

5

Yesu Akanguisa Muka Kalepa ku Cisali

¹ Munima yevi, Yesu uaile ku nganda ya Yelusalema ku ciuano ca Vayunda.

² Kuje ku Yelusalema kuyehi na Cikolo ca Vampanga kuakele cisali cakele na mambalanda atanu, cije mu Cihevelu vacitumbula nguavo Mbetezasa.

³ Civunga cakama ca vaka mishongo ya vupuputua, vilema, na vaka kalepa vakosele kuje.

⁴ Omuo kangelo ka Muene ha ntsimbu yoshe uashulukilile muje mu cisali na kutupuisa mema. Kaha uoshe uje muka kuvavala alivangamo, akanguka ku mushongo uendi.

⁵ Kuakele yala umo kuje uavavalele miaka makumi atatu na miaka itanu na itatu (38).

⁶ Omo Yesu uamumuene nakosa kuje nakutantekeya nguendi uje yala nakala kuje ntsimbu yailaha, uahandeketele kuli ikeye nguendi, "Utonda kukanguka ndi?"

⁷ Uje yala uakuvavala uamukumbuluile nguendi, "Muene, kunjesi naumo uakunjikovelesa mu cisali omo mema atupuka, omo njeseke nguange njikovelele, uka naua alivangamo."

⁸ Yesu uahandeketele kuli ikeye nguendi, "Katuka, ambata linala liove kaha enda."

⁹ Hajevene uje yala uakangukile, uambatele linala liendi nakuputuka kuenda.

Lije litangua liapuile lia sapalalo.

¹⁰ Nankuma, Vayunda valekele uje yala ivakanguisile nguavo, "Lino linapu lia sapalalo, eci cinapu kuluisa lishiko omo unambata linala liove."

¹¹ Vuno honi uavakumbuluile nguendi, "Yala uje nanjikangula ikeye nanjileka nguendi, 'Ambata linala liove, enda!'"

¹² Vamuhuile nguavo, "Iya ou yala nakuleka nguendi, 'Ambata linala liove kaha enda?'"

¹³ Honi uje yala ivakanguisile katantekeyele indi uapuile iya, omuo Yesu uavombolokele mu civunga cije cakele kuje.

¹⁴ Munima yevi, Yesu uamuuanene ali mu Njivo ya Njambi kaha uahandekela kuli ikeye nguendi, "Tala, unakanguka! Ketu ukalinge vupi naua, kuteua viavipi vikalingiye kuli yove."

¹⁵ Ambahoni uje yala uale nakuleka vaje vantuama va Vayunda nguendi Yesu ikeye namukanguisa.

¹⁶ Nankuma, vapusukile kupakesa Yesu, omuo uakanguisile muntu ha litangua lia sapalalo.

¹⁷ Vuno honi Yesu uavakumbuluile nguendi, "Tate alinakupanga ntsimbu yoshe, nange naua njinapande kupanga."

¹⁸ Vihandeka evi vialingisile cikuma vantuama va Vayunda linga vamutsihe, omuo keti lika uapokuele lishiko lia ha litangua lia sapalalo, vuno honi uahandekela naua nguendi Njambi ikeye Ishe, mu ngila eyi ualipuisile mumo na Njambi.

Nzili Yakama ya Muana

¹⁹ Yesu uahandekela kuli vakevo nguendi, "Mua vusunga njimileka nguange: Muana kasa kupanga hali kaliendi lika, vuno honi akalingi lika vije amona Ishe avilinga, omuo vije viose viakalingi Ishe, vikevio naua vialinga Muana.

²⁰ Omuo Ishe uazanga Muana kaha amumuesa viose vije viakalingi, amumuesa vipangi viakama kupulakana evi, linga muka likomokelele.

²¹ Ngue muje Ishe akasangula vatsi nakuvahana muono, mucifua cimo vene naua Muana akahana muono kuli vaje atonda.

²² Ishe kekusompa hali uoshe vuno honi nahana cisompelo kuli Muana,

²³ linga voshe vasingimike Muana ngue muvakasingimika Ishe. Uoshe uje kasingimika Muana kasingimika Ishe uje uamutumine.

²⁴ "Mua vusunga njimileka nguange, uoshe evua lizi liange na kutsiliela kuli uje uanjitumine alina muono uayaye, naua kuvakamusompo vuno honi nahumu ku kutsa nakovela ku muono.

²⁵ "Mua vusunga njimileka nguange, ntsimbu ilinakuija, naua inahete laja, omo vatsi vakevua lizi lia Muna Njambi, kaha voshe vaje valivua vakayoya.

²⁶ Ngue muje Ishe ukala na muono muli ikeye vavenia, mukemo vene napuisa na Muana kukala na muono muli ikeye vavenia,

²⁷ naua namuhana nzili yakama ya cisompelo, omuo ikeye napu Muna Muntu.

²⁸ Ketu mulikomokele hali eci, omuo ntsimbu ilinakuija omo voshe vaje vali mu vihilo vakevua lizi liendi

²⁹ kaha vakahumamo, voshe vaje vapangele muacili vakasangukila ku muono na vaje voshe vapangele vupi vakasangukila ku cihiso.

Vukaleho vua hali Yesu

³⁰ “Kunjasa kulinga cimo mu nzili yange vavenia. Njikasompo lika muje muanjileka Njambi, cisompelo cange naua capua lika ca vusunga, omuo kunjekulilingila cizango cange vuno honi cizango cauje uanjitumine.

³¹ “Nga njiliambulula yange vavenia, vukaleho vuange keti vua vusunga.

³² Kuali ueka uje akuambulula vukaleho vuange, njatantekeya nguange vukaleho vuje ali nakuambulula hali yange vunapu vua vusunga.

³³ Muatumine tunganda kuli Iuano, uavalekele vusunga.

³⁴ Ketu ngue vukaleho vunjitambula vuahumu ku muntu, vuno honi njilinakuhandeka evi viuma linga muovoke.

³⁵ Uapuile ndeya yakushukuma na kutua ceke, neni muavuahelelele ka ntsimbu lika mu ceke cendi.

³⁶ Vuno honi yange njili na vukaleho vuakama kupulakana vukaleho vuje vuambulule Iuano. Omuo evi vikevio vipangi viananjihana Tate linga njivimanusule, vipangi evi vene vinjilakupanga, vilinakuhandeka hali yange kumuesa ngue Tate uanjitumine.

³⁷ Na Tate uje uanjitumine alinakuhandeka vukaleho hali yange. Kanda muvueho lizi liendi, cipue kumona cihanga cendi,

³⁸ naua yeni kumuekuniunga mezi endi mu mitima yeni, omuo kumuatsilieleseli kuli uje yatumine.

³⁹ Muli nakulilongesa visoneka omuo muyongola ngueni mu vikevio muuanamo muono uayaye, nkuma visoneka evi vene vikevio viambulula vukaleho vuange.

⁴⁰ Vuno honi yeni muviana kuija kuli yange linga mukale na muono.

⁴¹ “Yange kunjitondo linga vantu vanjishangazale.

⁴² Vuno honi njatantekeya nguange kumuesi na cizango ca Njambi muli yeni.

⁴³ Njineja mu lizina lia Tate, vuno honi yeni kumuanjitambuile, nga ueka eja mu lizina liendi lika, mukamutambula.

⁴⁴ Muasa kutsiliela vati? Yeni mukatambula vumpau kuli umo na mukuavo nakuhona kusetela vumpau vuje vuhuminina kuli umo lika ikeye Njambi.

⁴⁵ Ketu muyongole ngueni njikamivangeya kuli Tate, Mosesa vene uje imuatsilieleseli ikeye akamivangeya.

⁴⁶ Nga muatsilieleseli kuli Mosesa, nange naua ngue muanjitsiliela, omuo ikeye uasonekele viange.

⁴⁷ Vuno honi nga kumutsiliela vije viasonekele, kaha vatihoni mukatsiliela vinjihandeka?”

6

Yesu Alisa Vantu Vavengi

(Mateu14:13-21; Mako6:30-44; Luka9:10-17)

¹ Munima yeyi Yesu uaille musinia lia Cisali ca Ngallileya, cije civatumbula naua nguavo Cisali ca Timbeliase.

² Civunga cakama camukavele, omuo vamuene vitantekeyeso vije viakele nakulinga ku vaka kuvavala.

³ Yesu ualondele ku munkinda nakutumama hamo na vandongisi vendi.

⁴ Tele Paseka Ciuano ca Vayunda cakele muyehi.

⁵ Omo Yesu uanduile mesho endi uamuene civunga cakama cili nakuija kuli ikeye, nankuma uehuile Filipu nguendi, “Kuli tuasa kulanda viakulia via vantu ava linga valie?”

⁶ Uahandekela eci mukumueseka, omuo ikeye vavenia uatantekeyele vije viakalinga.

⁷ Filipu uamukumbuluile nguendi, "Cipue vihita vivali (200) via vim-bongo via muuaya uaya kuviyasa kulanda viakulia viakulisa ava linga umo na umo auane kakandende."

⁸ Umo ua vandongisi vendi, Anduleo munaina ya Simoni Petulu, uahandekela kuli ikeye nguendi,

⁹ "Kuli kanike kayala kuno alina mikasha itanu ya mbolo na vantsi vavali. Vuno honi viasa kupuamo kuli vantu voshe ava ndi?"

¹⁰ Yesu uahandekela nguendi, "Lekeni vantu voshe vatumame ha mavu." Kuakele muila uauingi ku cihela cije, nankuma voshe vatumamene ha mavu, kuakele vamala vakupua mu makulukazi atanu (5,000).

¹¹ Kaha Yesu uatambuile ije mikasha ya mbolo, uatsatselelele kuli Njambi, kaha uaipangezelele vantu vaje vatumamene, ualingile cuma cimo naku vantsi naua, voshe valile kaha vakutile muva tondelelelele.

¹² Omo voshe vakutile, Yesu ualekele vandongisi vendi nguendi, "Kunguluni evi vimbazuvuila vinasalaho, keti tuvihiseho cipue tuatundende."

¹³ Nankuma vavikunguluile viose, kuje ku vimbazuvuila via mikasha itanu ya mbolo ivasezele vaje valile, vashulisileho mitonga likumi na ivali.

¹⁴ Omo vantu vamuene vitantekeyeso vialingile Yesu, vaputukile kuhandeka nguavo, "Cilivene ou ikeye kananguizi ua Njambi uje akeja hano ha mavu."

¹⁵ Omo Yesu uatantekeyele nguendi vatonda kumukuata linga vamupuisse muene, uaile naua ku munkinda likaliendi lika.

Yesu Enda ha Mema

(Mateu14:22-33; Mako6:45-52)

¹⁶ Omo litangua liatokele, vandongisi va Yesu vaile ku cisali,

¹⁷ vakovelele mu vuato nakuya musinia lia cisali ku Kapenauma. Kuaputukile milima, tele hanga Yesu kanda acihete kuli vakevo.

¹⁸ Cisali cakele nakulininganga omuo kuahitile mpunzi yakama.

¹⁹ Omo vajavuile ntunda ya mantambo akupua atatu cipue auana, vamuene Yesu alinakuenda ha mema kuija kuyehi na vuato, kaha vovuile liova.

²⁰ Vuno honi Yesu uahandekela kuli vakevo nguendi, "Yange vene, keti muvue liova."

²¹ Kaha vatondele kumukovelesa mu vuato, hajevene vuato vuahetele ku ntunda kumutambela kuje vakele nakuya.

Vantu Vatonda Yesu

²² Liamukuavo civunga ca vantu vaje vasalele musinia lia cisali vamuene nguavo kuakele lika vuato vumolika kuje. Vamuene naua nguavo Yesu kakovelele hamo mu vuato na vandongisi vendi, vuno honi vandongisi vendi vaile lika likaliavo.

²³ Kaha mato amo aje ahumine ku Timbeliase ezile kuyehi na cihela kuje kuvalililile mbolo hanima ya Muene kuitsatselele kuli Njambi.

²⁴ Nankuma, omo civunga camuene ngeci Yesu na vandongisi vendi vahiko kuje, vakovelele mu mato nakuya ku Kapenauma mukutonda Yesu.

Yesu Ikeye Mbolo ya Muono

²⁵ Omo vamuuanene musinia lia cisali, vahandekela kuli ikeye nguavo, "Mulungisi, tangua lika unezile kuno?"

²⁶ Yesu uavakumbuluile nguendi, “Mua vusunga vene njimileka nguange, muli nakunjitonda, keti ngue omuo muamuene vitantekeyeso viange, vuno honi omuo mualile mbolo nakukuta.

²⁷ Keti mupangele viakulia vije vikapola, vuno honi pangeleni viakulia via muono ua yaye, vije Muna Muntu akamihanavio. Omuo Njambi, Ishe namuhaka cimueso ca kumutava.”

²⁸ Kaha vamuhuile nguavo, “Vika tuapande kulinga linga tulinge vije viatonda Njambi?”

²⁹ Yesu uavakumbuluile nguendi, “Eci cinapu cipangi ca Njambi, linga mutsilele muli uje yanatumu.”

³⁰ Nankuma, vamuihuile nguavo, “Citantekeyeso muka ukatuhana honi, linga tukacimone na kukutsiliela? Cipangi muka ukalinga?

³¹ Vakukuluila vetu valile maana mu Mpambo, ngue muvanacisoneka nguavo, ‘Uavahanene mbolo yakuhuminina kuilu linga valie!’ ”

³² Kaha Yesu uahandekele kuli vakevo nguendi, “Mua vusunga vene njimileka nguange, kapuile Mosesa uje uamihanene mbolo yakuhuma kuilu, vuno honi Tate ikeye akamihana mbolo ya vusunga ya kuhuma kuilu.

³³ Omuo mbolo ya Njambi yapua ije ihuma muilu nakuhana muono kuli vaka mavu.”

³⁴ Vahandekele kuli ikeye nguavo, “Muene, tuhane eyi mbolo ntsimbu yoshe.”

³⁵ Yesu uavalekele nguendi, “Yange mbolo ya muono. Uoshe uje eja kuli yange kakatsiho njala, naua uoshe uje atsiliela kuli yange kakevuiho mpuila.

³⁶ Vuno honi njamilekele nguange muanjimonu vuno honi kumuasa kunjitsiliela.

³⁷ Coshe cije canjihana Tate cija kuli yange, na uoshe uje eja kuli yange kunjikamusheke,

³⁸ omuo njahumine muilu, keti ngue mukulinga cizango cange, vuno honi cizango cauje uanjitumine.

³⁹ Honi eci cikeco cizango cauje uanjitumine, linga keti njikahone cimo ku vioshe vije viananjihana, vuno honi njikavasanguile ku muono ha litangua liama manusiilo.

⁴⁰ Eci cilivene cikeco cizango ca Tate, ngeci uoshe amona Muana nakutsiliela kuli ikeye akakale na muono ua yaye, kaha njikamusanguile ku muono ha litangua liama manusiilo.”

⁴¹ Kaha vantuama va Vayunda vaputukile kulinienetela hali ikeye omuo uahandekele nguendi, “Yange mbolo ije yahumine kuilu.”

⁴² Vakele nakuhandeka nguavo, “Keti ikeye Yesu ou, muna Yosefa, uje ishe na vaina vatutantekeya ndi? Cija vati ahandeke nguendi, ‘Njahuminine muilu?’”

⁴³ Yesu uavakumbuluile nguendi, “Keti muliniengete hhakati keni.

⁴⁴ Naumo uahi asa kuija kuli yange kuvanga uje yanaha Tate uanjitumine, kaha njikamusanguile ku muono uje muntu ha litangua liama manusiilo.

⁴⁵ Vanacisoneka ku tunanguizi va Njambi va Njambi nguavo, ‘Voshe Njambi akavalongesa.’ Uoshe evua Tate nakulilongesa kuli ikeye eja kuli yange.

⁴⁶ Keti nguavo muntu uoshe uamona Tate, vuno honi kuvanga lika uje uahuma kuli Njambi ikeye uamona Tate.

⁴⁷ Mua vusunga vene njimileka nguange, uje uoshe atsiliela alina muono uayaye.

⁴⁸ Yange mbolo ya muono.

⁴⁹ Vakukuluila veni valile maana mu Mpambo na kutsa.

⁵⁰ Eyi ikeyo mbolo ije ihuma muilu, linga uoshe uje aliako kakatsi.

⁵¹ Yange mbolo ya muono ije yahumine muilu. Uoshe uje alia ku mbolo eyi akayoya miaka yoshe, kaha mbolo ije injikahana ya muono ua vaka mavu inapu muvila uange.”

⁵² Vantuama va Vayunda vapatukile kulinga vimpata hhakati kavo, vahandekele nguavo, “Cija vati ou yala atuhane muvila uendi linga tu ulie?”

⁵³ Nankuma, Yesu uahandekele kuli vakevo nguendi, “Mua vusunga vene njimileka nguange, nga kumukali muvila ua Muna Muntu na kunua maninga endi, kaha kumukakala na muono.

⁵⁴ Voshe valia muvila uange na kunua maninga ange valina muono uayaye, kaha njikavasanguila ku muono ha litangua liama manusuilo,

⁵⁵ omuo muvila uange ukeuo viakulia via vusunga na maninga ange akeuo viakunua via vusunga.

⁵⁶ Vaje voshe valia muvila uange na kunua maninga ange vakala muli yange, nange njikala muli vakevo.

⁵⁷ Ngue muanjitemine Tate uakuyoya, nange njilinakuyoya omuo Tate, nankuma uoshe akanjilia akayoya omuo yange.

⁵⁸ Eyi ikeyo mbolo ije yahumine muilu, keti ngue ije ivalile vakukuluila veni, kaha vatsile. Vuno honi uoshe uje alia mbolo eyi akayoya miaka yoshe.”

⁵⁹ Yesu uakele nakuhandeka evi oku tele ali nakulongesa mu njivo ya malombelo ku Kapenauma.

Mezi a Muono Uayaye

⁶⁰ Omo vandongisi vendi vavengi vovuile evi, vahandekele nguavo, “Vilongesa evi viavikalu, iya asa kuvitambula?”

⁶¹ Vuno honi Yesu hakutantekeya ngeci vandongisi vendi vali nakulin-iengetela ha cikeco, uahandekele kuli vakevo nguendi, “Nkuma eci cilinaku-mivuisa kupihia ndi?

⁶² Kaha vatihoni nga muamuene Muna Muntu alonda kuya kuakele ha kulivanga?

⁶³ Cimbembesi ua Njambi ikeye akahana muono, muvilani uapua uan-goco. Mezi aua anjinahandeka kuli yeni akeuo a Cimbembesi na muono.

⁶⁴ Vuno honi hhakati keni kuli vamo vaje vakuhona kutsiliela.” Omuo Yesu uatantekeyele laja hume hambangelo vaje vaka kuhona kutsiliela, na vaje vaka muenda vungungu.

⁶⁵ Nankuma, uahandekele nguendi, “Ha cuma eci njamilekele nguange naumo uahi asa kuija kuli yange kuvanga Tate amutavese.”

⁶⁶ Omuo yevi vilongesa, vandongisi vendi vavengi vahilukilemo nakuhona naua kumukavangeya.

⁶⁷ Nankuma Yesu uehuile vandongisi vendi likumi na vavali nguendi, “Neni naua mutonda kuhilukamo ndi?”

⁶⁸ Simoni Petulu uamukumbuile nguendi, “Muene, kuli iya tuasa kuya? Yove uli na mezi a muono ua yaye.

⁶⁹ Tuatsiliela honi nakutantekeya nguetu yove uapua Umo Uakulela ua Njambi.”

⁷⁰ Yesu uavakumbuile nguendi, “Nkuma keti yange njamihanguile, yeni vandongisi likumi na vavali ndi? Vuno honi umo ueni napu satana.”

⁷¹ Uakele nakuhandeka Yundasa muna Simoni Sakaliote, cipue vene uapuile umo uavaje vandongisi likumi na vavali, ikeye akamuenda vun-gungu.

7

Yesu na Vamuanaye

¹ Munima ye, Yesu uendanganene mu Ngalileya. Katondele kuendagan-gana mu Yundeya omuo vantuama va Vayunda vakele nakutonda ngila ya kumutsihilamo.

² Ntsimbu ya ciuano ca Mapapela ca Vayunda cakele mu yehi.

³ Nankuma, vamuanaye vahandekela kuli ikeye nguavo, “Huma kuno uye ku nganda ya Yundeya linga vandongisi vove navakevo naua vakamone vipangi viulinakulinga,

⁴ omuo naumo uahi ashueka vije vialinga nga atonda kutsimana. Nga ulinakulinga viuma evi, lisholole yove vavenia ku vaka mavu.”

⁵ (Omuo cipue vene vamuanaye kuvamutsiliehele.)

⁶ Yesu uahandekela kuli vakevo nguendi, “Ntsimbu yange kanda ihete, vuno honi yeni ntsimbu yoshe ili kuno.

⁷ Vaka mavu kuvasa kumizinda, vuno honi vazinda yange omuo njili-nakuvala nguange vipangi viaho via vipi.

⁸ Yeni ku ciuano yeni vavenia. Yange kunjijiko ku ciuano eci, omuo ntsimbu yange kanda ichete.”

⁹ Munima yakuhandeka evi, Yesu uasalele mu Ngalileya.

Yesu ku Ciuano ca Mapapela

¹⁰ Vuno honi omo vamuanaye vanai laja ku ciuano, ambahoni Yesu nendi uaile, kaile citoma mesho vuno honi uaile mu vushueke.

¹¹ Vantuama va Vayunda vakele nakumutonda ha ciuano nakuhandeka nguavo, “Alikuli ikeye?”

¹² Kuje kuakele kumufueya mu civunga. Vamo vakele nakuhandeka nguavo, “Ou yala uacili,” kaha vamo vakele nakuhandeka nguavo, “houe, alinakutangula civunga.”

¹³ Vuno honi naumo uahi uahandekela hali ikeye citona mesho omuo vakele na liova lia vantuama va Vayunda.

¹⁴ Ciuano cakele kuyehi nakuhua omo Yesu uaile ku Njivo ya Njambi nakukaputuka kulongesa.

¹⁵ Vantuama va Vayunda valikomokelele cikuma, kaha vahandekela nguavo, “Cija vati yala ou akale navilongesa evi, omo ikeye kalilongesele?”

¹⁶ Kaha Yesu uavakumbuluile nguendi, “Vilongesa evi keti viange vuno honi via uje uanjitumine.”

¹⁷ Uoshe uje atonda kulinga vije viatonda Njambi akatantekeya nga evi vinjilinalongesa vihuma kuli Njambi cipue njilinaluhandekela lika yange vavenia.

¹⁸ Vaje vakalihandekela vakevo vavenia, vakatondo kuuana vumpau vakevo vavenia, vuno honi uje atonda vumpau vua uje uamutumine napu muntu ua vusunga, naua muli ikeye kumuesi makuli.

¹⁹ “Nkuma Mosesa kamihanene lishiko ndi? Vuno honi naumo uahi hhakati keni aniunga lishiko eli. Vika muli nakutondela ngila ya kunjit-sihilamo?”

²⁰ Vivunga vamukumbuluile nguavo, “Uli na lihamba! Iya alinakutonda kukutsiha?”

²¹ Yesu uavakumbuluile nguendi, “Njalingile cipangi cimo, kaha muva voshe mualikomokelele.

²² Mosesa uamishikile kulovoka ku mukanda (kucapuile ca Mosesa, vuno honi cahumine kuli vakukuluila veni), yenihoni mukalovola yala ha litangua lia sapalalo.

²³ Nga yala alovoka ku mukanda lia sapalalo linga keti mupokole lishiko lia Mosesa, nkuma vika munienguela yange omuo njakanguisile muntu ha litangua lia sapalalo?

²⁴ Ketu musompele vulemu vuno honi sompeni mu vusunga.”

Ou ikeye Kilistu ndi?

²⁵ Vamo vantu vaku Yelusalema vakele nakuhandeka nguavo, “Keti ikeye ou yala uje ivatonda kutsiha vantuaa va Vayunda ndi?

²⁶ Nkuma ali kuno, mukuhandeka citona mesho ku vantu vuno honi vakevo nacimo cahi civali nakuhandeka kuli ikeye! Nkuma vaka nzili yakama vatantekeya ngeci ikeye vene Kilistu ndi?

²⁷ Yetu tuatantekeya laja kuje kuahuminina ou yala, vuno honi omo Kilistu akeja, naumo uahi akatantekeya kuje kuakahuma.”

²⁸ Kaha Yesu uatambakanene cikuma tele alinakulongesa mu vimbalaka via Njivo ya Njambi nguendi, “Muanjitantekeya naua muatantekeya kuje njihuma. Kunjalizililile vuno honi uje nanjitumine uapua ua vusunga naua kumu mutantekeya.

²⁹ Yangе njimutantekeya, omuo njihuma kuli ikeye naua ikeye uanjitumine.”

³⁰ Kaha vatondele kumukuta vuno honi naumo uahi uasalekele livoko hali ikeye, omuo ntsimbu yendi tele kanda ihete.

³¹ Vuno honi vantu vavengi va muje mu civunga vamutsilieelele nakuhandeka nguavo, “Omo Kilistu akeja, nkuma ikeye akalinga vitan-tekeyeso viavingi kupulakana evi vianalingi ou yala ndi?”

Vaka Kuniunga Vavatumu Kukuata Yesu

³² Vafaliseo vovuile civunga cije cakele nakungunguta hali Yesu ha viuma evi, nankuma, vakuluntu va tusasendote na Vafaliseo vatumine vaka kuniunga Njivo ya Njambi mukukuata Yesu.

³³ Kaha Yesu uahandeketele nguendi, “Njikakala neni ka ntsimbu kakan-dende lika, ambahoni njikaya kuli uje uanjitumine.

³⁴ Mukanjitonda vuno honi kumukanjiuana, kaha kuje njikakala ku-mukasa kuyako.”

³⁵ Vantuama va Vayunda valihandekesele umo na mukuavo nguavo, “Kuli atonda kuya ou yala kuje kutukasa kumuana? Atonda kuya ku Vinganda via Vangelengu kuje kuvanashandokela vantu vetu nakulongesa Vangelengu ndi?

³⁶ Alinakulumbununa vika mukuhandeka nguendi, ‘Mukanjitonda vuno honi kumukanjiuana’ naua ‘kuje njikakala, kumukasa kuyako?’”

Vindonga via Mema a Muono

³⁷ Ha litangua lia kumanusula ciuano naua likelio litangua liakama, tele Yesu nacimana kuje, uatambakanene cikuma nguendi, “Uoshe uje ali nampuila eje kuli yange linga akunue mema,

³⁸ na uoshe uje atsiliela kuli yange anue. Ngue muvinahandeka visoneka nguavio, ‘Mu mitima ya vaka kutsiliela mukahuma vindonga via mema a muono!’ ”

³⁹ Yesu uahandeketele evi hali Cimbembesi uje vaka kutsiliela ivakatambula, haje tele kanda kukale Cimbembesi omuo Yesu tele kanda vamujundule ku vumpau.

Lihangununo hhakati ka Vantu omuo ya Yesu

⁴⁰ Omo vovuile mezi aua, vamo mu civunga vahandeketele nguavo, “Mua vusunga vene ou yala ikeye kananguizi ua Njambi.”

⁴¹ Kaha vamo vahandeketele nguavo, “Ou ikeye vene Kilistu.”

Vuno honi vamo vehuile nguavo, “Nkuma Kilistu asa kuhuma ku Ngalileya ndi?”

⁴² Nkuma visoneka kuviahandeketele nguavio Kilistu akahuminina ku muyati ua Ndaviti na kusemukila mu Mbetelehema, mu limbo muje muakele Ndaviti ndi?”

⁴³ Nankuma kuakele lihangununo hhakati ka civunga omuo yendi Yesu.

⁴⁴ Vamo vatondele kumukuta vuno honi naumo uahi uasalekele mavoko hali ikeye.

Kuhona Kutsiliela ca vantuama va Vayunda

⁴⁵ Omo vaka kuniunga Njivo ya Njambi vahilukile kuli vakuluntu va tusasendote na kuli Vafaliseo, vavehuile nguavo, “Vika kumua mukutilile?”

⁴⁶ Vaka kuniunga Njivo ya Njambi vakumbuluile nguavo, “Naumo uahi asa kuhandeka ngue ou yala!”

⁴⁷ Kaha Vafaliseo vavakumbuluile nguavo, “Neni naua vamikuiza ndi?”

⁴⁸ Nkuma kuli umo ua vaka nzili yakama cipue ua Vafaliseo natsiliela kuli ikeye ndi?

⁴⁹ Vuno honi civunga eci kucitantekeya lishiko lia Mosesa, kaha cinasingua.”

⁵⁰ Nikondemo uje uaille kuli Yesu hakulivanga, uehuile vakuavo nguendi,

⁵¹ “Nkuma lishiko lietu likahisa vantu vaje kanda tucivue viavo na kuuana vika vivanalingi ndi?”

⁵² Vakevo vamukumbuluile nguavo, “Nkuma nove naua uhuma ku Ngalileya ndi? Tondesesa kaha ukauana nguove naumo uahi Kananguizi ua Njambi akahuminina ku Ngalileya.”

⁵³ [Kaha muntu na muntu uaille kuimbo liendi,

8

Mpuevo Ivakuatele oku Alinga Vupangala

¹ Vuno honi Yesu tele nayi ku Munkinda ua Oliveta.

² Cimene mene uahilukilele ku vimbalaka via Njivo ya Njambi. Kaha vantu voshe vezile kuli ikeye kaha uatumamene ha mavu nakuvalongesa.

³ Valongisi va mashiko na Vafaliseo vanehele mpuevo uje vakuatele oku alinga vupangala, nakumuimika ha lutue luavo voshe,

⁴ kaha vahandeketele kuli ikeye nguavo, “Mulongisi, ou mpuevo tua-muana alinga vupangala.

⁵ Mu lishiko lije Mosesa uatushikile lihandeka ngualio mpuevo ua cifua eci napande kumutsiha na mavue. Honi yove uhandekaho vika?”

⁶ Vahandeketele eci mukumueseka, linga vamuuaneneneho mulonga. Yesu uakotamene nakusoneka na munie uendi ha mavu.

⁷ Omo vatualeleleleho kumuihula, kaha uandukile nakuhandeka kuli vakevo nguendi, “Iya uje hhakati keni kesi na vupi aputuke kumuasha livue.”

⁸ Kaha naua uakotamene nakusoneka ha mavu.

⁹ Omo vovuile eci, vaputukile kuya umo na umo kuputukila ku vaku-luntu, kaha Yesu uasalele likaliendi na mpuevo uje yemanene nendi.

¹⁰ Yesu uandukile nakuhandeka kuli uje mpuevo nguendi, "Mpuevo, valikuli? Nkuma naumo uahi nakuhisa ndi?"

¹¹ Uahandেকেলে nguendi, "Naumo uahi, Muene."

Kaha Yesu uahandেকেলে nguendi, "Nange kunjikuhisa. Ya, kuhuma hano kuya kulutue keti ukalinge vupi naua.]"

Yesu Ikeye Ceke ca Mavu

¹² Kaha naua Yesu uahandেকেলে kuli vakevo nguendi, "Yange ceke ca mavu. Uoshe anjikava kakende mu milima vunoni akakala na ceke ca muono."

¹³ Kaha Vafaliseo vahandেকেলে kuli ikeye nguavo, "Ulinakuhana vukaleho vuove vavenia, vukaleho vuove keti vua vusunga."

¹⁴ Yesu uavakumbuluile nguendi, "Cipue vene njilinakuhana vukaleho vuange vavenia, vukaleho vuange vunapu vua vusunga omuo njitantekeya oku njihuma noku njiya, vunoni kumutantekeya oku njihuma noku njiya."

¹⁵ Mukasompo mu vuntu, vunoni yange uahi njikasompo.

¹⁶ Cipue vene nga njikasompo, kusompa cange capua ca vusunga, omuo keti likaliange njikasompo, vunoni yange na Tate uje uanjitumine.

¹⁷ Mu lishiko lieni vasoneka nguavo vukaleho vua vantu vavali vunapu vua vusunga.

¹⁸ Njihana vukaleho vuange hali yange vavenia, kaha naua na Tate uanjitumine ahana vukaleho hali yange."

¹⁹ Kaha vahandেকেলে kuli ikeye nguavo, "Ali kuli Isho?"

Yesu uavakumbuluile nguendi, "Nga kumutantekeya yange kaha na Tate kumu mutantekeya. Nga muanjitantekeye nga na Tate muamutantekeya naua."

²⁰ Uakele nakuhandeka evi oku tele ali nakulongesa mu vimbalaka via njivo ya Njambi kuyehi na mulili ua vimbongo via mulambu, vunoni naumo uahi uamukutile, omuo ntsimbu yendi tele kanda ihete.

Oku Njiya, Kumuasa Kuyako

²¹ Naua Yesu uahandেকেলে kuli vakevo nguendi, "Njili nakuya, kaha mukanjitonda, vunoni mukatsa na vupi vueni. Oku njiya, kumuasa kuyako."

²² Kaha vantuama va Vayunda vahandেকেলে nguavo, "Aya nakulitsiha ndi? Vikahoni vianalumbununa mukuhandeka nguendi, 'Oku njiya, kumuasa kuyako?'"

²³ Kaha uahandেকেলে kuli vakevo nguendi, "Yeni muhuma kuintsi, vunoni yange njihuma kuilu. Yeni mu vaka mavu, vunoni yange keti njiuahano ha mavu."

²⁴ Njamilekele nguange mukatsa ku vupi vueni, cilivene mukatsa ku vupi vueni kuvanga noho muatsiliela ngueni, 'Yange vene ikeye.'"

²⁵ Vahandেকেলে kuli ikeye nguavo, "Yove iya?"

Yesu uahandেকেলে kuli vakevo nguendi, "Vika vinjihandekela viakulifua hume hambangelo kuli yeni?"

²⁶ Njili naviavingi via kuhandeka hali yeni na viavingi via kumisompa, vunoni ou uanjitumine uapua ua vusunga, kaha njihandeka ku vaka mavu vije vinjinevu kuli ikeye."

²⁷ Kuvatantekeye nguavo uakele nakuhandeka kuli vakevo via hali Ishe.

28 Kaha honi Yesu uahandekela nguendi, “Nga muamujundula Muna Muntu, ambahoni mukatantekeye nguendi yange vene, kunjililingila viuma lika liange, vuno honi njikahandeka viuma evi kuya muje Tate nanjshikilamo.

29 Nauje uanjitumine ali nange, kanjisezele lika liange, omuo ntsimbu yoshe njikalingi via kumuvuahelesa.”

30 Oku tele ali nakuhandeka evi viuma, vavengi vatsilielege muli ikeye.

Vusunga vuka Mipatula

31 Kaha Yesu uahandekela kuli Vayunda vaje vatsilielege muli ikeye nguendi, “Nga mutualelelaha kuononoka lizi liange, kaha cilivene mu vandongisi vange va vusunga,

32 kaha mukatantekeya vusunga, na vusunga kaha vukamipatula.”

33 Vamukumbuluile nguavo, “Yetu tuvatekuluila va Avilahama kaha kanda tupueho tu vandungo ku muntu. Ulumbununa vika omo uhandeka nguove, ‘Vakamipatula?’”

34 Yesu uavakumbuluile nguendi, “Mua vusunga vene njimileka nguange, uoshe alinga vupi napu ndungo ua vupi.

35 Ndungo kakele na muhela ua kutumamenena ku ntanga ije keti yendi, vuno honi muana ikeye atumamenena ntsimbu yoshe.

36 Nga Muana akupatula, cilivene ukapua ukupatuka.

37 Njatantekeya vene nguange muvatekuluila va Avilahama, vuno honi mulinakutonda ngila yakunjitsihilamo, omuo ku muesi lizi liange muli yeni.

38 Njihandeka vije vinjinamono kuli Tate, neni naua muapande kulinga vimunevu kuli ishueni.”

39 Vamukumbuluile nguavo, “Avilahama ikeye tatetu.” Yesu uahandekela kuli vakevo nguendi,

“Nga muapuile mu vana va Avilahama, ngue muli nakulinga vialingile Avilahama.

40 Vuno honi mulinakutonda kunjitsiha, yala uje namilekesa vusunga vuje vunjevuiile kuli Njambi. Eci keti cikeco calingile Avilahama.

41 Cilivene muli nakulinga vije vialingile isho.”

Vahandekela kuli ikeye nguavo, “Yetu keti tuvana vaku vupangala, tuli na Tate umolika, ikeye Njambi likaliendi.”

42 Yesu uahandekela kuli vakevo nguendi, “Nga Njambi uapuile Ishueni, ngue muanjizange, omuo njahuma kuli Njambi kaha yange uno. Kunjalizilile lika liange, vuno honi ikeye uanjitumine.

43 Nkuma vika kumuvuisa vinjihandeka? Omuo kumutambula lizi liange.

44 Muahuma kuli Ishueni Satana, kaha muahangula kulinga mashungu a ishueni. Uapuile muka kutsiha hume hambangelo kaha uahona vusunga, omuo kumuesi vusunga muli ikeye. Omo akeja, akahandeka kuya muafuilamo, omuo ikeye uapua ua makuli naua ishe ya vaka makuli.

45 Vuno honi omuo njikahandeka vusunga, kumuasa kunjitsiliela.

46 Iya hhakati keni ahandeka nguendi nanjiuana na mulonga ua vupi? Nga njihandeka vusunga, kaha vika kumunjitsiliela?

47 Uoshe ahuma kuli Njambi evua mezi a Njambi. Mulonga omuo kumueku evuilila omuo kumuhumu kuli Njambi.”

Yesu na Avilahama

⁴⁸ Vakuluntu va Vayunda vamukumbuluile nguavo, “Nkuma kutuahan-dekele muacili omo tuahandeka ngueto u Kasamaliya kaha uli na lihamba ndi?”

⁴⁹ Yesu uakumbuluile nguendi, “Kunjesi na lihamba, vuno honi njikasingimika Tate, kaha yeni ku munjisingimika.

⁵⁰ Kunjekutonda vumpau vuange vavenia, vuno honi kuali ali nakutonda vumpau kaha ikeye naua muka kusompa.

⁵¹ Mua vusunga njimileka nguange, uoshe aniunga lizi liange kakatsiho.”

⁵² Vakuluntu va Vayunda vahandekile kuli ikeye nguavo, “Tunamono cili vene ngueto uli na lihamba. Avilahama uatsile, kaha na tunanguizi va Njambi va Njambi vatsile, vuno honi uhandeka nguove, ‘Uoshe aniunga lizi liange kakatsiho.’

⁵³ Nkuma yove u uakama kupulakana tatetu Avilahama uje uatsa ndi? Na vaje tunanguizi va Njambi va Njambi vatsile. Usinganieka nguove yove iya?”

⁵⁴ Yesu uavakumbuluile nguendi, “Nga njilihana vumpau yange vavenia, vumpau vuange kaha vunapu vuangoco. Tate ikeye muka kunjihana vumpau, ou muhandeka nguene, Njambi yeni.

⁵⁵ Cipue vene ku mumutantekeya. Vuno honi yange njimutantekeya, nga njihandeka nguange kunjimutantekeya, kaha njipua ua makuli ngue yeni. Vuno honi njamutantekeya naua njiniunga lizi liendi.

⁵⁶ Ishueni Avilahama uavuahelele ngue akamone litangua njikeja, kaha ualimuene nakuvuahelela.”

⁵⁷ Kaha Vakuluntu va Vayunda vahandekile kuli ikeye nguavo, “Kanda uhete ha miaka makumi atanu (50), honi uamumono vati Avilahama?”

⁵⁸ Yesu uahandekile kuli vakevo nguendi, “Mua vusunga vene njimileka nguange, ntsimbu kanda Avilahama a semuke, yange kunjili.”

⁵⁹ Nankuma vambatele mavue nakumuasha, vuno honi Yesu ua lishuekele nakuhuma mu vimbalaka via njivo ya Njambi.

9

Yesu Akanguisa Yala ua Semukile Vupuputua

¹ Tele Yesu alinakuenda, uamuene yala uje ua semukile vupuputua.

² Vandongisi vendi vamuhuile nguavo, “Mulongisi, iya ualingile vupi, ou yala indi visemi vendi, linga a semuke vupuputua?”

³ Yesu uavakumbuluile nguendi, “Voshe kuvalingile vupi, uasemukile vupuputua linga vipangi via Njambi visholoke muli ikeye.

⁴ Tuapande kupanga vipangi viendi uje uanjitumine tuyeni tupange ntsimbu kucili mutania, omo vutsiki vukeja tukahona kupanga.

⁵ Ntsimbu njicili ha mavu, njinapu ceke ca vaka mavu.”

⁶ Omo uamanusuile kuhandeka evi, uajekuulilile ha mavu kaha uambat-ele mavu a kupandakana na malenzi naku ahaka ha mesho a uje yala,

⁷ nakuhandeka kuli ikeye nguendi, “Ya, ukatane ku mesho ove mu cisali ca Siloame” (Siloame ilumbunuka vana mutumu). Kaha uaille nakutana omo uahilukile uaputukile kumona.

⁸ Vandambo vendi na vaje vamumuene laja tele acili muka kulomba vukuasi, vaputukile kuihula nguavo, “Ou keti ikeye uje yala uakele nakutu-mama na kulomba vukuasi ndi?”

⁹ Vamo vaputukile kuhandeka nguavo, “Ikeye vene.” Vamo vahandekile nguavo, “houe, vuno honi muntu lika ueka uakulifua nendi.”

Kaha ikeye uahandekile nguendi, “Yange vene uje yala.”

10 Vuno honi vatualeleleho kumuihula nguavo, “Kaha mesho ove anemuka vati?”

11 Uavakumbuluile nguendi, “Yala ivatumbula nguavo Yesu uambatele mavu nakunjihaka ha mesho, nakuhandeka kuli yange nguendi, ‘Ya ku Siloame ukatane.’ Kaha njaile nakutana mukemo njaputukile kumona.”

12 Vahandekela kuli ikeye nguavo, “Ali kuli honi?”

Uahandekela nguendi, “Kunjitantekeya.”

Vafaliseo Vatondesesa ha Kukanguisa eci

13 Vanehele uje yala uapuile kapuputua kuli Vafaliseo.

14 Liapuile litangua lia Sapalalo lije Yesu uemuisile uje yala.

15 Kaha Vafaliseo naua vaputukile kumuihula nguavo, cineja vati linga umone. Uahandekela kuli vakevo nguendi, “Uanjihakele mavu ha mesho ange. Kaha njataneneko, mukemo njili nakumona.”

16 Vamo va Vafaliseo vahandekela nguavo, “Ou yala kahumu kuli Njambi, omuo kekuniunga litangua lia sapalalo.”

Vuno honi vakuavo vahandekela nguavo, “Muka vupi asa vati kulinga vitantekeyeso evi?” Kaha vali hangunuine.

17 Kaha Vafaliseo vahandekela naua kuli uje kapuputua nguavo, “Uhandekaho vika hali ikeye? Mesho ove akeo anemuisile.”

Uahandekela nguendi, “Ikeye Kananguizi ua Njambi.”

18 Vakuluntu va Vayunda kuvatsilelele nguavo uapuile kapuputua kaha ali nakumona naua, kuvanga noho vasanene visemi va uje yala ivemuisile

19 nakuvehula nguavo, “Ou ikeye vene muneni, uje imuahandekela nguendi nasemuka vupuputua ndi? Cija vatihoni linga amone?”

20 Visemi vendi vakumbuluile nguavo, “Tuatantekeya vene ngueto ou ikeye munetu, naua ikeye vene uje uasemukile vupuputua,

21 vuno honi kutuatantekeye cije canehesa linga amone, kaha kutuatantekeye naua nauje nemuisa mesho endi. Muhuliseni, mukuluntu alihandekela ikeye vavenia.”

22 Visemi vendi vahandekela eci omuo vateuele vantuama va Vayunda, omuo vantuama va Vayunda valitavasane nguavo uoshe ahandeka nguendi Yesu ikeye Kilistu vakamusheka mu njivo ya malombelo.

23 Nankuma visemi vendi vahandekela nguavo, “Nakolo, muhuliseni.”

24 Nankuma vasanene uje yala uapuile kapuputua lua mucivali, kaha vahandekela kuli ikeye nguavo, “Hana kaleso kuli Njambi! Tuatantekeya ngueto ou yala napu muka vupi.”

25 Uakumbuluile nguendi, “Kunjitantekeya indi muka vupi indi kuahi. Cuma cimo cinjitantekeya lika nguange njapuile njikapuputua, vuno honi hano njimona.”

26 Vahandekela kuli ikeye nguavo, “Nalingile vika kuli yove? Nakuimuisa vati?”

27 Uavakumbuluile nguendi, “Njamilekesa laja, vuno honi ku muanjivuilile. Vika mutondela naua kucivua? Neni naua mutonda kupua vandongisi vendi ndi?”

28 Kaha vaputukile nakuhandeka nguavo, “Yove ndongisi uendi, vuno honi yetu tuvandongisi va Mosesa.

29 Tuatantekeya ngueto Njambi uahandekela kuli Mosesa, vuno honi hali ou yala, kutuatantekeye kuje kuahuma.”

30 Uje yala uakumbuluile nguendi, “Eci cinapu cuma cakukomouesa! Kumuatantekeye kuje ahuminina, vuno honi nemuisa mesho ange.

³¹ Tuatantekeya ngueto Njambi kekuivuilila kuva ka vupi, vuno honi akevuilila kuli uje muka kumulemesa na uje muka kuononoka cizango cendi.

³² Hume kuva tangelele mavu, naumo uahi uevua muntu uje emuisa muntu uasemukile vupuputua.

³³ Nga ou yala kahumine kuli Njambi, ngue nevi ali nakulinga viahi."

³⁴ Vamukumbuluile nguavo, "Yove uasemukililile mu vupi, nkuma utonda kutulongesa ndi?" Kaha vamushekele mu njivo ya malombelo.

Vupuputua vuamu Cimbembesi

³⁵ Omo Yesu uevuile nguavo vanamusheke, kaha omo uamuuanene, uahandekele nguendi, "Uatsiliela muli Muna Muntu ndi?"

³⁶ Uamukumbuluile nguendi, "Napu iya, Muene? Njileke, linga njimut-silie." "

³⁷ Yesu uahandekele kuli ikeye nguendi, "Uamumono, nou ali nakuhandeka kuli yove ikeye vene."

³⁸ Uahandekele nguendi, "Muene, njitsiliela." Kaha uamulemesele.

³⁹ Yesu uahandekele nguendi, "Njezile hano ha mavu mu kusompa linga vaje kuvamono linga vamone, naua navaje vamaona linga keti vamone."

⁴⁰ Vamo va Vafaliseo vaje vakele hayehi nendi vovuile eci vahandekele kuli ikeye nguavo, "Cili vene netu naua tutupuputua ndi?"

⁴¹ Yesu uahandekele kuli vakevo nguendi, "Nga muapuile tupuputua, ngue kumuesi na vupi. Vuno honi muhandeka ngueni, 'Tumona,' vupi vueni hanga vuakala."

10

Cisimo ca Kaniungi

¹ Yesu uahandekele nguendi, "Mua vusunga vene njimileka nguange, uoshe uje akovelela ku cikolo ca limba lia vampanga napu kaniungi ua vusunga, vuno honi uje alikuasesa ngila yeka napu muizi cipue muhuza,

² vuno honi uje akovelela ku cikolo napu kaniungi ka vampanga.

³ Muka kuniunga ku cikolo akamushokuelela cikolo, kaha vampanga vakevu lizi liendi. Akavasana vampanga vendi ha lizina nakuvatuamenena mukulovoka.

⁴ Omo nga natuhuisa voshe, akai kulutue luavo, kaha vampanga vaka mukavangeya omuo vatantekeya lizi liendi.

⁵ Kuvakakava mungenzi, vuno honi vakamuteua omuo kuvatantekeya lizi lia vangenzi."

⁶ Yesu ualikuasesele mezi aua kuli vakevo, vuno honi kuvevuisisile viakele nakuhandeka kuli vakevo.

Yesu Ikeye Kaniungi Uacili

⁷ Kaha naua Yesu uahandekele kuli vakevo nguendi, "Cili vene njimileka nguange, yange cikolo ca vampanga.

⁸ Voshe vezile kulutue luange vapuile vezi na mihuza, vuno honi vampanga kuvevuililile kuli vakevo.

⁹ Yange cikolo, uoshe akovela kuhitila muli yange, akovoka, kaha akakovela nakulovoka na kuuana muila ua cili.

¹⁰ Muizi akeja lika na kuiva, na kutsiha na kupihisa, yange njezilile lika linga vakale na muono uacili mukushula.

¹¹ "Yange kaniungi uacili. Kaniungi uacili akatsila vampanga vendi.

¹² Uakukumuna uje keti kaniungi naua kakele na vampanga, omo amona kangunga kaha aseza vampanga na kuteua, kaha uje kangunga akuata vaje vampanga nakuvashandola.

¹³ Uje uakukumuna ateua omuo kazangele vampanga.

¹⁴ Nji kaniungi uacili, njitantekeya vange kaha vange naua vanjitan-tekeya,

¹⁵ ngue omuo Tate anjitantekeya nange naua njitantekeya Tate, kaha njitsila vampanga vange.

¹⁶ Kaha njili na vampanga veka, vaje keti va mulimba lino, njapande kuvaneha naua, kaha vakovuulila lizi liange. Kaha vakapua vutanga vumo, na kaniungi umo.

¹⁷ “Mucifua eci vene Tate uanjizanga, omuo njihana muono uange, linga njikauambate naua.

¹⁸ Naumo uahi akauambata kuli yange, vuno honi njihana muono uange mukulihana. Njili nanzili yaku utula, naua njili nanzili yaku uambata, eci kushika njinacambata kuli Tate.”

¹⁹ Kaha naua vantuama va Vayunda valihangunuine omuo ya mezi aua.

²⁰ Vuingi vuavo vahandekele nguavo, “Ali na lihamba naua nazaluka, vika muli naku muivuulilila?”

²¹ Vakuavo vakele nakuhandeka nguavo, “Aua keti mezi a muntu uje ali na lihamba. Nkuma lihamba liasa kuimuusa kapuputua ndi?”

Yesu Vamuviana

²² Ha ntsimbu ije ciuano ca Kukundika cakele ku cihela ca Yelusalema. Capuile cisika,

²³ na Yesu uakele nakuenda mu vimbalaka via njivo ya Njambi, mu mbalanda ya Solomoni.

²⁴ Kaha vantuama va Vayunda vamuzengelekele nakuhandeka kuli ikeye nguavo, “Vintsimbu vingahi ukatuseza mu citanga? Nga yove Kilistu tuleke vusunga.”

²⁵ Yesu uavakumbuluile nguendi, “Njamilekele vuno honi ku muanjit-silielelele. Vipangi vije njikapanga mu lizina lia Tate, vihandeka vukaleho hali yange,

²⁶ vuno honi kumuvitsiliela, omuo kumuakundamene ku vampanga vange.

²⁷ Vampanga vange vakevu lizi liange, kaha njivatantekeya naua vakan-jikavangeya.

²⁸ Njikavahana muono uayaye, naua kuvakanongo. Naumo uahi akavahumisa mu livoko liange.

²⁹ Vije viananjihana Tate vinapu viakama kupulakana vioshe, kaha naumo uahi asa kuvihumisa mu livoko lia Tate.

³⁰ Tate nange tunapu umolika.”

³¹ Vantuama va Vayunda vambatele mavue linga vamuashe.

³² Yesu uavakumbuluile nguendi, “Njamipangela vipangi viacili viavingi viakuhuminina kuli Tate, hali vioshe evi njalingi cilihoni munjashela mavue?”

³³ Vantuama va Vayunda vamukumbuluile nguavo, “Keti nguavo ha vipangi viacili tukuashela mavue, vuno honi yove uli nakushaula Njambi, omuo yove u muntu lika vuno honi ulinakulilinga ngue u Njambi.”

³⁴ Yesu uavakumbuluile nguendi, “Nkuma kuvacisonekele mu lishiko lieni nguavo, Njahandেকেle nguange, mu vanjambi ndi?”

³⁵ Nga kuli vaje lizi lia Njambi liezile vavatumbuile nguavo 'vanjambi' (naumo uahi asa kuhaka kumukulo vije vivihandeka visoneka),

³⁶ nkuma muhandeka ngueni uje Tate yanalelesa nakumutuma ha mavu alinakushaula Njambi omuo njahandeketele nguange, 'Nji Muna Njambi ndi?'

³⁷ Nga kunjesi nakupanga vipangi via Tate, kaha keti munjitsilie,le,

³⁸ vuno honi nga njilinakuvipanga, cipue vene kumunjitsilie,le, tsiliele ni vipangi, linga mukatantekeye na kuvua ngueni Tate ali muli yange kaha nange njili muli Tate."

³⁹ Kaha vesekele kumukuta vuno honi uapusunukile mu mavoko avo.

⁴⁰ Kaha uahilukilile naua musinia lia ndonga ya Yundau ku cihela cije Iuano uakele nakumbuitikila ha kulivanga, kaha uakelele kuje.

⁴¹ Vavengi vezile kuli ikeye nakuhandeka nguavo, "Iuano kalingile vitan-tekeyeso vuno honi viose vije Iuano uahandeketele hali ou yala viapuile via vusunga."

⁴² Kaha vavengi vamutsilie,le,le.

11

Kutsa ca Lazalu

¹ Kuakele yala uakele nakuvavala ua lizina lia Lazalu uaku Mbeteniya, kuje kuvakele vamunaina Maliya na Mata.

² Ou ikeye Maliya uje uetilile Muene mazi akunika aseho nakumuhunda ku viliato na vinkambu viendi ikeye uje munaina Lazalu uakele naku-vavala.

³ Nankuma vamuanaye vatumine mezi kuli Yesu nguavo, "Muene, uje kavusamba kove ali nakuvavala."

⁴ Vuno honi omo Yesu uacivuile uahandeketele nguendi, "Eci kuvavala keti ca kutsa, vuno honi cinapu ca vumpau vua Njambi, linga Muna Njambi vamujundule kuhitila muli cikeco."

⁵ Yesu uazangele Mata na munaina Lazalu.

⁶ Munima yakuivua nguavo Lazalu ali nakuvavala, uatumameneko naua matangua avala kuje kuakele.

⁷ Kaha munima yakuivua ou muzimbu uahandeketele kuli vandongisi vendi nguendi, "Tuyeni ku nganda ya Yundeya naua."

⁸ Vandongisi vendi vahandeketele kuli ikeye nguavo, "Lambi, vantuama va Vayunda vatondele kukuasha mavue, nkuma uciyako naua ndi?"

⁹ Yesu uavakumbuluile nguendi, "Nkuma keti mahola likumi na avala ha litangua ndi? Vaje vakakuenda mutania, kuvekutsutsuka omuo vakamono ceke ca ha mavu.

¹⁰ Vuno honi vaje vakakuenda vutsiki vakatsutsuka, omuo ceke kucesi muli vakevo."

¹¹ Munima yakuhandeka eci, uavalekele nguendi, "Kavusamba ketu Lazalu nakosa tulo, vuno honi njiya naku muhindula mutulo."

¹² Vandongisi vendi vahandeketele kuli ikeye nguavo, "Muene, nga nakosa tulo, kaha akahinduka."

¹³ Yesu uahandeketele kutsa ca Lazalu, vuno honi vakevo vasinganiekele nguavo nahandeka nguendi nakosa tulo lika.

¹⁴ Kaha Yesu uavalekele vusunga nguendi, "Lazalu natsi.

¹⁵ Omuo yeni njavuahahelela ngeci kunjakeleko, linga mutsiliele. Vuno honi tuyeni kuli ikeye."

¹⁶ Tomasi, ivatumbuile nguavo Mpasa, uahandeketele kuli vakuavo van-dongisi nguendi, "Netu tuyeni, linga tukatse nendi."

Yesu Ikeye Kusanguka na Muono

¹⁷ Omo Yesu uahetele, uauanene Lazalu tele ali na matangua auana mu cihilo.

¹⁸ Mbeteniya yapuile kuyehi na nganda ya Yelusalema mu mantambo atatu lika,

¹⁹ kaha vuingi vua Vayunda vezile kuli Mata na Maliya mukuva simpisa omuo hakutsa ca munaina Lazalu.

²⁰ Omo Mata uevuile nguavo Yesu ali nakuija, uamusheshele, tele Maliya ali mu njivo.

²¹ Mata uahandekete kuli Yesu nguendi, "Muene, nga unakele kuno, muanetu ngue katsile.

²² Vuno honi cipue ntsimbu ino njatantekeya nguange vioshe ulomba kuli Njambi, akakuhnavio."

²³ Yesu uahandekete kuli ikeye nguendi, "Muanoko ahinduka naua."

²⁴ Mata uahandekete kuli ikeye nguendi, "Njatantekeya vene nguange akahinduka ha ntsimbu ya kusanguka ha litangua lia mamanusuilo."

²⁵ Yesu uahandekete kuli ikeye nguendi, "Yange kusanguka na muono, voshe vaje vatsiliela muli yange, cipue vakatsa, vakayoya naua,

²⁶ kaha uoshe ayoya nakutsiliela muli yange kakatsiho. Utsiliela eci ndi?"

²⁷ Uahandekete kuli ikeye nguendi, "Eyo, Muene, Njatsiliela nguange yove Kilistu Muna Njambi, uje akeja hano ha mavu."

Yesu Alila

²⁸ Munima yakuhandeka evi, Mata uaille nakusana munaina Maliya, uamusanenene kuali kaliendi nakumulekesa nguendi, "Mulongisi uno ali nakukusana."

²⁹ Kaha omuo uacivuile, uakatukile vuasi vuasi nakuya kuli Yesu.

³⁰ Honi Yesu tele kanda ahete hembo, vuno honi uakele ku cihela kuje kualiuaneanene na Mata.

³¹ Vayunda vaje vakele nendi mu njivo nakumusimpisa, vamuene Maliya akatuka vuasi vuasi nakuya hambanza, vamukavele omuo vasinganiekele nguavo alinakuya ku cihilo nakulililako.

³² Omo Maliya uahetele kuje kuakele Yesu nakumumona, uauililile ku viliato viendi nakuhandeka nguendi, "Muene, nga unakele kuno ngue muanetu katsile."

³³ Omo Yesu uamumuene alinakulila na vaje Vayunda vezile navo, uakele na vusiua cikuma mu Cimbembesi.

³⁴ Kaha uahandekete nguendi, "Mua mutsindi kuli?"

Vahandekete kuli ikeye nguavo, "Muene, ija umone."

³⁵ Yesu ualilile.

³⁶ Kaha Vayunda vahandekete nguavo, "Haaa! Taleni mua muzangelele!"

³⁷ Vuno honi vamo vavo vahandekete nguavo, "Keti ikeye uje uemuisile uje yala ua kapuputua ndi, vikahoni kalingililile ou yala linga keti atse?"

Yesu Asanguka Lazalu

³⁸ Kaha Yesu naua uakele na vusiua cikuma, kaha uaille ku cihilo. Capuile cihilo cakuhinda mu livue, kuakele livue ku cikolo ca cihilo.

³⁹ Yesu uahandekete nguendi, "Humiseniko livue eli."

Mata munaina ya uje yala uatsile, uahandekete kuli ikeye nguendi, "Muene, ntsimbu ino alinakunika, omuo ali na matangua auana mu cihilo."

⁴⁰ Yesu uahandekete kuli ikeye nguendi, "Nkuma kunjakulekele nguange nga uatsilieelele nga umona vumpau vua Njambi ndi?"

⁴¹ Kaha vahumisileko livue. Kaha Yesu uandukile nakuhandeka nguendi, "Tate, njantsantselako ha kunjivua.

⁴² Njatan-tekeya nguange ukanjivu ntsimbu yoshe, vuno honi njahandeka evi ha mesho a vantu ava vanemana hano, linga vatsilie le nguavo yove uanjitumine."

⁴³ Munima yakuhandeka evi, uatambakanene nguendi, "Lazalu, humamo!"

⁴⁴ Uje uatsile uahindukile, oku mavoko na mikono yendi yakukuta na vintanga, na cihanga cendi vacizengele na ntanga. Yesu uahandekela kuli vakevo nguendi, "Muzituleni, kaha mueceleni aye."

Vutumbe vua Kutsiha Yesu

(Mateu26:1-5; Mako14:1-2; Luka22:1-2)

⁴⁵ Vuingi vua Vayunda vaje vezile na Maliya omo vamuene vialingile Yesu, vatsilie lele muli ikeye,

⁴⁶ vuno honi vamo vaile kuli Vafaliseo nakuvalekesa vialingile Yesu.

⁴⁷ Nankuma vakuluntu va tusasendote na Vafaliseo valiuanene na vaka mpunga nakuhandeka nguavo, "Vika vituapande kulinga? Omuo ou yala alinakulinga vitantekeyeso viavingi.

⁴⁸ Nga tumuecelela muje vene, kaha muntu uoshe akatsiliela muli ikeye, kaha Valoma vakeja naku pihisa njivo ya Njambi na lifuti lietu."

⁴⁹ Vuno honi umo uavo, Kayafase, uje uapuile kasasendote uakama ha muaka uje, uahandekela kuli vakevo nguendi, "Navimo viahi vimutan-tekeya!"

⁵⁰ Kumuevuile nguavo cacili muntu umolika kutsila vantu, kupulakana lifuti lioshe kunonga."

⁵¹ Kahandekela eci mu nzili yendi lika, vuno honi mukupuako kasasendote uakama ha muaka uje, uananguile nguendi Yesu napande kutsila vantu,

⁵² kaha keti vantu lika vuno honi kukungulula vana va Njambi na vaje valishandokela ku mafuti eka.

⁵³ Kuhuma ha litangua lije vatondele ngila ya kumutshilamo.

⁵⁴ Nankuma Yesu kalisholuele ceka naua kuli Vayunda, vuno honi uahumine kuje nakuya ku nganda ije ivatumbuile Efalime ku mutambela uje uakele kuyehi namu mpambo, kaha uakakele kuje na vandongisi vendi.

⁵⁵ Tele Ciuano ca Paseka ya Vayunda cakele kuyehi, vavengi vahumine mu lifuti nakuya ku Yelusalema ntsimbu kanda Paseka ihete nakulilelesa vakevo vavenia.

⁵⁶ Vakele nakutonda Yesu kaha vakele nakulihozola umo na mukuavo oku tele vali mu vimbakala via njivo ya Njambi nguavo, "Musinganieka vika? Nkuma cilivene keja kuno ku ciuano ndi?"

⁵⁷ Honi vakuluntu va tusasendote na Vafaliseo vashikile nguavo uoshe uje atantekeya kuje kuali Yesu avalemuise, linga vamukuate.

12

Maliya Avuavesa Yesu ku Mbete niya

(Mateu26:6-13; Mako14:3-9)

¹ Tele matangua atanu na limo kanda ahete a paseka, Yesu uezile ku Mbete niya kuimbo lia Lazalu, uje ya sanguile Yesu kuvatsi.

² Vamuvuaheselele kulia ca cinguezi, Mata uamuhanene via kulia, na Lazalu uapuile umo uavaje vakele nendi ku mesa.

³ Maliya uambatele kantsazi kakupuisa hhakati ka mazi a luengo luacili nakuvuavesa ku viliato via Yesu nakuhunda viliato viendi na vinkambu viendi, kaha njivo yoshe yashulile na luengo luacili lua mazi.

⁴ Vuno honi Yundasa Sakaliote, umo ua vandongisi vendi (ikeye uje akamuenda vungungu), uahandekele nguendi,

⁵ “Vika aua mazi a luengo lua cili ku va alandesela ha vimbongo via muuaya uaya viakupua vihita vitatu (300) na kuviana ku tuhutu?”

⁶ Uahandekele evi keti ngue uakele nakuniunga vuino tuhutu vunono honi omuo uapuile muizi, uakele na cikuama cakuhaka vimbongo muje muakele nakuiva.

⁷ Yesu uahandekele nguendi, “Mueceleni atumbikile ha ntsimbu yange ya kunjitsinda.

⁸ Tuhutu mukala navo ntsimbu yoshe, vunono honi yange kumukakala nange ntsimbu yoshe.”

Vutumbe vua kutsiha Lazalu

⁹ Omuo civunga ca Vayunda ca tantekeyele nguavo ali kuje, vezile keti lika omuo ya Yesu vunono honi kuija nakumona Lazalu, uje ivasanguile ku vatsi.

¹⁰ Kaha vakuluntu va tusasendote vasinganiekele muakutsihila Lazalu naua.

¹¹ Omuo ya vije vialingiuile kuli ikeye vuingi vua Vayunda va vavianene kaha vatsilielegele Yesu.

Yesu Akovela na Vumpau mu Yelusalema

(Mateu21:1-11; Mako11:1-11; Luka19:28-40)

¹² Omuo kuacele liamukuavo vantu vavengi vezile ku ciuano kaha vovuile nguavo Yesu ali nakuija ku nganda ya Yelusalema.

¹³ Kaha vambatele mintango ya miti ya mambale nakumushesha oku vatambeka nguavo, “Hosana! Hosana! Uakukuisuliua uje eja mu lizina lia Muene, Shukulu ua Isaleli!”

¹⁴ Kaha Yesu uauanene muna cimulu, kaha ualondeleho nakutumama, ngue muje vacisoneka mu visoneka nguavio,

¹⁵ “Keti uteue, muana ua mpuevo ua Zioni, tala, Muene yove ali nakuija

natumama ha muongo ua muna cimulu!”

¹⁶ Vandongisi vendi kuvatantekeyele evi hakulivanga, vunono honi omuo Yesu vamujunduile mu vumpau vuendi, kaha vanukile nguavo evi viuma vavisonkele hali ikeye kaha vialingiuile kuli ikeye.

¹⁷ Civunga cije cakele nendi omo muahinduile Lazalu na kumuhumisa mu cihilo nakumusangula kuvatsi vahanene vukaleho.

¹⁸ Omo civunga cevuike nguavo nalingi vitantekeyeso kaha vaile nakuli-uana nendi.

¹⁹ Kaha Vafaliseo vahandekele kuli umo na mukuavo nguavo, “Talen, mavu oshe ali nakumukava.”

Vangelengu vamo vatonda Yesu

²⁰ Hhakati kavaje vaile na kulemesa ku ciuano, vamo vapuile Vangelengu.

²¹ Kaha vezile kuli Filipu uje uahumine ku Mbetesainda ku nganda ya Ngalileya, vahandekele kuli ikeye nguavo, “Muene, tutonda linga tumone Yesu.”

²² Filipu uaile nakuleka Anduleo, kaha Anduleo uaile na Filipu nakuleka Yesu.

²³ Kaha Yesu uavakumbuluile nguendi, “Ntsimbu inahete linga Muna Muntu vamujundule.

²⁴ Cilivene njimileka nguange, kuvanga nona ya tiliku iuile ha mavu na kutsa, kaha ikakala likaliayo, vuno honi nga itsa, kaha ikahaka vushuka vua vuingi.

²⁵ Voshe vaje vazanga miono yavo vaka izimbalesa, kaha na vaje voshe vazinda miono yavo hano ha mavu vanalitulikila miono yayaye.

²⁶ Nga uoshe uje anjipangela napande kunjikava, kaha kunjikakala yange, na vangamba vange vakakalako. Uoshe anjipangela, na Tate akamusingimika.

Yesu Ahandeka ha Kutsa cendi

²⁷ “Mutima uange uli nakulinienga. Kaha njikahandeka vika, “Tate, njohiele ha hola ino ndi? Houe, omuo ha cuma eci njinahete ha hola ei.

²⁸ Tate, lemesa lizina liove.”

Kaha lizi liahumine muilu ngualio, “Njalilemesa, kaha njikalilemesa naua.”

²⁹ Civunga cije cemanene kuje cevule evi kaha vahandekela nguavo muhiato unalumu. Veka vahandekela nguavo, “Kangelo nahandeka kuli ikeye.”

³⁰ Yesu uavakumbuluile nguendi, “Eli lizi linezila omuo yeni, keti yange.

³¹ Eci cinapu kusompa ca mavu, honi muka kuyula ua hano ha mavu vaka muhumisaho.

³² Nga yange omo vaka njijundula hano ha mavu, vantu voshe vakeja kuli yange.”

³³ Uahandekela eci kumuesa kutsa cije cakatsilamo.

³⁴ Civunga camukumbuluile nguavo, “Tunevu ku lishiko ngualio Kilistu akayoya miaka yoshe. Cineja vati uhandeke nguove Muna Muntu vakamujundula? Iya honi ou Muna Muntu?”

³⁵ Yesu uahandekela kuli vakevo nguendi, “Ceke cili neni lika muka ntsimbu kakandende. Endeni oku muli na ceke, linga milima keti imihiane, uje enda mu milima, kekutantekeya kuje ali nakuya.

³⁶ Ha ntsimbu ije mucili na ceke, tsilieleni mu ceke, linga mukapue vana va ceke.”

Kuhona Kutsiliela ca Vantu

Munima yakuhandeka evi, Yesu uaile nakulishueka.

³⁷ Cipue vene ualingile vitantekeyeso viavingi hhakati kavo, vuno honi vantuaama va Vayunda kuvamutsilieele.

³⁸ Eci capuile kushulisisa lizi liahandekela kananguizi ua Njambi Isaya ngualio:

“Muene, iya natsiliela muzimbu uetu,

kaha kuli iya livoko lia Muene kuvanalisholuela?”

³⁹ Kaha kuvatsilieelele, omuo Isaya naua uahandekela nguendi,

⁴⁰ “Napuisa mesho avo vupuputua

nakukolesa mitima yavo,

linga mesho avo keti amone,

na mitima yavo keti ivuisise kaha kuvakatengulukila

kuli yange linga njika vakanguise.”

⁴¹ Isaya uahandekela eci omuo uamuene vumpau vuendi na kuhandeka hali Yesu.

⁴² Cipue vene ngoco, vamo vantuama va Vayunda vavengi vatsilielelele muli ikeye. Vuno honi omuo hakuteua Vafaliseo kuvalitavelelele, hakuteua nguavo vakavasheka mu njivo ya malombelo,

⁴³ omuo vazangele kulemesa ca vantu kupulakana kulemesa ca Njambi.

Mezi a Yesu Akavasompa

⁴⁴ Kaha Yesu uatambakanene cikuma nguendi, “Uoshe atsiliela muli yange, katsilielele muli yange lika vuno honi muli uje ua njitumine.

⁴⁵ Kaha uoshe uje amona yange, namono naua na uje ua njitumine.

⁴⁶ Njineja ngue ceke ha mavu, linga uoshe atsiliela muli yange keti akale mu milima.

⁴⁷ Kunjikasompo uoshe uje evua mezi ange nakuhona kuaniunga, omuo kujezile mukusompesa mavu, vuno honi muku ovola.

⁴⁸ Uje uoshe anjiviana nakuhona kutambula lizi liange alina muka kusompa, ha litangua liama manusuilo lizi eli njahandeka likapua ngue muka kusompa.

⁴⁹ Omuo kunjahandekela mu nzili yange lika, vuno honi Tate uje uanjitumine ikeye vavenia nanjihana lishiko muje munjikahandekela.

⁵⁰ Kaha njatantekeya nguange lishiko liendi linapu muono uyayaye. Evi njihandeka, nankuma, njihandeka kuya muje Tate muananjilekela.”

13

Yesu Atanesa Viliato via Vandongisi vendi

¹ Tele kanda ciuano ca Paseka cihete, Yesu uatantekeyele nguendi ntsimbu yendi yakuhuma ha mavu nakuya kuli Ishe inahete. Ha kuzanga vendi vaje vakele ha mavu, uavazangele nakumamanusuilo.

² Kaha ha kulia ca cinguezi, Satana tele nakovela laja mu mutima ua Yundasa Sakaliote, muna Simoni, uje akamuenda vungungu,

³ Yesu ha kutantekeya nguendi Ishe namuhana vioshe mu mavoko endi, omuo uahumine kuli Njambi kaha naua ali nakuhiluka kuli Njambi,

⁴ uakatukile ku mesa, uashuluile cikovelo cendi cahelu, kaha ualikutile ntanga yendi mu mbunda.

⁵ Kaha uetilile mema mu lilonga, nakuputuka kutanesa viliato via vandongisi vendi, kaha uavahundile na ntanga ije ya likutile mu mbunda.

⁶ Uezile kuli Simoni Petulu, kaha Petulu uahandekela nguendi, “Muene, ukatanesa viliato viange ndi?”

⁷ Yesu uamukumbuluile nguendi, “Vinjili nakulinga kumuvitantekeya ha ntsimbu ino, vuno honi kulutue muka vitantekeya.”

⁸ Petulu uahandekela kuli ikeye nguendi, “Ku ukatanesaho viliato viange.”

Yesu uamukumbuluile nguendi, “Nga kunjikutanesa, ku ukapu naua ndongisi uange.”

⁹ Simoni Petulu uahandekela kuli ikeye nguendi, “Muene, keti utanese lika viliato viange vuno honi utanese na mavoko ange na mutue uange!”

¹⁰ Yesu uahandekela kuli ikeye nguendi, “Uoshe uje natana katela kutana naua, kuvanga lika ku viliato viendi, vuno honi muvila uendi una lele laja, kaha neni mualele, vuno honi keti muva voshe.”

¹¹ Omuo uatantekeyele uje akamuenda vungungu, ha cuma eci mukemo uahandekela nguendi, “Keti muva voshe munalele.”

¹² Omuo Yesu uamanusuile kuvatanesa ku viliato viavo, kaha uambatele kazaku kendi nakuzala, uahilukile nakukatamama ku mesa, kaha uahandekela kuli vakevo nguendi, “Muatantekeya vinjinalingi kuli yeni ndi?”

13 Mukanjitumbula nguenu, “Mulongisi na Muene, eyo mukahandeka muacili, omuo omu mukemo vene munjafua.

14 Nga yange vene Muene ueni na Mulongisi ueni, njamitanesa ku viliato vieni, neni naua muapande ku tanesa umo na mukuavo ku viliato vieni.

15 Omuo yange njamihana cimueso, linga neni mulinge munjinalingi kuli yen.

16 Cilivene muavusunga njimileka nguange, ngamba kapulakana muene uendi, cipue kanganda kasa kupulakana uamutumine.

17 Nga muatantekeya evi viuma, kaha mupua vakukuisulua nga muvilinga.

18 “Kunjesi nakuhandeka muva voshe, njatantekeya ava njinahangula. Vuno honi linga visoneka vilishulisile vije vihandeka nguavio, ‘Uje ualile mbolo yange lelo na njitengulukila.’

19 Njimileka eci ha ntsimbu ino kanda vilingiue, linga omuo vikalingiua mukatsiliele nguenu, ‘Yange vene ikeye.’

20 Cilivene muavusunga njimileka nguange, uoshe uje atambula uje injituma natambula yange, kaha uoshe anjitambula atambula uje uanjitumine.”

Yesu Ahandeka hali Uje Akamuenda Vungungu

(Mateu26:20-25; Mako14:17-21; Luka22:21-23)

21 Munima yakuhandeka evi, Yesu uakele na vusiua mu Cimbembesi, kaha uahandekela nguendi, “Cilivene muavusunga njimileka nguange, umo ueni akanjenda vungungu.”

22 Vandongisi vendi valitalele umo na mukuavo, kuvatantekeyele uje yahandekela.

23 Umo ua vandongisi vendi uje Yesu yazangele cikuma, uajendamenene cikuma ha ntulo ya Yesu,

24 nankuma Simoni Petulu uayevetele kuli ikeye nguendi, “Muihule atuleke uje yali nakuhandeka.”

25 Omuo uajendamenene cikuma kuli Yesu, uamuhuile nguendi, “Muene, nkuma iya honi?”

26 Yesu uamukumbuluile nguendi, “Uje vene injikahana ei mbazuvuila ya mbolo munima yakuitanta mu lilonga.” Kaha omo naitanta, uaihanene Yundasa, muna Simoni Sakaliote.

27 Munima yakutambula ije mbazuvuila ya mbolo, Satana uakovelele muli Yundasa. Kaha Yesu uahandekela kuli ikeye nguendi, “Linga vuasi vije viutonda kulinga.”

28 Naumo uahi kuje ku mesa uatantekeyele vika uahandekela evi kuli ikeye.

29 Vamo vasinganiekele nguavo, omuo Yundasa uapuile muka kuniunga cikuama ca vimbongo, Yesu uamulekele nguendi, “Landa vije vitondeka ha ciuano,” cipue ahaneko vimo kuli tuhutu.

30 Munima ya kutambula mbazuvuila ya mbolo, hajevene uahumineho. Tele vutsiki.

Lishiko Lialiha

31 Omo Yundasa uahumineho, Yesu uahandekela nguendi, “Vuavuno Muna Muntu vamulemesa, kaha muli ikeye naua Njambi vamulemesa.

32 Nga Njambi vamulemesa kuhitila muli ikeye, na Njambi naua akamulemesa kuhitila muli ikeye vavenia, nakumulemesa ha ntsimbu ije vene.

³³ Vana vavandende, njili neni katsimbu kakandende lika. Mukanjitonda, ngue muje munjahandekela kuli vantuaama va Vayunda mukemo naua njihandeka kuli yeni nguange, 'Kunjili nakuya, kumukasa kuyako.'

³⁴ Njimihana lishiko lialiha: lizangeni umo na mukuavo. Ngue munji-namizangelamo, neni naua muapande kulizanga umo na mukuavo.

³⁵ Hakulinga eci vantu voshe vakatantekeya nguavo mu vandongisi vange, nga muli na cizango hali umo namukuavo."

Yesu Ahandeka ngeci Petulu Akamuviana

(Mateu26:31-35; Mako14:27-31; Luka22:31-34)

³⁶ Simoni Petulu uahandekela kuli ikeye nguendi, "Muene, kuli uli-nakuya?" Yesu uamukumbuluile nguendi, "Oku njili nakuya kumuasa kunjikava ha ntsimbu ino, vuno honi mukanjikava munima."

³⁷ Petulu uahandekela kuli ikeye nguendi, "Muene, vika kunjasela kukukava ha ntsimbu ino? Njikatula muono uange hali yove."

³⁸ Yesu uakumbuluile nguendi, "Nkuma ukasa kutula muono uove hali yange ndi? Muavusunga vene njikuleka nguange, ntsimbu kanda ndemba atambeke ukanjiviana lutatu."

14

Yesu Ikeye Ngila yakuya kuli Tate

¹ "Keti mulinienge mu mitima yeni, tsilieleni muli Njambi kaha tsilieleni muli yange naua."

² Mu njivo ya Tate muakala milili yaingi, nga ketimo, nga njamileke nguange njiji nakumivuahesela cihela ndi?

³ Honi nga njiji nakumivuahesela cihela, njikeja naua nakumiambata yange vavenia, linga kuje kunjakala neni mukakaleko.

⁴ Kaha honi mukatantekeya ngila ya kuje ku cihela kunjili nakuya."

⁵ Tomasi uahandekela kuli ikeye nguendi, "Muene, kututantekeya oku ulinakuya, tukatantekeya vati ngila?"

⁶ Yesu uahandekela kuli ikeye nguendi, "Yange ngila, na vusunga, na muono. Naumo uahi eja kuli Tate, kuvanga kuhitila muli yange."

⁷ Nga muatantekeya yange, kaha na Tate muamutantekeya naua, kuhuma hano kutuala kulutue muamutantekeya kaha mua mumono."

⁸ Filipu uahandekela kuli ikeye nguendi, "Muene, tumuese Isho, kaha tuapuisamo."

⁹ Kaha Yesu uahandekela kuli ikeye nguendi, "Nkuma kunjakele nove ntsimbu yailaha Filipu, vuno honi na ntsimbu ino kanda unjitantekeya ndi? Uoshe namono yange namono na Tate naua, uhandeka vatihoni nguove, 'Tumuese Tate'?"

¹⁰ Nkuma ku uatsilieele nguove njakala muli Tate, na Tate uakala muli yange ndi? Mezi aua njihandeka kuli yeni," kunjesi nakuhandeka mu nzili yange vavenia, vuno honi Tate uakala muli yange ikeye akapanga vipangi viendi."

¹¹ Njitsilieleni ngueni njakala muli Tate kaha na Tate uakala muli yange, vuno honi nga kumunjitsiliela, kaha tsilieleniko lika vipangi njili nakulinga."

¹² Muavusunga vene njimileka nguange, uoshe atsiliela muli yange na ikeye akalinga vipangi vinjili nakulinga, cilivene akalinga vipangi viakama kupulakana evi, omuo njilinakuya kuli Tate."

¹³ Njikalinga coshe mukalomba mu lizina liange, linga Tate vaka mulemese kuhitila muli Muana,

¹⁴ Nga mulomba cili coshe mu lizina liange, njikamilingilaco.

Cikulaheso ca Cimbembesi Uakulela

¹⁵ “Nga munjizanga, mukaniunga mashiko ange.

¹⁶ Njikalomba Tate, kaha akamihana mukuasi mukuavo, uje akakala neni miaka yoshe.

¹⁷ Ou ikeye Cimbembesi ua vusunga, uje vaka mavu kuvasa kumutam-bula, omuo kuvekumumona cipue kumutantekeya. Yeni mu mutantekeya, omuo ukala neni, naua akakala muli yeni.

¹⁸ “Kunjikamiseze ngue vantsiua, njikeja kuli yeni.

¹⁹ Muka ntsimbu kakandende vaka mavu kuvakanjimonu, vuno honi yeni mukanjimonu. Omuo njayoya, neni naua mukayoya.

²⁰ Ha litangua lije mukatantekeya ngueni njakala muli Tate, kaha yeni muakala muli yange, nange naua muli yeni.

²¹ “Voshe vaje vali na mashiko ange naku aniunga vakevo vaje van-jizanga, kaha voshe vaje vanjizanga na Tate akavazanga, nange naua njikavazanga kaha njikalisholola yange vavenia kuli vakevo.”

²² Yundasa (keti Sakaliote) uahandekete kuli ikeye nguendi, “Muene, cikapua vati linga ukalisholole yove vavenia kuli yetu, vuno honi keti ku vaka mavu?”

²³ Yesu uamukumbuluile nguendi, “Uje uoshe uanjizanga akaniunga lizi liange. Kaha na Tate akamuzanga, kaha tukeja kuli ikeye nakutumama hamo nendi.

²⁴ Uoshe uje kanjizanga, kaniungu mezi ange, na mezi munevu keti ange, vuno honi a Tate uje uanjitumine.

²⁵ “Njahandeka evi viuma kuli yeni ha ntsimbu ino njili neni.

²⁶ Vuno honi Mukuasi, Cimbembesi Uakulela, uje Tate akatuma kuhitila mu lizina liange, akamilongesa viosehe, nakumianukisa viosehe njahandeka kuli yeni.

²⁷ “Ciyulo cikale neni, ciyulo cange njamihana. Kunjicihana kuli yeni ngue muje mavu akahanenamo. Mitima yeni keti ilinienge, naua keti muteue.

²⁸ Muevuile omo njahandekete kuli yeni nguange, ‘Njili nakuya, kaha njikeja naua kuli yeni.’ Nga muanjizangele, ngue muavuahelela ngueni njiya kuli Tate, omuo Tate uakama kupulakana yange.

²⁹ Njimileka viuma evi ntsimbu kanda vilingiue, linga omuo vikalingiua mutsilele.

³⁰ Kunjikaandeka cikuma neni, omuo muka kuyula ua hano ha mavu alinakuija. Kesi na nzili hali yange,

³¹ vuno honi njilinga ngue omuo muananjishikilamo Tate linga mavu akatantekeye nguauo njazanga Tate.

“Katukeni, tuyeni tuhume kuno ku cihela.

15

Yesu Ikeye Mukolovozi ua Vusunga

¹ “Yange mukolovozi ua vushuka vua vusunga, kaha Tate ikeye ndimi.

² Ikeye akatete mintango muli yange ije kuyimi vushuka. Kaha muntango uoshe uje uima vushuka aunonga linga uime vushuka vua vuingi.

³ Vamilelesa laja na lizi lije njahandeka kuli yeni.

⁴ Kaleni muli yange ngue omuo yange njakala muli yeni. Ngue omuo muntango kuuasa kuima vushuka hali kaliao vuno honi kuvanga ukala ha mukolovozi, neni naua kuvanga mukale muli yange.

5 “Yange mukolovozi, kaha yeni munapu mintango kaha vaje vakakala muli yange nange njikakala muli vakevo. Kaha vakema vushuka vua vuingi, omuo kuakuhona yange nacimo cahi muasa kulinga.

6 Uje uoshe kakala muli yange vakamumbila ngue muntango kaha akoma, kaha mintango ya cifua eci vaka yihaka hamo nakuyumbila mu tuhia nakuitsimika.

7 Nga mukala muli yange, na mezi ange akakala muli yeni, lombeni vioshe vimutonda, kaha vakamihanavio.

8 Mucifua eci, Tate vaka mulemesa cikuma omo nga mukema vushuka vua vuingi na kupua vandongisi vange.

9 Ngue muje muanjizanga Tate, nange vene njamizanga, kaleni mu cizango cange.

10 Nga muniunga mashiko ange, mukakala mu cizango cange ngue muje yange munjaniungila mashiko a Tate nakukala mu cizango cendi.

11 “Njahandeka viuma evi kuli yeni linga kuvuahelela cange cikale muli yeni, kaha kuvuahelela ceni cikapuisemo.

12 Eli likelio lishiko liange, lizangeni umo na mukuavo ngue munja mizangela.

13 Naumo uahi alina cizango cakama ngue eci, cakutsila va vusamba vendi.

14 Muva vusamba vange nga mulinga vije vinjimishika.

15 Kunji kamisana vandungo naua, omuo vandungo kuvekuntatekeya vije via kalingi Muene uavo, vuno honi njamisana vavusamba vange, omuo njamitantekeya vioshe vije vinjevuile kuli Tate.

16 Kumuanjihanguile vuno honi njamihanguile. Kaha njamihanguile nguange mukeme vushuka, vushuka vuje kuvukahu, linga Tate akamihane vioshe vije vimukalomba mu lizina liange.

17 Njili nakumihana aua mashiko linga mukalizange umo na mukuavo.

Cizindo ca Vaka Mavu

18 “Nga vaka mavu vaka mizinda, mutantekeye nguene vazindile yange tele kanda vazinde yeni.

19 Nga muakundamene ku vaka mavu, ngue vaka mavu vaka mizanga ngue muvavo. Omuo kumuakundamene kuva ka mavu, vuno honi njamihangula kuhuma kuli vaka mavu, nankuma vaka mavu vamizinda.

20 Anukeni lizi lije linjahandেকে kuli yeni nguange, ‘Vandungo kuvasa kupulakana vimiene vavo.’ Nga vanjipakesele, kaha neni naua vakamipakesa, nga vaniungile lizi liange, kaha neni naua vakaniunga mezi eni.

21 Vuno honi vakalinga vioshe evi kuli yeni omuo lizina liange, omuo kuvatantekeya uje uanjitumine.

22 Nga kunjezile nakuhandeka kuli vakevo ngue kuvakele na vupi, vuno honi kuvesi nacimo cije casa kuvohiela ku vupi vuavo.

23 Uoshe uanjizinda, uazinda Tate naua.

24 Nga kunjalingile vipangi vije naumo uahi uavilinga hhakati kavo, nga kuvesi na vupi, vuno honi vanavimono, kaha vananjizindi nakuzinda Tate.

25 Capuile kushulisisa lizi lije livasoneka mu lishoko liavo nguavo, ‘Vanjizindile kuakuhona mulonga.’

26 “Vuno honi omo Mukuasi akeja, uje injikatura kuli yeni kuhuminina kuli Tate, cipue Cimbembesi ua vusunga uje akahuminina kuli Tate, akahandeka vakaleho vuange.

27 Neni naua mukahana vakaleho omuo munakala nange hume hambangelo.

16

¹ “Njahandeka evi kuli yeni, linga keti mukahilukile munima ku kutsiliela ceni.

² Vakamisheka mu vinjivo via malombelo. Cilivene ntsimbu ikaheta omo vaje vakamitsiha vakasinganieka nguavo mukulinga evi vali nakuhana mulambu uakulemesa kuli Njambi.

³ Kaha vakalinga evi omuo kuvantatekeya Tate cipue yange.

⁴ Vuno honi njinamileke evi omo ntsimbu yavio ikeja linga mukanuke ngueni njamilekelevio.

Cipangi ca Cimbembesi Uakulela

“Kunjahandekela viuma evi kuli yeni hambangelo, omuo njakele neni.

⁵ Vuno honi hano njili nakuya kuli uje uanjitumine, vuno honi na umo uahi hali yeni anjihula nguendi, ‘Ulina kuya kuli?’

⁶ Omuo njinahandeka evi kuli yeni, vusiua vunashulu mu mitima yeni.

⁷ Cipue ngocovene njimileka vusunga, cacili kuli yeni nga njiya, nga kunjiji, mukuasi kakeja kuli yeni, vuno honi nga njiya, njikamutuma kuli yeni.

⁸ Kaha omo akeja, akamuesa vaka mavu ha vupi na vusunga na cisompelo,

⁹ ha vupi, omuo kuvanjitsiliebele,

¹⁰ ha vusunga, omuo njilinakuya kuli Tate kaha kumukanjimonu naua,

¹¹ ha cisompelo, omuo muka kuyula mavu vanamusompo laja.

¹² “Njicili navia vingi via kuhandeka neni, vuno honi vimilemuila cikuma.

¹³ Omo Cimbembesi ua vusunga akeja, akamituamenena ku vusunga vuoshe, omuo kakahandeka mu nzili yendi, vuno honi akahandeka vije via kevua, nakuhandeka kuli yeni viuma vije vikeja.

¹⁴ Akanjijundula omuo akambata viange nakumilekavio.

¹⁵ Vioshe vije viali navio Tate vinapu viange. Mucifua eci vene njahandekela nguange akambata vije viange nakumilekavio.

Vusiua na Kuvuahelela

¹⁶ “Muka ntsimbu kakandende lika, kumukanjimonu, kaha naua muka ntsimbu kakandende lika, mukanjimonu.”

¹⁷ Kaha vamo va vandongisi vendi valihandekesele umo na mukuavo nguavo, “Vika alinakulumbununa mukuhandeka kuli yetu nguendi, ‘Muka ntsimbu kakandende lika, kumukanjimonu, kaha naua nguendi muka ntsimbu kakandende lika, mukanjimonu’, omuo ‘Njili nakuya kuli Tate?’”

¹⁸ Vahandekela nguavo, “Vika alinakulumbununa omo alinakuhandeka nguendi, ‘Muka ntsimbu kakandende lika?’ Kututantekeya evi alinakuhandeka.”

¹⁹ Yesu mukutantekeya nguendi vatondele kumuihula, kaha uahandekela kuli vakevo nguendi, “Muli nakulihandekesa yeni vavenia vika njalumbununa omo njahandeka nguange, ‘Muka ntsimbu kakandende lika kumukanjimonu, naua muka ntsimbu kakandende lika mukanjimonu?’”

²⁰ Mua vusunga vene njimileka nguange, mukalila na kusikoka cikuma vuno honi vaka mavu vaka vuahalela, muka pihilila, vuno honi kupihilila ceni cikahimpuka kuvuahelela.

²¹ Nga mpuevo ali ku chihela ca kusemena, akevu kuvavala, omuo ntsimbu yendi yahete. Vuno honi nga muana nasemuka, kekuvuluka naua kuje kuvavala ca nevuile omuo cakuvuahelela cije cakuneha muntu ha mavu.

²² Muvua kuvavala hano, vuno honi njikamimona naua, kaha mitima yeni ikavuahelela, naumo uahi akambata kuvuahelela ceni.

²³ Ha litangua lije nacimo cahi cimukalomba kuli yange. Mua vusunga njimileka nguange, nga mukalomba cuma kuli Tate mu lizina liange, aka mihanaco.

²⁴ Hume haje na kuheta lelo kumualombeke nacimo cahi mu lizina liange. Vuno honi lombeni kaha mukatambula, linga kuvuahelela ceni cikapuemo.

Kuhiana Mavu

²⁵ Njahandeka viuma evi kuli yeni mu visimo. Ntsimbu ikeja omo kunjikahandeka neni mu visimo, vuno honi njikamilekesa via Tate via vusunga.

²⁶ Ha litangua lije mukalomba mu lizina liange. Kunjahandekela kuli yeni nguange njikamilombelela kuli Tate,

²⁷ omo Tate ikeye vavenia ua mizanga, omuo muazanga yange kaha muantsiliela nguene njahuma kuli Njambi.

²⁸ Njahumininine kuli Tate kaha njezile ha mavu naua, njili nakuseza mavu kaha njili nakuhiluka kuli Tate.

²⁹ Vandongisi vendi vahandekela nguavo, "Haaa! Ulinakuhandeka muacili kaha honi tulinakuivuisisa, kuuesi nakulikuasesa visimo!

³⁰ Kaha hano tuatantekeya ngueto utantekeya viuma viose, kaha naumo uahi asa kukuihula vihula naua, ha viuma evi tuatsiliela ngueto uhuma kuli Njambi."

³¹ Yesu uavehuile nguendi, "Muatsiliela honi ndi?

³² Ntsimbu ikeja, kaha ineja laja, omo mukalishandozoka muntu na muntu ku njivo yendi, kaha mukanjiseza lika liange. Vuno honi kunjesi lika liange omuo Tate ali nange.

³³ Njahandeka evi kuli yeni, ngeci kuhitila muli yange linga mukale na ciyulo. Ha mavu mukamona mapakeso. Vuno honi simpeni, njahiana mavu!"

17

Yesu Alilombelela Ikeye Vavenia

¹ Yesu omo uamanesele kuhandeka mezi aua, uatalele kuilu nakuhandeka nguendi, "Tate ntsimbu inahete jundula Munove linga na Munove akujundule.

² Omuo uamuhanene nzili ya kuyula vantu viose, na kuhana muono uayaye kuli vaje viose vaua muhanene.

³ Kaha ou ukeuo muono uayaye, linga vakutantekeye ngeci uapua Njambi ua vusunga lika, na Yesu Kilistu uje uatumine.

⁴ Njakujundula hano ha mavu mukumanesa vipangi vije viuanjihanene kupanga.

⁵ Kaha honi Tate njijundule ha mesho ove, na vumpau vuje njakele navuo hamo nove tele kanda utange mavu.

Yesu Alombelela Vandongisi Vendi

⁶ "Njinalingisa lizina liove linga valitantekeye kuli vantu vaje uanjihanene hano ha mavu. Vapuile vove, vuno honi uanjihanenevo, kaha vanononoka lizi liove.

⁷ Kaha vanatantekeya viose vije viuanjihanene vije via humine kuli yove.

⁸ Kaha aje mezi auanjihanene njinahana kuli vakevo, kaha vana atambula nakutantekeya muavusunga nguavo njihuminina kuli yove, kaha vanatsiliela nguavo yove uanjitumine.

⁹ “Njili nakuvalombeleda. Kunjesi nakulombeleda vaka mavu, vuno honi njilinakulombeleda vaje vauanjihanene, omuo yove.

¹⁰ Voshe vange vanapu vove, naua vove vanapu vange, kaha vumpau vuange vukalisholola muli vakevo.

¹¹ Hano honi kunjesi ha mavu, vuno honi vakevo vali ha mavu, yange njilinakuhiluka kuli yove naua. Tate Uakulela! Vaniunge mu lizina lije liuna njihana, linga vakapue umolika, ngue omo yetu tuapua umolika.

¹² Omo njakele navo njavaniungile mu lizina liove lije liuanjihanene. Njavaniungile, kaha naumo uahi uavo uazimbalele kuvanga uje ivatantekeye nguavo akazimbala, linga visoneka vilishulisise.

¹³ Kaha honi njilinakuija kuli yove, njili nakuhandeka mezi aua ku vaka mavu linga vakakale nanzolela yange ije ikashula muli vakevo.

¹⁴ Njavahana mezi ove, vuno honi vaka mavu vana azindi omuo kuuakundamene kuli vaka mavu, ngue yange kunjakundamene kuli vaka mavu.

¹⁵ Kunjesi nakulomba linga uvahumise hano ha mavu, vuno honi njikulomba linga uvaniunge ku citozi.

¹⁶ Kuvakundamene kuli vaka mavu, ngue yange kunjakundamene ku vaka mavu.

¹⁷ Valelese mu vusunga omuo lizi liove liapua lia vusunga.

¹⁸ Ngue muje uanjitumine ha mavu, nange naua njavatumu ha mavu.

¹⁹ Omo yavakevo njalilelesa yange vavenia, linga navakevo valilelese mua vusunga.

Yesu Alombeleda vaka Kutsiliela voshe

²⁰ “Kunjilombo omuo yavo lika, vuno honi kuli voshe vaje vatsiliela muli yange kuhitila mu mezi avo,

²¹ linga voshe vapue vamo lika. Ngue omo yove, Tate, uakala muli yange nange naua njakala muli yove, kaha na vakevo vakale muli yetu, linga vaka mavu vatsiliele nguavo yove uanjitumine.

²² Vumpau vuje vuuanjihanene njavahanako navo, linga vapue vamo-liko, omo yetu tuapua umolika,

²³ yange muli vakevo kaha yove muli yange, kaha navo vapue vantu vamolika mu vusunga, linga vaka mavu vatantekeye nguavo yove uanjitumine kaha uavazanga ngue omo muuazangela yange.

²⁴ “Tate, njitonda nguange vaje vauanjihanene vakakale hamo nange kuje ku njikakala, linga vakamone vumpau vuange vuje vuuanjihanene omuo uanjizangele tele kanda utange mavu.

²⁵ Tate uavusunga, vaka mavu kuvakutantekeya, vuno honi yange njikutantekeya, kaha ava vatantekeya nguavo yove uanjitumine.

²⁶ Njatantekeyesia lizina liove kuli vakevo, kaha njikalitsimanesa, linga cizango cije cianjizanga naco cikakale muli vakevo, kaha nange muli vakevo.”

¹ Hanima ya Yesu kuhandeka mezi aua, uaile na vandongisi vendi musinia lia cana ca Kindeloni. Ku cihela kuje kuakele citungu cije ikeye na vandongisi vendi vakovelelelo.

² Kaha Yundasa uje uamuendele vungungu, nendi uatantekeyele ku cihela kuje, omuo vintsimbu via vingi Yesu uakele na kuliuanenako cikuma na vandongisi vendi.

³ Kaha Yundasa uaile ku citungu cije, uaile hamo namasualale va Loma na vamo vaka kuniunga Njivo ya Njambi vaje vavatumine kuli tusasendote hamo na Vafaliseo, vezile na mitetengo ya tuhia, na vindeya na vitua.

⁴ Kaha omo Yesu ha kutantekeya vije vikalingiua kuli ikeye, uezile kuli vakevo nakuvehula nguendi, "Iya muli nakutonda?"

⁵ Vamukumbuluile nguavo, "Yesu uaku Nazaleta."

Yesu uavakumbuluile nguendi, "Yange vene ikeye."

Yundasa uje uamuendele vungungu uakele hamo navo.

⁶ Omo Yesu uahandekela kuli vakevo nguendi, "Yange vene ikeye," vahilukilile munima kaha vauilile ha mavu.

⁷ Kaha naua uavehuile nguendi, "Iya muli nakutonda?"

Kaha vahandekela kuli ikeye nguavo, "Yesu uaku Nazaleta."

⁸ Yesu uavakumbuluile nguendi, "Njamileke laja nguange yange vene ikeye." Kaha nguendi, "Nga munjitonda, eceleni ava va mala vaye."

⁹ Uahandekela evi linga vije viahandekela vilishulisise nguavo, "Kunjazimbaleseleho naumo uahi kuli vaje vauanjihanene."

¹⁰ Kaha Simoni Petulu uakele na mukuale, uatete ndungo ya kasasendote uakama lituitui lia ku cilio. Lizina lia uje ndungo liapuile Maleka.

¹¹ Yesu uahandekela kuli Petulu nguendi, "Haka mukuale uove mucindalo cauo. Nkumani yange kunjasa kunua ei nganja yanjihanene Tate ndi?"

Yesu Vamutuala kuli Anase

¹² Nankuma, masualale Valoma na mukuluntu ua vaka kushika na vaka kusua na vantuama va Vayunda vakuatele Yesu, kaha vamukutile

¹³ Ha kulivanga vamutualele kuli Anase, uje uapuile vaishe mueno ya Kayafase, uje uapuile kasasendote uakama ha muaka uje.

¹⁴ Kayafase ualekele vantuama va Vayunda nguendi cacili muntu umo kutsila vantu voshe.

Petulu Aviana Yesu

(Mateu26:69-70; Mako14:66-68; Luka22:55-57)

¹⁵ Kaha honi Simoni Petulu na ndongisi mukuavo vakavangeyele Yesu. Uje ndongisi vamutantekeyele cikuma kuli kasasendote uakama, uakovelele na Yesu mu cipango ca njivo ya kasasendote uakama,

¹⁶ vuno honi Petulu uemanene hambanza ku cikolo. Ngeci uje mukuavo ndongisi, uje ivatantekeyele cikuma kuli kasasendote uakama, uaile hambanza, nakuhandeka na mpuevo uje uakele nakuniunga ku cikolo, kaha uakovelelele Petulu mukati.

¹⁷ Uje mpuevo uahandekela kuli Petulu nguendi, "Nkuma keti yove uavamo ua vandongisi va yala ou ndi?"

Petulu uamukumbuluile nguendi, "Keti yange."

¹⁸ Kaha vangamba na vaka kuniunga vavuekele tuhia omuo kuakele lisika, kaha voshe valizengelekele kuje ku tuhia nakuota. Na Petulu nendi uemaneneko nakuota.

Kasasendote Uakama Ehula Yesu

(Mateu26:59-66; Mako14:55-64; Luka22:66-71)

¹⁹ Kasasendote uakama uehuile Yesu via vandongisi vendi na vilongesa viendi.

²⁰ Yesu uamukumbuluile nguendi, “Njahandekela citona mesho ku vaka mavu, njinakala nakulongesa mu vinjivo via malombelo na mu njivo ya Njambi, muje muva kakungulukila Vayunda voshe. Kunjahandekela cuma mu vushueke.

²¹ Vika munjihuila? Ihuleni vaje vovuile vije vinjakele nakuhandeka kuli vakevo, vatantekeya vije njakele nakuhandeka.”

²² Omo uahandekela eci, umu ua vaka kuniunga uemanene hayehi nendi, uapupile mbanda Yesu ha mesho nakuhandeka nguendi, “Nkuma omu mukemo muuapande kutava Kasasendote uakama ndi?”

²³ Yesu uamukumbuluile nguendi, “Nga njinahandeka cuma ca cipi, leka vantu voshe vatantekeye. Vuno honi nga njinahandeka vusunga, vika honi uanjipupila?”

²⁴ Kaha Anase uatumine Yesu kuli Kayafase uje uapuile Kasasendote uakama oku vanamukutu.

Petulu Aviana Yesu naua

(Mateu26:71-75; Mako14:69-72; Luka22:58-62)

²⁵ Kaha Simoni Petulu uemanene nakuota tuhia. Vamuhuile nguavo, “Keti yove umu ua vandongisi vendi ndi?”

Uavianene nakuhandeka nguendi, “Keti yange.”

²⁶ Umo ngamba ua Kasasendote uakama, kavushoko kauje yala yatetele lituitui Petulu, uamuhuile nguendi, “Nkuma kunjakumuene na Yesu mu citungu ndi?”

²⁷ Kaha naua Petulu uavianene, kaha ha ntsimbu ije vene ndemba uatambekele.

Yesu Vamutuala kuli Pilato

(Mateu27:1-2; 11:14; Mako15:1-5; Luka23:1-5)

²⁸ Tele cimenemene vahumisile Yesu kuli Kayafase nakumutuala kuli Pilato ku lipela liakama. Kuje vakevo kuvakovelele mu lipela liakama, omuo kuvatondele kulijualesa linga vakase kulia ciuano ca Paseka.

²⁹ Kaha Pilato uaille hambanza kuli vakevo nakuhandeka nguendi, “Mulonga muka muamu uana nauo ou yala?”

³⁰ Vamukumbuluile nguavo, “Nga ou yala kapuile muhuza, ngue kutuamunehela kuli yove.”

³¹ Pilato uahandekela kuli vakevo nguendi, “Muambateni yeni vavenia linga muka musompe muje muayila lishiko lieni.”

Vantuama va Vayunda vamukumbuluile nguavo, “Kuvatutavesela kut-siha muntu.”

³² (Eci capuile kushulisisa aje mezi ahandekela Yesu omo uahandekela kutsa cije akatsa naco apue a vusunga.)

³³ Kaha Pilato uakovelele mu lipela liakama naua, uasanene Yesu nakumuihula nguendi, “Yove Muene ua Vayunda ndi?”

³⁴ Yesu uamukumbuluile nguendi, “Cihula eci cihuminina kuli yove vavenia, indi kuli vamo vanakuleke viange?”

³⁵ Pilato uamukumbuluile nguendi, “Usinganieka nguove yange Kayunda ndi? Vantu vove na vakuluntu va tusasendote vakevo vanahana yove kuli yange. Vika unalingi?”

³⁶ Yesu uamukumbuluile nguendi, “Vumuene vuanje keti vua hano ha mavu, nga vumuene vuanje vuapuile vua hano ha mavu, ngue vakuasi vange ngue vanalu kvingilika kunjihana ku mavoko a vantuama va

Vayunda. Vuno honi ngue mucinafulamo, vumuene vuange keti vua hano ha mavu."

³⁷ Pilato uamuhuile nguendi, "Nkumani yove muene ndi?"

Yesu uamukumbuluile nguendi "Ukahandeka nguove nji muene. Ha cuma eci vene mukemo njasemukile, kaha naua ha cuma eci vene mukemo njezile ha mavu mukuhandeka vusunga. Uoshe uje nakundama ku vusunga akevuilila ku lizi liange."

³⁸ Pilato uamuhuile nguendi, "Vusunga vika?"

Yesu Vamusompela Kutsa

(Mateu27:15-31; Mako15:6-20; Luka23:13-25)

Munima yakuhande evi vioshe, Pilato uaille naua hambanza kuli vantuama va Vayunda nakuvaleka nguendi, "Kunjauanene mulonga uakumuluisa nauo ou.

³⁹ Vuno honi muli na cilika nguendi njimihumisile umo ha litangua lia Paseka. Nkuma mutonda linga njimihumisile Kuene ua Vayunda ndi?"

⁴⁰ Vatambakanene cikuma nakumukumbulula nguavo, "Keti ou yala, vuno honi mbalambasa!" Honi mbalambasa uapuile muhuza.

19

¹ Kaha Pilato uambatele Yesu nakuvahanaye linga va mupupe makote.

² Masualale vazengele cilongo ca vimbimbo vacihakele ku mutue uendi, nakumuzika cikovelu calaha ca vunengu.

³ Vakele nakuija kuli ikeye okuvahandeka nguavo, "Uavulie, Muene ua Vayunda!" Oku valinakushuena kuyehi nendi nakumupupanga ku cihanga.

⁴ Pilato naua uatuhukile hambanza nakuhandeka kuli vakevo nguendi, "Talen, njilinakumuneha kuli yeni linga mutantekeye nguendi kunjauanene mulonga muli ikeye uakumuluisa."

⁵ Kaha honi Yesu uatuhukile hambanza, oku nazala cilongo ca vimbimbo na cikovelu calaha ca vunengu. Pilato uahandekela kuli vakevo nguendi, "Ou yala uno."

⁶ Omo vakuluntu va tusasendote na vaka kuniunga njivo ya Njambi vamuene, vatambakanene cikuma nguavo, "Mushukikeni! Mushukikeni!"

Pilato uahandekela kuli vakevo nguendi, "Muambateni yeni vavenia linga mumushukike, kunjauanene mulonga muli ikeye uakumuluisa nauo."

⁷ Kaha vantuama va Vayunda vamuukumbuluile nguavo, "Tuli na lishiko, kaha kuya ku lishiko eli napande kutsa omuo nalitumbula kupua Muna Njambi."

⁸ Honi omo Pilato uevuile eci, uovuile liova kupulakana hakulivanga.

⁹ Uakovelele naua mu lipela liendi nakuihula Yesu nguendi, "Uhumanina kuli?"

Vuno honi Yesu kamukumbuluile.

¹⁰ Nankuma Pilato uahandekela kuli ikeye nguendi, "Nkuma uviana kuhandeka nange ndi? Nkuma kuuatantekeye nguove yange njili na nzili yaku kuhumisa, na nzili ya kukushukika ndi?"

¹¹ Yesu uamukumbuluile nguendi, "Kuuesi na nzili hali yange kuvanga vanakuhanayo kuhuminina kuli Njambi, nankuma uje uanjinehele kuli yove ali na mulonga ua vupi uakama."

¹² Kuhuma haje Pilato uatondele ngila ya kumuecela, vuno honi vantuama va Vayunda vatambakanene cikuma nguavo, "Nga uecela ou yala linga aye, kaha keti ukavusamba ka Sezale. Uoshe uje alitumbula ikeye vavenia kupua muene napu citozi ca Sezale."

¹³ Omo Pilato uevuile mezi avahandekele, uatuhisile Yesu hambanza, kaha uatumamene ha citumamo ca kusompela ku cihela civatumbuile nguavo, "Cihela cakujala mavue," kaha mu Cihevelu nguavo "Ngavata."

¹⁴ Kaha liapuile litangua lia Kulivuahelela Paseka, tele mutania. Pilato uahandekele kuli vantuaama va Vayunda nguendi, "Ou Muene ueni!"

¹⁵ Vatambakanene cikuma nguavo, "Mutsihe! Mutsihe! Mushukike ha cilindakano!"

Kaha Pilato uavehuile nguendi, "Mutonda njishukike Muene ueni ndi?" Vakuluntu va tusasendote vamukumbuile nguavo, "Kutuesi na muene ueka vuno honi Sezale."

¹⁶ Kaha Pilato uavahaneneye linga vamushukike.

Yesu Vamushukika ha Cilindakano

(Mateu27:32-44; Mako15:21-32; Luka23:26-43)

Kaha vambatele Yesu linga vakamushukike

¹⁷ kaha Yesu uambate cilindakano cendi vavenia, vaile ku cihela cije civatumbula nguavo Cikola, mu Cihevelu vacitumbula nguavo Ngolongota.

¹⁸ Kuje kuvamushukikile, kaha vashukikile naua nava mala vavali, umo ku cilio mukuavo ku cimoshue, na Yesu mukati kavo.

¹⁹ Pilato uasonekele helu lia cilindakano nguendi, "Yesu uaku Nazaleta, Muene ua Vayunda."

²⁰ Vayunda vavengi vatandele haje helu lia cilindakano, omuo ku cihela kuje kuvamushukikile cakele kuyehi na nganda, kaha haje hacilindakano uasonekeleho mu Cihevelu na mu Cilatini, na mu Cingelengu.

²¹ Kaha vakuluntu va tusasendote na vantuaama va Vayunda vahandekele kuli Pilato Nguavo, "Keti usonekeho nguove, 'Muene ua Vayunda,' vuvoni nguove, 'Ou yala uahandekele nguendi nji Muene ua Vayunda.' "

²² Pilato uavakumbuile nguendi, "Vinjasoneka, njasoneka."

²³ Omo masualale vamanusuile kushukika Yesu, vambatele vizalo viendi, kaha vavipangele mu vimbazuvuila viuana, lisualale umo na umo uambat-eleko cendi. Kaha naua vambatele cikovelo cendi ca mukati cakupanga ha ntanga imolika ya maka yakuhona mungundo, kuhuma kuilu na ha mavu.

²⁴ Valihandekesele umo na mukuavo nguavo, "Keti tucitavule, vuno honi tuteni nkela tumone iya akacambata." Eci calingiule linga visoneka vilishulisise vije vihandeka nguavio,

"Valipangezelele vizalo viange hhakati kavo,

kaha omuo ya vuzalo vuanje vatile nkela."

Evi vikevio vivalingile masualale.

²⁵ Kaha vaje vemanene kuyehi na cilindakano ca Yesu vapuile vaina, na shongo ya vaina, na Maliya mpuevo ya Kolopase, na Maliya Mangandalena.

²⁶ Omo Yesu uamuene vaina na ndongisi uje yazangele cikuma uemanene kuyehi nendi, kaha Yesu uahandekele kuli vaina nguendi, "Mpuevo, tala, munove!"

²⁷ Kaha uahandekele kuli ndongisi yendi nguendi, "Tala vanoko!" Kuhuma ha ntsimbu ije uje ndongisi uatualele vaina ya Yesu ku njivo yendi.

Kutsa ca Yesu

(Mateu27:45-56; Mako15:33-41; Luka23:44-49)

²⁸ Hanima yevi Yesu uatantekeyele ngeci vioshe vinahu kaha uahan-dekele nguendi, "Linga visoneka vilishulisise, 'Njilinakuvua mpuila!' "

²⁹ Kuakele nganja kuje ije ya shulile na viniu. Kaha vajavekelemo mupelo muje mu viniu na ku haka ku muntango ua Isope, vaukakuile naku haka ku kanua kendi

³⁰ Omo Yesu uatambuile viniu kaha uahandekela nguendi, "Kunahu." Kaha uatepuile mutue uendi nakuecela Cimbembesi cendi.

Yesu Vamutuva Likunga

³¹ Omo liapuile litangua lia Kulivuahelela ciuano ca paseka. Vayunda kuvatondele mivila isale ha cilindakano ha litangua lia Sapalalo omuo liapuile litangua liakama cikuma. Kaha Vayunda valombeke Pilato linga vapokozole mikono ya vaje vamala va vashukikile na mivila yavo linga vaihumise ha vilindakano.

³² Kaha masualale vezile nakupokozola mikono ya vaje mihuza va vashukikile hamo na Yesu.

³³ Vuno honi omo vahetele kuli Yesu vamuuanene natsi laja, nankuma kuvapokuele mikono yendi.

³⁴ Ūmo ua vaje masualale, uatuvile Yesu likunga ku vimpoti, kaha haje vene maninga na meme atuhukileko.

³⁵ (Uje uamuene vioshe evi muvialingiuile uahanene vukaleho ngeci neni naua mutsiliele. Vukaleho vuendi vua vusunga, kaha atantekeya nguendi ahandeka vusunga.)

³⁶ Vioshe evi via lingiuile linga visoneka vilishulisise vije vihandeka nguavio, "Kuvitsiha viendi nacimo cahi cikapokokako."

³⁷ Kaha naua visoneka vikuavo vihandeka nguavio, "Vakatonda uje ivatuvile likunga,"

Yesu Vamutsinda

(Mateu27:57-61; Mako15:42-47; Luka23:50-56)

³⁸ Munima ya viuma evi, Yosefa uaku Alamatiya, uje uapuile ndongisi ua Yesu mu vushuke, omuo ya liova lia vantuama va Vayunda uezile kuli Pilato nakumulomba linga ambate muvula ua Yesu. Kaha Pilato uamuhanene nzili yakuhumisa muvula ua Yesu ha cilindakano, Kaha ua uhumisile.

³⁹ Nikondemo, uje ikeye ha kulivanga uaile kuli Yesu vutsiki na ikeye uaileko, uambatele makilo akupua makumi atatu a mukundu, uakupan-dakana na miila na malimangango.

⁴⁰ Vambatele muvula ua Yesu nakuzengela ha vintanga via liniu hamo na mukundu, kuya muvakatsindila ku cilika ca Vayunda.

⁴¹ Kuakele citungu ku cihela cije kuvamushukikile, muje mu citungu muakele cihilo cije kanda vatsindemo muntu.

⁴² Omuo liapuile litangua lia Vayunda lia Kulivuahelela ciuano ca paseka, kaha omuo na cihilo cakele muyehi, kaha vatsindilemo Yesu.

20

Cihilo ca Mupulungua

(Mateu28:1-8; Luka24:1-12)

¹ Cimene mene ha litangua lia calumingu tele kuacizivala, Maliya Mangandalena uaile ku cihilo, kaha uamuene livue vana lihumisa ku cihilo.

² Kaha uashatukile kuli Simoni Petulu na ndongisi mukuavo naua uje uazangele Yesu cikuma, kaha uavalekele nguendi, "Muene uetu vana muhumisa mu cihilo kaha kututantekeya oku vanamuhaka!"

³ Hajevene Petulu na uje ndongisi mukuavo vaile ku cihilo.

⁴ Kaha voshe vavali vakele nakushatuka hamo, vuno honi uje ndongisi mukuavo uashatukile cikuma kupulakana Petulu, kaha uapuile ukuli-vanga kuheta ku cihilo.

⁵ Uemanene nakutalezeka mu cihilo, kaha uamuene vintanga via liniu, vuno honi kakovelelemo.

⁶ Simoni Petulu uje uamukavele munima na ikeye uahetele, hajevene ikeye ukovelele mu cihilo uamuene lika vintanga via liniu vili ha mavu,

⁷ na ntanga ije yakele ku mutue ua Yesu kuyakele hamo na vintanga via liniu vuno honi yalihuminine nakukala hali kaliayo lika.

⁸ Kaha uje ndongisi mukuavo ualivangele kuheta ku cihilo, nendi naua ukovelelemo, kaha uamuene nakutsiliela.

⁹ Cipue ngocovene kuvovuisisile visoneka vije viahandekele nguavio napande kusanguka ku vatsi.

¹⁰ Kaha vaje vandongisi vahilukile ku membo avo.

Yesu Alisholola kuli Maliya Mangandalena

(Mateu28:9-10; Mako6:9-11)

¹¹ Vuno honi Maliya uemanene ku cihilo nakulila kaha omo tele ali nakulila uakotamene nakutala mu cihilo,

¹² uamuene tungelo vavali vanazala vizalo via kutoka vanatumama kuje kuakele muvila ua Yesu, umo ku mitue mukuavo ku viliato.

¹³ Vahandekele kuli ikeye nguavo, "Mpuevo vika ulinakulila?"

Kaha uahandekele kuli vakevo nguendi, "Vanambata Muene uange, kaha kunjitantekeya oku vanamuhaka!"

¹⁴ Omo tele acili nakuhandeka vioshe evi, uatalele kunima kaha uamuene Yesu nemana kuje, vuno honi katantekeyele nguendi Yesu.

¹⁵ Yesu uamuhiile nguendi, "Mpuevo, vika ulinakulila iya utonda?"

Maliya uasinganiekele nguendi ndimi, kaha uahandekele kuli ikeye nguendi, "Muene, indi yove unamuambata, njileke oku kunamuhaka, linga njikamuambateko."

¹⁶ Yesu uahandekele kuli ikeye nguendi, "Maliya!"

Kaha Maliya uatengulukile nakuhandeka nendi mu Cihevelu nguendi, "Lavoni!" (Kulumbununa Mulongisi).

¹⁷ Kaha Yesu uahandekele kuli ikeye nguendi, "Keti unjikuate omo kanda njilonde kuya kuli Tate. Vuno honi ya kuli vavusamba vange ukavaleke nguove njili nakuhiluka kuli Tate ikeye uje ishueni, kuli Njambi yange ikeye uje Njambi yeni."

¹⁸ Maliya Mangandalena uaille nakuleka vandongisi nguendi, "Njinamono Muene." Kaha Maliya Mangandalena uavalekele nguendi Yesu ikeye nahandeka viuma evi kuli ikeye.

Yesu Alisholola kuli Vandongisi vendi

(Mateu28:16-20; Mako16:14-18; Luka24:36-49)

¹⁹ Omo capuile cinguezi ca litangua lia calumingu, vandongisi valikunguluilile hamolika mu njivo ije vikolo viapuile viakupata omuo vakele na liova lia kuteua vantuama va Vayunda, kaha Yesu uezile nakuimana navo nakuhandeka nguendi, "Ciyulo cikale neni."

²⁰ Omo uamanesele kuhandeka evi, uavamonesele mavoko endi mukati na helu, kaha vandongisi vendi vavuahelelele kumona Muene uavo.

²¹ Yesu uahandekele kuli vakevo naua nguendi, "Ciyulo cikale neni. Omuo Tate uanjitumine nange naua njimituma."

²² Omo uamanesele kuhandeka evi, uavahuiminine nakuhandeka kuli vakevo nguendi, "Tambuleni Cimbembesi Uakulela.

²³ Nga mukonekela vipi vuamukueni, kaha vanamukonekela, nga kumu-vakonekela, kaha kuva kavakonekela."

Yesu na Tomasi

²⁴ Vuno honi Tomasi (uje ivatumbuile nguavo mpasa), uje umo ua vaje likumi na vavali kakele hamo navo omo Yesu uezile.

²⁵ Kaha vakuavo vandongisi va Yesu vamulekele nguavo, "Tuamono Muene."

Kaha ikeye uahandekela kuli vakevo nguendi, "Kuvanga njinamumono mu mavoko muje mu vatuvile vimbambo, nakukuatamo na munie uange, nga keti ngoconi kunjitsiliela."

²⁶ Omo kuahitile matangua atanu na atatu kaha vandongisi vendi naua vakele mu njivo, kaha Tomasi uakele hamo navo. Cikolo capuile cakupata, vuno honi Yesu uezile nakuimana hhakati kavo nakuhandeka nguendi, "Ciyulo cikale neni."

²⁷ Kaha uahandekela kuli Tomasi nguendi, "Kuata munie uove mu livoko liange, tala mavoko ange kaha humisa livoko liove nakulihaka ku vimpati viange linga keti ukale navimpata vuno honi untisilele."

²⁸ Tomasi uamukumbuile nguendi, "Muene uange, Njambi yange!"

²⁹ Yesu uahandekela kuli ikeye nguendi, "Uatsiliela omuo uanjimono ndi? Vanakuisuliua vaje kuva njimuene vuno honi vanatsiliela."

Vutumbe vua Livulu eli

³⁰ Kaha Yesu ualingile vitantekeyeso viavingi ha mesho a vandongisi vendi, vije kuvasonekele mu livulu eli.

³¹ Vuno honi evi vanavisoneka linga mutsilele ngeci Yesu ikeye Kilistu, Muna Njambi, kaha mukutsiliela mukakala na muono kuhitila mu lizina liendi.

21

Yesu Alisholola kuli Vandongisi Vatanu na Vavali

¹ Hanima yevi Yesu ualisholuele vavenia naua kuli vandongisi vendi ku cisali ca Timbeliase, ualisholuele ikeye vavenia mu ngila eyi.

² Simoni Petulu, na Tomasi uje ivatumbuile mpasa, na Natanele uje uahumine ku Kana mu nganda ya Ngalileya, na vana va Zembendeo na vakuavo vandongisi vavali voshe vakele hamo.

³ Simoni Petulu uahandekela kuli vakevo nguendi, "Njili nakuya nakuta vatsi."

Kaha vahandekela kuli ikeye nguavo, "Tuya mumo." Kaha vaile hamo mu vuato, vuno honi vutsiki vuje kuvakuatele na umo uahi.

⁴ Liamukuavo cimene mene, Yesu uemanene ku cisali, vuno honi vandongisi vendi kuvatantekeyele nguavo Yesu.

⁵ Kaha Yesu uahandekela kuli vakevo nguendi, "Vana vange, kumuakuateleko cipue itsi umo ndi?"

Kaha vamutavele nguavo, "Houe."

⁶ Kaha uahandekela kuli vakevo nguendi, "Teni vuanda vueni ku cihela ca cilio ca vuato, kaha mukakuata vatsi." Vatele vuanda vuavo kuje kaha vahonouele cipue kukoka vuje vuanda omuo vatsi vapuile vavengi.

⁷ Uje ndongisi ivazangele cikuma kuli Yesu uahandekela kuli Petulu nguendi, "Nkumani Muene!" Omo Simoni Petulu uevuile nguendi uapuile Muene, uazalele vizalo viendi, omuo uashuluile vizalo viendi viahelu, kaha uakovelele mu mema.

⁸ Vuno honi vandongisi veka vakevo vezile mu vuato, vakele nakukoka vuanda vuje vuashulile na vatsi. Omo kuvakele kulahako na ntunda, vuno honi yapuile lika ntunda yakupua matambo cihita (100).

⁹ Kaha omo vahetele ha ntunda vamuene manungu a tuhia hali na itsi na mbolo.

10 Yesu uahandekela kuli vakevo nguendi, "Neheniko vatsi vamo vamu nakuata."

11 Kaha Simoni Petulu uakovelele mu vuato, nakukokela vuanda ku ntunda vuje vuashulile na vatsi vakama cikuma, vatsi vapuile cihita na makumi atanu na vatsi vatatu (153), kaha cipue vene tele vatsi vapuile vavengi, vuno honi vuanda ku vuatavukile.

12 Yesu uahandekela kuli vakevo nguendi, "Ijeni muakulie via kulia via cimene." Kaha naumo uahi ua vandongisi uehuileko nguendi, "Yove iya?" Omuo vatantekeye nguavo Muene.

13 Kaha Yesu uezile nakuambata mbolo na kuvahanayo, kaha ualingile cimo vene naua na ku vatsi.

14 Eyi yapuile ntsimbu ya mucitatu ije Yesu ualisholuele kuli vandongisi vendi hanima yakusanguka ku vatsi.

Yesu na Petulu

15 Omo vamanusuile kulia via kulia via cimene, kaha Yesu uahandekela kuli Simoni Petulu nguendi, "Simoni muna Iuano, nkuma uanjizaka kupulakana ava ndi?" Petulu uamukumbuluile nguendi, "Eyo Muene nove utantekeya nguove njakuzanga." Yesu uahandekela kuli ikeye nguendi, "Lisa vana va vampanga vange."

16 Kaha Yesu uahandekela kuli ikeye ntsimbu ya mucivali nguendi, "Simoni muna Iuano, uanjizanga ndi?"

Petulu uamukumbuluile nguendi, "Eyo, Muene, nove utantekeya nguove njakuzanga."

Yesu uahandekela kuli ikeye nguendi, "Niunga vampanga vange."

17 Kaha Yesu uahandekela kuli ikeye ntsimbu ya mucitatu nguendi, "Simoni muna Iuano, uanjizaka ndi?"

Petulu uevuile kupihia omuo uamuihuile ntsimbu ya mucitatu nguendi, "Uanjizanga ndi?" Kaha uahandekela kuli ikeye nguendi, "Muene, utantekeya nove nguove njakuzanga."

Yesu uahandekela kuli ikeye nguendi, "Lisa vampanga vange."

18 Cilivene mua vusunga njikuleka nguange omo tele uapuile u kanike, uakele nakulikuta muiwa uove mu mbunda nakuya kuoshe kuje ku uatondele. Vuno honi omo ukakuluvala ukolola mavoko ove kaha mukueni akakukuta muiwa mu mbunda yove nakukutuala kuje ku utondo."

19 (Mukuhandeka evi, Yesu uahandekela vutsi vuje vuakatsa navuo Petulu vuje vukaneha vumpau kuli Njambi.) Kaha Yesu uahandekela kuli Petulu nguendi, "Njikave!"

Yesu na Ndongisi uje Yazangele cikuma

20 Petulu uatengulukile kaha uamuene uje ndongisi ivazangele cikuma kuli Yesu alinakumukava, uje uasindamenene ha ntulo ya Yesu ha ntsimbu ije ivalile via kulia via cinguezi naua ikeye uje uahandekela nguendi, "Muene iya akakuenda vungungu?"

21 Omo Petulu uamumuene, uehuile Yesu nguendi, "Muene, vika vikingiua kuli ou yala?"

22 Yesu uahandekela kuli ikeye nguendi, "Nga ku cizango cange akayoya noho njikeja, nkuma evi vikevio vika kuli yove? Njikave!"

23 Kaha muzimbu ou uashandokelele muimbo lioshe, nguavo ou ndongisi ka katsi. Vuno honi Yesu kahandekela kuli ikeye nguendi ka katsi, vuno honi nguendi, "Nga ku cizango cange ngue akayoya noho njikeja, evi vikevio vika kuli yove?"

²⁴ Ou ikeye ndongisi uje ahandeka vukaleho vua viuma evi vialingiuile nakuvisoneka, kaha tutantekeya nguetu vukaleho vuendi vunapu vua vusunga.

Mamanusuilo

²⁵ Vuno honi kuvili vimo viuma viavingi vikuavo vije Yesu ualingile, nga vioshe va visonekele, njatantekeya nguange nga mavu oshe ku asele kuuana cihela cakutulikila mavulu aje avanasoneka.

VILINGA **via Tunganda** **Citsindikisi**

¹ Kuli ua cizango Telefilo,

Mu livulu lia kulivanga Njasonekele hali vije vioshe Yesu ualingile na kulongesa cendi hume hambangelo,

² nakuheta litangua lije vamutualele muilu, munima yakuhana vishika kuhitila mu Cimbembesi Uakulela ku tunganda vaje vahanguile.

³ Munima ya kutsa na kusanguka cendi, ualisholuele ikeye vavenia kuli vakevo mu vingila vije viakele na vukaleho ngeci ikeye alinakuyoya. Ualisholuele kuli vakevo mu matangua akupua makumi auana nakuhandeka via vumuene vua Njambi.

⁴ Tele acilinavo, uavashikile nguendi, “Keti vakahume mu Yelusalema vuno honi vakavandamenene kuje cikulaheso ca Tate. Evi vikevio viahandekele vije vimuevuile kuli yange.

⁵ Iuano uambuitikile na mema vuno honi ha matangua amandende lika vakamibuitika na Cimbembesi Uakulela.”

Yesu Vamutuala Muilu

⁶ Omo tunganda vakele hamo na Yesu, vamuihuile nguavo, “Muene, nkuma kuntsimbu inovene ukahiluisila vumuene ku Isaleli?”

⁷ Yesu uavakumbuluile nguendi, “Keti kuli yeni kutantekeya vintsimbu cipue matangua aje Tate anavua hesa kuya ku nzili yendi.

⁸ Vuno honi mukatambula nzili omo Cimbembesi Uakulela cikeja hali yeni, kaha mukapua vakaleho vange mu Yelusalema, na mu Yundeya muoshe na mu Samaliya, na kuma manusuililo a mavu.”

⁹ Omo uamanusuile kuhandeka eci, vamukakuile naku mutuala muilu te oku vamutalelela, lishelua liamuambate kaha kuvamumuene naua.

¹⁰ Tele vali nakutalelela muilu, hajevene vamala vavali vazalele via kutoka vemanene kuli vakevo.

¹¹ Vehuile nguavo, “Vamala vaku Ngalileya, vika munemanena nakutala muilu? Ou Yesu, uje ivanambata kuli yeni nakumutuala muilu, akeja naua mucifua cimo nge muje mumuamumuenene aya muilu.”

Uje uahingile mu muhela ua Yunda

¹² Kaha tunganda vahilukille ku Yelusalema omo vahumine ku Munkinda ua Oliveta uje uakala kuyehi na Yelusalema, yapuile ntunda yakupua ngue kilomita imolika.

¹³ Omo vakovelele mu nganda, kaha vaile ku mulili ua kuilu kuje kuvakele va Petulu, na Iuano, na Tiango, na Anduleo, na Filipu, na Tomasi, na Mbatolomeo, na Mateu, na Tiango muna Alufeya, na Simoni Zelote uje ualuisile vaka kusuana va Valoma, na Yundasa muna Tiango.

¹⁴ Vakele nakulikunguluila hamolika mukulombela na mutima umo, hamo na vampuevo veka na Maliya vaina ya Yesu hamolika na vashongo vendi Yesu.

¹⁵ Mu matangua aje Petulu uemanene hhakati ka vaka kutsiliela hamolika na civunga cakupua cihita na vantu makumi avala (120) nakuhandeka nguendi,

16 “Vavusamba vange, visoneka vinapande vilishulisise muje Cimbembesi Uakulela kuhitila muli Ndaviti cahandekela hali Yundasa, uje uatuamenenene vaje vakutile Yesu.

17 Yundasa uapuile umo uetu, omuo vamuhanguile kupua uakuvipangi vietu.”

18 (Na vimbongo vije viatambuile Yundasa ha vilinga viendi via vipi, uavilandeke lihia muje mualiuililile na kutsa, uatavukile lizimo na mila yendi yatutulukile hambanza.

19 Vantu voshe vakele mu Yelusalema vacuvuile, kaha mu muyati uavo vatumbuile lije lihia nguavo Akalundama, “kulumbununa nguavo Lihia lia Maninga.”)

20 “Omuo vanacisoneka mu livulu lia Miaso nguavo,
 ‘Njivo yendi ipue yamupulungua,
 keti mukale cipue umo.’
 vacisoneka naua nguavo,
 ‘Muntu ueka akahinge ha vipangi viendi.’

21 Nankuma tuapande kuhangula umo ha vamala vaje vanakala netu ntsimbu yoshe ije Muene Yesu uendanganene netu,

22 kuputukila ku ntsimbu ije Iuano uambuluile muzimbu uendi uakumbitika nakuheta ha litangua lije omo vahumisile Yesu kuli yetu nakumutuala mulu. Ha cuma eci, umo uavo napande kupua mukaleho uetu ku kusanguka cendi.

23 Nankuma, vahanguile vamala vavali, Yosefa uje ivalukile Mbalasambase (naua vamutumbuile nguavo Njasitase) na Maseyase.

24 Ambahoni valombebele nguavo, “Muene, utantekeya mutima ua muntu uoshe. Tumuese hali ava vavali iya uje iunahangula

25 kuambata cihela mu vipangi evi na kupanga vipangi via vunganda vije Yundasa uasezele nakuya ku mutambela uendi.”

26 Kaha vavatelele nkela, na nkela yautilile hali Maseyase, nankuma vamupandakanene ku tunganda likumi na umo.

2

Kuija kua Cimbembesi Uakulela

1 Omo litangua lia Pentekosita liahete, vaka kutsiliela voshe vakungulukile mu njivo imolika.

2 Hajevene muilu muahumine cililimo ngue kupekumuka kua mpunzi yakama, kaha yashulisile njivo yoshe muje muvatumamene.

3 Vamuene vije viafuile ngue milengi ya tuhia vije vialihangunukile kaha imo na imo yakele hali umo na umo uavo.

4 Voshe vashulile na Cimbembesi Uakulela kaha vaputukile kuhandeka mu vindaka vieka, nge muje Cimbembesi cavalingile linga vahandekemo.

5 Mu Yelusalema muakele Vayunda vaka kuivula Njambi liova vaje vahumine ku mafuti oshe ahano ha mavu.

6 Omo vovuile kalua kaje, civunga cakama cakungulukile. Voshe valikomokelele omuo muntu uoshe uovuile vaje vaka kutsiliela vahandeka mu vindaka viavo.

7 Voshe valikomokelele cikuma nakuhandeka nguavo, “Nkuma ava vali nakuhandeka ngeci keti voshe Vangalileya ndi?

8 Cija vati honi tuvavoshe tuvevu umo na umo mu muyati uetu vavenia?

9 Vamo vetu vahuma ku Palitiya, Mendiya na ku Elame, vakuavo ku Mesopotamia, Yundeya na ku Kapandosiya, vakuavo ku Pontiyasi na ku vinganda vimo via Valoma via mu Asiya,

¹⁰ vamo ku Filingiya na ku Pampiliya, vakuavo ku Ingito na ku mitambela ya Limbiya kuyehi na Silene, vamo vangenzi vahuma ku nganda ya Loma

¹¹ (Vayunda na ava keti Vayunda vuno honi lika vakakava futisi ya Vayunda), vamo vetu vahuma ku Kelete na ku Alambiya yetu tuvavoshe tulinakuvevua vahandeka vikomoueso via Njambi mu miyati yetu.”

¹² Kaha voshe valikomokelele nakukala na citanga, kaha valihozuele umo na mukuavo nguavo, “Eci cilumbunuka vika?”

¹³ Vuno honi vamo vavo vashendumuine vaka kutsiliela nakuhandeka nguavo, “Vantu ava vanapende viniu!”

Muzimbu ua Petulu

¹⁴ Vuno honi Petulu uemanene na vakuavo tunganda likumi na umo, uahandekela na lizi liakama ku civunga cije nguendi, “Vamala vaku Yundeya neni voshe muakala mu Yelusalema, tantekeyeni eci cuma, kaha ivuilileni muacili kuli evi njihandeka.

¹⁵ Cilivene, vantu ava kuvapendele nge mumuli nakuyonguelamo, ino inapu ntsimbu ya mucitanu na viuana ku cimene.

¹⁶ Vuno honi evi vikevio viahandekela kananguizi ua Njambi Njuele nguendi.

¹⁷ Njambi ahandeka nguendi, ‘Eci cikeco njikalinga mu matangua amanusuililo

njiketila Cimbembesi cange hali muntu na muntu.

Vana veni va vamala na ava va vampuevo vakambulula vunanguizi,

na vakuenje veni vakamona vimona,

na vakulukazi veni vakalota vinjozi.

¹⁸ Mu matangua aje njiketila Cimbembesi cange, cipue hali vangamba vange, va vamala na ava va vampuevo kaha vakambulula vunanguizi.

¹⁹ Njikalinga vikomoueso muilu na vitantekeyeso hano ha mavu, kukakala maninga, na tuhia, na vuisi vuakama.

²⁰ Litangua likazivala vuili, na ngonde ikavenga ngengu ngue maninga, ntsimbu kanda litangua liakama lia vumpau vua Muene lihete.

²¹ Kaha uoshe akasana lizina lia Muene akovoka.’

²² Yeni vamala vaku Isaleli! “Ivuilileni ku mezi aua, Yesu uaku Nazaleta uapuile yala uje nzili yendi yakama yavu Njambi yasholuele muacili kuli yeni vikomoueso na vitantekeyeso vije vialingile Njambi kuhitila muli ikeye hhakati keni, nge muje yeni vavenia mualitantekeyela.

²³ Njambi mu kutantekeya cendi na mu viyongola viendi via laja ngeci Yesu vaka muhana ku mavoko eni, kaha yeni muamutsihile hakutava vaka vupi linga vamushukike ha cilindakano.

²⁴ Vuno honi Njambi uamusanguile ku vatsi, uamupatuile ku nzili ya kutsa, omuo kucatavele linga kutsa cimupuisse cinzinda.

²⁵ Omuo Ndaviti uahandekela hali ikeye nguendi, ‘Muene kulutue luange ntsimbu yoshe, omuo ali ku livoko liange lia cilio kaha kunjikajaja.

²⁶ Nankuma mutima uange uvuahelela, na mezi ange anashulu na nzoleda. Kaha muvula uange ukahuima mu lutsilielo.

²⁷ Omuo kukanjiseze mu vukalo vua vatsi, cipue kutava muka kulela uove linga apolele mu cihilo.

²⁸ Unanjitantekeyesa vingila virtuala ku muono,

ukanjishulisa na nzolela mukukala muyehi nove.'

²⁹ "Vakuetu, njihandeka kuli yeni nakusimpa hali kukuluila yetu Ndaviti uje uatsile na kumutsinda, na cihilo cendi hanga tucili naco na lelo lino.

³⁰ Ndaviti uapuile kananguizi ua Njambi, kaha uatantekeyele nguendi Njambi uamukulahesele na kulisinga nguendi akapuisa umo ua vatekuluila vendi kukala ha litanda lia vumuene.

³¹ Ndaviti ha kumona vije vikalingika kulutue, uahandeketele ha kusan-guka kua Kilistu omo uahandeketele nguendi,
'Ikeye kuvamusezele mu vukalo vua vatsi,
muvila uendi kuuapolelele mu cihilo.'

³² Njambi nasangula ou Yesu ku vatsi, kaha yetu voshe tunapu vakaleho va viuma evi.

³³ Ikeye hakumujundula kuya ku livoko lia cilio lia Njambi, nakutambula Cimbembesi Uakulela kuli Ishe cije camu kulahesele, kaha netilahoni vije vimili nakumona na kuivua hali yetu.

³⁴ Omuo keti Ndaviti uje ualondele muilu, vuno honi ikeye uahandeketele nguendi,

'Muene uahandeketele kuli Muene yange nguendi,
Tumama ku livoko liange lia cilio

³⁵ noho cikapuisa vitozi vove vuliatelyo vuave.'

³⁶ "Nankuma vantu voshe va Isaleli vanapande kutantekeya muacili ngeci ou ikeye Yesu, uje imuashukikile ha cilindakano ikeye Njambi yanapuisa Muene na Kilistu."

³⁷ Omo vantu vovuile evi, cavakuete ku mitima yavo kaha vahandeketele kuli Petulu na kuli tunganda vakuavo nguavo, "Eni vakuetu, tuapande kulinga vati?"

³⁸ Petulu uahandeketele kuli vakevo nguendi, "Muntu na muntu napande kutenguluka ku vipi viendi nakumumbuitika mu lizina lia Yesu Kilistu linga vamisambese ku vipi vieni, kaha mukatambula vuana vua Cimbembesi Uakulela.

³⁹ Omuo cikulaheso ca Njambi cinapu ceni na vana veni, na kuli voshe vaje vali kulahako, vaje voshe vakasana Muene Njambi yetu veje kuli ikeye."

⁴⁰ Petulu uahandeketele kuli vakevo na mezi eka akuvanangula naku-valambelega nguendi, "Lioheleni yeni vavenia ku miyati eyi ya vilinga via vipi."

⁴¹ Vaje voshe vatambuile muzimbu ua Petulu vavambuitikile, kaha ha litangua lije kualivuezelelele vantu vakupua makulukazi atatu (3, 0 0 0).

⁴² Vakakateyele ku vilongesa via tunganda na mukukunguluka hamo, na mukutavula mbolo na mukulombela.

Vuyoye vua Vaka kutsiliela

⁴³ Vikomoueso na vitantekeyeso viavingi vivalingile tunganda viovuisile vantu voshe liova.

⁴⁴ Vaka kutsiliela voshe vakele hamo mukulitombola, kaha valipangelele vufuko vuavo voshe.

⁴⁵ Valandesele viuma viavo na vufuko vuavo, kaha valipangezelele vimbongo hhakati kavo, kuya muje muanazenekela muntu.

⁴⁶ Ha litangua na litangua valikunguluile mu Njivo ya Njambi, vakele nakutavula mbolo mu vinjivo viavo na kulia viakulia viavo mukuvuahelela na mitima ya kulikehesa,

⁴⁷ nakushangazala Njambi, nakuvazanga ku vantu voshe. Ha litangua na litangua Muene uavuezeleleleko ku civunga cavo vaje vantu vakele nakuovoka.

3

Petulu akanguisa yala ua Cilema

¹ Ha litangua limo Petulu na Iuano vaile ku Njivo ya Njambi ha ntsimbu ya kulombela, yapuile ntsimbu ya maola atatu ku mutania.

² Kuje ku cikolo civatumbuile nguavo Cikolo Cacili ca Njivo ya Njambi, kuakele yala umo uje uapuile cilema hume kukusemuka cendi. Vakele nakumutuala tuala ku cikolo ha litangua na litangua linga alombe vuana kuli vantu vaje vakele nakukovela mu Njivo ya Njambi.

³ Omo uamuene Petulu na Iuano valinakukovela mu Njivo ya Njambi, uavalombele linga vamuhaneko cimo.

⁴ Petulu na Iuano voshe vamutalele ntoma, kaha Petulu uahandeketele kuli ikeye nguendi, "Tutale!"

⁵ Nankuma uavatalele ntoma, uayonguele nguendi hamo vamuhanako cimo.

⁶ Vuno honi Petulu uahandeketele kuli ikeye nguendi, "Kunjesi na Silivela cipue Ngolinde, vuno honi eci njilino cikeco cinjikuhana, mu lizina lia Yesu Kilistu uaku Nazaleta imana linga uende."

⁷ Ambahoni uamukuate ku livoko liendi lia cilio nakumukatula, hajevene viliato na tutsendengele tuendi viakele na nzili.

⁸ Uakatukile nakutumbuka kaha uaputukile kuenda, uakovelele hamo navo mu Njivo ya Njambi, uendele nakutumbuzoka na kushangazala Njambi.

⁹ Vantu voshe kuje vamumuene alinakuenda nakushangazala Njambi,

¹⁰ omo vamutantekeyele ngeci ikeye uje uakele nakutumama ku cikolo cije civatumbuile nguavo Cikolo Cacili ca Njivo ya Njambi nakulomba vuana, kaha voshe valikomokelele cikuma ha cuma cije calinguiile kuli ikeye.

Petulu ambulula mu Njivo ya Njambi

¹¹ Omo uje yala uakakateyele kuli Petulu na Iuano, vantu voshe valikomokelele kaha voshe vashatukililele kuli vakevo mu Mbalanda ya Solomoni.

¹² Omo Petulu uamuene vaje vantu, uahandeketele kuli vakevo nguendi, "Yeni vaka Isaleli, vikahoni mualikomokela ha cuma eci, cipue vikahoni mututalele ntoma? Muayongola nguendi eci cinalingua mu nzili yetu cipue mu vunjambi vuetu mukemo tunendesa ou muntu ndi?"

¹³ Njambi ua Avilahama, na Isake na Yakomba, Njambi ya vakukuluila vetu, ikeye nahana vumpau kuli ngamba yendi Yesu, uje imuahanene kuli vaka kusuana nakumuviana ku mesho a Pilato, cipue Pilato te nayongola kumuecela.

¹⁴ Vuno honi yeni muamuvianene Uakulele na Vusunga kaha muashikile Pilato linga amiecelele na kumihana muhuza.

¹⁵ Kaha muamutsihile uje ikeye Vavenia muono, vuno honi Njambi uamusanguile ku vatsi. Yetu tunapu tuvakaleho ha cuma eci.

¹⁶ Mukutsiliela mu lizina lia Yesu, lizina liendi ikeye vavenia likelio lihana ou yala nzili, ou mumona nakutantekeya, nalutsilielo luakuhitila muli Yesu lunamuhana kukanguka kuacili ku mesho eni voshe.

¹⁷ "Honi vamuanetu njatantekeya nguange vije mualingile kuli Yesu, yeni na vantuama veni muavilingilile mu nzimba.

¹⁸ Mu ngila eyi vene Njambi uashulisilile vije viahandekele laja kuhitila ku tunanguizi va Njambi va Njambi voshe nguendi, Kilistu uendi akayanda.

¹⁹ Omuo acuma eci tengulukeni, kaha hilukeni kuli Njambi linga amisambese ku vipi vieni,

²⁰ Vitsimbu via kuuima vikahuminina kuli Muene kaha akatuma Kilistu uendi uje yahanguile laja ikeye Yesu.

²¹ Napande kukala muilu noho ntsimbu ikaheta ije Njambi akapuisa viuma vioshe vuha, nge muahandekele laja kuhitila muli tunanguizi va Njambi vendi va kulela.

²² Mosesa uahandekele nguendi, 'Muene Njambi yeni akamitumina kananguizi ngue muje muatumine yange, akapua umo uakuhuma hhakati ka vantu veni, mukononoke vioshe vije viakamileka.

²³ Uoshe kakononoka uje kananguizi vakamuhumisa kuli vantu va Njambi.'

²⁴ Tunanguizi va Njambi voshe nge muvana vahandekelamo, kuhuma kuli Samuele na vaje vezile munima yendi, navo naua vambuluile vije vilingiua matangua ano.

²⁵ Mu vatekuluila va tunanguizi va Njambi va Njambi na litavasano lije Njambi uahanene kuli vakukuluila veni nge muahandekele kuli Avilahama nguendi, 'Kuhitila muli vatekuluila vove miyati yoshe ya vantu hano ha mavu vakakuisuliua.'

²⁶ Omo Njambi ujunduile ngamba yendi, uamutumine kuli yeni hakulivanga, mukumikuisula linga muntu uoshe ahume ku vilinga viendi via vipi."

4

Petulu na Iuano ku mesho a mpunga

¹ Tele Petulu na Iuano vacili nakuhandeka ku vantu, vamo tusasendote na ntuama ua Njivo ya Njambi na Vasanduki vezile kuli vakevo.

² Vanienguele cikuma omuo vakele nakulongesa vantu nguavo Yesu nasanguka ku vatsi, eci camuesele ngeci vatsi vakasanguka.

³ Nankuma, vavakuate nakuvahaka mu kamenga noho liamukuavo, omuo kuapuile laja cinguezi.

⁴ Vuno honi vavengi vaje vovuile lizi vatsilielelele, kaha vuingi vua vamala vapuile makulukazi atanu (5, 0 0 0).

⁵ Liamukuavo vantuama va Vayunda, na vakuluntu, na valongisi va mezi a Lishiko valikunguluile mu Yelusalema.

⁶ Valiuanene hamo na Anase Kasasendote Uakama na Kayafase na Iuano na Alekizanda na voshe vaje vapuile vaka ntanga ya Kasasendote Uakama.

⁷ Omo vemikile Petulu na Iuano ku mesho avo vatondele kutantekeya kaha vavehuile nguavo, "Nzili yeya mulinayo cipue mu lizina lieya mulalingi cuma eci?"

⁸ Ambahoni Petulu hakushula na Cimbembesi Uakulela, uavakumbuluile nguendi, "Yeni vantuama va vantu na vakuluntu,

⁹ nga muli nakutuihula lelo ha vilinga viacili vinalingiu kuli yala ou ua cilema na vati muje muanakangukilamo,

¹⁰ yeni voshe munapande kutantekeya, na vantu voshe vamu Isaleli vanapande kutantekeya ngeci muntu ou nemana ku mesho eni nakanguka muacili mu lizina lia Yesu Kilistu ua ku Nazaleta, uje imuashukikile ha cilindakano, uje yasanguile Njambi ku vatsi.

¹¹ Ou Yesu ikeye uje visoneka vihandeka nguavo

'Livue limuayenguile yeni vaka kutunga,
ikeye honi napu cisimi caseho cikuma ca mumbango kupulakana
vioshe.'

¹² Kutuasa kuuana kuovoka muli ueka naua, omuo kukuesi lizina lieka hano ha mavu lianahana Njambi ku vantu litunapande kuovokelamo."

¹³ Vaka mpunga vakomokele omo vamuene kusimpa kua Petulu na Iuano omuo vamuene ngeci vapuile vantu vangoco vakuhona kulilongesa, kaha vavanongonuene ngeci vakevo vakele hamo na Yesu.

¹⁴ Vuno honi hakumona uje muntu ivakanguisile nemana hamo na Petulu na Iuano, kuvasele kuhandeka cuma cimo cakuvaluisa naua.

¹⁵ Nankuma, vavalekele linga vatuhuke mu njivo ya Mpunga, kaha vaputukile kulihandekesa hhakati kavo nguavo,

¹⁶ "Vika tulinga nava vamala? Omuo muntu uoshe mu Yelusalema natan-tekeya ngeci eci cikomoueso caciha civanalingi, kaha kutuasa kuciviana.

¹⁷ Vuno honi kuvindika cuma eci ngeci keti citsimane naua hhakati ka vantu, tunanguleni ava vamala linga keti vahandeke naua kuli muntu mu lizina lia Yesu."

¹⁸ Nankuma, vasanene mukati nakuvashika linga keti vahandeke cuma cimo cipue kulongesa naua mu lizina lia Yesu.

¹⁹ Vuno honi Petulu na Iuano vavakumbuluile nguavo, "Yeni vavenia uaneni cuma muka cacili ku mesho a Njambi, kuononoka yeni indi kuononoka Njambi.

²⁰ Omuo kutuasa kuholoka kuhandeka viuma vije vituamono nevi vitunevu."

²¹ Hanima yakuvanangula cikuma kaha vavecelele. Vamuene ngeci capuile cacikaluvavahana kashitiku, omuo vantu voshe vashangazalele Njambi ha vije vialingiuile.

²² Uje yala ivalingilile cimueso cakumukanguisa uakele na miaka yakupulakana makumi auana.

Vaka kutsiliela valombelega ha kusimpa

²³ Omo Petulu na Iuano vavecelele, vahilukile kuli vantu vavo naku-valeka vije vivahandekele vakuluntu va tusasendote na vantuaama kuli vakevo.

²⁴ Omo vaka kutsiliela vovuile viuma evi, voshe vakungulukile hamo nakulumbela kuli Njambi nguavo, "Muene Samatanga ua lilu na mavu, na mema a kalunga na viose vilimo!

²⁵ Yove uahandekele na Cimbembesi Uakulela kuhitila muli kukuluila yetu Ndaviti, ngamba yove, omo ikeye uahandekele nguendi,

"Kaha omuo vika ava keti Vayunda vanienguele,
na omuo vika vantu vatumba matumbe akuhona seho?

²⁶ Vamieni va hano ha mavu valivuaheselele vualumo vakevo vavenia,
na vaka kusuana valikunguluile hamo
nakuluisa Muene na Kilistu uendi.'

²⁷ Cilivene Helonde na Pontiyu Pilato valikunguluile hamo mu nganda ino hamo na ava keti Vayunda na vantu va Isaleli nakuluisa ngamba yove uakulela Yesu, uje iuavuavesele.

²⁸ Valikunguluile nakulinga viose vije viuatondele laja na nzili yove na cizango cove linga vikalingiue.

²⁹ Kaha vuavuno, Muene, tala muvali nakutushunguiya, kaha tava linga vangamba vove vambulule lizi liove na kusimpa.

³⁰ Sholola livoko liove mukukanguisa nakulinga vitantekeyeso na viko-moueso mu lizina lia ngamba yove uakulela Yesu."

³¹ Omo vamanusuile kulombela, cihela cije vakungulukilile caliningangele. Kaha voshe vashulile na Cimbembesi Uakulela nakuambulula lizi lia Njambi nakusimpa.

Vaka kutsiliela valipangezela vufuko vuavo

³² Civunga ca vaka kutsiliela vakele na mutima umolika na viyongola vimolika, naumo uahi uatumbuile viuma viendi vije viafukile kupua viendi, vuno honi valipangezelele viose viavo vije vivakele navio.

³³ Kaha na nzili yakama tunganda vambuluile vukaleho vua kusanguka kua Muene Yesu, kaha na kavumbi kakama kakele hali vakevo.

³⁴ Kukuakele umo hhakati kavo uajenekele cuma, omuo vaje vakele na mehia cipue vinjivo vavilandesele kaha vanehele vimbongo vivatambuile ku viuma vije valandesele

³⁵ nakuvihana kuli tunganda, kaha vavipangezelele ku muntu na muntu ngue kukujeneka cendi.

³⁶ Kaha Yosefa, Kalevi uje uasemukilile mu sapulasi, uje tunganda vamutumbuile nguavo Mbanambasa, kulumbunuka nguavo “Muka kuzembeleka,”

³⁷ ualandesele lihia liendi, kaha uanehele vimbongo nakuvihaka kuli tunganda.

5

Ananiya na Safila

¹ Kuakele yala umo lizina liendi Ananiya, na mpuevo yendi Safila valitavasane kulanesa mutambela ua vufuko vuavo.

² Hakulitavasana na mpuevo yendi uashukele mutambela ua fuvuko, kaha uatualele mutambela umo ua vimbongo kuli tunganda.

³ Kaha Petulu uahandekela kuli ikeye nguendi, “Ananiya, vika unatavela Satana akovele mu mutima uove nakuhandeka makuli kuli Cimbembesi Uakulela hakushueka mutambela ua vimbongo viunatambula hakulandesa lihia liavo?”

⁴ Tele kanda uvulandese, vuakele vuove, naua namunima yakuvulandesa, vimbongo viapuile viove. Nkuma vika uayonguela kulinga cuma eci? Kuakuisile vantu vuno honi unakuisi Njambi!”

⁵ Hajevene omo Ananiya uovuile mezi aua, uauililile ha mavu na kutsa, kaha vantu voshe vaje vuovuile evi vakele na liova.

⁶ Vakuenje vezile nakuzenga muvila uendi, kaha vamutualele hambanza na kumutsinda.

⁷ Omo kuahitile maola atatu mpuevo yendi uezile, katantekeyele cuma cije calingiuile.

⁸ Petulu uamuihuile nguendi, “Njileke nga evi vikevio vimbongo vimulandesele lihia lien yove na yaliove?” Kaha Safila uamukumbuile nguendi,

“Eyo, vikevio vene evi.”

⁹ Nankuma, Petulu uahandekela kuli ikeye nguendi, “Nkuma vika yove na yaliove muayongola kueseka Cimbembesi ca Muene? Tala, vamala vanakatsinda yaliove ava vali ku cikolo, vakevo vakutuala nove naua.”

¹⁰ Hajevene Safila uauililile ha mavu ku viliato via Petulu na kutsa. Omo vaje vakuenje vakovelele vamuuanene natsi, kaha vamutualele nakumutsinda kuyehi na yaliendi.

¹¹ Cikungulukilo coshe na vantu voshe vaje vovuile viuma evi vakele na liova liakama.

Vitantekeyeso na Vikomoueso

¹² Tunganda valingile vitantekeyeso na vikomoueso viavingi hhakati ka vantu. Kaha vaka kutsiliela voshe vakungulukilile hamo mu Mbalanda ya Solomoni.

¹³ Cipue vene vantu vavashangazalele cikuma, vuno honi naumo uahi ualipandakanene navo.

¹⁴ Vantu vavengi valivuzezelele ku civunga cavo, civunga ca vamala na vampevo vaje vatsiliezelele kuli Muene.

¹⁵ Nankuma, ku vije vivalingile tunganda, vantu vakele nakuneha vaka kuvavala ku vitapalo nakuvalangeka ha mihela na ha vitalatala linga Cimbembesi ca Petulu cihite helu lia vamo omo ahita kuyehi.

¹⁶ Vivunga via vantu vavengi vezile kuhuma ku membo akuzenguluka Yelusalema, vanehele vaka kuvavala na vaje vakele navaje vanakele nakuyandisiua ku vimbembesi via kujuala, kaha voshe vavakanguisile.

Tunganda vavayandesa

¹⁷ Ambahoni kasasendote uakama na vakuavo vaje va mu mpunga ya Vasanduki, vovuile cipululu kaha vakele na vutumbe vua kuvaluisa.

¹⁸ Vakuate tunganda nakuvahaka mu kamenga ka civunga.

¹⁹ Vuno honi ku vutsiki vujevene kangelo ua Muene uashokoluele vikolo via kamenga, kaha uatuhisile tunganda hambanza, nakuhandeka kuli vakevo nguendi,

²⁰ "Yeni mukemane mu Njivo ya Njambi nakuleka vantu vioshe via muono ou ua uha."

²¹ Omo vovuile evi vakovelele mu Njivo ya Njambi cimene mene nakuputuka kulongesa vantu.

Omo Kasasendote uakama na vantu vendi vahete kaha vasanene mpunga hamo navakuluntu voshe va vantu va Isaleli, kaha honi vatumine vantu ku kamenga linga vanehe tunganda ku mesho avo.

²² Vuno honi omo vaje vaka kuniunga Njivo ya Njambi vahete kuje, kuvauanene vaje tunganda mu kamenga, nankuma vahilukile ku Mpunga nakuambulula nguavo,

²³ "Omo tuahete ku kamenga tuauanene kuakupata ngongongo na vaka kuniunga voshe te vanemana ku vikolo, vuno honi omo tunashokoluele tuauanene mukati naumo alimo uahi."

²⁴ Omo vakuluntu va tusasendote na mukuluntu ua vaka kuniunga Njivo ya Njambi vovuile viuma evi, valikomokelele cikuma nguavo cuma muka cinalingia.

²⁵ Ambahoni yala umo uezile nakuhandeka kuli vakevo nguendi, "Talen, vaje vamala vamunahakele mu kamenga vali mu Njivo ya Njambi nakulongesa vantu!"

²⁶ Nankuma, uje mukuluntu ua vaka kuniunga Njivo ya Njambi uaile na vantu vendi mukuambata tunganda. Kuvakapangesele nzili omuo vovuile liova nguavo hamo vantu vavasha mavue.

²⁷ Omo vanehele tunganda, vavemikile ku mesho a Mpunga. Kaha kasasendote uakama uavehozelele nguendi,

²⁸ "Tuamishikile ngueto keti mulongese naua mu lizina lia yala ou, vuno honi yeni munashandola laja vilongesa vieni mu Yelusalema muoshe kaha mutonda naua mutuhake mulonga ua kutsa cendi!"

²⁹ Vuno honi Petulu na tunganda vakuavo vavakumbuluile nguavo, "Tunapande kuononoka cikuma Njambi kupulukana vantu.

³⁰ Njambi ya vakukuluila vetu ikeye uasanguile Yesu ku vatsi, uje imuatsihile mukumushukika ha cilindakano.

³¹ Njambi uamujunduile nakumutuala ku livoko liendi lia cilio na kumupuisa Ntuama na Muyoyesi linga akahane Isaleli ntsimbu yakuten-guluka ngeci vavasambese ku vipi viavo.

³² Tuvakaleho va viuma evi, yetu hamo na Cimbembesi Uakulela cije Njambi nahana kuli vaje vamuononoka.”

³³ Omo vaje vaka Mpunga vovuile evi, vanienguele cikuma nakutonda linga vatsihe tunganda.

³⁴ Vuno honi umo uavo, uapuile Kafaliseo lizina liendi Ngamaliele, uapuile mulongisi ua mezi a Lishiko kaha naua vantu vamusingimikile cikuma, uakatukile nakushika Mpunga linga vacituhule tunganda ham-banza muka ntsimbu kakandende.

³⁵ Kaha uahandekela ku Mpunga nguendi, “Yeni vakuetu Vaisaleli, zangameni ha viuma evi mulinakulinga kuli ava vamala.

³⁶ Ha vintsimbu via kunima kuasholokele Teundase uje ualipuisile uakama, kaha vamala vakupua makulukazi auana (400) valipandakanene nendi. Vuno honi vamutsihile kaha na voshe vaje vamukavele valishan-dokele, kaha cije civunga cendi cahuile.

³⁷ Munima yendi Yundasa Kangalileya uasholokele ha ntsimbu yaku-tanda vantu, uakokele civunga cakama vuno honi nendi naua vamutsihile kaha na voshe vaje vamukavele valishandokele.

³⁸ Nankuma, ha cihande eci njimileka nguange, keti mueseke kulinga cuma cimo hali ava vamala. Veceleni! Nga evi vanayongola nevi vali nakulinga vinahumu ku vantu, kaha vikahua,

³⁹ vuno honi nga vinahumu kuli Njambi, kaha kumuasa kuvahiana. Ha mulonga ou mukaliuana lika muli nakuluise Njambi!” Kaha vovuisisile mezi a Ngamaliele. Kaha Mpunga yakavele kunangula kua Ngamaliele.

⁴⁰ Nankuma, vasanene vaje tunganda linga vakovele, vavapupile naku-vashika nguavo keti naua vahandekela mu lizina lia Yesu, kaha vavecelele.

⁴¹ Ambahoni omo tunganda vasezele ije Mpunga, vavuahalelele cikuma omuo Njambi uavayonguelele kuyanda nakushauka omuo ha lizina lia Yesu.

⁴² Kaha ha litangua na litangua vakele nakulongesa nakuambulula Muzimbu Uacili ua Yesu Kilistu mu Njivo ya Njambi na mu vinjivo via vantu.

6

Vahangula vakuasi vatanu na vavali

¹ Mu matangua aje, omo vandongisi vakele nakulivuezelela, kuakele Vayunda vaje vakele nakuhandeka ndaka ya Cingelengu valingile vimpata na Vayunda vaje vakele nakuhandeka ndaka ya Cihevelu omuo vantuluue vavo vakele nakuvayengula hakuhana viakulia via ha litangua na litangua.

² Nankuma, vaje tunganda likumi na vavali vasanene vandongisi voshe nakuhandeka kuli vakevo nguavo, “Kucitava tuecele kuambulula lizi lia Njambi linga tutale ha cimpande ca kupangezela viakulia.

³ Nankuma, vakuetu, hanguleni vamala vatanu na vavali hhakati keni vaje vmutantekeya ngeci vanashulu na Cimbembesi Uakulela na mana, tuvahake linga vapange cipangi eci.

⁴ Kaha yetu tukalihane lika ku kulombela nakupanga vipangi viakuam-bulula.”

⁵ Civunga coshe cavuahalelele cikuma na viyongola via tunganda, nankuma, vahanguile Setefano, yala uakushula nalutsilielo na Cimbembesi Uakulela, hamolika na Filipu, na Polokolase, na Nikanole, na Timoni, na

Palamanase, na Nikolau uje keti Kayunda ua ku Antiyoke uje uakavele futisi ya Vayunda.

⁶ Civunga cemikile vaje vamala ku mesho a tunganda, vaje vakevo vavalombebelelele nakuvasaleka mavoko.

⁷ Kaha lizi lia Njambi liashandokele. Civunga ca vandongisi mu Yelusalema calivuezelelele cikuma, na civunga ca tusasendote vavengi vatsiilelele.

Setefano vamukuata

⁸ Kaha honi Setefano, mukushula na kavumbi ka Njambi na nzili, ualingile vitantekeyeso na vikomoueso viakama hhakati ka vantu.

⁹ Vamulisile kuli vamala vamo vaje vapuile vaka njivo ya malombelo ya Vamala Vakupatuka (nge muje muvaitumbuile), muje muakele Vayunda vakuhuma ku Silene na ku Alekizandiliya. Vakuavo vahumine ku mbonge ya Silisiya na ku Asiya valingile vimpata na Setefano.

¹⁰ Vuno honi Cimbembesi cahanene Setefano mana linga omo ahandeka naumo uahi usele kumuhiana kulinga nendi vimpata.

¹¹ Ambahoni vahanene vamala vamo lizika kanva linga vahandeke nguavo, "Tunamuvu alinakuhandeka mezi akushaula Mosesa na Njambi."

¹² Kaha mu ngila eyi vene vashongangeyele vantu na vakuluntu na valongisi va mezi a Lishiko. Vakuate Setefano nakumutuala ku Mpunga.

¹³ Ambahoni vanehele vakaleho vamakuli vaje vamuvinge nguavo, "Ou yala ntsimbu yoshe alinakuluisa Njivo ya Njambi ya kulela na Lishiko lia Mosesa.

¹⁴ Tunevu ahandeka nguendi ou Yesu ua ku Nazaleta akasiula Njivo ya Njambi, nakutengulula futisi yatuhanene Mosesa."

¹⁵ Voshe vatumamene muje mu Mpunga mesho avo atalele hali Setefano, kaha vamuene cihanga cendi casholokele ngue ca kangelo.

7

Majui a Setefano

¹ Kaha Kasasendote uakama uehuile Setefano nguendi, "Viuma evi vinapu via vusunga ndi?"

² Kaha Setefano uavakumbuluile nguendi, "Vamuanetu na vatate njivuilileni! Njambi ua vumpau ualisholuele kuli kukuluila uetu Avilahama te acili mu Mesopotamia, ntsimbu kanda acikale mu Halane,

³ kaha uahandekele kuli ikeye nguendi, 'Seza lifuti liove na ntanga yove kaha ya ku lifuti lije linjikakumuesa.'

⁴ Ambahoni uasezele lifuti liandi lia Kalundiya uaile nakukala mu lifuti lia Halane. Munima ya kutsa kua ishe ya Avilahama, kaha Njambi uamuhumisile mu lifuti lije nakumoneha mu lifuti lino limulinakukala hano.

⁵ Njambi kahanene Avilahama mutambela umo ua lifuti linga upue uendi, cipue kamutambela kakandende ka kuliata ka livu, vuno honi Njambi uamukulahesele kumuhanalio linga lipue liandi na vatekuluila vendi cipue vene te Avilahama kanda akale na muana.

⁶ Kaha evi vikevio viahandekele Njambi nguendi, 'Vatekuluila vove vakakala mu lifuti lia vungezi, kaha vakapua vandungo nakuvayandesa cikuma miaka yakupua vihita viwana (400).

⁷ Njikahisa vantu vaje vavakapangela, kaha munima ya viuma evi vatekuluila vove vakahuma mu lifuti lije, kaha vakanjilemesa mu mutambela uno vene.'

⁸ Ambahoni Njambi uahanene Avilahama cilika cakulovoka ku mukanda kupua cimueso ca cikumiyiyo. Nankuma, Avilahama uapuile ishe ya Isake kaha uamutuhuile ku mukanda omo kuahitile matangua atanu na atatu kuhuma ha kusemuka cendi, kaha Isake uatuhuile munendi Yakomba, na Yakomba uatuhuile vana vendi likumi na vavali, vaje vakevo vakukuluila vakutsimana va muyati uetu.

⁹ “Kaha vakuavo vana va Yakomba vovuilelele cipululu shongo yavo Yosefa, vamulandesele ku vundungo mu Ingito. Vuno honi Njambi uakele hamo nendi

¹⁰ nakumuniunga muacili mu tuyando tuendi tuoshe. Omo Yosefa uasholokele ku mesho a Falao muene ua Ingito, Njambi uamuhanene mana na kavumbi, kaha muene ua Ingito uapuisile Yosefa nguvulu uaka yula Ingito yoshe ya njivo ya muene.

¹¹ Ambahoni kuakele njala mu lifuti lioshe lia Ingito na mu Kanana, kaha njala ije yanehele tuyando tuakama. Kaha vakukuluila vetu kuvasele kuuana viakulia,

¹² vuno honi omo Yakomba uovuile nguavo ku Ingito kuli viakulia, uatu-mineko vana vendi, vakukuluila vetu, ha vungezi vuavo vua kulivanga.

¹³ Kaha ha vungenzi vuavo vua mucivali Yosefa ualisholuele kuli vamu-a-naye, kaha Falao muene ua Ingito uatantekeyele ntanga ya Yosefa.

¹⁴ Nankuma, Yosefa uatumine lizi kuli ishe Yakomba linga vakamuleke hamo na ntanga yendi ngeci veje ku Ingito, vapuile makumi atanu na avali na vantu vatanu (75).

¹⁵ Ambahoni Yakomba uasikumukile uaile ku Ingito, ikeye na vakuku-luila vetu vakatsilileleko.

¹⁶ Mivila yavo vaitualele ku Shekeme kuje vakavatsindile mu cihilo cije calandele Avilahama na vimbongo kuli vana va Hamole.

¹⁷ “Vuno honi omo ntsimbu yahete muyehi linga Njambi ashulisise cikulaheso cendi kuli Avilahama, vantu vetu valanene cikuma mu Ingito.

¹⁸ Kaha kuasuanene muene ueka uje katantekeyele Yosefa.

¹⁹ Ikeye uazangamesele vakukuluila vetu nakuvapangesa mua mupi, nakuvasindiya linga vombile kuti vana vavo linga vatse.

²⁰ Ha ntsimbu ivene Mosesa uasemukile, uapuile kanike uacili cikuma ku mesho a Njambi. Vamulelele mu njivo ya ishe mu vingonde vitatu,

²¹ kaha omo vamuhumisile mu njivo yavo, muna muene Falao ua mpuevo uamuambate nakumulela muacili nge munendi.

²² Mosesa vamulongesele mana oshe a vaka Ingito, kaha uapuile yala uakama mukuhandeka cendi na mu vilinga.

²³ “Omo Mosesa uakele na miaka makumi auana (40), cahuminine kuintsi lia mutima uendi kuya nakumenekela vavushoko vendi vaka Isaleli.

²⁴ Kaha omo uamuene Kaingito ali nakuyandesa umo ua kuli vavushoko vendi, nankuma, uashueneneko nakuohiela uje Kaisaleli kaha uatsihile uje Kaingito.

²⁵ Uayonguele nguendi hamo va Isaleli vendi vovuisisa ngeci Njambi alinakumupangesa linga akavohiele, vuno honi kuvatantekeyele.

²⁶ Ha litangua liamukuavo Mosesa uamuene Vaisaleli vavali valinakulua, kaha uezile mukati kavo nakuhandeka kuli vakevo na mezi a ciyulo nguendi, ‘Eni vamala ivuilileni, yen i muvushoko vueni, kaha vika muli-nakuliluisa umo namukuavo?’

²⁷ Vuno honi uje yala uakele nakuluisa mukuavo uanakuile Mosesa nakuhandeka kuli ikeye nguendi, ‘Iya nakupuisa muka kusuana cipue lihako hhakati ketu?’

²⁸ Nkuma utonda linga unjitsihe naua nge munatsihile uje Kaingito izau ndi?’

²⁹ Omo Mosesa uovuile mezi aua, uateuele mu Ingito nakuya nakukala mu lifuti lia Mindyani. Kaha kuje uakakele na vana vavali va vamala.

³⁰ “Omo kuahitile miaka makumi auana (40), kangelo uasholokele kuli Mosesa mu mulengi ua tuhia tuakele nakushukuma mu liputa mu mpambo kuyehi na Munkinda ua Sinai.

³¹ Omo Mosesa uamuene evi ualikomokelele ha cuma cije camuene, kaha uashuenene kuyehi na liputa mukumonesesa muacili. Vuno honi uovuile lizi lia Muene ngualio,

³² ‘Yange Njambi ya vakukuluila vove, Njambi ya Avilahama na Isake na Yakomba.’ Kaha Mosesa uajajele nakuvua liova, kaha kataleleko naua.

³³ Kaha Muene uahandeketele kuli ikeye nguendi, ‘Shulula vinkaku viove, omuo ha mutambela ha unemana hanapu ha kulela.

³⁴ Njinamono omo muvali na kuyandeselamo vantu vange vaje vali mu Ingito. Kaha njinevu kulinienieta kuavo, njineja ha mavu nakuvamena. Kaha ija honi, linga njikakutume ku Ingito.’

³⁵ “Ou ikeye Mosesa uje ivavianene omo vahandeketele nguavo, ‘Iya nakupuisa muka kusuana cipue lihako hhakati ketu?’ Ikeye vene uje yatumine Njambi kupua muka kusuana na muka kupatula kuhitila muli kangelo uje uasholokele kuli ikeye mu liputa lije liakele nakuuema.

³⁶ Ikeye uahumisile vantu mu Ingito, ualingile vitantekeyeso na viko-moueso mu Ingito, na ku Cisali ca Kuvenga naua na mu mpambo ha miaka makumi auana (40).

³⁷ “Ou ikeye Mosesa uje ualeke vantu va Isaleli nguendi, ‘Njambi akahumisa kananguizi ngue yange uje akahuma hhakati ka vantu veni vavenia.’

³⁸ Ikeye uakele hamo na vantu va Isaleli omo vakungulukilile mu mpambo, naua hamo na vakukuluila vetu na kangelo uje uahandeketele kuli ikeye ha Munkinda ua Sinai, kaha uatambuile muzimbu ua kuyoya ua Njambi nakutuhanauo.

³⁹ “Vakukuluila vetu vavianene kumuononoka, kaha vamunakuililile kumukulo nakutonda linga vahilukile naua ku Ingito.

⁴⁰ Nankuma, vahandeketele kuli Alone nguavo, ‘Tupangele vanjambi linga vatutuamenene. Kututantekeya cuma muka cinalingia kuli Mosesa uje uatuhumisile ku Ingito.’

⁴¹ Yapuile ntsimbu ije ivamungile kamponia mu cifua ca ngombe ua nkomba nakukombelelako nkombelo nakulinga ciuano cakusingimika cipangi ca mavoko avo.

⁴² Vuno honi Njambi uavatalesele nima, kaha uavecelele linga valemese viuma via mulu, nge muvanasoneka mu livulu lia tunanguizi va Njambi va Njambi nguavo,

“ ‘Vantu va Isaleli! Ketu kuli yange
muatsihilile nakukombelela tusitu
ha miaka makumi auana mu mpambo.

⁴³ Yapuile mbalaka ya njambi Moleki ikeyo ije imuambate,
na cifua ca Lefane, njambi yeni ua vintangantanga,
ava vakevo tumponia tueni tuje tumuapangele linga mutulemese.
Nankuma, njikamituma ku vunzinda musinia lia Mbambilone.’ ”

⁴⁴ “Vakukuluila vetu vakele na mbalaka yakulihanana vukaleho mu mpambo. Vaipangele nge Njambi muashikile Mosesa linga vaipangemo, kuya mu cifua cije vene civamuesele Mosesa.

⁴⁵ Vakukuluila vetu vaje vatambuile mbalaka kuli vaishavo vayambate omo vaile na Yoshua nakutambula lifuti ku miyati ije yashekelemo Njambi omo vakele nakuya kulutue. Nankuma, cakele kuje noho ha ntsimbu ya Ndaviti.

⁴⁶ Ikeye vene Ndaviti uje uauanene kavumbi ku mesho a Njambi, kaha uehuile Njambi amutavese linga atungile Njambi ya Yakomba Muakukala.

⁴⁷ Vuno honi uapuile Solomoni uje uamutungilile njivo.

⁴⁸ “Vuno honi Njambi ua Helu Liavioshe kekukala mu vinjivo viakutunga na mavoko a vuntu, ngue muje alinakuhandeka kananguizi ua Njambi nguendi,

⁴⁹ ‘Muene ahandeka nguendi, lilu lipua litanda liange, na mavu apua vuliatelo vuange.

Njivo ya muyati muka muasa kunjitungila?

Mutambela ua muyati muka munjasa kukala?

⁵⁰ Nkuma keti livoko liange vene vavenia liapangele evi viuma vioshe ndi?”

⁵¹ “Yeni vantu vakukaluua,” Kaha Setefano uataualeho kuhandeka nguendi, “Yeni vantu va mitima yakuhona kukutsiliela, na matuitui eni anashoko ku lizi lia Njambi! Yeni naua muli nakuviana Cimbembesi Uakulela nge muvalingile vakukuluila veni.

⁵² Iya kananguizi ua Njambi ivahonouele kuyandesa vakukuluila veni? Vatsihile tunganda va Njambi vaje kusenkulu vambuluile kuija kua Ngamba yendi ua Vusunga. Kaha honi yeni muamuendele vungungu nakumutsiha.

⁵³ Yeni muatambuile Lishiko lia Njambi lije livamihanene tungelo, vuno honi kumualiononokele.”

Setefano vamuasha mavue

⁵⁴ Omo vaje vaka mpunga vovuile evi viuma kuli Setefano, vanienguele cikuma nakulishumanga ku mazo avo mukupihilila.

⁵⁵ Vuno honi Setefano mukushula na Cimbembesi Uakulela uatalele mulu, kaha uamuene vumpau vua Njambi na Yesu nemana ku livoko lia cilio lia Njambi.

⁵⁶ Uahandekela nguendi, “Talen! Njinamono lilu linashokoloka na Muna Muntu nemana ku livoko lia cilio lia Njambi!”

⁵⁷ Vuno honi vaje vaka mpunga vatambekele na lizi liakama cikuma na kuzika matuitui avo. Kaha voshe vaile hamo vuasi kuli ikeye,

⁵⁸ ambahoni vamukokelele hambanza lia nganda, kaha vamuashele mavue. Vakaleho vasezele vikovelo viavo mukuviniunga kuli mukueje umo lizina liendi Saulu.

⁵⁹ Tele vali nakumuasha mavue, Setefano ualombebele nguendi, “Muene Yesu tambula Cimbembesi cange!”

⁶⁰ Kaha uatsikamene ha mavuli endi nakutambakana na lizi liakama nguendi, “Muene, keti uanuke vupi vuavo ovu vuvanalingi!” Omo uahan-dekele mezi aua kaha uatsile.

8

Saulu Apakesa Cikungulukilo

¹ Kaha Saulu uatavele kutsa kua Setefano.

Ha litangua lije vene cikungulukilo ca mu Yelusalema caputukile kuyanda na mapakeso. Vaka kukutsiliela voshe valishandokelele mu mafuti a Yundeya na mu Samaliya kaha kuvanga lika tunganda vakevo vasalelemo.

² Vamo vamala vaka kulemesa Njambi vatsindile Setefano, vamulilile cikuma.

³ Vuno honi Saulu usekele kunongesa cikungulukilo, uaile ku njivo na njivo nakukokangeya vamala na vampuevo nakuvahaka mu kamenga.

Muzimbu Uacili vauambulula mu Samaliya

⁴ Vaka kukutsiliela vaje vashandokele vaile mutambela na mutambela nakuambulula lizi.

⁵ Filipu uasikumukile ku nganda ya Samaliya nakuambulula muzimbu ua Kilistu kuli vantu vaje vakele kuje.

⁶ Omo civunga ca vantu vovuile Filipu nakumona vitantekeyeso vije vialingile, kaha voshe vovuulilile kuli vije viakele nakuhandeka.

⁷ Vimbembesi viakujuala viahumine muli vantu vavengi oku vitam-bakana na lizi liakama, vaka tulepa vavengi na vilema vakangukile.

⁸ Nankuma, mu nganda ya Samaliya muakele kujolela kuakama.

⁹ Mu nganda ije muakele yala umo ua lizina lia Simoni, uje ha ntsimbu yahanima uakomokesele vaka Samaliya na mantseno endi. Ualimuesele ikeye vavenia kupua umo uakama,

¹⁰ kaha vantu voshe muje mu nganda, vantu va vulemu na vaje keti va vulemu vovuulilile kuli ikeye, kaha vahandokele nguavo, "Ou ikeye vene nzili ya Njambi uje ivatumbula nguavo Nzili Yakama."

¹¹ Vakele nakumuivuilila omuo ha ntsimbu yalaha uavakomokesele na mantseno endi.

¹² Vuno honi omo vatsilielelele uje muzimbu uahandokele Filipu kuli vakevo ua muzimbu uacili ua vumuene vua Njambi na via Yesu Kilistu, kaha voshe vamala na vampuevo vavambuitikile.

¹³ Cipue Simoni nendi vene naua uatsilielelele, kaha omo vamumbuitikile uakele hamo na Filipu, ualikomokelele cikuma omo uamuene vikomoueso na vitantekeyeso viakama vije viakele nakulinga.

¹⁴ Omo tunganda vaje vakele mu Yelusalema vovuile nguavo vantu va mu Samaliya vanatambula lizi lia Njambi, Nankuma, vavatuminine Petulu na Iuano.

¹⁵ Omo vahete kuje, vakalombelelele vaje vaka kutsiliela linga vatambule Cimbembesi Uakulela,

¹⁶ omuo Cimbembesi Uakulela te kanda cije kuli vakevo, vuno honi vavambuitikile lika mu lizina lia Muene Yesu.

¹⁷ Ambahoni Petulu na Iuano vasalekele mavoko avo hali vakevo, kaha vatambuile Cimbembesi Uakulela.

¹⁸ Omo Simoni uamuene nguendi tunganda vanahana Cimbembesi kuli vaka kutsiliela mukusaleka mavoko avo hali vakevo, nankuma uahanene vimbongo kuli Petulu na Iuano

¹⁹ nakuhandeka nguendi, "Nange naua njihaneniko eyi nzili yakama linga uoshe injikasaleka mavoko ange akatambule Cimbembesi Uakulela."

²⁰ Vuno honi Petulu uamukumbuluile nguendi, "Yove na vimbongo vovie munonge hamo, omuo yove uayongola nguove hamo uasa kulanda vuana vua Njambi na vimbongo!

²¹ Yove kuuesi na mutambela cipue cihela mu vipangi vietu, omuo mutima uove kuuesi muacili ku mesho a Njambi.

²² Nankuma, tenguluka linga uhume ku viyongola vovie via vipi, kaha lombi kuli Muene linga akusambese ku viyongola vovie nge evi.

²³ Omuo njinamono nguange yove unashulu na cipululu cacipi naua unapu u cinzinda ca vupi."

²⁴ Kaha Simoni uahandekela kuli Petulu na Iuano nguendi, “Njilombebeleleniko kuli Muene linga viuma evi vimunahandeka keti vilingiue kuli yange.”

²⁵ Omo vamanusuile kuhana vukaleho vuavo nakuambulula muzimbu ua Muene, Petulu na Iuano vahilukile ku Yelusalema. Mu ngila yavo vakele nakuambulula Muzimbu Uacili mu membo amengi a mu Samaliya.

Filipu na Nguvulu ua ku Isopia

²⁶ Kaha kangelo ka Muene uahandekela kuli Filipu nguendi, “Katuka uye ku mbuela ku ngila ije ihuma ku Yelusalema iya ku Ngaza.” (Ngila eyi yapua ya mu mpambo.)

²⁷ Nankuma, Filipu uakatukile nakuya kaha ualiuanene na kayunuke uje uapuile Kaisopia, ikeye uapuile mukuluntu ua vulemu muka kuniunga vufuko vuoshe vua Kandeke muene ua mpuevo ua ku Isopia. Kaha uaile laja ku Yelusalema nakulemesa Njambi.

²⁸ Omo uahilukile kuimbo uatumamene mu litemba liendi nakutanda livulu lia Isaya kananguizi ua Njambi.

²⁹ Kaha Cimbembesi Uakulela cahandekela kuli Filipu nguaco, “Shuena kuyehi na litemba lije.”

³⁰ Nankuma, Filipu uashatukilileko kaha uamuivuile ali nakutanda mu livulu lia kananguizi ua Njambi Isaya. Kaha uamuhiuile nguendi, “Ulinakuivuisisa evi ulinakutanda ndi?”

³¹ Uje mukuluntu uamukumbuluile nguendi, “Vatihoni njasa kuvivuisisa kuvanga umo anjilumbuininevio?” Kaha ualombele Filipu linga alonde nakutumama hamo nendi mu litemba.

³² Kaha mezi amu visoneka atandele uje yala akeuo aua:

“Uapuile ngue mpanga uje vatuala nakumutsiha.

Ngue muna mpanga uje aholoka kuluu kuli vaka kumutehula.

Mukemo vene muaholokelelele na ikeye.

³³ Vamukehesele, kaha kuvamusompelelele vusunga.

Iya asa kuambulula ntanga yendi?

Omuo muono uendi vauambate hano ha mavu.”

³⁴ Kaha uje Kayunike uehuile Filipu nguendi, “Njileke, iya nkuma yanatumbula kananguizi, ikeye vavenia indi mukuavo ueka?”

³⁵ Ambahoni Filipu uaputukile kuhandeka na visoneka evi, uamulekele Muzimbu Uacili ua Yesu.

³⁶ Kaha omo vakele nakuenda mu ngila, vahete ku mutambela umo kuje kuakele mema, kaha uje Kayunike uahandekela nguendi, “Tala mema aua! Vika naua vihonouesa kunjimbuitika?”

³⁷ [Filipu uamukumbuluile nguendi, “Citava kukumbuitika nga unatsiliela na mutima uove uoshe.” Ikeye uamukumbuluile nguendi, “Muavusunga vene njitsiliela nguange Yesu Kilistu ikeye Muna Njambi.”]

³⁸ Kaha uje Kayunike uashikile linga vemike litemba, kaha voshe vavali, Filipu na uje Kayunike vakovelele mu mema, kaha Filipu uamumbuitikile.

³⁹ Omo vajavulukile mu mema, Cimbembesi ca Muene catualele Filipu kueka. Kaha uje Kayunike kamumuene naua, vuno honi uaile vungezi vuendi nakuvuahelela cikuma.

⁴⁰ Vuno honi Filipu ualiuanene ikeye vavenia ali ku Azotase, kaha uaile ku Sesaliya, mu ngila muoshe uaile nakuambulula Muzimbu Uacili mu vinganda vioshe.

9

*Saulu Atsiliela muli Yesu**(Vilinga 22:6-16; 26:12-18)*

¹ Ha ntsimbu ijevene Saulu uakele navutenu vuakutonda kutsiha vandongisi va Muene, uaile kuli kasasendote uakama

² nakuvalomba mikanda ya ku vinjivo via malombelo vije viakele ku Ndamasika, linga nga akauanako vamo vakundama ku Ngila ya Yesu, vampuevo cipue vamala, akavakuate nakuvatuala ku Yelusalema.

³ Omo Saulu uahete kuyehi na nganda ya Ndamasika, vuasi vuasi ceke cahumine muilu nakutuila hali ikeye nakumuzengeleka.

⁴ Uaulilile ha mavu kaha uovuile lizi lihandeka kuli ikeye ngualio, "Saulu, Saulu, vika ulinakunjiyandesela?"

⁵ Kaha Saulu uehuile nguendi, "Yove iya, Muene?"

Kaha lizi liakumbuluile ngualio, "Yange Yesu, uje iulinakuyandesa.

⁶ Vuno honi katuka uye mu nganda, kaha vakakuleka viunapande kulinga."

⁷ Vamala vaje vendele hamo na Saulu vemanene kuakuhona kuhandeka omuo vovuile lika lizi vuno honi kuvamuene muntu cipue umo uje alihandeka.

⁸ Saulu uakatukile ha mavu kaha uemuine mesho endi vuno honi kamuene cuma cimo. Nankuma, vamukuete ku livoko nakumutuala ku Ndamasika.

⁹ Ha matangua atatu kasele kumona, kalile cipue kunua cuma cimo.

¹⁰ Mu Ndamasika muakele ndongisi ua Njambi lizina liendi Ananiyasi. Uamuene cimona cije Muene uahandekela kuli ikeye nguendi, "Ananiyasi!"

Kaha ikeye uakumbuluile nguendi, "Yange uno Muene."

¹¹ Kaha Muene uamulekele nguendi, "Katuka uye ku Ngila ya Kusungama ku njivo ya Yundasa ukehuleko yala nahumu ku Talisi lizina liendi Saulu. Omuo ha ntsimbu inovene alinakulombela,

¹² kaha mu cimona cendi namono yala umo lizina liendi Ananiyasi neja nakumusaleka mavoko endi linga ase kumona naua."

¹³ Vuno honi Ananiyasi uakumbuluile nguendi, "Muene, njinevu viou yala kuli vantu vavengi, na viuma viavingi viavikalu vianalingi ku vantu vove vakulela mu Yelusalema.

¹⁴ Kaha neja kuno na nzili yakama yakuhuma kuli vakuluntu va tusasendote mukukuata voshe vaje valemesa lizina liove."

¹⁵ Vuno honi Muene uahandekela kuli ikeye nguendi, "Ya, omuo nji-namuhangula linga anjipangele mukusholola lizina liange kuli vaje keti Vayunda na kuli vamiene na kuli vantu va Isaleli.

¹⁶ Vaje vavenia njikamuleka muje muanapande kuyanda omuo ya lizina liange."

¹⁷ Nankuma, Ananiyasi uaile nakukovela mu njivo kaha uasalekele mavoko endi hali Saulu nakuhandeka nguendi, "Muanetu Saulu, Muene Yesu uje uasholokele kuli yove mu ngila omo uakele nakuija kuno, nanjitemu linga uase kumona naua kaha ushule na Cimbembesi Uakulela."

¹⁸ Hajevene viuma viakufua ngue mavanda viahumine ha mesho endi, kaha uasele kumona naua. Ambahoni uakatukile kaha vamumbuitikile,

¹⁹ kaha munima yakulia viakulia, uakele na nzili naua.

Saulu ambulula mu Ndamasika

Saulu uakele matangua amandende lika na vandongisi mu Ndamasika.

²⁰ Hajevene uaille ku vinjivo via malombelo via Vayunda nakukaputuka kuambulula nguendi Yesu ikeye Muna Njambi.

²¹ Voshe vaje vamuviile valikomokelele nakuihula nguavo, “Nkuma ou keti ikeye uje yala uakele mu Yelusalema uje uakele nakutsiha voshe vaje valemesele lizina eli ndi? Kaha nkuma kezile kuno mukukuata vaje vantu linga avatuale kuli vakuluntu va tusasendote ndi?”

²² Saulu uakele na nzili cikuma, uapayesele Vayunda vaje vakele mu Ndamasika mukuvaloka vusunga nguendi Yesu ikeye Kilistu.

Saulu Ateua Vayunda ku Ndamasika

²³ Omo kuahitile matangua amengi, Vayunda valikunguluile hamo naku-tumba vutumbe vuakutsiha Saulu,

²⁴ vuno honi Saulu uatantekeyele via vutumbe vuavo. Mutania na vutsiki vakele nakuniunga ku vikolo via ku nganda linga vamutsihe.

²⁵ Vuno honi vutsiki vumo vandongisi vendi vamuhahele mu mutonga nakumusosela hambanza lia civumbe mu njanena.

Saulu mu Yelusalema

²⁶ Omo Saulu uaille ku Yelusalema uesekele kulipandakana hamo na vandongisi, vuno honi voshe vamuteuele omuo kuvatsilielele nguavo ikeye napu ndongisi.

²⁷ Vuno honi Mbanambasa uamuambate nakumutuala kuli tunganda. Uavalumbunuine muje Saulu uamuene Muene ha ngila na muje Muene uahandekele kuli ikeye. Kaha naua uavalekele kusimpa kua Saulu omo uambulule mu lizina lia Yesu mu Ndamasika.

²⁸ Nankuma, Saulu uatumamene hamo navo kaha uahitanganene mu Yelusalema muoshe nakuambulula mu lizina lia Muene nakusimpa.

²⁹ Uahandekele nakuliluisa na Vayunda vaje vakele nakuhandeka Cingelengu, vuno honi vatondele kumutsiha.

³⁰ Omo vaka kutsiliela vovuile evi, vatualele Saulu ku Sesaliya nakumutuma ku Tasisi.

³¹ Nankuma, cikungulukilo coshe mu Yundeya na mu Ngalileya na mu Samaliya viakele na ntsimbu ya ciyulo. Hakukuasa kua Cimbembesi Uakulela vikungulukilo viakolele nakulivuezelela, nge hakuyoya kuavo kuakuvuila Muene liova.

Petulu ali mu Linda na mu Yopa

³² Petulu uendanganene oku noku, kaha ha ntsimbu imo uaille nakumona vaka kutsiliela vaje vakele mu Linda.

³³ Kuje uakauanene yala umo lizina liendi Aeneyase uje uapuile muka kalepa kasele kuhuma ha linala ha miaka itanu na itatu.

³⁴ Petulu uahandekele kuli ikeye nguendi, “Aeneyase, Yesu Kilistu akukanguise. Katuka jandula linala liove.” Hajevene Aeneyase uakatukile.

³⁵ Vantu voshe vamu Linda na mu Shalone vamumuene kaha vatengu-lukilile kuli Muene.

Petulu asangula Ndokasi ku vatsi

³⁶ Mu Yopa muakele ndongisi ua mpuevo lizina liendi Tambita, (lizina liendi mu Cingelengu ikeye Ndokasi, kulumbunuka “Nsonge”) ntsimbu yoshe uakele nakulunga viacili nakukuasa tuhutu.

³⁷ Ha ntsimbu ijevene uavavalele, kaha uatsile. Vatanesele muvila uendi nakuulangeka ku mulili ua helu lia njivo.

³⁸ Linda yakele kuyehi na Yopa, kaha omo vandongisi vaje vakele mu Yopa vovuile nguavo Petulu ali mu Linda vatumine vama vavali kuli ikeye nguavo, "Muane, unapande kuija vuasi kuno kuli yetu."

³⁹ Nankuma, Petulu uakatukile nakuya navo. Omo uahete kuje vamu-tualele ku mulili uahelu kuje vantuluue voshe vamuzengelekele nakulila nakumumuesa vimbinja na vikovelo vije vialingile Ndokasi ha ntsimbu ije yakele navo.

⁴⁰ Petulu uavahumisilemo voshe muje mu mulili, kaha uatsikamene ha mavu nakulombela, ambahoni uatengulukilile ku civimbi ca Ndokasi nakuhandeka nguendi, "Tambita, hinduka!" Kaha uemukile, kaha omo uamuene Petulu, uahindikile na kutumama.

⁴¹ Petulu uamukuante ku livoko nakumuimika. Ambahoni uasanene vaka kutsiliela voshe na vaje vantuluue, kaha uavahaneneye oku alinakuyoya.

⁴² Kaha Muzimbu ou uashandokelele mu Yopa muoshe, kaha vantu vavengi vatsilielelele kuli Muene.

⁴³ Kaha Petulu uakele mu Yopa ntsimbu yalaha hamo na Simoni muka kufutungula vilambu.

10

Petulu na Koneliasi

¹ Kuakele yala umo mu Sesaliya lizina liendi Koneliasi, uje uapuile ntuama uamasualale cihita cimo (100) va Valoma vaje vavatumbuile nguavo, "Civunga ca masualale va Itali."

² Uapuile yala uavakakulemesa Njambi uakuivula Njambi liova hamo na ntanga yendi yoshe. Naua uakele nakukuasa cikuma vantu vakuhutua, kaha ntsimbu yoshe uakele nakulombela kuli Njambi.

³ Kuntsimbu imo te mutania ua viholo vitatu, uakele nacimona cije muamuene muacili kangelo ua Njambi uezile nakuhandeka kuli ikeye nguendi, "Koneliasi!"

⁴ Uatalele kuli kangelo na liova nakuhandeka nguendi, "Vika Muene?"

Kangelo uamukumbuluile nguendi, "Njambi navuluka malombelo ove na ku vipangi viove viacili.

⁵ Kaha honi tuma vama vaye ku Yopa kuli yala umo Simoni ivatumbula Petulu kaha vamunehe kuno.

⁶ Ikeye napu mungezi mu njivo ya Simoni uje muka kufutungula vilambu, njivo yendi ili kuyehi na mema a kalunga."

⁷ Omo uje kangelo yakele nakuhandeka nendi uaile, kaha Koneliasi uasanene vangamba vendi vavali na lisualale uje uapuile uavaka kulemesa Njambi, umo uavaje vakele nakumupangela.

⁸ Hanima yakuvaleka vioshe, uavatumine ku Yopa.

⁹ Liamukuavo, omo vakele mu ngila nakuya ku Yopa, kaha Petulu uaile ha tsimba lia njivo nakulombela te litangua lili hhakati ka mutue.

¹⁰ Uevuile njala kaha uakele nakutonda viakulia, te vali nakuvuahesa viakulia, uakele nacimona.

¹¹ Uamuene lilu liashokoloka na cuma cimo cakulifua ngue ntanga yakama ije yazezumukilile ha mavu yakuta ku vimbango viuana via lifuti.

¹² Mukati kayo muakale miyati yoshe ya tusitu, tusitu vakulikoka ha mavu na tuzila.

¹³ Kaha uevuile lizi ngualio, "Katuka Petulu, tsiha kaha alia."

¹⁴ Vuno honi Petulu uahandekela nguendi, "Muene kuahi, omuo kanda njicilieho cuma cimo cakujuala cipue cakujeneka kujela."

¹⁵ Kaha lizi liahandekela kuli ikeye naua ntsimbu ya mucivali ngualio, “Keti utumbule nguove viakujuala vije Njambi nalelesa

¹⁶ Eci calingiuile vintsimbu vitatu, kaha cije cuma vacihiluisile naua muilu.”

¹⁷ Tele Petulu nalikomokela cije cimona mucinalumbunukila, vamala vaje vavatumine kuhuma kuli Koneliasi vehuile ku njivo ya Simoni kaha vemanene ku cikolo.

¹⁸ Vehuile nguavo, “Kuli mungezi kuno ivatumbula nguavo Simoni Petulu ndi?”

¹⁹ Tele Petulu ali nakusinganieka cimona, Cimbembesi cahandekela kuli ikeye nguaco, “Tala, vamala vatatu vali nakukutonda.

²⁰ Katuka yauye ha mavu, linga ukaye navo kuakuhona kuhona, omuo yange njavatumu.”

²¹ Kaha Petulu uaila ha mavu kuli vaje vamala nakuhandeka nguendi, “Yange uno muli nakutonda. Vika munezila kuno?”

²² Kaha vamukumbuluile nguavo, “Koneliasi Ntuama ua masualale cihita cimo (100) ikeye natutumu kuno. Ikeye yala uacili mukakulemesa Njambi, kaha naua Vayunda voshe vakamusingimika. Kaha Kangelo ua Njambi kamulekele linga akulanie uye ku njivo yendi linga akevuile vije viukahandeka.”

²³ Kaha Petulu ualanie vaje vamala linga vakose mu njivo yendi.

Kaha liamukuavo uaila hamo navo, navamo vaka kutsiliela vaje vahumine ku Yopa vahile hamo nendi.

²⁴ Kaha liamukuavo vahete ku Sesiliya, kuje Koneliasi uakele nakuvavandamena, hamo navavushoko na vavusamba vendi vaje valaniene.

²⁵ Hakuheta kua Petulu, Koneliasi uamusheshele nakuua ku viliato viendi nakumulemesa.

²⁶ Vuno honi Petulu uamukatuile nakuhandeka nguendi, “Katuka njinapu nji muntu lika.”

²⁷ Kaha omo uakele nakuhandeka nendi, uakovelele mu njivo kaha uauanene vantu vavengi valikungulula hamo.

²⁸ Kaha uahandekela kuli vakevo nguendi, “Yeni munatantekeya ngueni Kayunda Lishiko liendi kulitavesa kulimenekele na kukala hamo nava keti Vayunda. Vuno honi Njambi nanjimuesa ngeci yange keti njiyongole muntu umo nguange uakujuala cipue uakuhona kulela.

²⁹ Kaha omo muanjisanene, njinezile kuakuhona vimpata. Kaha honi njihula vika muanjisanenena.”

³⁰ Koneliasi uamukumbuluile nguendi, “Yapuile nge ntsimbu ino vene te munahiti matangua auana omo njakele na kulombela mu njivo yange ha ola ya mucitatu ya cinguezi. Kaha hajevene yala umo uazalele vizalo viakuviazima uemanene kulutue luange.

³¹ Kaha uahandekela nguendi, ‘Koneliasi lilombelo liove vanalivu na vipangi viove vanavianuka kuli Njambi.

³² Tuma umo ku Yopa linga akasane yala umo lizina liendi Simoni ivatumbula Petulu. Napu mungezi ku njivo ya Simoni uje mukakufutungula vilambu uje uakala kungenge ya cisali.’

³³ Nankuma, njakusanene vuasi vuasi, kaha unavuahesa omo uneja. Kaha tuvavoshe tuli kuno ku mesho a Njambi nakuivuilila vije Muene nakushiki kuhandeka.”

Kuambulula kua Petulu mu njivo ya Koneliasi

³⁴ Kaha Petulu uaputukile kuhandeka kuli vakevo nguendi, “Mua vusunga njinevuisisa nguange Njambi kekuyengula.

³⁵ Vaje voshe vamuteua nakulinga vije viacili navatambula, kakatala ku muyati ua vantu.

³⁶ Muatantekeya muzimbu uatumine kuli Vaisaleli, uje uakuambulula Muzimbu Uacili ua ciyulo kuhitila muli Yesu Kilistu, Muene ua voshe.

³⁷ Uje muzimbu uashandokelele mu Yundeya, uaputukilile mu Ngaleleya munima ya Iuano ha kuambulula kumbuitika kua kutenguluka.

³⁸ Muje Njambi uavuvesele Yesu uaku Nazaleta na Cimbembesi Uakulela na nzili. Uakele nakuya kuoshe nakupanga viacili nakukanguisa vaje voshe vakele na nzili ya Liyavolo, omuo Njambi uakele hamo nendi.

³⁹ Tuvakaleho kuvije viose vialinguiile mu Yundeya namu Yelusalema. Kaha vamutshihile mukumushukika ha cilindakano.

⁴⁰ Vuno honi Njambi uamusanguile ku vatsi ha litangua lia mu citatu na kumutavesa linga alisholole,

⁴¹ keti ku vantu voshe vuno honi kuli yetu lika vaje vahanguile Njambi kupua vakaleho vendi, yetu vaje valile nendi na kunua nendi munima yakusanguka ku vatsi.

⁴² Uatushikile kuambulula ku vantu na kuambulula vukaleho ngeci Njambi namuhangula kupua muka kuyula uavaka kuyoya na vatsi.

⁴³ Kaha tunanguizi va Njambi voshe va Njambi vakahana vukaleho nguavo uoshe uje akatsiliela muli ikeye vakamukonekela ku vupi vuendi kuhitila muli lizina liendi."

Vaje keti Vayunda vatambula Cimbembesi Uakulela

⁴⁴ Tele Petulu uakele nakuhandeka, Cimbembesi Uakulela cezile hali voshe vaje uevuile muzimbu.

⁴⁵ Kaha Vayunda vaje vaka kutsiliela vaje vezile na Petulu kuhuma ku Yopa valikomokelele cikuma hakumona vuana vua Cimbembesi Uakulela vanachihana cipue kuli vaje keti Vayunda.

⁴⁶ Vevuile vali nakuhandeka mu vindaka viakuliseza seza nakulemesa vukama vua Njambi, kaha Petulu uahandekela nguendi,

⁴⁷ "Ava vantu vanatambula Cimbembesi Uakulela, nge muje yetu tuacitambole. Nkuma kuli umo asa kuvavindika kuvambuitika ku mema ndi?"

⁴⁸ Kaha uavashikile linga vavambuitike mu lizina lia Yesu Kilistu. Kaha vamulombele linga akale navo matangua amandende lika.

11

Vukaleho vua Petulu ku cikungulukilo mu Yelusalema

¹ Kaha Tunganda na vaka kutsiliela vaje vakele mu Yundeya vovuile nguavo vaje keti Vayunda navakevo vanatambula lizi lia Njambi.

² Omo Petulu uaile ku Yelusalema, vaje keti Vayunda vaje vauanene kavumbi ha kulovoka vamuluisile,

³ nakuhandeka nguavo, "Vika unaila kuli ava keti Vayunda vakuhona kulovoka nakulia navo?"

⁴ Kaha Petulu uaputukile kuvalumbunuina kuputukila hambangelo nguendi,

⁵ "Omo tele njakele nakulombela mu mbonge ya Yopa, njamuene cimona. Njamuene cimo cezile ha mavu cakulifua ngue ntanga yakama yakukuta ku vimbango viuana kuhuminina muilu, kaha yatulilile kuyehi nange.

⁶ Omo njatalele cikuma mukati kayo njamuene miyati ya tusitu vamikono iuana, tungunga, tusitu vakulikoka ha mavu, na tuzila.

⁷ Kaha njevuile lizi lihandeka kuli yange ngualio, 'Katuka Petulu, ntsiha kaha ulie!'

⁸ Vuno honi njakumbuluile nguange, 'Muene kuahi, omuo kanda nji-cilieho cuma cimo cakujuala cipue cakujeneka kulela.'

⁹ Kaha lizi liahandekela kuli yange naua ntsimbu ya mu civali kuhuminina muilu ngualio, 'Vije Njambi nalelesa, keti uvitumbule nguove viaku-juala.'

¹⁰ Eci calingiule ha vintsimbu vitatu, kaha ije ntanga na vioshe vije viakeleho vavihiluisile naua muilu.

¹¹ Kaha hajevene vamala vatatu vaje vavatumine kuli yange kuhuminina ku Seseliya vahete ku njivo kuje kunjakele.

¹² Cimbembesi canjilekele nguaco njiye navo kuakuhona kulisindiya. Ava vakuetu vatanu na umo vaka kutsiliela vaile hamo nange ku Seseliya, kaha tuvavoshe tuakovelele hamo mu njivo ya Koneliasi.

¹³ Uatulekele omo muamuenenenemo kangelo uje uemanene mu njivo yendi nakuhandeka nguendi, 'Tuma vantu ku Yopa vakasane Simoni, uje ivatumbula Petulu.

¹⁴ Akamihana muzimbu uje yove na ntanga yove yoshe mukovokela.'

¹⁵ Omo njaputukile kuhandeka, Cimbembesi Uakulela cakele hali vakevo nge muje mucakele hali yetu hambangelo.

¹⁶ Nankuma njili nakuvuluka lizi liahandekela Muene nguendi, 'Iuano uambuitikile na mema, vuno honi vakamimbuitika na Cimbembesi Uakulela.'

¹⁷ Nga Njambi avahana vuana vuakulifua ngue vuje vua tuhanene omo tuatsiliebele muli Muene Yesu Kilistu, kaha yange iya honi linga njivianese Njambi?"

¹⁸ Kaha omo vovuile vije viahandekela, vecelele kumuluisa kaha va-putukile kulemesa Njambi nakuhandeka nguavo, "Nkuma Njambi nahana ntsimbu kuli ava keti Vayunda linga vatenguluke naku yoya."

Cikungulukilo ca ku Antioke

¹⁹ Vakakutsiliela vaje valishandekela ha mapakeso na ha ntsimbu ije ivatsihile Setefano vaile kulahako, vaile ku Funisiya na ku sapulasi na ku Antioke nakuambulula lizi kuli Vayunda lika.

²⁰ Vuno honi vaka kutsiliela vakuavo vaje vahuminine ku Sapulasi naku Silene vaile ku Antioke kaha naua vaile nakuambulula muzimbu kuli Vangelengu, nakuvalekesa Muzimbu Uacili ua Yesu Kilistu.

²¹ Nzili ya Muene yakele hamo navo, kaha vantu vavengi vatengulukile na kutsiliela muli Muene.

²² Muzimbu uoshe uahete ku cikungulukilo ca mu Yelusalema, kaha vatumine Mbanambasi ku Antioke.

²³ Omo uezile uamuene kavumbu ka Njambi muje muka nakuisuliua vantu, uavuahelelele kaha uavalambelele ngeci vapue vaka vusunga kuli Muene na mitima yavo yoshe.

²⁴ Mbanambasa uapuile yala uacili uakushula na Cimbembesi Uakulela na lutsilielo, kaha na vantu vavengi vezile kuli Muene.

²⁵ Kaha Mbanambasa uahile ku Tasisi mukutonda Saulu.

²⁶ Kaha omo uamuuanene uamutualele ku Antioke, mu muaka uoshe uamutuntu ava vavali valiuanene na vantu va mu cikungulukilo naku-longesa civunga cakama kaha ku Antioke kuje Vandongisi vavaputukile kuvahandeka nguavo vaka Yesu.

²⁷ Ha ntsimbu ije tunanguizi va Njambi va Njambi vahumine ku Yelusalema vasikumukile ku Antioke.

²⁸ Umo uavo ua lizina lia Angambase uemanene na nzili ya Cimbembesi nakuambulula vunanguizi nguendi njala yakama ilinakuija hano ha mavu oshe a vaka Loma (kaha eci calingiuile omo Kalaundiase uapuile Sezale).

²⁹ Nankuma vandongisi vasinganiekele ngeci umo na umo hhakati kavo akatume vukuasi ngue muanasela mukukuasa vakuavo vaka kutsiliela vaje vakele mu Yundeya.

³⁰ Kaha valingile cuma eci, vahanene vimbongo kuli Mbanambase na Saulu ngeci vavituale kuli vakuluntu va cikungulukilo.

12

Tiango vamutsiha kaha Petulu vamuhaka mu Kamenga

¹ Kaha ha ntsimbu ije vene muene Helonde uaputukile kupakesa vaka cikungulukilo.

² Uatsihile Tiango munaina ya Iuano, namukuale.

³ Kaha omo uamuene ngeci navuahelesa Vayunda, kaha uatualeleleleho lutue kukuta Petulu. (Eci capanguile ha ntsimbu ya ciuanao ca Mbolo yakuhona cimbaluila.)

⁴ Kaha omo uamukutile uamuhakele mu kamenga, kaha vamuhanene ku vivunga via masualale viuana muje muakele vauana mu civunga cimo na cimo linga vamuniunge. Helonde uatondele kumusompesela ha civunga ca vantu omo ciuano ca Paseka nga cinahu.

⁵ Tele Petulu acili mu kamenga, Cikungulukilo cakele nakumulombebelela kuli Njambi.

Kangelo ahumisa Petulu mu kamenga

⁶ Vutsiki vujevene ntsimbu Helonde kanda a mutuale kuli vantu, Petulu uakosele mukati kavaje vakele nakumuniunga vavali. Vamukutile na malienge avala, kaha kuakele masualale ha cikolo vaje vakele nakuniunga.

⁷ Kaha hajevene kangelo ua Njambi uasholokele na ceke kutuila mu kamenga, kaha uje kangelo uaningangele Petulu nakuhandeka kuli ikeye nguendi, “Katuka vuasi.” Kaha hajevene malienge aje akele ku mavoko endi azitukile.

⁸ Kaha kangelo uahandeketele naua kuli ikeye nguendi, “Kuta muiva uove kaha zala na vinkaku viovie.” kaha Petulu ualingile muje muamulekelelelo, kaha kangelo uahandeketele naua nguendi, “Zala cikovelo cove kaha njikave.”

⁹ Kaha Petulu uamukavangeyele hambanza lia kamenga, vuno honi katantekeyele nguendi vije viakele nakulinga kangelo viapuile via vusunga, uasinganiekele nguendi hamo ali nakumona lika cimona.

¹⁰ Omo vapulakanene civunga ca masualale ca kulivanga na cije ca mucivali, kaha vahete ku cikolo lia cikuavo cije cakushokoluela cikolo caku nganda. Kaha cikolo calishokolokelele cikeco vavenia, kaha vatuhukile hambaza. Vendele hamo kaha hajevene kangelo uasezele Petulu.

¹¹ Petulu uasinganiekele hali vije vialingiuile kuli ikeye kaha uahandeketele nguendi, “Hano honi njatantekeya muavusunga ngeci Muene natumu kangelo uendi linga anjovole ku nzili ya Helonde naku vioshe vije Vayunda vasinganiekele nguavo vikalangua.”

¹² Omo uatantekeyele vioshe vije via lingiuile, uaila ku njivo ya Maliya vaina ya Iuano uje ivatumbuile Mako, kuje kuvakungulukilile vantu vavengi nakulombela.

¹³ Kaha Petulu ua tote ha cikolo ca hambanza, kaha ngamba umo ua lizina lia Londa uezile nakumutava.

¹⁴ Uatantekeyele lizi lia Petulu kaha uavuahelele cikuma, uahilukile kuli vakeyo kuakuhona kushokolola cikolo nakuhandeka nguendi, "Petulu ali hambaza."

¹⁵ Kaha voshe vahandekela kuli ikeye nguavo, "Uzaluka!" Kaha uavasindiye nguendi njimileka vusunga. Kaha vamukumbuluile nguavo, "kumani kangelo uendi."

¹⁶ Vuno honi Petulu uatuaheleho kutota ha cikolo, kaha omo vashokoluele ku cikolo vamumuene kaha valikomokelele cikuma.

¹⁷ Uavaniatelele na livoko liendi linga vaholoke kulu, kaha uavalekele omo Muene namuhumisilamo mu kamenga nguendi, "Lekeni evi kuli Tiango na vakakutsiliela."

Kaha uavasezele nakuya ku mutambela ueka.

¹⁸ Kaha omo kuacele cimene kuakele citanga cikuma hhakati ka masualale vaje vaka kuniunga kamenga, hali vije vialingiuile kuli Petulu.

¹⁹ Helonde uavashikile linga vamutonde vuno honi kuvamuuanene, uehozele vaje vaka kuniunga kaha uashikile linga vavatsihe, nankuma Helonde uahumine mu Yundeya na kuya ku Sesaliya, nakukalako.

Kutsa kua Helonde

²⁰ Nankuma Helonde uanienguelele cikuma vantu vaku Tile na Kusindone. Kaha civunga cakama caile nakumumona. Hakulivanga valambelele Mbalasitase muka kuniunga lipela ngeci avakuase. Kaha honi vaile kuli Helonde nakumulomba ngeci kukale ciyulo, omuo lifuti liavo liakele nakutambula via kulia via kuhuma ku lifuti lia muene.

²¹ Ha litangua lia kuhangula, Helonde ualikutile mukole uendi ua vumuene nakutumama ha vumuene vuendi nakuhandeka ku vantu.

²² Vatambakanene cikuma nguavo, "Keti lizi lia muntu lihandeka vuno honi lizi lia tunjambi!"

²³ Hajevene kangelo ua Njambi uapupile Helonde, omuo kahanene kasingimiko kuli Njambi. Kaha mavuno amulile, kaha uatsile.

²⁴ Vuno honi lizi lia Njambi liatuaheleleho kuya lutue.

²⁵ Omo vamanusuile vije vivaililile kuli Mbanambasa na Saulu kaha vahilukile ku Yelusalema hamo na Iuano, uje ivatumbuile naua nguavo Mako.

13

Mbanambase na Saulu vavahangula nakuvatuma

¹ Kaha mu cikungulukilo ca Antioke kuakele tunanguizi va Njambi va Njambi na valongisi, vapuile Mbanambase na Simioni uje ivatumbuile nguavo uaku zivala, na Luyasi (uje uahumine ku Silene) na Manane, (Uje ivalelele hamo na Sezale Helonde) na Saulu.

² Omo vakele nakulemesa Muene nakuliumina via kulia, Cimbembesi Uakulela cahandekela nguaco, "Njitepeseleniko Mbanambase na Saulu linga vapange vipangi vije njavasanenene."

³ Hanimu yakuliumina via kulia na kulombela, nakukasaleka mavoko kaha vavatumine.

Mbanambase na Saulu vambulula mu Sapulasi

(Vilinga12:25)

⁴ Omo Cimbembesi Uakulela ca tumine Mbanambase na Saulu vaye ku Seleusiya, kaha hakuhuma kuje vasikumukile mu vuato ku nkundu lia Sapulasi.

⁵ Omo vahete ku Salamisi vaputukile kuhandeka lizi lia Njambi mu vinjivo via malombelo via Vayunda. Kaha Iuano uakele hamo navo mukuvakuasa vipangi.

⁶ Vendele mu nkundu muoshe nakuheta kuli Pafose kuje vakauanene umo muka matseno lizina liendi Mbala-Yesu, ikeye Kayunda uje ualitumbuile ikeye vavenia kupua kananguizi ua makuli.

⁷ Uapuile kavusamba kauje mukuluntu uamuje mu nkundu lizina liendi Selengiyase Pauluse, uje uapuile yala uamangana. Nguvulu ua Loma uasanene Mbanambase na Saulu omuo uatondele kuivua lizi lia Njambi.

⁸ Vuno honi vakele nakuvaluisa kuli muka mantseno Eliamase (eli likelio lizina liendi lia Cingelengu), uje usekele kuhumisa Nguvulu lutsilielo.

⁹ Vuno honi Saulu uje ivatumbuile nguavo Paulu uashulile na Cimbembesi Ukulela, uatalele uje muka mantseno.

¹⁰ Nakuhandeka nguendi, “Yove muna Liyavolo, yove citozi ca vusunga, uakushula na makuli oshe na lizangamena lioshe, kaha yove ntsimbu yoshe uli nakueseka kutengulula vusunga vua Muene kuvupuisa makuli.

¹¹ Muene akakuluisa, kaha ukapua kapuputua muka ntsimbu lika, kukamono kutua ca litangua.” Kaha hajevene mbundu na milina viezile ha mesho endi kaha uahonouele kumona, uaputukile kutonda muntu linga amukuate ku livoko.

¹² Kaha omo Nguvulu uavimuene vije via lingiule uatsilielele, omuo ualikomokelele cikuma ha vilongesa via Muene.

Paulu na Mbanambasi vali mu Antioke ya mu Pisindiya

¹³ Kaha Paulu na vakuavo vajavukile mu vuato kuya musinia lia Pafose, kaha vezile ku Pelenga nganda ya mu Pamefeliya, kaha Iuano uavasezele uahilukile ku Yelusalema.

¹⁴ Vahumine ku Pelenga vahete ku Antioke mu Pisindiya, kaha lia Sapalalo vaile mu njivo ya malombelo ya Vayunda na kutumama.

¹⁵ Omo vatandele Lishiko lia Mosesa na visoneka via tunanguizi va Njambi va Njambi kaha vantuama va mu njivo ya malombelo ya Vayunda vatumine lizi kuli vakevo nguavo, “Vavusamba tumilomba ngueto muhandeke kuli vantu nga muli na mezi akuvatakamesa.”

¹⁶ Kaha Paulu uemanene na kualola livoko liendi muilu nakuhandeka nguendi,

“Vavushoko vuange vaka Isaleli neni keti Vayunda vaka kulemesa Njambi, tolilileni kuli yange!

¹⁷ Njambi ua vantu va Isaleli uahanguile vakukuluila vetu, nakuvapuisa muyati uakama ha tsimbu ije vakele vangezi mu Ingito. Kaha Njambi uavahumisile mu Ingito na nzili yendi yakama,

¹⁸ Kaha uavaniungile mu mpambo miaka yakupua makumi auana.

¹⁹ Uanongesele mafuti a miyati itanu na ivali mu lifuti lia Kanana, kaha uapuisile lifuti lije vusuana vua vantu vendi.

²⁰ Kaha evi viuma vioshe via lingiule ha miaka yakusetekesa vihita viuana na makumi atanu (450).

“Kaha munima yevi uavahanene mahako noho ha ntsimbu ya kananguizi Samuele.

²¹ Valombebe muene, kaha Njambi uavahanene Saulu muna Kishe, uaku muyati ua Mbenjamani, ngeci apue muene uavo ha miaka makumi auana (40).

²² Kaha omo Njambi uahumisile Saulu ha vumuene, uapuisile Ndaviti muene uavo. Eci cikeco cahandekela Njambi hali ikeye nguendi, 'Njin-auna Ndaviti muna Njesi ikeye yala uje injazanga, uje akalanga vioshe vije njitonda ngeci avilinge.'

²³ Ikeye Yesu uaku ntanga ya Ndaviti uje Njambi uamupuisile muyoyesi ua vantu va Isaleli ngue muakulahesele laja.

²⁴ Ntsimbu kanda Yesu aputuke vipangi viendi, Iuano uambulule kuli vantu voshe va Isaleli ngeci vatenguluke ku vupi vuavo nakuvambuitika.

²⁵ Kaha omo Iuano uahete muyehi nakumanesa vipangi viendi, uehuile vantu nguendi, 'Musinganieka ngueni Yange iya? Keti yange uje muli na kuvandamena. Vuno honi ivuilleni! Alinakuija munima yange, yange kunjasa cipue kuzitula miva ya vinkaku viendi.'

²⁶ "Vavushoko vange vaka Isaleli vatekuilila va Avilahama, kaha neni voshe keti Vayunda yeni mulikuno vaka kulemesa Njambi: muzimbu ou uakuovoka vanautumu kuli yetu!

²⁷ Omuo vantu vaje valinakuyoya mu Yelusalema na vakuluntu omuo kuvatantekeye ngeci ikeye napu muyoyesi, cipue kuivuisisa mezi a tunanguizi va Njambi va Njambi aje avakatanda ha litangua na litangua lioshe lia Sapalalo, cipue ngoco valingisile mezi a tunanguizi va Njambi va Njambi kupua a vusunga mukuhana Yesu mulonga.

²⁸ Cipue ngocovene kuvauanene vukaleho ngeci vamuhatuile mulonga ua kutsa, vuno honi valombebe Pilato linga amutsihe.

²⁹ Kaha omo valingile vioshe vije ngue muviahandeka visoneka hali ikeye, vamuhumisile ha cilindakano na kumuhaka mu cihilo.

³⁰ Vuno honi Njambi uamusanguile ku vatsi,

³¹ kaha ha matangua amengi ualisholuele kuli vaje uendele navo kuhuma ku Ngalileya nakuheta ku Yelusalema. Vakevo honi vanapu vakaleho vendi kuli vantu va Isaleli.

³² Yetu tulikuno naku minehela Muzimbu Uacili, uje Njambi uakulahesele vakukuluila vetu kuvilinga,

³³ vikevio natulingila yetu vatekuluila vavo mukusangula Yesu ku muono ngue muvanasoneka mu livulu lia mucivali lia Miaso ngualio, 'Yove unapu u munange, litangua lia lelo njinapu nji Isho.'

³⁴ Kaha eci cikeco cahandekela Njambi hakumusangula ku vatsi nguendi kakapolela mu cihilo kuahi, 'Njikakuhana vivesikiso via kulela via vusunga vije njakulahesele Ndaviti.'

³⁵ Ngue muanahandeka naua mu mikanda yeka nguendi, 'Kukatava ngamba yove uakulela linga apole mu cihilo.'

³⁶ Kaha omo Ndaviti uapangele cizango ca Njambi ha ntsimbu yendi vavenia, kaha uatsile, vamutsindile na vakukuluila vendi, kaha muvila uendi uavolele mu cihilo.

³⁷ Vuno honi kuli uje yasanguile Njambi ku vatsi muvila uendi kuuapolelele mu cihilo.

³⁸ "Kaha yeni voshe vavushoko vange vaka Isaleli munapande kutantekeya ngeci kuhitila muli Yesu mukemuo vali nakuambulula muzimbu uaku sambuesa ca vipi.

³⁹ Kaha muapande kutantekeye ngeci uoshe uje atsiliela muli Yesu nazituka ku vipi, Njambi amupuisa kupua ua vusunga ku viuma vioshe vije Lishiko lia Mosesa ku liasele kumupuisa ua vusunga.

⁴⁰ Zangameni linga vije vivahandekela Tunanguizi keti vilingiue kuli yeni.

41 “Taleni yeni vaka kusembulula, kaha likomokeleni na kutsa!
 Omuo cuma cije njikalinga mu matangua eni cikapua cuma cije
 kumukatsiliela,
 cipue vamilumbunueco!”

42 Omo Paulu na Mbanambase vahumine mu njivo ya malombelo ya Vayunda, vantu vavalaniene naua kuhiluka kuli vakevo ha litangua lia Sapalalo likuavo nakuvaleka viuma evi.

43 Omo vantu vahumine kuje ku njivo ya malombelo ya Vayunda, Vayunda vavengi na vaje keti Vayunda vaje vapuile va kulungua ku futisi ya Vayunda vakavele Paulu na Mbanambase. Kaha vahandekele kuli vakevo nakuvatakamesa kukakateya ha kuyoya mu kavumbi ka Njambi.

44 Kaha lia Sapalalo yakaveleho vantu vavandende lika vasalele mu nganda omuo voshe vezile mukuivua lizi lia Muene.

45 Omo Vayunda vamuene civunga, vakele nacipululu, valuisile vije viakele nakuhandeka Paulu nakumutukanga.

46 Vuno honi Paulu na Mbanambase vahandekele nakusimpa nguavo, “Capandele ngue lizi lia Njambi valihandeka kuli yeni ha kulivanga. Vuno honi mualivianene, kaha munalisinganieka yeni vavenia ngueni kumuafuililile kutambula muono uayaye, kaha tumiseza nakuya kuli vaje keti Vayunda.

47 Omuo eli likelio Lishiko lianatushiki Muene nguendi,
 “Njinamipuisa ceke kuli ava keti Vayunda,
 ngeci vaka mafuti voshe vakovoke.”

48 Omo vaje keti Vayunda vuovuile evi, vavuahelele nakulemesa lizi lia Muene, kaha vaje vavahanguile kupua na muono uayaye vatsilieele.

49 Kaha lizi lia Muene liashandokelele kuoshe mu lifuti lije.

50 Vuno honi Vayunda vashongangeyele vantuaama va mu nganda, nava vampevo vakutsimana vaje keti Vayunda vaje vakulungua vaka kulemesa Njambi. Kaha vapatukile kupakesa Paulu na Mbanambase nakuvashaka mu lifuti liavo.

51 Vuno honi tunganda vatotomuene likungu ku viliato viavo kupua cihiso ca vantu va kuje, kaha vaile ku Ikoniya.

52 Kaha vandongisi mu Antioke vashulile nakuvuahelela na Cimbembesi Uakulela.

14

Paulu na Mbanambase mu Ikoniya

1 Cuma cimolika calingiuile mu Ikoniya, muje Paulu na Mbanambase vaile mu njivo ya malombelo ya Vayunda vahandekele mu ngila ije yanehelele ngeci civunga cakama ca Vayunda na Vangelengu linga vatsilieele.

2 Vuno honi Vayunda vaje vakakuhona kutsiliela vashongangeyele vaje keti Vayunda nakuluisa vaka kutsiliela.

3 Kaha Paulu na Mbanambase vakele kuje ntsimbu yalaha, vahandekele nakusimpa hali Muene, uje uasholuele ngeci muzimbu uavo ua kavumbi uapuile ua vusunga mukuvahana nzili ya kulinga vitantekeso na viko-moueso.

4 Vuno honi vantu va muje mu nganda valitepele, vamo vemanene na Vayunda, vakuavo vemanene na tunganda.

5 Kaha Vayunda na vaje keti Vayunda hamo na vakuluntu vavo, valitavasanene kuyandesa tunganda nakuvasha mavue.

6 Kaha omo tunganda vanangukile eci, vateuelele ku Lisitala na ku Ndemba vinganda via mu Likaoniya na ku mitambela yakuhatako.

7 Kaha kuje vambuluile Muzimbu Uacili.

Paulu na Mbanambase mu Seseliya

8 Mu Lisitala muakele yala umo uje uapuile cilema ua mikono hume ha kusemuka cendi kasele kuenda.

9 Uatumamene kuje nakuivua mezi a Paulu, Paulu uamuene ngeci natsiliela, kaha asa ku kanguka nankuma uamutalele ntoma.

10 Kaha Paulu uatambekele na lizi liakama nguendi, “Katuka uimane na mikono yove!” Kaha uje yala uatumbukile nakuputuka kuenda.

11 Omo civunga camuene vije Vialingile Paulu, vaputukile kutambeka mu ndaka yavo ya Cilikaoniya nguavo, “vanjambi vaneja kuli yetu mu cifua ca vuntu!”

12 Kaha valukile Mbanambase lizina nguavo Zeyase, naua lizina lia Paulu nguavo Helemese, omuo ikeye uapuile mukuluntu uakuhandeka.

13 Kasasendote ua Zeyase uje njivo yendi yakulemesela yakele hambanza lia nganda, uanehele vangombe va vankomba na vitsani ku cikolo, omuo ikeye na vaje vivunga vatondele kukombelela nkombelo ku tunganda.

14 Vuno honi omo Mbanambase na Paulu vovuile vije vatondele kulinga, vatavozuele vizalo viavo nakushatukila mukati ka civunga nakutambeka nguavo,

15 “Vika muli nakulingila cuma eci? Netu tunapu vantu ngeci yen! Tulikuno mukuambulula Muzimbu Uacili, nakumitengulula ku viuma viangoco ngeci muije kuli Njambi ua kuyoya, uje uatangele lilu na mavu na mema a kalunga na vioshe vilimo.

16 Ku miaka ya vakukuluila vetu uatavesele vantu voshe linga vaye mu vingila viavo vavenia.

17 Vuno honi ha ntsimbu ije uahanene vukaleho vuakukala cendi vavienia ha viuma via cili, kaha akamihana kalunga na vimbuto ha ntsimbu yavio, akamihana via kulia nakushulisa mitima yen! nakuvua-helela.”

18 Cipue ngocovene na mezi aua a tunganda kuvasele kuvindika civunga kukombelela nkombelo kuli vakevo.

19 Vuno honi Vayunda vamo vahuminine ku Antioke mu Pisindiya naku Ikoniyame vashongangeyele vivunga kaha vashele mavue Paulu nakumukokela hambaza ya nganda omo vayonguele nguavo hamo natsi.

20 Vuno honi omo vandongisi vamuzengelekele, uahindikile nakuimana nakuhilukila mu nganda. Kaha liamukuavo ikeye na Mbanambase vaile ku Ndemba.

Kuhilukila ku Antioke mu Seseliya

21 Omo Paulu na Mbanambase vambuluile Muzimbu Uacilil mu Ndemba, kaha vauauanene vandongisi vavengi. Kaha vahilukile ku Lisitala na ku Ikonoyame noho vahete ku Antioke, mu Pisindiya.

22 Vakolesele vandongisi nakuvatakamesa ngeci vapue vaka vusunga mukutsiliela, vavalongesele nguavo, “Tuapande kuhita mu tuyando tua-tuingi ngeci tukovele mu vumuene vua Njambi.”

23 Mu cikungulukilo na cikungulukilo vemikilemo vankulutu, kaha na malombelo na kuli kela kulia vavakundikile kuli Muene uje ivatsiliehelele.

24 Kaha omo vahete mu mutambela ua Pisindiya, vezile ku Pampaliya,

25 kuje vambuluile lizi ku Pelenga, kaha vasikumukile ku Ataliya.

26 Kaha kuhuma kuje vajavukile mu vuato nakuhiluka ku Antioke ku mutambela uje vavakundikile kukavumbi ka Njambi ku vipangi vije vinamanesele ku linga ha ntsimbu ije.

²⁷ Omo vahete mu Antioke vakunguilile hamo vantu vaka cikungulukilo nakuvaleka viuma vije via lingile Njambi, muje mua shokololuele ngila kuli vaje keti Vayunda ngeci vatsilieles.

²⁸ Kaha vakele kuje ntsimbu yalaha na vandongisi.

15

Vantuama va Cikungulukilo valiua mu Yelusalema

¹ Vuno honi vamala vamo vahumine ku Yundeya vaile ku Antioke vaputukile kulongesa vaka kutsiliela nguavo, “Kumuasa kuovoka kuvanga mutuhuke ngue kuya ku Lishiko lia Mosesa.”

² Kaha Paulu na Mbanambase vakele na vimpata cikuma na vakevo ha cuma eci, vasinganiekele ngeci Paulu na Mbanambase na vamo veka vantu va mu Antioke vaye ku Yelusalema nakuliuana na tunganda na vakuluntu vamu nganda ije.

³ Nankuma, cikungulukilo ca vatumine, kaha omo vahitile mu Fonisiya na mu Samaliya, kaha valumbunuine muje vati vaje keti Vayunda vatengulukilile kuli Njambi, ou muzimbu uanehele kuvuahela cikuma kuli vaka kutsiliela voshe.

⁴ Kaha omu vahete Yelusalema, vavatambuile ku cikungulukilo na tunganda na vakuluntu, kaha valimbunuine vuoshe vije valingile Njambi.

⁵ Vuno honi vakakutsiliela vamo vaje vakundamene ku civunga ca Vafaliseo vakatukile nakuhandeka nguavo, “Vaje keti Vayunda vanapande kulovoka nakuvaleka ngeci vononoke Lishiko lia Mosesa.”

⁶ Tunganda hamo na vakuluntu vakungulukile na nakusinganieka cihula eci.

⁷ Kaha omo vahandeketele ntsimbu yalaha, Petulu uakatukile nakuhandeka kuli vakevo nguendi, “Vakakutsiliela muatantekeya hume laja Njambi uahanguile yange hhakati keni na kuambulula Muzimbu Uacili kuli vaje keti Vayunda ngeci vovue na kutsiliela.

⁸ Njambi uje atantekeya visinganieka via muntu uoshe, uamueseles vukaleho vuendi kuli vaje keti Vayunda hakuvahana Cimbembesi Uakulela, ngue muje muatuhanene yetu.

⁹ Kaha kamonesele kahangu hhakati kavo netu, vuno honi uavasambeles ku vupi vuavo omo vatsilieles.

¹⁰ Kaha honi vika muesekele Njambi nakutuika citeli ha miongo ya vandongisi cije cipue vakukuluila vetu cipue yetu kutuasa kucambata.

¹¹ Tutsiliela na kuovoka ha kavumbi ka Muene Yesu, ngue vakevo naua.”

¹² Kaha civunga coshe ca vantu vaholokele kulu omuo vovuile Mbanambase na Paulu valumbununa vitantekeyeso na vikomoueso vije vialingile Njambi muli vakevo hali vaje keti Vayunda.

¹³ Omo vamanusuile kuhandeka vioshe, kaha Yakomba uahandeketele nguendi, “Vavusamba njivuulileni!

¹⁴ Simoni ahavene natulumbunuina muje vati Njambi hakulivanga uahakelele mana kuli vaje keti Vayunda mukuhangulaho vamo hhakati kavo ngeci vapue vantu vendi.

¹⁵ Vihandeka via tunanguizi va Njambi va Njambi via litombola muacili na viuma evi. Ngue muje muviendeka visoneka,

¹⁶ Kaha Muene Njambi alinakuhandeka

Nguendi, munima ya

viuma evi njikeluka nakuiluisa naua vumuene vua Ndaviti njikavutungulula

nakuvukolesa naua.

17 Kaha vantu voshe vakeja kuli yange,
voshe vaje keti Vayunda vaje vanjikana kupua vange.

18 Kaha omu mukemuo mualinakuhandekela Muene, uje uasholuele viuma
vioshe kusankulu.'

19 Yakomba uahandekela nguendi "Muvisinganieka viange," nguange,
"kutua kupesa vaje keti Vayunda vaje vanatengulukila kuli Njambi.

20 Vuno honi tunapande kuvasonekela mukanda uakuvaloka ngueto keti
valie viakulia via kujeneka kulela omo vanavikombelela ku tumponia
nakulitenga kuvupangala, kaha naua keti valie tusitu tua kutikinia cipue
kulia maninga.

21 Kuhuma kuntsimbu ya laja Lishiko lia Mosesa valitanda muvi njivo via
malombelo via Vayunda ha litangua lia Sapalalo, kaha naua mezi endi va
ambulula mu vinganda vioshe."

Mukanda kuli vaje vaka kutsiliela vaje keti Vayunda

22 Kaha tunganda na vakuluntu hamo na cikungulukilo coshe vasin-
ganiekele kuhangula vantu vamo, vahanguile vamala ku civunga cavo
ngeci vavatumu ku Antioke hamo na Paulu na Mbanambase. Vahanguile
naua vamala vavali vaje vavasingimikile cikuma vaka kutsiliela, Yundasa
ivasanene Mbalambase na Silasi.

23 Kaha vavatumine hamo na mukanda uakuya kuli vakevo nguavo,
"Vakueto yetu tunganda na vakuluntu, tunatumu vihindu vietu kuli yeni
voshe vakueto vaje keti Vayunda ku cisemua vaje muakala mu Antioke na
mu Silisha.

24 Tunevu nguavo vamo vamala vamu civunga cetu vaneja na naku-
mitanganesa na vije vivanahandeka vakevo kuvatambuile vilongesa vi-
akuhuma kuli yetu.

25 Kaha tualikunguluile nakulitavasana tu vavoshe kuhangula vamo
vamala nakuvatuma kuli yeni. Hamo na vavusamba vetu vatuzangele
cikuma Mbanambase na Paulu,

26 vaje vahanene muono uavo mukupangela Muene uetu Yesu Kilistu.

27 Kaha tunatumu Yundasa na Silasi vaje vakamileka viuma vimo vije
vituli na kusoneka.

28 Omo Cimbembesi Uakulela hamolika netu tualitavasana ngeci kutua-
pandele kumituika citeli ceka lelo kuvanga lika mashiko aua ngueto,

29 Keti mulie viakulia vije viakukombelela ku tumponia, keti munue
maninga, keti mulie kasitu uakutikinia, kaha litengeni ku vupangala,
mukakala muacili nga muliniunga kuakuhona kulinga viuma evi, vihindu
vieni."

30 Kaha vaje vavatumine vasikumukile ku Antioke kuje vakakunguluile
civunga coshe ca vaka kutsiliela nakuvahana uje mukanda.

31 Kaha omo vantu muvatandele uje mukanda vavuahelelele cikuma ha
muzimbu uakuvasimpisa.

32 Kaha Yundasa na Silasi vaje vapuile tunanguizi va Njambi va Njambi,
va vasimpisile nakuvatakamesa cikuma.

33 Omo vakele navo kuje ha ntsimbu imo, kaha vaka kutsiliela
vavahiluisile kuli vaje vavatumine nakuhandeka kuli vakevo nguavo
endeni mu ciyulo.

34 [Kaha Silasi uasinganiekele kukala kuje.]

35 Vuno honi Paulu na Mbanambasi vasalele mu Antioke, hamolika na
vakuavo veka vavengi valongesele na kuambulula Muzimbu Uacili ua
Muene.

Paulu na Mbanambase valitepa

³⁶ Ha ntsimbu imo Paulu uahandekela kuli Mbanambase nguendi, “Tuye tuhiluke linga tukameneke vakakutsiliela mu vinganda viose muje tuambuile lizi lia Muene, linga tukamone vati muje vali nakuyoya.”

³⁷ Kaha Mbanambase uatondele kuambata Iuano uje ivatumbuile Mako, linga vaye nendi.

³⁸ Vuno honi Paulu uasinganiekele nguendi keti cacili kuya nendi, omuo kakele hamo navo mukumanesa vipangi, vuno honi uahilukile nakuvaseza mu Pampaliya.

³⁹ Hakele vimpata, kaha valitepele Mbanambase uambate Mako nakuya ku Sepulasi na vuato.

⁴⁰ Vuno honi Paulu uahanguile Silasi nakuya nendi, vamutavesele kuli vaka kutsiliela kuhitila mu kavumbi ka Muene.

⁴¹ Omo vaile vahitile mu silia namu Silisha mukukolesa vikungulukilo

16

Timoteo aya hamo na Paulu na Silasi

¹ Kaha Paulu uahete naua ku Ndemba na kuli Lisitala, kuje kuakele mukua Yesu umo lizina liendi Timoteo. Vaina navakevo vapuile vakua Yesu vaje vapuile Kayunda, vuno honi ishe uapuile Kangelengu.

² Kaha voshe vaka kutsiliela vamu Lisitala na mu Ikoniya vashangazalele cikuma Timoteo.

³ Kaha Paulu uatondele kuya na Timoteo, kaha uamutuhisile. Ualingile viose evi omuo Vayunda voshe vaje vakele mu mitambela ije vatan-tekeyele ngeci ishe ya Timoteo uapuile Kangelengu.

⁴ Omo vakele nakuhita mu vinganda, vahanene vakakutsiliela mashiko aje avasinganiekele tunganda na vakuluntu mu Yelusalema, kaha vavalekele linga vononoke aje mashiko.

⁵ Vikungulukilo viakele na nzili mukutsiliela kaha valivuezelele ha litangua na litangua.

Cimona ca Paulu Mu Tolouase

⁶ Kaha vahitile mu mutambela ua Filingiya na mu Ngalatiya omuo Cimbembesi Uakulela cavavindikile kuambulula muzimbu mu nganda ya Asiya.

⁷ Kaha omo vahete ku nginga ya Misiya vesekele kuya mu lifuti lia Mbitaniya, vuno honi Cimbembesi ca Yesu kucavatavesele.

⁸ Kaha vahitile mukati ka Misiya nakuya ku Tolouase.

⁹ Kaha ku vutsiki vuje vene Paulu uamuene cimona muje uamuene yala umo ua ku Masendoniya nemana nakumulomba nguendi, “Ija kuno ku Masendoniya uakutukuase.”

¹⁰ Kaha omo Paulu uamuene eci cimona, hajevene tuakatukile nakuya ku Masendoniya, omuo tuasinganiekele ngueto Njambi natusana mukuambulula Muzimbu Uacili kuli vantu kuje.

Kutenguluka kua Lindiya mu Filipu

¹¹ Omo tuahumine ku Tolouase tuajavukile mu vuato nakuya ku Samotalase, kaha lia mukuavo tuaile mu Neyapolise.

¹² Kaha kuhuma kuje tuahile ku Filipu, nganda yamutambela uakulivanga mu lifuti lia Masendoniya, ikeyo naua yapuile nganda ya Loma kaha tuakele muje mu nganda matangua amengi.

¹³ Kaha lia Sapalalo tuakatukile mu nganda tuaile ku ngenga ya ndonga kuje tuayonguele ngueto kuli mutambela uakukungulukila mukulombela. Kaha tuatumamene nakusikama na vampuevo vaje vakungulukilili kuje.

¹⁴ Kaha umo uavo uatuvuile uapuile Lindiya uahumine ku Tiyaile uapuile mukakulandesa vintanga viacili viakuvenguluka naua uapuile mpuevo ua kulemesa Njambi, kaha Muene uashokoluele mutima uendi kukuivuilila ku vije viakele nakuhandeka Paulu.

¹⁵ Kaha omo vamumbuitikile ikeye na vantu vamu njivo yendi, kaha uatulaniene nguendi, "Tjeni mukakale mu njivo yange nga muasinganieka ngueni njinapu muka kutsiliela muli Muene." Nankuma uatusindiile linga tuye.

Mu kamenga ku Filipu

¹⁶ Ha litangua limo omo tuakele nakuya ku muhela uakulombelela, tualuanene na ngamba ua mpuevo uje uakele na Cimbembesi cakujuala uje uakele nakumupangesa mukumona viuma via kulutue. Kaha uapitisile cikuma muene uendi mukuhandeka viuma viacili vije vikalungiua kulutue.

¹⁷ Ou mpuevo ukavele Paulu hamo netu kaha uatambekele nguendi, "Ava vamala vanapu vangamba va Njambi Uahelu lia Vioshe! Vali nakuambulula kuli yeni ngila ya kuovoka!"

¹⁸ Nankuma ualingile eci matangua amengi, vuno honi Paulu uapililihile, kaha uatengulukile nakuhandeka kuli uje Cimbembesi nguendi, "Mu lizina lia Yesu Kilistu njikushika nguange humu muli ikeye!" Kaha hajevene Cimbembesi cahumine muli uje mpuevo.

¹⁹ Omo liavenia uje ngamba uevuile nguendi uje mpuevo ngila ya kupangelamo vimbongo inahu, vakuate Paulu na Silasi nakuvakokangeya nakuvatuala hambango kuli vakakusua ku muhela uakulandesela.

²⁰ Kaha vavatualele ku mesho a vakuluntu Valoma nakuhandeka nguavo, "Ava vamala vanapu Vayunda, kaha valinakuneha vukalu mu nganda yetu.

²¹ Vali nakulongesa futisi ije iluisa Lishiko lietu, yetu tu Valoma, kaha kutuasa kutava futisi yavo cipue kuyikava!"

²² Kaha civunga coshe calitavasanene kuluisa Paulu na Silasi.

Kaha honi vaje vakuluntu vatavozuele vizalo via Paulu na Silasi. Nakushika ngeci vavapupe.

²³ Kaha omo vavapupile cikuma, vavahakele mu kamenga, kaha vashikile cikuma muka kuniunga kamenga ngeci apate cikuma ku vikolo.

²⁴ Omo uje muka kuniunga kamenga uatambuile Lishiko eli, kaha uavahakele mukati ka mulili ua kamenga nakuhaka mikono yavo mu vikuali.

²⁵ Vuno honi mukati kavuntsiki Paulu na Silasi vakale nakulombela nakuimba miaso ya Njambi, kaha vaje vinzinda vakele mu kamenga vavevuilile.

²⁶ Hajevene kuakele mandunduma akama cikuma kaha luvula lua kamenga luajajele cikuma. Kaha hajevene vikolo via kamenga viashokolokele, kaha malienge ahumine kuli vinzinda voshe.

²⁷ Omo uje mukakunianga kamenga uahindikile, kaha omo uamuene vikolo via shokoloka, uasinganiekele nguendi, vinzinda voshe vanateue, kaha uashomuene mukuale uendi linga alitsihe.

²⁸ Kaha Paulu uatambakanene cikuma na lizi liakama nguendi, "Keti ulitsihe! Omuo tuvavoshe mutuli muno!"

²⁹ Kaha uje mukakunianga kamenga uasanene ngeci vamuneheleko ndeya, kaha uashatukillilemo, kaha uatsikamene ku mikono ya Paulu na Silasi oku ali nakujaja.

³⁰ Kaha uavatuhiile hambanza nakuvehula nguendi, “Muene, vika njasa kulinga linga njovoke?”

³¹ Kaha vamukumbuluile nguavo, “tsiliela kuli Muene Yesu, kaha uko-voka, yove na ntanga yove yoshe.”

³² Kaha vambuluile lizi lia Muene kuli ikeye na kuli voshe vaje vakele mu njivo yendi.

³³ Kaha ha ntsimbu ijevene ya vutsiki uje mukakuniunga kamenga uaile navo, kaha uakushile ha vimbandu viavo, kaha hajevene ikeye na ntanga yendi voshe vavambuitikile.

³⁴ Nankuma, uatualele Paulu na Silasi ku njivo yendi, kaha uakava-hanene viakulia. Kaha ikeye na ntanga yendi vavuahelele cikuma, omuo vatsiliehele muli Njambi.

³⁵ Kaha liamukuavo cimenemene vakuluntu Valoma vashikile vantuama masualale nguavo, “Eceleni ava vamala vaye.”

³⁶ Kaha uje muka kuniunga kamenga ualekele Paulu nguendi, “Vakuluntu Valoma vanashiki lizi kuli yove na kuli Silasi nguavo tumiecele. Muasa kuya, kaha yeni mu ciyulo.”

³⁷ Vuno honi Paulu uahandekela kuli vaje vankuluntu vamasualale va kamenga nguendi, “Kuvatuuanene na mulonga, vuno honi vanatupupilile ku mesho a vantu kuakuhona kutusompesa, cipuevene yetu tuapua vandambo va lifuti lia Loma! Kaha vanatuhakele mukamenga. Kaha vuavuno vatonda kutuecela mu vushueke indi? Vakuluntu Valoma vanapande kuija kuno vakutuecele vakevo vavenia linga tuye.”

³⁸ Kaha vantuama vamasualale vambuluile mezi aua kuli vankulutu Valoma, kaha omo vovuile ngeci Paulu na Silasi vapuile vandambo va lifuti lia Loma, kaha vovuile liova.

³⁹ Kaha vaile kuli vakevo nakulomba cikonekelo, kaha honi vavahumisile mu kamenga, kaha vavalombele linga vahume mu nganda ije.

⁴⁰ Omo Paulu na Silasi vahumine mu kamenga, vaile ku njivo ya Lindiya. Kuje vakaliuanene na vaka kutsiliela, kaha vahandekela kuli vakevo mezi akuvasimpisa, kaha vaile.

17

Paulu na Silasi mu Tesalonika

¹ Paulu na Silasi omo vaile vahitile mu Afipolise na mu Apoloniya, kaha vezile ku Tesalonika, kuje kuakele njivo ya malombelo ya Vayunda.

² Kaha ngue ku cilika cendi Paulu, uaile mu njivo ya malombelo ya Vayunda ha matangua atatu a Sapalalo uakele nakuhandeka na vantu nakuvaleka,

³ nakuvambulumbuina visoneka, nakuvamuesa vukaleho vua kuhuma mu visoneka ngeci Kilistu napande kuyanda nakusanguka ku vatsi. Kaha Paulu uahandekela nguendi, “Ou Yesu njihandeka kuli yeni ikeye vene Kilistu.”

⁴ Kaha vamo hhakati kavo vatsiliehele, kaha valipandakanene na Paulu na Silasi hamo na vampuevo vaje vapuile vantuama na civunga cakama ca Vangelengu vaje vakakulemesa Njambi.

⁵ Vuno honi Vayunda vakele na cipululu, kaha vakunguluile vamo viendangane va mihuza mu vitapalo, kaha vapangele civunga. Vanehele citanga cakama muje mu nganda yoshe, kaha valuisile njivo ya Njasone mukueseka kuuana Paulu na Silasi linga vavatuale ku civunga ca vantu.

⁶ Vuno honi omo kuvavauanene, vakokangeyele Njasone na vamo vaka kutsiliela nakuvatuala kuli vakuluntu va nganda kaha vatambakanene nguavo, “Ava vamala vananeha vukalu mu lifuti lioshe kaha vaneja kuno,

⁷ kaha Njasone uavatangula mu njivo yendi. Voshe valinakupokola mashiko a Sezale nakuhandeka nguavo kuli muene ueka naua lizina liendi Yesu."

⁸ Kaha ha mezi aua vanehele citanga cakama ku civunga na kuli vakuluntu va nganda.

⁹ Kaha vakuluntu va nganda vafuetelese Njasone na vakuavo vimbongo vije viatondekele linga vavecele vaye.

Paulu na Silasi mu Mbeleya

¹⁰ Hajevene omo vutsiki vuezile vaka kutsiliela vatumine Paulu na Silasi ku Mbeleya. Omo vahete kuje vaile mu njivo ya malombelo ya Vayunda.

¹¹ Vayunda vakuje vapuile va ceke kupulakana vaku Tesalonika. Vakele nakuivuilila ku lizi na mitima yakuzituka kaha ha litangua na litangua vakele nakutanda mu visoneka linga vamone vije viandekela Paulu indi via vusunga.

¹² Kaha vuingi vua Vayunda vatsilielege, kaha na vampuevo vamo vavengi va vakuluntu va Vangelengu na vamala vamo vavengi va Vangelengu vatsilielege navo.

¹³ Vuno honi omo Vayunda vaku Tesalonika vatantekeye nguavo Paulu nambulula lizi lia Njambi mu Mbeleya vaile kuje naku shongangeya civunga.

¹⁴ Kaha hajevene vaka kutsiliela vatumine Paulu ku cikuma ca mema a kalunga, vuno honi Silasi na Timateo vasalele mu Mbeleya.

¹⁵ Kaha vamala vasindikiile Paulu vaile nendi kuvanga naku Atena kaha vahilukilile ku Mbeleni, kaha Paulu uavashikile nguendi Silasi na Timateo vanapande kumukavangeye vuasi vuasi.

Paulu mu Atena

¹⁶ Omo te Paulu uakele nakuvandamena Silasi na Timateo mu Atena, uanienguele cikuma omo uamuene muje mu nganda muashulile tuponia tuatuingi cikuma.

¹⁷ Kaha muje mu njivo ya malombelo ya Vayunda uahandekela na Vayunda na vaje keti Vayunda vaje vaka kulemesa Njambi, kaha ha litangua na litangua uakele nakuhandeka na vaje vakele nakuliwana navo ku cihela cakulandesela.

¹⁸ Vamo valongisi va civunga civatumbula nguavo Epikuli na civunga ca Sitoike valingile vimpata nendi, kaha vamo vamuhuile nguavo, "Vika atonda kuhandeka ou cilema uakulihalesa?" veka vahandekela nguavo, "Kumoneka ngue ali nakuhandeka vanjambi veka naua." Vahandekela evi omo Paulu uakele nakuambulula via Yesu na cisangukilo.

¹⁹ Kaha vamuambate nakumutuala ku mpunga ya nganda ya Alapangase nakuhandeka nguavo, "Tutonda kutantekeya eci cuma caciha ciuli naku-longesa.

²⁰ Omo vimo viuma tuli nakuivua uhandeka vinapu viavihia kuli yetu, kaha tutonda kutantekeya muvialumbunukila."

²¹ (Omo vaka Atena voshe na vangezi vakele muje vatondele kupihisa ntsimbu yavo yoshe mukuhandeka na kuivua viuma viavihia.)

²² Kaha Paulu uemanene ha lutue lua mpunga ya Alepangase nakuhandeka nguendi, "Yeni vantu vamu Atena, njamono nguange mu vilinga vieni viose munapu mu vaka kulemesa.

²³ Omuo njakele nakuenda mu nganda yeni nakutala muacili mutambela mukalemesela, njauanene ha mutula uasonekele nguavo, 'Kuli Njambi uje kututantekeya.' Cije mukalemesa cipue ku mucitantekeya cikeco njilinaikulambulula kuli yeni lelo.

²⁴ Njambi uje uatangele lifuti na vuoshe via kalamo, uapua Muene ua Melu na Mavu, kaha kekuyoya mu njivo yakutunga ku mavoko a vantu.

²⁵ Cipue kekutonda linga tumupangele cipue cuma cimo, omuo ikeye akahana muono na mpunzi ije ituhuima na viuma vioshe kuli vantu voshe.

²⁶ Kaha uatangele mihati yoshe kuhuma kuli yala umo ngeci vakale ha mavu oshe. Ikeye vavenia uavuahelele laja vintsimbu na vilinga na vihela kuje vaka yoyela.

²⁷ Ualingile eci linga vamutonde, kaha omo vakamutonda hamo vaka muuana. Vuno honi cipue ngoco Njambi kakele kulako netu kuahi,

²⁸ ngue umo uahandেকেle nguendi,
'Muli ikeye mu kemo mutuayoyela, mukemuo mutuendela mukemuo mutuli.'

Ngue muihandeka miaso yeni imo nguayo,
'Netu naua tunapu tu vana vendi.'

²⁹ Kaha hakupua tuvana vendi, kutuapandele kusikanieka ngueto Njambi uapua ngue cifua ca Ngolinde cipue ca Siliva indi cipue livue lia kushonga na vutongue na mana a muntu.

³⁰ Laja Njambi uakele nakutalelela vantu omo kuvamutantekeyele, kaha hanohoni alinakushika vantu voshe kuoshe linga vatenguluke ku vupi vuavo.

³¹ Omuo nalivuahesela laja litangua lije akasompa lifuti lioshe kuakuhona kahangu kuhitila muli yala uje yanahangula. Kaha ha cuma eci nahana vukaleho kuli muntu uoshe hakusangula yala uje ku vatsi!"

³² Omo vovuile Paulu ahandeka kusanguka ku vatsi, vamo vamushendu-muine vuno honi vamo vahandেকেle nguavo, "Tutonda linga tuvue viuma evi naua kuli yove."

³³ Kaha Paulu uasezele cije cikungulukilo.

³⁴ Kaha vamo vamala valipandakanene nendi nakupua vaka kutsiliela, hhakati kavo umo uapuile Ndiyonisiyase, uapuile umo ua mpunga ca Elepase, na mpuevo umo lizina liendi Ndamalise, navakuavo veka naua.

18

Paulu mu Kolinte

¹ Hanima ya viuma evi, Paulu ua humine ku Atena na kuya ku Kolinte.

² Kaha kuje ualiuanene na Kayunda ualizina lia Akuila, uje uasemukilile ku Pontase, uje uahuminine ku Itali na mpuevo yendi Pilisila, Omuo Sezale Kalaundiasi uashikile linga Vayunda voshe vahume mu Loma. Kaha Paulu uaile nakuvamona,

³ kaha uatumamene nakupanga hamo navo, omuo uakele nakutunga vimbalaka, ngue muvakele nakulinga vakevo.

⁴ Paulu uakele nakuhandeka mu njivo ya malombelo ya Vayunda ha litangua lia Sapalalo lioshe, mukuesaka Vayunda na Vangelengu linga vatsiliela.

⁵ Omo Silasi na Timoteo vahete mukuhuma ku Mbeteseniya, Paulu ha ntsimbu yendi yoshe ualihanene kuambulula muzimbu nakuhana vukaleho kuli Vayunda ngeci Yesu ikeye Kilistu.

⁶ Omo vamuluisile nakuhandeka viuma via vipi kuli ikeye, kaha uatoto-muene likungu ku vintanga viendi nakuhandeka nguendi, "Nga munazimbala, unapu mulonga ueni vavenia! Yange kujesi namulonga naumo uahi. Kuhuma lelo nakuya kulutue njiya kuli vaje keti Vayunda."

⁷ Kaha Paulu uahumine mu njivo ya malombelo ya Vayunda nakuya ku njivo ya yala umo lizina liendi, Tito Yusitasi muka kulemesa Njambi, njivo yendi yalihatela na cikolo ca njivo ya malombelo ya Vayunda.

⁸ Kaha Kilisipase uje uapuile ntuama ua mu njivo ya malombelo ya Vayunda uje uatsilielegele kuli muene hamo lika na ntanga yendi yoshe, kaha na vantu vavengi vamu Kolinte vovuile lizi na kutsiliela kaha vavambuitikile.

⁹ Kaha vutsiku vumo Paulu uamuene cimona cije Muene uahandekete kuli ikeye nguendi, “Keti uvue liova, vuno honi tualelelaho kuhandeka kaha keti ulikele,

¹⁰ omuo yange njili hamo nove. Kaha naumo uahi asa kukuvulumuna, omuo njili na vantu vavengi munganda eyi.”

¹¹ Kaha Paulu uakele kuje muaka umo na vingonde vitanu na imo, mukulongesa vantu lizi lia Njambi.

¹² Omo Ngaliyo uapuile nguvulu ua Loma mu nganda ya Akaya, kaha Vayunda valikunguliule hamo vakuate Paulu nakumutuala hambanza lia nzango ya kusompela.

¹³ Vahandekete nguavo, “Yala ou alinakusindiya vantu kulemesa Njambi mu ngila ya kuluisa Lishiko!”

¹⁴ Tele Paulu uatondele kuhandeka kaha Ngaliyo uahandekete kuli Vayunda nguendi, “Nga eci cimpande capuile ca mulonga uakuvulumuna cipue via vupi vumo vuanalingi, nge njinevuilila yeni Vayunda.

¹⁵ Vuno honi omuo cinapu cimpande ca kulivianangana ha mezi na mazina na Lishiko lieni vavenia, munapande kuvimanusula yeni vavenia. Yange kunjapandele kupua lihako ua viuma evi!”

¹⁶ Kaha uavashekele mu nzango ya kusompela.

¹⁷ Kaha voshe vakokangeyele Sositene, uje uapuile ntuama ua njivo ya malombelo ya Vayunda, vamupupilile ha mesho a nzango yakusompela. Vuno honi Ngaliyo kombileko mutima ku cuma cije.

Paulu ahiluka ku Antioke

¹⁸ Kaha Paulu uakele mu Kolinte hamo na vaka kutsiliela matangua amengi, kaha honi uavasezele uaile mu vuato ku Siliya hamo na Pilisila na Akuila. Tele kanda ahume ku Senkilise Paulu uatehuile ku mutue uendi omuo ya cisingo cije calisingile.

¹⁹ Omo uahete mu Efeso, kuje Paul uasezele Pilisila na Akuila, uakovelele mu njivo ya malombelo ya Vayunda nakuhandeka na Vayunda.

²⁰ Omo vantu vamulombele linga akale navo ntsimbu yalaha, vuno honi kavatavele.

²¹ Vuno honi uavalekele omo uavasezele nguendi, “Nga eci cinapu cizango ca Njambi, kaha njikahiluka naua kuli yeni.” Kaha uakovelele mu vuato nakuhuma ku Efeso.

²² Omo uahete ku Sesaliya, uaile ku Yelusalema mukukameneka cikungulukilo, ambahoni uaile ku Antioke.

²³ Munima yakukala navo ntsimbu imo, uahumineko uaile mu mutambela ua Ngaliya na mu Filingiya nakukolesa vandongisi voshe.

Apolo mu Efeso na mu Kolinte

²⁴ Ha ntsimbu ije Kayunda umo ua lizina lia Apolo uje uasemukilile mu Alekizandiliya uezile ku Efeso. Uapuile muntu uakuhandeka muacili, kaha uakele na mana akulumbununa visoneka.

²⁵ Vamunanguile laja mu Ngila ya Muene, kaha uakele na ntuima yakuambulula nakulongesa muacili cili viuma via hali Yesu. Cipuevene ngoco, vuno honi uatantekeyele lika viakumbuitika kua Iuano.

²⁶ Uaputukile kuhandeka nakusimpa mu njivo ya malombelo ya Vayunda. Vuno honi omo Pilisila na Akuila vamuvuile, vamutualele ku njivo nakumunangula muacili cili cikuma Ngila ya Njambi.

²⁷ Omo Apolo uatondele kuya ku Akaya, kaha vaka kutsiliela va mu Efeso vamukuasele mukusonekela mukanda kuli vandongisi va mu Akaya nakuvalomba ngeci vamutambule muacili. Omo uahela kuje, uapuile mukakukuasa cikuma kuli vaje vapuile vaka kutsiliela ngue ku kavumbi ka Njambi.

²⁸ Omuo ha nzili yendi yakulivianangana uavianene Vayunda muviahan-deka viavo citona mesho mukumuesa vukaleho vua mu visoneka ngeci Yesu ikeye Kilistu.

19

Paulu mu Efeso

¹ Tele omo Apolo uakele mu Kolinte, Paulu uahitile ku vihela via minkinda via mu mbonge kaha uasikumukilile ku Efeso. Kuje uakauanene vandongisi vamo

² kaha uahandekela kuli vakevo nguendi, “Muatambuileho Cimbembesi Uakulela omo muapuile vaka kutsiliela ndi?” Vamukumbuluile nguavo, “houe, kanda tuivueho nguavo kuakala Cimbembesi Uakulela.”

³ Kaha uahandekela nguendi, “Mu cimbutiko muka va mimbuitikile naco?” Vamukumbuluile nguavo, “Mu cimbutiko ca muka kumbuitika Iuano.”

⁴ Kaha Paulu uahandekela nguendi, “Iuano uambuitikile mu cimbutikilo cakutenguluka ku vupi, kulekesa vantu linga vatsilie kuli uje eja munima yendi, uje ikeye, Yesu.”

⁵ Omo vovuile eci, kaha vavambuitikile mu lizina lia Muene Yesu.

⁶ Omo Paulu uavasalekele mavoko endi, Cimbembesi Uakulela cezile hali vakevo kaha vaputukile kuhanda mu mindaka vieka kaha naua vaputukile kuambulula vunanguizi.

⁷ Voshe vapuile ngue likumi na vavali.

⁸ Uakovelele mu njivo ya malombelo ya Vayunda kaha ha vingonde vitatu uahandekela nakusimpa, nakulambeleda cikuma vantu via vumuene vua Njambi.

⁹ Omo vamo vakukola mitima vavianene kutsiliela nakuhandeka viavipi angila ya Njambi ku mesho ya civunga ca vantu, kaha uavasezele, nakuya na vandongisi uakele nakuhandeka navo mu njivo ya kuli longesela mu Tilanase.

¹⁰ Eci catualeleleleho ha miaka ivali, linga voshe vantu vamu mbonge ya Asiya, Vayunda na Vangelengu vovue lizi lia Muene.

Vana va Sikeva

¹¹ Njambi ualingile vikomoueso viavingi kuhitila muli Paulu.

¹² Cipue vitambala na vizalo vije viakele nakulikuasesa vavihanene kuli vakakuvavala, kaha na mishongo yoshe yavahumine, kaha na vimbembesi viavipi via humine muli vakevo.

¹³ Kaha vamo Vayunda vaje vakele nakuendangana nakuhumisa vimbembesi via vipi mukulikuasesa mukutumbula lizina lia Muene Yesu kuhumisa vimbembesi viavipi. Kaha vakele nakuhandeka kuli vaje vakele

navio nguavo, “Njimishika mu lizina lia Yesu uje yali nakuambulula Paulu humamo.”

¹⁴ Vaje vana vatanu na vavali va vamala va Kayunda uje uapuile Mukuluntu ua Kasasendote ivatumbuile nguavo Sikeva, vakevo vakele nakulinga evi.

¹⁵ Vuno honi Cimbembesi cacipi ca handekele kuli vakevo nguaco, “Yesu njamutantekeya, na Paulu naua njamuivuahho viendi, vuno honi yeni, yeni vey?”

¹⁶ Kaha uje yala uakele na Cimbembesi cacipi uavaluisile, navukalu, nakuvahiana voshe kaha vahumile mu njivo mutototo na vimbandu.

¹⁷ Omo eci vacitantekeyele ku vantu voshe vaje vakele Efeso, Vayunda na Vangelengu, kaha muntu uoshe uakele na liova, kaha lizina lia Muene Yesu valilemesele.

¹⁸ Kaha naua vuingi vuavaje vapuile vakakutsiliela vahandeketele vupi vuavo na kuambulula vilinga viavo.

¹⁹ Vuingi vua vaje vakele nakulinga matseno vambate mavulu avo na ku atsimika hakati ka civunga, kaha omo vapandakanene vimbongo via aje mavulu viapuile makulukazi a makumi atanu a vimbongo via muuayauaya Siliva (50 0 0 0).

²⁰ Kaha lizi lia Muene liakolele cikuma nakushandoka.

Mpindangano mu Efeso

²¹ Hanima ya kulingiua viuma evi, Paulu hakupua mu Cimbembesi uasinganiekele kuya ku Makandonia na ku Akaya kaha nakutualelelaho kuya ku Yelusalema. Kaha uahandeketele nguendi, “Munima yakuya kuje, njapande naua kuya ku Loma”.

²² Kaha uatumine vakuasi vendi vavali, Timateo na Elasitase, ku Makindoniya, te ikeye uacikele mu mbonge ya Asiya ha ntsimbu imo.

²³ Ha ntsimbu ije kuakele mpindangano yakama mu Efeso omuo ya Ngila ya Muene.

²⁴ Yala umo ivatumbuile nguavo Ndemetaliase mukakufula viuma via siliva, ualingile cifua ca njivo ya siliva yakulifua ngue njivo ya Atemesi kalunga ua mpuevo, kaha evi vipangi viendi vianehele vimbongo viavingi kuli vaka kupanga.

²⁵ Uakunguluile voshe hamolika vakuavo veka vaje vakele navipangi ngue viavo, kaha uahandeketele kuli vakevo nguendi, “Yeni vamala, muatantekeya ngueni vufuko vuetu vukahumu ku vipangi evi.

²⁶ Mu namono kaha munevu naua nguavo keti mu Efeso lika vuno honi na mu mutambela ua mbonge ya Asiya, ou Paulu nakoko vantu vavengi nakuhandeka nguendi tumponia tuakupanga na mavoko keti tulunga.

²⁷ Kaha kuli vukalu keti lika kundando yetu vuno honi naua na ku njivo yakama ya kamponia ua mpuevo Atemise kuvaihana kalemesa, kaha uoshe muntu ua mu mbonge Asiya na lifuti lioshe uahi akamulemesa!”

²⁸ Omo vovuile evi, vanienguele na kutambakana nguavo, “Uakama Atemise uava Efeso!”

²⁹ Mu nganda muoshe muakele kalua, kaha vantu vashatukilile mu njivo yakuehela kaha vakuate Ngayasie na Alisitakase, vaku makondoniya vavali vaje vapuile nakusindikiya Paulu.

³⁰ Paulu uazangele kuya ha katati kacivunga, vuno honi vandongisi vamuvindikile,

³¹ navajevene vakuluntu va mbonge ya Asiya, vaje vapuile vasepa liendi, vamutuminine mezi akumulekesa nguavo keti akovele mu njivo yakuehela.

³² Ha ntsimbu ije, vamo vakele na kutambakana cuma cimo, vamo cikuavo, kaha civunga cakele namiyoyo na vuingi vavo kuvatantekeyele civali kunguilile.

³³ Vamo vantu va ha civunga cije vasompesele Alekizanda, uje ivatualele Vayunda kulutue. Kaha Alekizanda uavaholuesele nakueseke kuliohiela hhakati ka vantu.

³⁴ Vuno honi omo vatantekeyele nguavo ikeye Kayunda, mu viholo vivali voshe vatambakanene mukulivuasana nguavo, "Uakama Atemise ua va Efeso!"

³⁵ Vuno honi omo muka kusoneka ua nganda uaholuesele civunga, uahandekele nguendi, "Vantu va mu Efeso, iya katantekeya nguendi nganda ya Efeso yapua njivo ya kutumbikila Atemisi uakama na kamponia uje uauile kuilu?"

³⁶ Omuo viuma evi kuviasiaua kuviviana muapande kuholoka kaha naua keti mulinge viuma muvuasi.

³⁷ Munanehe vantu ava keti ngue vezi va mu njivo ya tumponia cipue nguavo vanashaula kamponia ua mpuevo.

³⁸ Nga Ndemeteliase na vaka kupanga vendi valinakuvangeyaho umo, vinzango viashokoloka mukuhana ciyulo, kaha tuli naua na vaka nzili yakama vaka kusompesa kaha veceleni vanehe vimpande viavo viakuliluisa vakevo vavenia.

³⁹ Nga kuli vimo vikuavo mutonda kutantekeya, muapande kuvihan-dekela mu nzango yakuliuana.

⁴⁰ Hanima yevi vinalingiaua lelo, tuli muvukalu vuakama vuakutuvangeya nguavo yetu tunanehe mpindangano. Kaha kukuesi kusambuesa ha kalua aka koshe kanalingiaua lelo, kutuasa kuhana vukaleho vuacili ha viuma evi."

⁴¹ Hanima yakuhandeka evi uasunuine ciuano eci.

20

Paulu aya ku Mesendoniya na Akaya

¹ Hanima yakuhua kuampindangano ije Paulu uasanene vandongisi, kaha uahandekele kuli vakevo mezi akuvasimpisa nakuvasalesa. Amba-honi uakatukile nakuya ku Mesendoniya.

² Omo te alinakuhita mu vihela vije nakukolesa cikuma vandongisi, uaile ku Akaya,

³ kuje uakatutumamene vingonde vitatu. Ha ntsimbu ije uakele nakulivua-hesela linga aye na vuato ku Silia kaha kalua ka kumuluisa kuli Vayunda kaputukile, kaha uasinganiekele kuhiluka nakuhita ku Mesendoniya.

⁴ Vamusindikiile kuli Sopata muna Pihase uakuhuma ku Mbeleya, na Alisitikase na Sekundase uaku Matesolonika, na Ngayase na Timoteo vaku ndemba, Taikikase na Tolofimase vaku mbonge ya Asiya.

⁵ Vaile kulutue luetu na kutuvandamena mu Tolouasi,

⁶ vuno honi tuajavukile mu vuato kuhuma ku Filipu hanima ya ciuano ca mbolo yakuhona cimbaluila, kaha munima ya matangua atanu tuakavauanene ku Tolouasi, kuje kukeko tuakakele matangua atanu na avalu.

Paulu aya ku Tolouasi

⁷ Ha cinguezi cakuhua litangua lia Sapalalo, tualiuanele nakutavula mbolo, kaha Paulu uakele nakuhandeka navo, kaha uatualeleho kuhan-deka cikuma noho mukati kavutsiki, omuo uatondele kuya lia mukuavo.

8 Muakele vindeya viavingi mu milili ya kuilu uje mukemo tuakele nakuliuana.

9 Mukueje ua lizina lia Yutikase, uje uatumamene ku njanena, uaputukile kunenguka omo te Paulu alinakuhandeka ntsimbu yailaha, kaha uauililile ha mavu kuhuma haje ha mulili uahelu lia njivo ya mu citatu ya injivo viakulipandakana. Kaha omo uamukuate uauanene natsi.

10 Vuno honi Paulu uasikumukile ha mavu, nakukotama hali ikeye nakumuvumbatela. Kaha uahandekela nguendi, "Keti mulishoshomuene, omuo hanga acilina kuyoya!"

11 Kaha Paulu ualondele ku milili ya kuilu, kaha hanima yakupazula mbolo na kulia, uatuaeleleleho kuhandeka navo mu ntsimbu yailaha noho cimene, kaha uaile.

12 Kaha vatuaelele uje mukuenje kuimbo liavo oku te ali na kuyoya kaha eci cava simpile cikuma.

Paulu ahuma ku Tolouasi aya ku Miletase

13 Vuno honi yetu tualivangele kuya mu vuato nakukajavuka kuya ku Asose, kuje tuaile nakukambata Paulu linga akovele mu vuato. Uatushikile kulinga evi, omuo uaile kuje na ngila ya ntunda.

14 Kaha omo uatuanene ku Asose, tuamukovelesele mu vuato ka tuahete ku Mitilene.

15 Kaha omo tuajavukile mu vuato kuhuma kuje, liamukuavo tuahete kuje ku cihela ca kulitala na Ciyosi, kaha liamukuavo tuaile ku Samose kaha naua hanima ya litangua eli tuaile ku Miletu.

16 Nankuma, Paulu uasinganiekele kuhona kuhita ku Efeso, linga keti akale ntsimbu yailaha mu Asiya, omuo uatondele kuheta ku Yelusalema, nge casua, ha litangua lia Pentekosita mu mbonge ya Asiya.

Majui a Paulu akulisalesa na Vakuluntu mu Efeso

17 Omo uakele ku Miletu kaha uatumine mezi ku Efeso ku vakuluntu va cikungulukilo linga valiuanene.

18 Kaha omo vezile kuli ikeye, uahandekela kuli vakevo nguendi, "Yeni vavenia muatantekeya omo njayoyele hhakati keni ha ntsimbu yoshe kuputuka ha litangua liakulivanga lije linjahete mu mbonge ya Asiya,

19 mukupangela Muene nakulihana na masozi na vieseko vianjuiuanene omuo yakunjiyandesa kuli Vayunda.

20 Nacimo cahi cije cacili njahonouele kuhandeka kuli yeni, kaha naua nakumilongesela hhakati ka vantu, kaha nakumilongesela ku njivo na njivo.

21 Nakuhana vukaleho kuli Vayunda na Vangelengu ha kutengulukila kuli Njambi na lutsilielo kuli Muene uetu Yesu Kilistu.

22 Kaha taleni njilinakuya ku Yelusalema ngue muje mucitondelamo Cimbembesi Uakulela, kuakuhona kutantekeya vika vikalingiua kuli yange kuje.

23 Njatanetekeyele lika nguange mu nganda muoshe Cimbembesi Uakulela cinjinangula nguaco, kamenga na vukalu vinanjivandamena.

24 Vuno honi njasinganieka nguange mmuono uange kuuesi na seho kuli yange, njatondo lika kumanesa vipangi vianjihanene Muene Yesu kuvilinga, vije vikevio kuambulula Muzimbu Uacili ua kavumbi ka Njambi.

25 "Kaha honi njatanetekeya nguange naumo uahi hhakati keni injinambulula Vumuene vua Njambi, akamonaho cihanga cange, lueka naua.

26 Nankuma njimilekesa ha litangua lia lelo nguange kunjesi na mulonga ua maninga hali umo ueni nga azimbala.

²⁷ Omuo kunjahonouele kumileka vioshe via cizango ca Njambi.

²⁸ Liniungeni kaha naua niungeni vutanga vua vampanga vuje Cimbembesi Uakulela camihana kumona, kuniunga cikungulukilo ca Njambi cije cambate na maninga a munendi.

²⁹ Njatanetekeya nguange nga njinai, tungunga vaje vakuteuesa vakeja hhakati keni na kupihisa vutanga vua vampanga.

³⁰ Vamo vaku civunga ceni vakeja nakuhandeka makuli linga vatangule vandongisi linga vavakave.

³¹ Nankuma zangameni, anukeni ngueni ha miaka itatu vutsiki na mutania kunjahonouele kunangula uoshe na masozi.

³² Kaha honi njimikundika kuli Njambi linga aminionge naku muzimbu ua Kavumbi kendi, uje uasa kumitungisa na kumihana vikuisulo vije viali navio Njambi ha vantu vendi voshe.

³³ Ku njatondele siliva cipue ngolinde cipue vuzalo vua muntu.

³⁴ Muatantekeya yeni vavenia ngueni njapangele na mavoko ange vavenia hakulikuasa yange vavenia na vakuasi vange.

³⁵ Ha vioshe evi njamihana cimueso ngeci ha vipangi evi tuapande kukuasa vaka kuzeya, kuvuluka mezi a Muene Yesu, omuo ikeye vavenia uahandekela nguendi, 'Cinapu cakuvezika cikuma kuhana kupulakana kutambula.' "

³⁶ Omo uamanuisile kuhandeka, uatsikamene ha mavu navo voshe na kulombela.

³⁷ Valilile cikuma hhakati kavo voshe, kaha vamuvumbatele na ku mutsuemba.

³⁸ Vakele na vusiu omuo vovuile ahandekela nguendi ku vakamu-monoho ceka naua. Kaha vamusindikiile ku vuato.

21

Paulu aya ku Yelusalema

¹ Hanima yakulisalesa navo kaha tuajavukilile musinia, kaha tuahete ku Kose, kaha lia mukuavo tuahete ku Londese, kaha kuhuma kuje tuahete ku Patala.

² Omo tuauanene vuato vuakuya ku Fonisiya, tuakovelele mu vuato kaha tuaile.

³ Tuahete kaha tuamuene sipulase, kaha tuajavukilile ku mbuela yaku Silia kaha tuahete ku Tile, omuo vuato vuapandele kuhumisa vitenga kuje.

⁴ Tuakauanene vandongisi kaha tuakakele navo matangua atanu na avala. Kuhitila mu Cimbembesi valekele Paulu nguavo keti aye ku Yelusalema.

⁵ Omo matangua etu ahuile kuje, tuatuaeleleho na vungenzi vuetu, kaha voshe va mala na va mpuevo vavo na vanike, vatusindikiile hahuma munganda. Kuje tuatsikamene hamavu kungenga amame a kalunga kaha tua lombelele.

⁶ Kaha tualisalesa umo namukuavo. Kaha tuaile nakukovela mu vuato, kaha vakevo velukile ku membo avo.

⁷ Tuatuaeleleleho vungenzi vuetu kuhuma ku Tile, kaha tuahete ku Putolemaise kaha tuamenekele vakakutsiliela kaha tuatumamene navo litangua limo.

⁸ Omo kuacele tuaile kaha tuahete ku Sesilia, kaha tuakovelele mu njivo ya Filipu uje mukakutuala lizi lia Njambi ku vantu, uavaje vatanu na vavali, vaje vavahanguile mu Yelusalema kupua vakuasi kaha tuatumamene nendi.

⁹ Uakele na vana vendi vauana va vampuevo vakuhona kushomboka vaje vakele na vuana vua vunanguizi.

¹⁰ Tuatumamene kuje ha matangua amo, kananguizi ua Njambi iva tumbuile nguavo Angambase uezile kuhuma ku Yundeya.

¹¹ Uezile kuli yetu kaha uambate muiva ua Paulu, ualikutile kuviliato na mavoko endi na muiva uje, kaha uahandekela nguendi, "Cimbembesi Uakulela cihandeka nguaco, Eyi ikeyo ngila Vayunda vamu Yelusalema vakakuta yala uavavenia muiva ou kaha vakamuhana kuli vaje keti Vayunda."

¹² Omo tuevuile eci, yetu na vakuetu vakele muje tualombeke Paulu linga keti aye ku Yelusalema.

¹³ Kaha Paulu uakumbuluile nguendi, "Vika muli nakulinga, kulila ngacije kaha muli nakupokola mutima uange? Njalivuahesela keti lika kunjikuta vuno honi cipue kukatsila mu Yelusalema omuo ha lizina lia Muene Yesu."

¹⁴ Omuo kutuahasele kumusindiya, tuaholokele kulu kaha tuahandekela ngueto, "Cizango ca Muene cilingiue."

¹⁵ Hanima ya matangua akukala kuje kaha tualivuaheselele kuya ku Yelusalema.

¹⁶ Vamo va vandongisi vaje vahumine ku Sesaliya na vakevo vezile netu kaha vatutualele ku njivo ya Manasone ua ku sipulasi, uje uapuile ndongisi uakulivanga.

Paulu aheta mu Yelusalema

¹⁷ Omo tuahete ku Yelusalema, kaha vakuetu vaka kutsiliela vatutam- buile muacili.

¹⁸ Omo kuacele Paulu uaile netu hamo nakukamona Tiango, na vaku- luntu va cikungulukilo kuvakele.

¹⁹ Hanima yakuvameneka, Paulu ualumbuniune cimo na cimo ha viuma Njambi vialingile kuli vaje keti Vayunda kuhitila mucipangi cendi.

²⁰ Omo vacivuile, vashangazalele Njambi. Kaha vahandekela kuli vakevo nguavo, "Tala, muanetu Paulu, unamono makululukazi aje a Vayunda vaje muje muvanatsiliela, kaha namuje muvanalihanenamo vakevo vavenia voshe ku Lishiko lia Mosesa.

²¹ Vanavalekesa viove nguavo ulinakulongesa voshe Vayunda vaje vatunga hhakati kavaje keti Vayunda linga keti vakave Lishiko lia Mosesa, kaha nana nguove keti vatuhule vana vavo cipue keti vaniunge futisi ya Vayunda.

²² Cilivene vakevua nguavo unaija. Kaha vikahoni vikalikinga?

²³ Evi vikevio vitutonda yove linga uvilinge. Kuli vamala vauana kuno vaje vanakulahesa Njambi.

²⁴ Ya hamo nava vamala vauana ulipandakane navo mu cilika ca kulilelesa, kaha fueta ndando yavo, linga vakatehule ku mitue yavo. Mu ngila eyi vene muntu uoshe akatantekeya ngeci viose vijevene vanakala nakuhandeka hali yove keti via vusunga, vuno honi yove vavenia uli nakuononoka Lishiko lia Mosesa.

²⁵ Vuno honi hali ava keti Vayunda vuno honi vaka kutsiliela, tunatumu mukanda ua kusompa kuetu ngueto vahume ku via kulia vije vanakombela ku tumponia na ku maninga naku tusitu tuakutikinia nakulihimisa vakevo vavenia ku vupangala."

²⁶ Kaha liamukuavo Paulu uaile navaje vamala hanima yakulilelesa, uakovelele mu Njivo ya Njambi navo, nakuvalekesa matangua a kulilelesa muje muakahuila, omo vakakombela nkombelo hali umo na umo uavo.

Paulu va mukuta mu Njivo ya Njambi

²⁷ Vuno honi omo matangua atanu na avalu te atonda kuhua, Vayunda vaje vahumine ku mbonge ya Asiya, vaje vamuene Paulu mu Njivo ya Njambi. Vashongangeyele civunga coshe linga vakuate Paulu.

²⁸ Vatambekele nguavo, “Vamala vaku Isaleli, tukuaseni! Ou ikeye yala uje ali nakulongesa vantu voshe kuoshe linga valuisse vantu va Isaleli, na Lishiko lia Mosesa, na Njivo ya Njambi ino. Kaha honi nanehe naua na Vangelengu mu Njivo ya Njambi linga vajualesa eci cihela cakulela.”

²⁹ Omo vamuene Tolofimase uaku Efeso hamo na Paulu mu nganda, kaha vasinganiekele nguavo hamo Paulu uamutualele mu Njivo ya Njambi.

³⁰ Kaha citanga eci cashandokelele mu nganda yoshe, kaha vantu voshe vashatukile hamo. Vakuate Paulu nakumuhumisa mu Njivo ya Njambi, kaha hajevene vashokele vikolo.

³¹ Cije civunga casinganiekele kumutsiha, kaha lizi liaile kuli Ntuama ua masualale ua Loma ngualio Yelusalema yoshe ili mumpindangano.

³² Hajevene uambate masualale na vantuama ua masualale cihita cimo (100) kaha vashatukilile ku civunga. Kaha omo vamuene Ntuama ua masualale na masualale, kaha veccelele kupupa Paulu.

³³ Kaha Ntuama ua masualale uyezile kuli Paulu, uamukutile, kaha uashilkile nguendi vamukute na malienge avalu, kaha uavehuile nguendi, “Ikeye iya ou yala, kaha naua nalingi vika.”

³⁴ Vamo mu civunga vatambekele vimo, vakuavo naua vieka. Mulonga uakuhona kuivuisisa muacili vialingiule omuo ya citanga, ualekesele vatuale Paulu ku vinjivo kuje kuvakakala masualale.

³⁵ Omo Paulu uahete ha vindendelo, kaha vukalu vua civunga vuakele vuakama ngeci valingile uakukakula kuli masualale.

³⁶ Civunga cije cavakavele catualeleleleho kutambeka, “Mutsiheni!”

Paulu Aliamena

³⁷ Hajevene Paulu vatondele kumuneha mu vinjivo muje muakala masualale. Ntuama ua masualale likulukazi limo (1, 0 0 0) uahandekile kuli vakuluntu nguendi, “Njasakuhandekako cuma cimo kuliyeni?” Uje Ntuama ua masualale likulukazi limo (1, 0 0 0) uakumbuilile nguendi,

“U tantekeya ci Ngelengu?”

³⁸ Nkuma keti yove Kaingito uje ha ntsimbu yakunima uatengulukilile vumuene nakutuamenena vamala vanzita vakupua makulukazi auana (4, 0 0 0) mu ndinda ndi?

³⁹ Paulu uakumbuilile nguendi, “Yange nji Kayunda, njasemukilile ku Talisi mu Silisha, mundambo ua nganda yakasingimiko. Njitavese linga njihandeke kuli vantu.

⁴⁰ Kaha uje mukakushika masualale uamuhanene ntsimbu yakuhandeka, kaha Paulu uemanene ha vindendelo nakuolola livoko liendi linga vantu voloke. Omo vantu vaholokele, kaha Paulu uahandekile kulivakevo mu Cihevelu.

22

¹ “Vamuanetu na vatatetu Vayunda, njivuulileni omo njili na kuliamena hakati keni.”

² Kaha omo vamuville ali nakuhandeka kuli vakevo mu Cihevelu, kaha vaholokele cikuma. Kaha uahandekile nguendi,

³ “Yange Kayunda, njasemukilile ku Talisi mu Silisha, njakolele mu nganda ino vene ya Yelusalema, kaha Ngamaliele ikeye uapuile mulongisi

uange, nakulilongesa muacili lia Lishiko lia vakukuluila vetu, na kulikolesa cikuma kuli Njambi, nge omo mu munapu muva voshe lelo.

⁴ Njapakesele noho nja tsihile vantu vaje vakavele Ngila ya Muene eyi. Njakutile vamala na vampuevo nakuvatuala mukamenga.

⁵ Kupua Kasesondote uakama na mpunga yoshe vanahase kuhana vukaleho hali yange. Kulivakevo njatambuile mikanda yakuhuminina kuli vakuetu Vayunda va ku Ndamasika, kaha njaileko linga njikakuate vaje vakele kuje nakuvahiluusa mu Yelusalema linga vavazangamese."

*Paulu ahandeka omo Yesu ualisholuele kuli ikeye
(Vilinga9:1-19; 26:12-18)*

⁶ "Kaha omo njakele nakuya nakuheta kuyehi na Ndamasiku, hhakati ka mutania kaha vuasi vuasi ceke ca humine muilu ca kuviazima catuile nakunjizengeleka.

⁷ Kaha njauililile ha mavu kaha njevuile lizi lihandeka kuli yange ngualio, 'Saulu, Saulu, vika uli na kunjiyandesela?'

⁸ Kaha njehuile nguange, 'Yove iya Muene?' Kaha lizi liakumbuluile ngualio, 'Yange Yesu ua ku Nazaleta uje ulinakuyandesela.'

⁹ Vuno honi vaje vamala vakele hamo nange vamuene lika ceke vuno honi kuvovuile lizi lia uje uakele nakuhandeka kuli yange.

¹⁰ Kaha njehuile nguange, 'Njilinge vati honi, Muene?' Kaha Muene uahandekela kuli yange nguendi, 'Katuka linga uye ku Ndamasika, kuje vakakuleka viuma vioshe vije via nakuimikila Njambi linga uvilinge.'

¹¹ Kaha njapuile njikapuputua omuo ca ceke cakuviazima, kaha vaje njendele navo vanjikuate ku livoko nakunjitala ku Ndamasika."

¹² "Mu nganda muje muakele yala umo lizina liendi ikeye Ananiyasi, uakulongua nakuononoka Lishiko lietu kaha vamusingimikile cikuma kuli voshe Vayunda vakele Mundamasika.

¹³ Uezile kuli yange, kaha uemanene kuyehi nange kaha uahandekela nguendi, 'Muanetu Saulu mona naua!' Kaha ha ntsimbu ijevene njamuene naua nakutala kuli ikeye.

¹⁴ "Kaha uahandekela nguendi, 'Njambi ua vakukuluila vetu nakuhangula linga utantekeye cizango cendi, nakumona ngamba yendi ua vusunga nakumuivula omo ahandeka na lizi liendi.

¹⁵ Omuo ukapua mukaleho uendi ku vantu voshe ku vije viunamono na ku vije viunevu.

¹⁶ Kaha honi vika viuvandamena? Katuka linga vakumbuitike, kaha vupi vuove vavusambese, hakusana lizina liendi.'

Paulu vamusana linga Ambulule kuli vaje keti Vayunda

¹⁷ "Hanima ya kuhilukila ku Yelusalema, kaha ha ntsimbu ije njakele nakulombela mu Njivo ya Njambi, njamuene cimona,

¹⁸ mu cimona cije njamuene Muene ahandeka kuli yange nguendi, 'Zangulako huma mu Yelusalema vuasi, omuo vantu valimuno kuvasa kutambula vukaleho vuove omuo yange.'

¹⁹ "Kaha njamukumbuluile nguange, 'Muene, vakevo vavenia vatan-tekeya nguavo njakele nakuya mu vinjivo vioshe via malombelo via Vayunda kaha njakele nakuya nakuvakuta nakuvapupa vaje vatsilieelele muli yove.

²⁰ Kaha omo mukaleho uove Setefano muva mutsihile, kunjakele nange vene hakulitavasana navo ha kutsa cendi, kaha njaniungile tuzaku tua vaje vamutsihile.'"

²¹ “Kaha Muene uahandekela kuli yange nguendi, ‘Ya, omuo njikakutuma kulahako kuli vaje keti Vayunda.’”

Paulu Vamusana linga Ambulule kuli vaje keti Vayunda

²² Kaha vantu vovuile vije viahandekela Paulu, kaha vaputukile kutambakana cikuma nguavo, “Kutuamutondele ou yala! Mutsiheni! Kapandele kuyoya!”

²³ Vakele nakutambakana cikuma na kuashanga vizalo viavo, nakushauila livu muilu.

²⁴ Kaha uje mukuluntu ua masualale ua Loma uashikile vantu vendi linga vatuale Paulu mu vinjivo muvakakala masualale kaha uavalekele nguendi vamupupe nakuuana omuo vika Vayunda vakele nakutambekela nakumuluisa.

²⁵ Vuno honi omo vamukutilile linga vamupupe, Paulu uahandekela kuli mukuluntu uje uemanene kuje nguendi, “Nkuma linapu Lishiko kupupa mundambo ua mu lifuti lia Loma uje kuvasompelele linga vauane mulonga uanalangi ndi?”

²⁶ Omo uje ntuama ua masualale cihita cimo (100) uevuile evi, uaile kuli mukakushika ntuama ua masualale cihita cimo (1, 0 0 0) kaha uahandekela kuli ikeye nguendi, “Vika utonda kulinga? Ou yala napu ka Loma.”

²⁷ Kaha uje mukakushika ua masualela uaile nakuihula Paulu nguendi, “Njileke, unapu uka Loma ndi?” Kaha Paulu uahandekela nguendi, “Eyo.”

²⁸ Kaha uje mukuluntu uamasualale uahandekela nguendi, “Yange ovu vundambo vua mu lifuti lia Loma njavulandele na vimbongo viavingi cikuma.” Vuno honi Paulu uamukumbuluile nguendi, “Vuno honi yange njasemukila mu nove vene.”

²⁹ Hajevene vaje vamala vatondele kuihula Paulu vamushondolekele nakuya kaha na uje mukuluntu uamasualale naua uevuile liova, omo uakutantekeyele nguendi nkuma Paulu uapuile mundambo ua mu lifuti lia Loma, vuno honi uamuhakele mu malienge.

Paulu ku mesho a Mpunga ya Vayunda

³⁰ Vuno honi uje mukakushika masualale uatondele muacili vika cuma cika Vayunda vakele nakuvangela Paulu, kaha liamukuavo uashikile linga vazitule Paulu, kaha uashikile vakuluntu vavasasendote na vakampunga voshe vakunguluke. Ambahoni uatualele Paulu nakumuimika ha mesho avo.

23

¹ Tele Paulu uatalele ntoma hali ije mpunga, kaha uahandekela nguendi, “Vamuanetu, vaka Isaleli! Visinganieka viange vinapu via vusunga ha ngila ije injinayoyo nayo ku mesho a Njambi nakuheta ku litangua lia lelo.”

² Kaha mukuluntu ua kasasendote uakama ua lizina lia Ananiyasi uashikile vaje vemanene kuyehi nendi linga vapupe Paulu kukanua.

³ Ambahoni Paulu uahandekela kuli ikeye nguendi, “Muavusunga vene Njambi akupupa, yove cimumbe cakukuita mufutilo uakutoka! Uatumama aha linga unjisompe kuya na Lishiko, vuno honi yove unapokola Lishiko lia Mosesa mukuvashika linga vanjipupe!”

⁴ Vaje vamala vemanene kuyehi na Paulu vahandekela nguavo, “Ulinakutuka Kasasendote Uakama ua Njambi!”

⁵ Kaha Paulu uavakumbuluile nguendi, “Vamuanetu vaka Isaleli kunjatantekeyele nguange uapuile Kasasendote Uakama, omuo vacisoneka nguavo, ‘Keti uhandeke vupi hali ntuama ua vantu vove.’”

6 Vuno honi omo Paulu uamuene nguendi vamo va muje mu civunga uapuile Vasanduki kaha naua vakuavo vapuile Vafaliseo, uatambakanene ku mpunga nguendi, “Vamuanetu, yange nji Kafaliseo, muna Vafalisi. Va linakunjisompa kuno omuo ya hakutsiliela cinje cinjili naco ca ha kusanguka kua vatsi.”

7 Kaha omo uahandeketele evi, hajevene Vafaliseo na Vasanduki vaputukile vimpata, kaha vaka mpunga valipangele.

8 (Omuo Vasanduki vahandeka nguavo vantu kuvakasanguka ku vatsi, kaha naua kukuesi tungelo cipue vimbembesi, vuno honi Vafaliseo vat-siliela muviuma viosehe evi vitatu).

9 Ambahoni vantu vaputukile kutambakana cikuma mukuhandeka, kaha vamo valongisi va mashiko a Mosesa vaje vakele ku mpunga ya Vafaliseo vemanene nakuhandeka na nzili nguavo, “Kutuaanene cuma cimo cacipi canalingi ou yala! Hamo muavusunga Cimbembesi cipue kangelo nahan-deka kuli ikeye!”

10 Kaha omuo vimpata viatualeleleho cikuma, uje Ntuama ua masualale cihita cimo (1, 0 0 0) uevuile liova nguendi hamo Paulu vamutavozola vimpindi vimpindi. Kaha uashikile masualale kukovela hakati ka mpunga cije linga vakatundiseho Paulu nakumutuala ku vinjivo vivakatumama masualale.

11 Kuvutsiki vujevene Muene uemanene kuyehi na Paulu kaha nakuhan-deka nguendi, “Keti uivue liova! Unahana vukaleho vuove hali yange muno mu Yelusalema, kaha uapande kulinga cifua cimo naua na mu Loma.”

Vutumbe vuakutsiha Paulu

12 Kaha omo liamukuavo cimene vamo Vayunda valiuanene nakulitumba vutumbe vuavushuenge. Valisingile nguavo naumo uahi alia cipue kunua kuvanga noho vanatsihi Paulu.

13 Kuakele vantu vakupulakana makumi auana vaje vatumbile vutumbi vuje hamo.

14 Kaha vaile kuvakuluntu va tusasendote na ku vakuluntu kaha vahan-dekele nguavo, “Tunalikutu tuva voshe nakulisinga ngueto naumo uahi amakela viosehe kuvanga noho tuatsihi Paulu.

15 Kaha honi yeni na vaka mpunga muapande kutuma lizi ku Ntuama ua masualale cihita cimo (1, 0 0 0) ua Loma linga atume Paulu kuli yeni, mulikuise ngue mutonda kuuana vukaleho vuacili hali ikeye. Vuno honi yetu tulivuahesela kumutsiha ha ntsimbu kanda ahete kuno.”

16 Vuno honi muihua ua Paulu uevuile vutumbe ou, kaha uaile ku vinjivo vivakakala masualale, uakalekele evi kuli Paulu.

17 Kaha Paulu uasanene umo ua vaje Vantuama va masualale cihita cimo (100) nakuhandeka kuli ikeye nguendi, “Tualeni ou mukuenje kuli Ntuama ua masualale likulukazi vimo (1, 0 0 0) ali navimo vije atonda kumuleka.”

18 Ambahoni uje ntuama ua masualale cihita cimo (100) uamutualele kuli Ntuama ua masualale cihita cimo (1, 0 0 0) nakuhandeka nguendi, “Ou cinzinda Paulu na njilombe nguendi njinehe ou mukuenje kuli yove, kuli vimo atonda kukuleka.”

19 Kaha Ntuama ua masualale cihita cimo (1, 0 0 0) va Loma uakuate ku livoko lia uje mukueje, nakumutuala ikeye vavenia, kaha uamusanene kumukulo kualikaliavo, uamuhuilisile nguendi, “Vuima vikahoni utonda kunjileka?”

20 Kaha uahandeketele nguendi, “Vaka nzili yakama ya Vayunda val-itavasana kukulomba linga vatuale Paulu kuli va ku mpunga imene, mukulimuesa nge vakatondesesa muacili ha vukaleho vuendi.

²¹ Vuno honi keti uvevuilile, omuo kuvali vamala vakupulakana makumi auana vaje vakavanda nakuvandamena Paulu. Vanalisingi linga keti valie viakulia cipue kunua mema kuvanga noho vanamutsihi. Vanalivua hesela laja kulinga eci, kaha vanamuvandamena nakuvandamena lika yove linga uvatave.”

²² Kaha uje ntuama ua masualale cihita cimo (1, 0 0 0) uahandekela nguendi, “Keti ulekeko muntu cipue umo nguove unahandeka evi kuli yange.” Kaha uashikile uje mukuenje linga aye.

Paulu Vamutuma kuli Nguvulu Felekisi

²³ Ambahoni Ntuama ua masualale cihita cimo (1, 0 0 0) uasanene vanuama ua masualale cihita cimo (100) vavali kaha uahandekela kuli vakevo nguendi, “Ambateni masualale vakupua vihita vivali (200) valivua hesela kuya ku Sesaliya, hamo makumi vatanu na avali vaje kakuendela ha tuvalu na masualale vakupua vihita vivali (200) vaje vakakulua na makunga, livua heseleni kukatuka ha ntsimbu ya vitanu na viuana vutsiki vuno vene.

²⁴ Vua heseniko vamo tuvalu linga Paulu alondeho, kaha muheteseni muacili kuli nguvulu Felekisi.”

²⁵ Kaha uje Ntuama ua masualale cihita cimo (1, 0 0 0) uasonekele mukanda muje muakele mezi aua,

²⁶ “Kalaundiase Lisiyase kalemesa, kuli Nguvulu Felekisi, vihindu.

²⁷ Vayunda vakuate ou yala kaha vatondele kumutsiha. Kaha omo njevuile nguavo mundambo ua mu lifuti lia Loma, njaile na masualale vange na kumuyoyesa.

²⁸ Kaha njatondele kutantekeya vika vakele nakumuvangeya, nankuma, njamutualele kuli vaka mpunga yavo.

²⁹ Njauanene nge nacimo cahi cacipi calingile cije vatondele kumutsihila cipue kumuhaka mu kamenga. Vakele nakumuvangeya viuma vije viakundama kuvihula via mashiko avo vavenia.

³⁰ Kaha omo vanjilekesele nguavo vali navutumbe vua kumuluisa, hajevene njasinganiekele kumutuma kuli yeni. Njalekesele vaje vamu-vangeyeye linga vamuhanene mulonga ha mesho eni.”

³¹ Masualale valingile mu vavashikililemo. Vambate Paulu nakumutuala vutsiki vuje vene kuli Antipatilisise.

³² Liamukuavo vaje masualale vahilukile kuvihela viavo nakuseza vaje vaka kuendela ha tuvalu linga vaye nendi.

³³ Vamutualele ku Sasaliya, kaha vahanene uje mukanda kuli Nguvulu, nakuhetesa Paulu kuli ikeye.

³⁴ Nguvulu uatandele uje mukanda kaha uehuile Paulu nguendi uhuma ku mbonge muka. Omo uauanene nge Paulu uatundile ku Silisha,

³⁵ kaha uahandekela nguendi, “Njikakuivuilila nga vaje vanakuvangeya vanahete kuno.” Kaha uashikile linga vaniunge Paulu mu mapela a Nguvulu.

24

Vayunda vavangeya Paulu

¹ Hanima ya matangua atanu Kasasendote Uakama Ananiyasi uaille ku Sesaliya na vamo vakuluntu na lihako umo ua lizina lia Tetulase. Vezile ku mesho a Nguvulu Felekisi nakumulekesa mulonga ua Paulu.

² Kaha uasanene Paulu linga akovele mukati, kaha Tetulase uaputukile kuvangeya Paulu nguendi, “Uakalemesa Felikisi, kutuamenena kuove

kua mana cinatunehela ciyulo ntsimbu yakama, kaha viuma viavinga vinatenguluka linga vantu vetu vakale muacili.

³ Tunacitambula eci kuoshe na ha ntsimbu yoshe, kaha naua tuavua-helela cikuma kuli yove.

⁴ Kunjatondele kumipihisila ntsimbu yeni cikuma, cipue ngoco, njiku-lomba ukakeleko na ngozi nakuvuilila ku mezi etu amandende.

⁵ Tuauana ou yala kupua muntu ua kalua, uaputukile kulinga mpin-dangano hhakati ka Vayunda mu cifuti coshe, kaha naua ikeye ntuama ya mpunga ya vaka Nazalite.

⁶ Ikeye naua uatondele kujualesa Njivo ya Njambi, kaha tuamukutile. [

⁷ Vuno honi Lisiyase ntuama ua masualale cihita (1, 0 0 0) ua Loma uezile, kaha na nzili yakama utatutambuileye.]

⁸ Nga umuhulisa yove vavenia ou yala uasa kuuana kuli ikeye vioshe vije vitunamuvangeya.”

⁹ Vayunda navo naua vamuvangeyeye nguavo vioshe evi via vusunga.

Paulu aliohela ku mesho a Felekisi

¹⁰ Kaha Nguvulu uashovueyele Paulu linga ahandeke, kaha Paulu uahan-dekele nguendi,

“Njatatentekeya nguange yove unapu ulihako ua lifuti eli ha miaka yaingi, kaha njavuahelela cikuma kuliohiela yange vavenia ku mesho ove.”

¹¹ Ngautondesesa, keti matangua a kupulakana matangua likumi na avali anahitimo ha njailile nakulemesa ku Yelusalema.

¹² Vayunda ku vanjiuanene njili nakulinga vimpata naumo mu Njivo ya Njambi cipue kuneha mpindangano mu civunga cipue mu njivo ya malombelo ya Vayunda cipue mu nganda yoshe.

¹³ Cipue vase kukuhana vukaleho vua makuli aua vali nakunjihana hano.

¹⁴ Vuno honi njitava cuma eci kuli yove nguange njikalemesa Njambi ua vakukulula vetu mukukavangeya Ngila ije ivatumbula vakevo nguavo ya makuli. Kahanaua njikatsiliela mu vioshe vije vivanasoneka mu Lishiko lia Mosesa na mu mavulu a tunanguizi va Njambi va Njambi.

¹⁵ Njili na lutsilielo muli Njambi nge muje muvalinaluo vakevo, luje luvatumbula nguavo kukakala kusanguka kua vaka vupi na vaka vusunga.

¹⁶ Nankuma njili nakulinga na nzili yange yoshe linga njikale na lishungu ku mesho a Njambi na ku mesho a vantu.

¹⁷ Hakuhona kukala mu Yelusalema ha miaka yaingi, kaha njahilukileko mu kutuala vukuasi ku vantu vange nakukakombelela vinkombelo.

¹⁸ Omo yapuile ntsimbu ije njakele nakulinga eci vanjiuanene mu Njivo ya Njambi te njinamanesa kulijelesa. Kunjakele na civunga ca vantu cahi, cipue kulinga kalua.

¹⁹ Vuno honi vamo va Vayunda vaje vahumine ku mbonge ya Asiya vakele kuje, vakevo vapandele kuija ku mesho ove nakunjivangeya nga vakele navimo viakuluisa yange.

²⁰ Cipue tava ava vamaala valikuno linga vahandeke mulonga uvanji-uanene nauo omo njemanene ku mesho a mpunga.

²¹ Kuvanga lika mpano ha cuma cimo cije njatambekele omo njemanene ku mesho avo nguange, “Mulinakunjisompa ku litangua lia lelo omuo njatsiliela nguange vatsi vaka sanguka.”

²² Ambahoni Felekisi, uje ualilongesele cikuma ha vimpande via Ngila ya Muene uemikile kuje kusompa, “Omo Lisiyase uje ntuama ua masualale cihita (1, 0 0 0) akeja ambahoni njikasinganieka ha mulonga uove.”

²³ Kaha uashikile uje muka kunuinga linga anuinge muacili Paulu, vuno honi napande kumuhanako kupatuka kumo nakuta vavusamba vendi linga vamukuase.

Paulu ku mesho a Felekisi na Ndulusiya

²⁴ Hanima ya matangua amo Felekisi uezile na mpuevo yendi Ndulusila, uje uapuile Kayunda, uamuminine vantu linga vakambate Paulu linga eje kaha akumuvuilile uje muahandeka via lutsilielo muli Kilistu Yesu.

²⁵ Vuno honi Paulu uakele nakuhandeka ha vucili, na kuliniunga, kaha na ha kuija kua Litangua lia cisompelo, Felekisi uevuile liova kaha uahandekela nguendi, “Yahoni ha tsimbu ino, omo njikauana ntsimbu kaha njikakusana naua.”

²⁶ Hatsimbu ijevene uasinganiekele nguendi hamo Paulu amuhanako vimbongo vimo, kaha ha mulonga ou linga akamusane sane nakuhandeka nendi.

²⁷ Munima yakuhita miaka ivali, Posiyase Fesitase uasuanene mucihela ca Felekisi kupua Nguvulu. Felekisi uatondele kuvuahelesa Vayunda, kaha uasezele Paulu mu kamenga.

25

Paulu Atuala Vimpane Viendi kuli Sezale

¹ Hanima ya matangua atatu Fesitase uahete mu nganda, uahumine ku Sesiliya nakuya ku Yelusalema,

² kuje vakuluntu va tusasendote na vakuluntu va Vayunda vamuhanene vimpane viakuuanena mulonga Paulu. Kaha valombeke Fesitase

³ linga avakuaseko kutuma Paulu ku Yelusalema omuo vatumbule vutumbe vuakumutshila mu ngila.

⁴ Fesitase uakumbuluile nguendi Paulu vali nakumuniungila mu kamenga ka ku Sesaliya kaha naua ikeye vavenia na singanieka kuhiluka kuje hano vene.

⁵ Kaha uahandekela nguendi, “Haliyeni vamo vaje vali na nzili vaye nange, nga kulicimo capihiako kuli uje yala, linga vakamuvangeye mulonga.”

⁶ Hanima yakutumama navo matangua keti akupulakana matangua atanu na atatu cipue likumi, kaha uaile ku Sesaliya, liamukuavo cimene uatamamene ha cituamo cendi cakusompela kaha uashikile vanehe Paulu kuli ikeye.

⁷ Omo Paulu uahete, Vayunda vaje vahumine ku Yelusalema vamuzengelekele, kuneha milonga hali ikeye, ha viuma vije kuvahanene vukaleho.

⁸ Paulu ualiamenene ikeye vavenia nguendi, “Naimo yahi ngila inji-napokuelamo Lishiko lia Vayunda, cipue kuluisa mu Njivo ya Njambi, cipue kuluisa Sezala.”

⁹ Vuno honi Fesitase, uatondele kuvuahelesa Vayunda kaha uehuile Paulu nguendi, “Nkuma utonda kuya ku Yelusalema linga njikakusompele kuje ha milonga eyi ndi?”

¹⁰ Paulu uahandekela nguendi, “Njikemana ku mesho a Sezale, kaha kuje vene munapande kunjisompesa. Nacimo cahi njapihisa kuli Vayunda, nge nove vene muje mumatantekeyela.

¹¹ Nga njapokola Lishiko nakulinga cuma ca cipi cije cinjinapande kutsila, kaha kunjikalombo kuteua. Vuno honi nga kuhesi vusunga ha milonga eyi ivali nakunjinehela, kaha naumo uahi akanjihana ku mavoko avo. Kaha njikatualaho kulomba kuli Sezale.”

¹² Kaha Fesitase hanima ya kulitavasana na vakakumunangula vendi uakumbuluile nguendi, “Unatuala vimpande viove kuli Sezale, kaha kuli Sezale vene kukeko ukaya.”

Paulu ku mesho a Angilipa na Mbenisi

¹³ Hanima ya matangua amo muene Angilipa na Mbenisi vaile ku Sesaliya kumeneka Fesitase.

¹⁴ Omo vakele kuje matangua amo, Fesitase uanehele mulonga ua Paulu kuli muene kaha uahandekele nguendi, “Kuli yala kuno yasezele Felekisi mu kamenga,

¹⁵ omo njakele mu Yelusalema, vakuluntu vatusasendote navakuluntu va Vayunda vanjilekele via hali ikeye kaha vanjilombe nguavo njimuhane mulonga.

¹⁶ Kaha njavalekele nguange keti kuvutisi yetu va Loma kuhisa muntu uje ivanavangeya mulonga, ntsimu kanda alimone mesho na mesho navaje vanamuvangeya, nakumuhana ntsimbu ya kuliama na ku mulonga uendi.

¹⁷ Kaha omo vezile kuno, kunjeshualele, kaha lia mukuavo njatumamene ha cituamo ca vusompele kaha njashikile uje yala nguange vamunehe kuli yange.

¹⁸ Kaha omo vaka kumuvangeya vemanene, kuvamuhanene mulonga uavupi ngue muje njavandamenene nguange vaka lingamo.

¹⁹ Vuno honi vakele nakulinga vimpata nendi ha lutsilielo luavo nali yala umo ivatumbuile nguavo Yesu, uje uatsa, vuno honi Paulu anga anjili nakuhandeka nguendi acili nayoya.

²⁰ Omuo njahonouele kutondesesa cimpande eci, njamuihuile nguange utonda kuya ku Yelusalema linga vaka musompeleko ha mulonga ei.

²¹ Vuno honi Paulu ualombele linga vamuniunge kaha na Sezala linga asinganike ha mulonga uendi. Kaha njahanene mashiko kuli ikeye linga vamuniunge kuvanga noho njikamutuma kuli Sezale.”

²² Angilipa uahandekele kuli Fesitase nguendi, “Njitonda njimuivue yange vavenia ou yala omo a handeka.” Kaha Fesitase uakumbuluile nguendi, “Imene ukamuivua.”

Paulu vamuneha ku mesho a Angilipa

²³ Kaha liamukuavo Angilipa na Mbenisi vezile na kalua kua kama, kaha vakovelele mu njivo muva kakungulukila civunga na vakuluntu va masualale na vamala ava vakakumona via nganda. Kaha Fesitase uashikile linga Paulu vamunehe mukati.

²⁴ Kaha Fesitase uahandekele nguendi, “Muene Angilipa na voshe valihano netu, muamono ou yala uje Vayunda voshe kuluisa kuavo hali yange, voshe vamu Yelusalema na vamuno, vali nakutambeka nguavo kapandele kuyoya naua.

²⁵ Vuno honi njauanene nguavo nacimo cacipi canalingi cahi oco napan-dela kutsila kaha omo ualilombelele kuli Sezale, njatondele kumutuma kuli ikeye.

²⁶ Vuno honi kunjesi na cimo hali ikeye cinjapandele kusonekela Sezale. Nankuma njamuneha hhakati keni voshe, ngue cikuma kuli yove muene Angilipa, linga, hanima yakutondesesa mulonga uendi, hamo njikala nacimo ca kusoneka.

²⁷ Omuo kucikamoneka muacili kuli yange kutuala cinzinda mu kamenga kuakuhona kumonesa mulonga uendi.”

26

Paulu Aliamena ku mesho a Angilipa

¹ Angilipa uahandekela kuli Paulu nguendi, "Uli na ntsimbu yakuliamena yove vavenia." Kaha Paulu uolele livoko liendi kaha uaputukile kuliamena ikeye vavenia nguendi,

² "Muene Angilipa! Njamonu nguange njavezika hakuliamena yange vavenia kulitangua lia lelo ku mesho ove ha viuma vioshe vali na kunjivangeya Vayunda,

³ Omuo unatantekeya muacili futisi na viula via Vayunda. Nankuma njikulomba unjivuilile mukusimpa.

⁴ 'Vayunda voshe vatantekeya vati njinayoyo hume kuvukuenje vuange. Vatantekeya kuyoya kuange kuoshe, ha vantu vange na mu Yelusalema.

⁵ Ntsimbu yoshe vanatantekeya, nga vatonda kuhana vukaleho ovu, njapuile umo ua civunga ca Vafaliseho vaje vaka kavangeya cikuma ngila ya muje tukalemeselamo Njambi yetu.

⁶ Kaha honi njinemana hano linga vanjisompe omuo njahaka lutsilielo mu cikulaheso ca Njambi calingile kuli vakukuilila vetu,

⁷ Aci cikeco cikulaheso cije miyati yetu likumi na ivali cije civatonda kumona cili shulisise omuo yakulemesa Njambi vutsiki na mutania. Muene Angilipa, omuo lualutsilielo olu mukemo Vayunda vali nakunjivangeya evi."

⁸ Vika muhandekela nguene cakaluua kuli yetu kutsiliela nguene Njambi akasangula vatsi?

⁹ "Nange vene njasinganiekele kulinga viuma viavingi viakuluisa lizina lia Yesu uaku Nazaleta.

¹⁰ Evi vikevio njalingile mu Yelusalema. Ha kutambulako nzili kuli vakuluntu vatusasendote, na kuhaka vantu vavengi va Njambi mukamenga, omo vavatsihele nange naua njatavele."

¹¹ Njavazangamesele ha vintimbu viavingi mu vinjivo via malombelo via Vayunda njesekele linga vaviane kutsiliela kuavo. Kaha njanienguele cikuma navo ngeci njaiile ku vinganda via vungezi na kuvayandeselako.

Paulu Avaleka Kutenguluka Kuendi

(Vilinga 9:1-19; 22:6-16)

¹² "Ha mulonga ou njaiile ku Ndamasika na nzili yakama cikuma na Lishiko lia kuhuma kuli vakuluntu vatusasendote.

¹³ Yapuile mu ngila omo te litangua lili hakatati kamutue, yove Muene, njamuene ceke cakuviazima cikuma kupulakana litangua cahumine muilu canjizengelekele na vantu vaje njendele navo.

¹⁴ Kaha tuvavoshe tuauililile hamavu, kaha njevuile lizi mu Cihevelu lihandeka kuliyange ngualio, 'Saulu, Saulu! Vika ulinakunjiyandesela? Ulinakulivulumuna yove vavenia omo ulinakuliamena, ngue ngombe uakulimisa aliatangela ku citi ca muene uendi.'

¹⁵ Ka njehuile nguange, 'Yove iya Muene?' Muene uanjikumbuilile nguendi, 'Yange Yesu ulinakuyandesela.

¹⁶ Honi katuka njalisholola kuli yove linga njikuhangule kupua ngamba na mukaleho uange ha viuma evi unamo navije ukamona kulutue.

¹⁷ Njikakuamena kuli vantu va Isaleli navaje keti Vayunda kuje kunjikakutuma.

¹⁸ Ukatonesa mesho avo na kuvahumisa kumilima na kuvatuala ku ceke nakuvahumisa ku nzili ya satana nakuvatuala kuli Njambi, linga ha

kutsiliela kuavo kuli yange vakavasambese ku vupi vuavo nakutambula muhela uavo hakati ka vantu vaje vanahangula Njambi.' "

Paulu Avaleka Vipangi Viendi

¹⁹ "Nankuma Muene Angilipa, njononokele cimona cije njamuene cahumine muilu.

²⁰ Vuno honi hakulivanga njambuluile mu Ndamasika, kaha mu Yelusalema ambahoni mu lifuti lia Yundeya, na kati kavaje keti va Vayunda, njambuluile linga vatenguluke ku vupi vuavo nakuhiluka kuli Njambi nakulinga viuma vije vimuesa linga vanatenguluka.

²¹ Omuo ha cuma eci mukemuo vanjikuata Vayunda mu Njivo ya Njambi kaha vatondele kunjitsiha.

²² Vuno honi na kulitangua lia lelo Njambi nanjikuasa, nankuma njihana vukaleho vuanze kuli yeni voshe, vakuluntu na vanike. Vije vinjihandeka vinapu vimo vije vivahandekela laja tunanguizi va Njambi tua Njambi na Mosesa linga vikalanguye:

²³ nguavo Kilistu napande kuyanda nakupua umo uakulivanga kusan-guka kuvatsi nakuambulula ceke ca kuovoka kuli Vayunda na kuli vaje keti Vayunda."

²⁴ Kaha omo Paulu uakele nakuliamena mungila eyi, Fesitase uatam-bekele kuli ikeye nguendi, "Ove Paulu unazaluka! Kulilongesa kuove kua cikuma kuli nakukuzaluisa!"

²⁵ Vuno honi Paulu uakumbuluile nguendi, "Yove muene Fesitase, kun-jazalukile! Vuno honi njili nakuhandeka mezi a cili a vusunga.

²⁶ Kunjasa kuteua kuhandeka cuma eci kuli Muene Angilipa! Omuo njatentekeya nguange atantekeya cuma eci. Kaha unamonoho cimo hali umo na umo uovo voshe, omuo cuma eci kucalingiulile muvushueka.

²⁷ Muene Angilipa, uatsiliela tunanguizi va Njambi va Njambi? Njazivuka nguange utsiliela!"

²⁸ Kaha Angilipa uahandekela kuli Paulu nguendi, "Mukantsimbu kakan-dende uasinganieka nguove uasa kunjipuisa mu kua Yesu?"

²⁹ Kaha Paulu uamukumbuluile nguendi, "Cipue njilinge vuasi cipue mu ntsimbu yailaha, lilombelo liange kuli Njambi nguange yove na vaje voshe vali nakunjivuilila lelo vapue ngue munjinapu yange kuhumisako lika aua malienge!"

³⁰ Kaha Muene uemanene, hamo na nguvulu na Mbenisi na voshe vaje vatumamene nabo,

³¹ kaha omo uapuile nakuya, vahandekela kuli umo na mukuavo, "Ou yala viahi napihisa linga atse cipue va muhake mukamenga."

³² Angilipa uahandekela kuli Felisitase nguendi, "Ou yala napandele kumuecela ngue kaile kuli Sezale."

27

Paulu vamutuala ku Loma mu Vuato

¹ Omo vasinganiekele nguavo tuapande kujavuka nakuya ku Italia, vahanene Paulu na vakuavo vinzinda mu mavoko a Njuliasi mukuluntu ua mpunga ya masualale ua va Loma ije vatumbuile nguavo, "Masualele va Nguvulu."

² Kaha tuakovelele muvuato kuhuma ku Andalomitayame, vuje vavuahe-selele cimueja kuya kuvikuma via ku mbonge ya Asiya, kaha vasunuine vu-ato nakuya. Kaha Alisitakase uje Kamasindonia uahumine ku Tesalonika, uakele hamo netu.

³ Liamukuavo tuahete ku Sindone. Kaha Njuliasi uakele na ngozi kuli Paulu kaha uamutavesele kuya kuli vasepa vendi linga vakamuhaneko vukuasi.

⁴ Tuahumine ku Sindoni nakuya. Kaha mpunzi yakele nakuhuminina kuje tuakele nakuya kaha tuakele na kukavangeya lika nkundu lia Sepulasi.

⁵ Hanima yakujavuka musinia lia mema a kalunga kuseza Silisha namu Pamefiliya, kaha tuahete ku Maila mu Lisiya.

⁶ Kuje mukuluntu uauanene vuato vuahumine ku Alekizandiya vuakele nakuya ku Itali, kaha uatukovesele.

⁷ Tuajavuile matangua amengiko kamandende kamande kaha tuauanene vukalu vuakama te kanda tuhete ku nganda ya Sinindase. Kaha mpunzi yatuvindikile kuya kulutue, kaha tuasuangesele lika nkundu lia Kelete kuje mpunzi kuyakele na kupekumuka cikuma nakuhita muyehi na cikuma ca Salemone.

⁸ Tuashueniele kuyehe na cikuma na kukaluhua cikuma, kaha tuahete kumutambela uje vatumbuile nguavo Vikuma viakuhona vukalu, keti kulako na nganda ya Laseya.

⁹ Kaha tuakele kuje ntsimbu yalaha cikuma omuo kuakele na vukalu movungenzi vuetu, omuo ntsimbu ino litangua lia ku liumina via kulia linahiti laja. Ngue muavananguile Paulu,

¹⁰ Nguendi “Yeni vamala njamono nguange vungenzi vuetu kuhuma hano nakuya kulutue vukakala na vukalu, vitenga vili muvuato vi kapihia, kaha naua na vuato vukapihia na miono ikanonga.”

¹¹ Vuno honi mukuluntu ua masualale uatavele via mukakuendesa vuato navije viahandele vavenia vuato kupulakana via handekele Paulu.

¹² Kaha cije cikuma kucapuile cacili kukalamo ha ntsimbu ya cisika, nankuma vamala vakele na cizango cakusununa vuato nakueseka kuheta Fonikisi, nga citava, linga tutakaleko ha ntsimbu ya cisika. Fonikisi capuile cikuma camu Kelete cije cakenga mu mbuela ya mu kangombe kayambi na mukunto ya mungangela.

Mpunzi yakama a mema a Kalunga

¹³ Kaha mpunzi lia lindende liahumine ku mbuela yaputukile kuhuaa kaha vaje vamala vasinganiekele nguavo vasa kutualelaho na vutumbe vuavo, linga vakokele lisonga lia vuato nakujavuka kuhita kuyehi na cikuma ca Kelete.

¹⁴ Vuno honi vuasi mpunzi yakama ije vatumbuile nguavo, “mpunzi ya mu mbuela ya Ngangela,” ya huule kuhuma ku ntunda ya nkundu.

¹⁵ Kaha mpunzi yapupile ku vuato, kaha capuile ca cikalu cikuma kutalesa ntongo ya vuato kuvuizililo vuampunzi, kaha tuecele vuato linga mpunzi ivupekumune.

¹⁶ Kaha mpunzi ya huile omo tuahete ku mbuela ya nkundu lia lindende lije vatumbuile nguavo kaunda. Kaha kuakele vukalu vumo tuasele kukuata kavuato kaje kakandende nakukahaka mu vuato vuakama linga kakale muacili.

¹⁷ Vakokele kaje ka vuato kamandende nakukakutilila helu lia vuato vua kama, ambahoni vakutile vuato vuakama na mikole nakuvushetula cikuma. Vakele na liova cikuma nguavo hamo vuato vukakateya ha mutumbo ualishekeshe lia masima a mema a kalunga kuyehi na cikuma ca Limbiya, linga vavungile vije vintanga viendesele vuato na mpunzi nakuecela vuato linga vupekumuke lika na mpunzi.

¹⁸ Mpunzi yakama cikuma liakele na kuhuaa, nankuma, liamukuavo vaputukile kumbangela mundonga vivala vimo vije viakele mu vuato,

19 Kaha ha litangua lia mucitatu naua vomбилile mu ndonga vimo viakulikuasesa ku vuato.

20 Kaha matangua amangi kutuahasele kumona litangua cipue vintanga ntanga, kaha mpunzi liakele na kuhua cikuma. Kaha hamamanusuillilo kutuakele na lutsilielo lua kuovoloka.

21 Omo voshe vakele ntsimbu yailaha kuhona kulia, kaha Paulu ue-manene nakuhandeka kuli vakevo nguendi, "Vamala, nga muanjivuilile na kuhona kujavuka kuhuma ku Kelete nga viuma evi ku viapihile na kuzimbala.

22 Vuno honi njimilomba honi nguange koleseni, mitima naumo uahi ueni a kazimbalesa muono uendi, kuvanga lika vuato.

23 Omuo izau vutsiki kuli yange kunemanene kangelo ka Njambi kuje kunjakundama nauje njikalemesa,

24 kaha uahandেকেle nguendi, 'Keti muvue liova, Paulu! Uapande kuimana ku mesho a Nguvulu. Kaha Njambi na kuniungila voshe ava uli nakujavuka navo mu vuato.'

25 Kaha likoleseni, vamala, muomu njili na lutsilielo muli Njambi kaha cikalingiua vene ngue omuo vana njilekelele mo.

26 Vuno honi mankimba akatutuala ku linkanda limo."

27 Omo vuakele vutsiki vua mu likumi navuana, tuakele na kuhungu-muka mu cisali ca Andiliya, omo vuakele vtsiki kaha va kakujavula vasinganyekele nguavo vuavuno vahete kuntunda.

28 Kaha vesekele kulova kua mema, kaha vauanene kulova kuapuile mamita makumi auana (40), omo kuahitile ka ntsimbu kakandende naua vesekele kulova kua mema naua, kaha vauanene kulova kua mema mamita makumi atatu. (3 0)

29 Kaha vakele na liova nguavo vuato vukongumukila ku mavue, nankuma, kaha vasoselele vinkovo viuana mu mema ku ntongo ya kunima ya vuato, kaha vavandamene nguavo kuke vuasi

30 Vuno honi omo vakakujavula vesekele kuteua kuhuma muvuato, vaha-kele kavuato kakandende mu mema linga vaje vava nakuhaka vinkovio vimo ku ntongo ya kulutue luavuato.

31 Vuno honi Paulu uahandেকেle kuli uje mukuluntu na masualale nguendi, "Nga ava vakakujavula kuvakala muvuato kuvasa kuovoka."

32 Kaha masualale vavatuile mukole uakuate vuato nakuvueca vuye.

33 Omo litangua kanda like Paulu uavalombele voshe valie viakulia nguendi, "Munakala na kuvandamena matangua likumi na auana, kaha ntsimbu yoshe ei kumuakele nakulia viakulia.

34 Nankuma njimilomba muvoshe mulie viakulia, linga muyoye, omuo naumo uahi a kunongesa cinkambu cakumutue uendi."

35 Hanima yakuhandeka evi, uambate mbolo, nakusatsela kuli Njambi ha mesho avo voshe, uaipazuile nakuputuka kulia.

36 Kaha voshe valisimpisile kaha vambate viakulia valile.

37 (Tuvavoshe tuapuile vihita vivali na makumi atanu naua avali na vantu vatanu na umo tuakele muvuato.) (276)

38 Hanima yakulia nakukuta, vomбилile tiliku mu mema a kalunga linga vuato vuehuke.

Kutavozoka kua vuato

39 Kaha omo kuacele, vakakujavula vamuene vuno honi ku vatantekeyele kuje kuvakele, vuno honi vamuene cinkonde cimo cakele na lishenkavu, kaha vayonguele nguavo nga citava, vapande vakatutike vuato kuje kulishenkavu.

⁴⁰ Nankuma vavatuile vinkovo nakuviseza vivombe mu mema, kaha ha ntsimbu ije vene vazituile mikole ije yakele ku vilapo vije viendesele vuato. Ambahoni vajuinduile vintanga vije viendesele vuato na mpunzi vije viakele kulutue lua vuato linga mpunzi lipekumune vuato kulutue, kaha tuasungamene ku cikuma

⁴¹ Vuno honi vuato vuapupile ha mutumbo ua mushekesheke lia ha cimbaliula lia mema, kaha vuakakatele, kaha kuyahasele kushuena, ha ntsimu ijevene ntongo ya kunima ya putukile kutavozoka vimbazivuila-mbazivuila na nzili ya mankimba.

⁴² Vutumbe vua masualale vatondele kutsiha vinzinda, linga cipue naumo napandele kuteua.

⁴³ Vuno honi mukuluntu ua masualale, uazangele kuyoyesa Paulu, uavavindikile kulinga vutumbe vuavo. Uashikile voshe vaje vahonele kutana linga vatumbuke muvuato cakulivanga kaha vatane nakuya ku ntunda,

⁴⁴ kaha voshe vaje vasaleleho vavakave, valikuatele ha mavaya vamo valikuatele kuviuma vije via pokuozokele ku vuato. Kaha voshe vahete muacili kuntunda.

28

Mu Melita

¹ Omo tuhete ku ntunda kuhona vukalu, tuauanene ngeci linkanda lije vatumbuile nguavo Melita.

² Vavenia Vaje vakele kuje vakele na ngozi netu. Kaha kalunga uaputukile kunoka, kaha kuakele lisika kujevene, vatuvuekelele tuhia nakututambula muacili tuvavoshe.

³ Kaha Paulu uakunguiye mukuta uavikuni, kaha omo uahakele vije vikuni acoto, uje linoka akuivua ku yukuma uahumine muje mutuhia na kumushuma nakuniengela ku livoko liendi.

⁴ Vavenia Vaje vakele kuje vamuene uje linoka ali nakuniengela ku livoko lia Paulu, vali handekesele umo na mukuavo nguavo, "Cili vene ou yala napande mu ka kutsiha, cipue vene novoka kumema njambi uje uazangamelele vantu kuvipi viavo akalinga ngeci atse."

⁵ Vuno honi Paulu uamiakelele uje linoka mu tuhia kuakuhona kuvetua.

⁶ Vamutalelele hamo a nzimba vuasi cipue kuuila hamavu na kutsa. Vuno honi omo vavandamenene ntsimbu yakama kuakuhona kumona cuma cimo cacikalu calinguiile kuli ikeye, kaha vatenguluile visikanieka viavo, na kuhandekele nguavo, "Napu njambi."

⁷ Kaha kuyehi namutambela uje kuakele mehia a Pambiliase, muene ualiye linkanda. Uatutambuile muacili, kaha tuampuile tu vangezi vendi matangua atatu.

⁸ Kaha ishe ya Pambiliase uakele mu mulili uendi na kuvavala cikuma masika sika na kuhuma maninga. Kaha Paulu uakovelele mu mulili uendi, ualombebele kaha uasalekele mavoko endi hali ikeye nakumukakuisa.

⁹ Omo eci calinguiile, voshe vaje vakakuvavala vamuje mu linkanda vezile, kaha vakangukile.

¹⁰ Vatusingimikile cikuma, kaha omo tuasunuine vuato, vahakele mu vuato viose vije tuatondele a vungenzi vuetu.

Kuhuma ku Melita na kuya ku Loma

¹¹ Kaha omo kuetile vingonde vitatu tuakovelele mu vuato vua humine ku Alekizandiliya, vuje vatumbuile nguavo, "Vanjambi va Vana vampasa," vuje vuakele kuje cisika coshe muje mu nkundu.

12 Tuahete mu nganda ya Silakuse, tuakele kuje matangua atatu.

13 Kuhuma kuje tuajavukile mu vuato nakueta mu nganda ya Lendile. Kaha liamukuavo naua mpunzi ya shangumukile kuhuma ku mbuela, kaha mu matangua avali tuahete mu nganda ya Puteoli.

14 Kuje tuauanene va kakutsiliela vamo vaje vatulombeke kukala navo matangua atanu na avali. Kaha tuete ku Loma.

15 Kaha vakakutsiliela va mu Loma omo vovuile nguavo tunete, vezile kuhuma ku vinganda viakulako via kulandesela via Apiyase na vinjivo vitatu via vangezi mukuliuana netu. Omo Paulu uavamuene, kaha uatsatsesele kuli Njambi nakulikolesa.

Paulu aya mu Loma

16 Omo tuahete mu Loma, Paulu vamutavesele kukala mua lika liendi lika amo na lisualale muka ku muniuka.

17 Ha matanga atatu uasanene vakuluntu voshe vayunda linga valiuanene hamo. Omo valiuanene hamo, uendekele kuli vakevo nguendi, "Vakuetu vaku Isaleli, cipue ngoco kunjalingile cimo ca kuluisa vantu cipue futisi ije ituatambuile kuli vakukuluila vatu, vuno honi vanjikutile Mu Yelusalema nakunjihana kumavoko a Valoma.

18 Omo vanjihule, Valoma vatondele kunjecela, omuo kuvauanene cuma cimo cije cinjalingile cije cinjapandela kutsila.

19 Vuno honi omo Vayunda vavianene eci, kaha canjilingisile linga njituale cimpande cange kuli Sesale, cipue yange kunjauanene vantu vange mulonga.

20 Omuo ha cuma eci mukemuo njamisanene linga njimimone nakuhandeka neni. Yange njili mu malienge aua omuo lizina liou uje muvanatsiliela vantu va Isaleli."

21 Kaha vahandekele kuli ikeye nguavo, "Kutuatambuile mikanda yakuhuma ku Yundeya ya hali yove, cipue kuno kukuezile umo ua vamuane ku kuhuma kuje na muzimbu umo, cipue kuhandeka via vipi hali yove.

22 Vuno honi tutonda kutantekeya viyongola viovve, omuo tuatantekeya ngueto kuoshe kuoshe vantu valinakuhandeka viakuluisa civunga eci cije mu uli."

23 Nankuma, vahanguile litangua liakuliuana na Paulu. Kuhuma ku cimene kuheta ku cinguezi uavalumbunuinine muzimbu uendi ua Vumuene vua Njambi, kaha usekele kuvalumbunuinine vukaleho vua Yesu ha kuvaleka mezi a mu Lishiko lia Mosesa na mezi a mu visoneka via tunanguizi va Njambi tua Njambi.

24 Vamo vatavele mezi endi, vuno honi veka kuvatsilieelelele.

25 Nankuma, vaile oku valinakuliviana hakati kavo, omuo Paulu nahan-deka navo cuma eci nguendi, "Cimbembesi Uakulela cahandekele vusunga kuli vakukuluila veni hali kananguizi Isaya!

26 Omo uahandekele nguendi,
 'Ya ukahandeke kuli vantu ava nguove,
 kuivua mukevuilila, vuno honi kumukevuisisa,
 kumona mukamona, vuno honi kumukamonesesa.

27 Omuo mitima ya vantu ava inapu yakuzeya,
 vanaziki matuitui avo,
 kaha vanalalameka na mesho avo.

Kuteua mesho avo amona,
 na matuitui avo evua,
 kaha mana avo akevua,
 kaha vakatengulukila kuli yange, mukemo mualinakuhandeka Njambi,

kaha njikavakanguisa.' ”

²⁸ Kaha Paulu uamanesele kuhandeka nguendi, “Munapande kutantekeya ngueni muzimbu ua Njambi uakuovola vanautumu kuli vaje keti Vayunda. Kaha vakauivuulila!”

²⁹ Omo Paulu uamanesele kuhandeka mezi aua, Vayunda vamusezele oku valinakulinga vimpata viakama hhakati kavo vavenia.

³⁰ Paulu uakele kuje miaka ivali mu njivo yakulifuetela ikeye vavenia, kaha uakele nakutambula voshe vaje vezile kuli ikeye nakumumona.

³¹ Uambulule via vumuene vua Njambi nakulongesa via Muene Yesu Kilistu nakusimpa na mutima uakupatuka.

Mukanda ua Paulu kuli vaka LOMA Citsindikisi

Livulu lia Loma valisonekele kuli Kanganda Paulu ha miaka ya mukati ka makumi atanu na iuana nakutuala hamiaka makumi atanu na miaka itanu na itatu (54-58) hanima yakusemuka kua Kilistu. Te Paulu kanda aciye mukumeneka ku Loma kaha uatumine mukanda ou kuleka vaka Yesu mu Loma, kuli vaje Vayunda na vaje keti Vayunda. Ou mukanda uasonekele te acili munganda ya Kolintu omuo ha ntsimbu ije kukekuo kuakele nakukala. Paulu uasonekele linga mafuti oshe a tsielele nakuononoka Yesu Kilistu (16-26). Livulu lia Loma liapua livulu lia seho ku vaka Yesu kuoshe na mu vintsimbu vioshe omuo ya muje mulialumbunuka muacili na muje maalitumbikilhamo Paulu mukulumbununa muacili kuovoka kuje kutuasa kukala naco kuhitila muli Yesu Kilistu. Paulu naua uanungakanene Muzimbu Uacili ua Yesu Kilistu ku Litavasano Lialaja. Vakakulilongesa vavengi vakaliluisa nguavo cinimbu ca seho mu livulu eli capua 1: 16 eci cihandeka nguaco, “Kunjivu shuamua ha muzimbu uacili, omuo ukeuo nzili ya Njambi ha kuovoka kuli uoshe uje atsiliela: hakulivanga kuli Vayunda, kuhumaho kuli vaje keti Vayunda.” Mbazuvuila yakulivanga ya Loma kuhuma (1-11) inahandeka cikuma via hali Njambi, kaha mbazuvuila ya mucivali kuhuma (12-15) ili naviavingi vishika ha vuyoye vua vaka Yesu.

Muvanautumbikilamo

Paulu, mu mukanda uendi aputuka kuliambulula ikeye vavenia na ku vantu vaje vausonekelele (1: 1; 15).

Cakuhatako asoneka vuyoye vua muntu na kuovoka kuhitila muli Yesu Kilistu (1: 16; 11:36)

Hanima yevi Paulu ahana cishika ca vuyoye vua Yesu (13: 1; 15: 13).

Uamanusuile Livulu lia Loma mukuhana vimeneka ku vantu va cikungulukilo ca Loma (16).

¹ Yange Paulu, ndungo ya Yesu Kilistu na kanganda uje yahanguile nakunjisana kuli Njambi mukuambulula Muzimbu uendi Uacili.

² Njambi uakulahesele laja Muzimbu Uacili kuhitila muli tunanguizi va Njambi vendi, nge muvanavisoneka mu Visoneka via Kulela.

³ Vinapu via Munendi, ngue ku vuyoye vuendi vua ha mavu, uasemukile ku ntanga ya Ndaviti,

⁴ kuhitila mu Cimbembesi Uakulela Yesu vamumuesele na nzili yakama kupua Muna Njambi omo vamusanguile ku vatsi.

⁵ Kuhitila muli Yesu tuatambuile kavumbi na vunganda linga tusane vaje keti Vayunda linga vononoke kulutsilielo omuo ya lizina liendi.

⁶ Kaha neni naua munapu vamo hhakati kavaje keti Vayunda vaje vavanasana linga vakundame kuli Yesu Kilistu.

⁷ Nankuma, njilinakusonekela kuli yeni voshe muli mu Loma vaje Njambi vazanga nakumisana linga mupue vantu vendi vakulela.

Njambi Tatetu na Muene Yesu Kilistu vamihane kavumbi na ciyulo.

Lilombelo lia Cikandelelo

⁸ Cakulivanga, njitsatsela kuli Njambi yange kuhitila muli Yesu Kilistu hali yeni voshe, omuo lutsilielo lueni lunatsimana ha mavu oshe.

⁹ Njambi ikeye mukaleho uange linga vije vioshe vinjihandeka vinapu via vusunga, Njambi uje injili nakupangela na mutima uange uoshe

mukuambulula Muzimbu Uacili ua Munendi. Njambi natantekeya ngeci njikamianuka,

¹⁰ ntsimbu yoshe mu malombelo ange njikalombo nguange Njambi mu cizango cendi nga atava njije kuli yen i nakumimeneka.

¹¹ Njishunguiya cikuma kumimona, linga njakumihaneko vuana vua mu Cimbembesi mukumitakamesa.

¹² Hano njilumbununa ngeci yen i nange tuakulikolesa ha ntsimbu imolika, yen i ha lutsilielo luange kaha nange ha lutsilielo lueni.

¹³ Vavusamba vange, munapande kuvuluka nguenu vintsimbu viavangi njakele na vutumbe vuakuija oko nakumimeneka, vuno honi kuli cuma cimo cinanjivindika. Njitonda kukoka vantu hhakati keni ngue munjinalingi hhakati ka vaje keti Vayunda.

¹⁴ Njilina likongo lia vipangi hhakati ka vantu voshe, kuli Vangelengu na ava keti Vangelengu, na kuli vaka kunangula na vilema.

¹⁵ Nankuma, njitonda cikuma kuambulula Muzimbu Uacili nakuli yen i naua muakala mu Loma.

Nzili ya Muzimbu Uacili

¹⁶ Kunjesi na shuamua ya kuambulula muzimbu uacili, omuo unapu nzili ya Njambi ije ineha kuovoka kuli vaje voshe vatsiliela, hakulivanga kuli Vayunda, kaha naua na kuli Vangelengu.

¹⁷ Omuo muli likelio vusunga vua Njambi vanavusholola kuhitila mulut-silielo ngue muvihandeka visoneka nguavio, "Muntu uje ivanapuisa muka vusunga ku mesho a Njambi ha lutsilielo akayoya."

Vantu voshe vali na mulonga ku mesho a Njambi

¹⁸ Vutenu vua Njambi vunasholoka kuhuma muilu nakuluisa vupi vuoshe na vilinga via kupihia via vantu vaje vilinga viavo viavipi vivindika vusunga linga keti vavufantekeye.

¹⁹ Omuo vije vineha nguavo linga vatantekeye Njambi vinasholoka, omuo Njambi navisholola kuli vakevo.

²⁰ Hume haje Njambi hatangelele mavu, vifua viendi vije kutuasa kumona, nzili yendi ya yaye na cifua cendi ca Vunjambi vinasholoka muacili, vantu vasa kuvitantekeyela mu viuma vije vianalingi Njambi. Nankuma, vantu ava kuvasa kulisambuesa kuahi.

²¹ Cipue vene vatantekeyele Njambi, vuno honi kuvamusingimikile cipue kumuhana citsatsela. Vuno honi visinganieka viavo vinapu viangoco kaha na mitima yavo yamupulungua inashulu na milima.

²² Vakahandeka nguavo vanapu vaka mana, vuno honi vanapu vilema,

²³ kaha vanalikela kulemesa uje kekutsa, nakulemesa viuma via vifua via vuntu vije kuviekuyoya miaka yoshe na vifua via tuzila cipue tusitu cipue viakulikoka.

²⁴ Nankuma, Njambi navecelela linga valinge viuma via mazilo ngue ku mashungu a mitima yavo, kaha valinga viuma via shuamua kuli umo na mukuavo.

²⁵ Vanaviana kutsiliela vusunga vua Njambi, kaha vanatsiliela makuli nakulemesa nakupangela vije vianatanga Njambi kuhona kulemesa vavenia uje uavitangele, uje ivanapande kushangazala miaka yoshe ya yaye! Amen.

²⁶ Omuo ha cuma eci, Njambi navecela linga valinge viuma via shuamua ngue ku mashungu avo. Cipue vampuevo vanatenguluka kulinga vilika na vamala mu ngila ya cisemua, vuno honi valinakuvilinga mu vingila vije kuviapandelelo.

²⁷ Kaha mu ngila imo naua vamala vanatenguluka kulinga vilika na vampuevo mu ngila ya cisemua, vuno honi valinakulinga vukoyi na vakuavo vamala. Vamala vali nakulinga viuma via shuamua kuli umo na mukuavo, kaha ha cuma eci vanatambula fueto inavapande omuo ya vilinga viavo viavipi vije vivanalingi.

²⁸ Omuo vantu ava vanaviana kuniunga vusunga vuakuivuisisa Njambi mu viyongola viavo, Njambi navecelela linga vakale na mana a api, linga valinge viuma vije kuvapandele kulinga.

²⁹ Vanashulu na viuma vioshe via mazilo na vipi na lizangamena na cizindo, vanashulu na cipululu nakutsiha na luozi na makuli na lizangamena. Vakafueye,

³⁰ nakuhandeka viavipi hali umo na mukuavo, vanapu vakakuzinda Njambi, vaka likamba, vaka kulihalesa, kaha vaka kulipamba, vayongola vingila viavingi viakupangelamo vupi, kuvekuononoka visemi vavo,

³¹ kuvekuvuisisa, kuvekuniunga vikulaheso viavo, kaha kuvekumuesa ngozi cipue kuvuila vakuavo cikeketima.

³² Cipuevene vatantekeya nguavo kusompa kua Njambi kuhandeka nguanguo vantu vaje vayoya mu ngila eyi vanapande kutsa, keti lika viuma evi valinakutualelelaho kulinga kuahi, vuno honi naua vacilitavasana na vaje vakakuvilinga.

2

Kusompa ca Njambi

¹ Yove kavusamba kange, nkuma ukasompo vakueni ndi? Kuli yove kukuesi kusambua, cipue vene yove iya. Nga yove usompa vakueni kaha ulinga viuma vije vivalinga vakevo, ulinakulihisa yove vavenia.

² Tuatantekeya ngeci kusompa ca Njambi capua ca vusunga ha vantu vaje valinga viuma via vipi.

³ Nkuma omo yove, muntu lika, usompa vakueni kaha naua ukalingi viuma vije vivakalingi, uayongola nguove uasa kuputumuka ku kusompa ca Njambi ndi?

⁴ Cipue ulinakukehesa ngozi yendi yakama na kulongua cendi na kusimpa cendi. Muavusunga utantekeya nguove Njambi uakala na ngozi omuo alinakueseka kukutuamenena linga utenguluke.

⁵ Vuno honi omuo ya mutima uove uakukola nakukaluua, kaha ulinakulingisa cihiso cove linga cipue cakama ha Litangua lije omo vutenu vua Njambi nakusompa cendi ca vusunga vikasholoka.

⁶ Njambi akahana vuana ku muntu na muntu kuya kuvipangi viendi vije vianalingi.

⁷ Vamo vantu vali nakutualelelaho kulinga muacili, nakutonda vumpau na kasingimiko na muono uje kuuekutsa, kuli vakevo Njambi akavahana muono ua yaye ya yaye.

⁸ Vuno honi vamo vantu valizanga vakevo vavenia nakuviana via vusunga nakukava vije viakupihia, kaha Njambi akamuesa vutenu vuendi na matoto endi hali vakevo.

⁹ Kukakala tuyando nalamba kuli vantu voshe vaje valinga vupi, hakulivanga kuli Vayunda kaha naua nakuli Vangelengu.

¹⁰ Vuno honi Njambi akahana vumpau na kasingimiko na ciyulo kuli voshe vaje valinga muacili, hakulivanga kuli Vayunda kaha naua na kuli Vangelengu.

¹¹ Muafua Njambi kakele nacivembulu.

¹² Vaje keti Vayunda vaje kuvesi na lishiko lia Mosesa, valinga vupi kaha vazimbala omuo liakuhona lishiko. Vayunda vaje vali na lishiko, valinga vupi kaha vavasompa na lishiko.

¹³ Muafua keti hakuvua lika lishiko lia Mosesa ngeci vantu vavapuisa vaka vusunga kuli Njambi, vuno honi vaje vononoka lishiko lia Mosesa vakavatumbula nguavo vaka vusunga.

¹⁴ Cilivene vaje keti Vayunda kuvakele na lishiko lia Mosesa, vuno honi vioshe vivakalingi na mana aje muaya lishiko lia Mosesa, vakevo vavenia vanapu lishiko liavo, cipuevene kuvakele na lishiko lia Mosesa.

¹⁵ Cifua cavo cimuesa ngeci vije lishiko lia Mosesa lishika vanavisoneka mu mitima yavo. Kaha naua na vilinga viavo vimuesa ngeci viuma evi vinapu via vusunga, omuo vintsimbu vimo viyongola viavo vikavahisa kaha naua vintsimbu vikuavo vikavamena.

¹⁶ Kaha ngue kuya ku Muzimbu Uacili unjinakuambulula, omu mukemo mucikafua ha Litangua lia Kusompa lije omo Njambi akahisa viyongola viavushueke via vantu voshe kuhitila muli Yesu Kilistu.

Vayunda na Lishiko lia Mosesa

¹⁷ Honi yove, nga ulitumbula yove vavenia nguove nji Kayunda, nga uajendamena ha Lishiko lia Mosesa nakulipamba hali Njambi,

¹⁸ kaha unatantekeya vika Njambi atonda linga uvilinge, kaha unali-longesa ku lishiko lia Mosesa kuhangula vije vinapu vusunga,

¹⁹ kaha unatantekeya muacili ngeci yove unapu ntuaama ua tupuputua, naua ceke kuli vaje vali mu milima,

²⁰ unapu umuka kusungamesa vilema, naua mulongisi ua vaje vali kunzimba. Uatantekeya muacili nguove mu lishiko lia Mosesa unauanamo mana akushula na vusunga.

²¹ Ukalongesa vakueni, nkuma vikahoni kulilongesela yove vavenia? Ukambulula nguove, “Keti muive.” Vuno honi yove vika ukevila?

²² Ukahandeka nguove, “Keti mulinge vupangala.” Nkuma yove vika ukalingila vupangala? Uzinda tumponia, nkuma ukevi via mu vinjivo viakulemesela tumponia ndi?

²³ Ukalishasha ha lishiko lia Njambi, vuno honi kuuekuvuisa Njambi shuamua omo upokola lishiko liendi ndi?

²⁴ Visoneka vihandeka nguavio, “Omuo yeni Vayunda, nankuma, vaje keti Vayunda vashaula Njambi.”

²⁵ Nga muononoka lishiko, kulovoka ceni cili na seho, vuno honi nga kumuononoka lishiko, mukapua cilivene ngue kumualovokele.

²⁶ Nga vaje keti Vayunda, vaje kuvatuhukile, vononoka vije lishiko lia Mosesa lalinakushika, nkuma Njambi kakavaniungu ngue vaka kulovoka ndi?

²⁷ Kaha yeni Vayunda vakamihisa kuli vaje keti Vayunda omuo mukapokola lishiko lia Mosesa, cipuevene vanamisonekelalio kaha naua muapua muvaka kulovoka, vuno honi vakevo valinakuononoka lishiko cipuevene kuvatuhukile ku cisemua.

²⁸ Munima yavioshe evi, iya Kayunda ua vusunga, uje uakulovoka muavusunga? Keti muntu uje ikeye Kayunda hambanza lika, uje kulovoka cendi kunapu kua muvila lika.

²⁹ Vuno honi Kayunda ua vusunga ikeye muntu uje Kayunda mukati, uje mutima uendi unalovoka, kaha eci cinapu cipangi ca Cimbembesi ca Njambi, keti ca lishiko liakusoneka. Muntu ua cifua eci Njambi amushangazala, keti vantu kuahi.

3

¹ Nkuma Vayunda vanapulakana vaje keti Vayunda ndi? Cipue nkuma kulovoka cili na seho ndi?

² Cuma cakama cikuma mu vingila vioshe! Mu cihela cakulivanga, Njambi uakundikile lizi liendi kuli Vayunda.

³ Vuno honi vatihoni nga vamo vavo kuvapuile vakulongua? Nkuma eci cilumbunuka ngue Njambi keti muka kulongua ndi?

⁴ Houe keti ngoco! Njambi napande kupua ua kulongua, cipue vantu voshe vapua vaka makuli. Ngue muvasoneka mu visoneka nguavo, “Unapande kusholoka muka kulongua omo uhandeka, unapande kuhiana mulonga uove omo vakusompa.”

⁵ Vuno honi nga vilinga vietu viakupihia vije vituli nakulinga visholola muacili vusunga vua Njambi, nkuma tuasa kuhandeka nguetu Njambi akalingi muamupi omo atuhana kashitiku ndi? (Njilinakuhandeka mucifua ca vuntu.)

⁶ Houe keti ngoco! Nga Njambi keti ua kulongua, kaha vatihoni asompa vaka mavu?

⁷ Vuno honi nga makuli ange amuesa vumpau vua Njambi hakusholola vusunga vuendi muacili, omuo vika naua hanga vacinjisompa ngue muka vupi?

⁸ Kaha vikahoni kumuhandekela nguene, “Tulingeni vupi linga vucili vusholoke?” Cilivene, vantu vamo vali nakunjishaula nakunjivangeya nguavo njinahandeka cuma eci! Vakavahisa ngue mucinapandelamo.

Naumo uahi Muka Vusunga

⁹ Vatihoni, nkuma yetu Vayunda tunapu tuvacili kupulaka Vangelengungu ndi? Ketu ngoco kuahi! Omuo njamilekele laja nguange Vayunda na Vangelengu voshe vali mu nzili ya vupi.

¹⁰ Ngue muvasoneka mu visoneka nguavo, “Naumo uahi muka vusunga,

¹¹ naumo uahi ali na mana
cipue muka kulemesa Njambi.

¹² Voshe vanatenguluka kuhuma kuli Njambi, voshe vanalingi vupi, naumo uahi akalingi cuma ca vusunga.

¹³ Majui avo anashulu na vusungu vua makuli, vindaka viavo vihandeka makuli, tunua tuavo tuhandeka mezi akupihia ngue vusungu vua linoka.

¹⁴ Hendekesi yavo inashulu na visingo via kushasha.

¹⁵ Vakazambula kuvulumuna na kutsiha vakuavo,

¹⁶ mu vingila viavo muli kupihisa na kunongesa.

¹⁷ Ku vatantekeya ngila ya ciyulo,

¹⁸ kaha na mu mesho avo kuvekuivuila Njambi liova.”

¹⁹ Honi tuatantekeya ngeci viuma vioshe mu lishiko viakundama kuli vaje vali mu lishiko, mukuvindika kulisambuesa kuoshe kua vantu nakuneha vantu voshe kukusompa ca Njambi.

²⁰ Omuo naumo uahi napu muka vusunga ku mesho a Njambi mukulinga vije lishiko litonda, vipangi via lishiko vikevio vinapu kuleka yetu linga tutantekeye nguetu tu vaka vupi.

Muje vati Njambi natupuisa tu vaka vusunga ku mesho endi

²¹ Vuno honi ngila ya Njambi yakupuisa vantu linga vapue vaka vusunga ku mesho endi inasholoka. Kuyesi nacimo na lishiko, cipue lishiko lia Mosesa na tunanguizi va Njambi vahanene vukaleho hali likelio.

²² Vusunga vua Njambi kuhitila mu lutsilielo muli Yesu Kilistu kuli voshe vaka kutsiliela. Omuo kukuesi kahangu kahi,

²³ vantu voshe vanalingi vupi, kaha vakelekulahako na vumpau vua Njambi.

²⁴ Vuno honi vanavapuisa vaka vusunga kuli Njambi ha vuana vua kavumbi ka Njambi kuhitila muli Yesu Kilistu, uje navapatula.

²⁵ Njambi uamupuisile nkombelo, linga ha nkombelo ya kutsa cendi akapue cihingo cakusambuesa vupi vua vantu halutsilielo luavo muli ikeye. Njambi ualingile cuma eci mukumuesa ngeci napu muka vusunga. Ha kulivanga Njambi uasimpile, kaha kahakeleko mutima ku vupi vua vantu,

²⁶ vuno honi ku ntsimbu ino alinakusompa vupi vua vantu, mukumuesa vusunga vuendi. Mu ngila eyi vene Njambi alinakumuesa ngeci ikeye vavenia napu muka vusunga kaha muntu uoshe uje atsiliela muli Yesu Njambi amupuisa muka vusunga.

²⁷ Kaha honi kulihhi naua tukalishasha? houe vene! Omuo tuononoka lishiko ndi? houe, vuno honi omuo tutsiliela.

²⁸ Omuo tuayongola ngeci muntu vamupuisa muka vusunga ku mesho a Njambi ha lutsilielo lika, vuno honi keti mukulinga vije lishiko vilishika.

²⁹ Cipue Njambi nkuma uapua Njambi ua Vayunda lika ndi? Nkuma kapuile Njambi ua vaje keti Vayunda naua ndi? Cilivene uapua Njambi uavoshe.

³⁰ Omuo Njambi uapua umolika, kaha akapuisa Vayunda kupua vaka vusunga ku mesho endi halutsilielo luavo.

³¹ Nkuma eci cinalumbunuka ngeci halutsilielo tunaviana lishiko ndi? Houe keti ngoco, vuno honi tulinakukolesa lishiko.

4

Cimueso ca Avilahama

¹ Nankuma, vikahoni tuhandeka hali kukuluila yetu Avilahama?

² Nga Avilahama vamupuisile muka vusunga ku mesho a Njambi ha viuma vije vialingile, nge uapandele kulishasha, vuno honi ikeye kalishashele ku mesho a Njambi.

³ Visoneka vihandeka nguavio, “Avilahama uatsilielelele Njambi, kaha omuo ha lutsilielo luendi, Njambi uamutambuile kupua muka vusunga.”

⁴ Muntu uje apanga atambula fueto, vuno honi fueto yendi kuvasa kuitumbula nguavo vuana, omuo inapu cuma cije napangela.

⁵ Vuno honi muntu uje natsiliela lika ha lutsilielo, keti ha vilinga viendi, kaha uje atsiliela kuli Njambi uje muka kusambuesa muka mulonga kupua uakuhona mulonga, kunapu kutsiliela cendi kuje Njambi ayongola linga amupuisse muka vusunga ku mesho endi.

⁶ Eci cikoco calumbunuine Ndaviti omo uahandeketele hakuvezika kua muntu uje Njambi namupuisa muka vusunga, kuakuhona cuma cimo cije calinga uje muntu,

⁷ “Vanavezika vantu vaje Njambi navasambesa ku vipi viavo, Vantu vaje vipi viavo vanavifuiki!

⁸ Uakukuisula muntu uje Muene kakamuanukila vipi viendi!”

⁹ Nkuma kuvezika kuje kuahandeketele Ndaviti kuakundama lika kuli vaka kulovoka ndi? Cilivene kuahi! Kunakundama naua nakuli vaje vaka kuhona kulovoka. Omuo tunamono laja mu visoneka nguavio,

"Avilahama uatsilielegelele kuli Njambi, kaha omuo ha lutsilielo luendi Njambi uamutambuile kupua muka vusunga."

¹⁰ Ntsimbu mukahoni eci calingiuile? Eci calingiuile te Avilahama kanda atuhuke, keti te natuhuka laja.

¹¹ Vamutuhule, kaha kulovoka cendi kuapuile cimueso cakumuesa linga omuo hakutsiliela cendi Njambi uavatambuile kupua muka vusunga ntsimbu kanda vacimutuhule. Nankuma, Avilahama napu ishe ua voshe vaka kutsiliela kuli Njambi, kaha Njambi navatambula kupua vaka vusunga, cipue vene kuvatuhukile.

¹² Kaha ikeye naua napu ishe ua voshe vaje vanatuhuka, keti lika kuli vaje vanatuhuka vuno honi linga vavuezeleleko mukulovoka, vayoya yoyesi yakutsiliela ije yayoyele tatetu Avilahama ntsimbu kanda vamutuhule.

Cikulaheso ca Njambi vacitambula ha lutsilielo

¹³ Omo Njambi uakulahesele Avilahama na vatekuluila vendi ngeci vakasuana mavu, ualingile eci, keti nge Avilahama uononokele lishiko kuahi, vuno honi uatsilielegelele, kaha Njambi uamutambuile kupua muka vusunga.

¹⁴ Omuo nga vije viakulahesele Njambi vavihana kuli vaje vononoka lishiko lia Mosesa, kaha lutsilielo lua muntu lupua luangoco, naua kaha cikulaheso ca Njambi cinapu cakuhona seho.

¹⁵ Omuo lishiko lineha vutenu vua Njambi, vuno honi nga kukuesi lishiko, kaha kukuesi kupokola lishiko.

¹⁶ Nankuma, cikulaheso cajendamenene ha lutsilielo, linga cikulaheso vapande kucikolesela kupua vuana vua Njambi kuli vatekuluila voshe va Avilahama, keti lika kuli vaje vononoka lishiko kuahi, vuno honi na kuli vaje vatsiliela nge mualingile Avilahama. Omuo Avilahama napu tate yetu voshe vaka kutsiliela.

¹⁷ Ngue muvanasoneka mu visoneka nguavo, "Njinakupuisa ishe ya mafuti oshe." Nankuma, cikulaheso cinapu cacili ku mesho a Njambi, uje yatsilielegelele Avilahama, Njambi uje muka kusangula vatsi, uje hakushika cendi ane ha viuma vije kuviesiko linga vikaleko.

¹⁸ Avilahama uatsilielegelele nakukala na lutsilielo, cipuevene kukuakele cuma catsilielegelele, kaha uapuile "Ishe ya mafuti oshe." Ngue muvanasoneka mu visoneka nguavo, "Nankuma, vatekuluila vove vakapua vavengi cikuma nge vintangantanga."

¹⁹ Avilahama ha ntsimbu ije uakele na miaka yakupua cihita cimolika (100), vuno honi lutsilielo luendi luazeyele omo uayonguele ha muvila uendi uje uakele kuyehi na kutsa, cipue ha cuma cije ngeci Sala kasa kusema vana.

²⁰ Kalitaliangelelele mukutsiliela cendi, kaha kakele na kulunienga ha cikulaheso ca Njambi, vuno honi uatsilielegelele cikuma kaha uashangazalele Njambi.

²¹ Uatsilielegelele nguendi Njambi asa kulinga vije vianamukulahesa.

²² Omu mukemo Avilahama ha lutsilielo luendi, vamutambuile kupua muka vusunga ku mesho a Njambi.

²³ Mezi aua a "Vamutambuile kupua muka vusunga," kuva asonekelele kuli ikeye lika kuahi.

²⁴ Va asonekelele naua nakuli yetu kupua vaka vusunga, vaje vanatsiliela kuli Njambi uje uasangule Muene yetu Yesu ku Vatsi.

²⁵ Vamuecelele linga atse omuo vipi vietu, kaha uamusanguile linga vatupuisse vaka vusunga ku mesho a Njambi.

5

Kutupuisa vaka vusunga ku mesho a Njambi

¹ Nankuma, omuo vanatupuisa vaka vusunga ku mesho a Njambi kuhitila mu lutsilielo, kaha tuli mu ciyulo na Njambi hali Muene yetu Yesu Kilistu.

² Hali ikeye natulingisa linga tutantekeye kavumbi ka Njambi, kaje tuli nakuyoyelamo hano. Kaha tulinakulipamba ha kutsiliela kua vumpau vua Njambi.

³ Keti lika ovio vuno honi tuli nakulipamba ha tuyando tuetu, omuo tunatantekeya ngueto tuyando tusholola lukakateya,

⁴ kaha lukakateya lupuisa linga muntu apue ua vilinga viacili, kaha evi vilinga vineha kutsiliela.

⁵ Kaha kutsiliela eci kucasa kutuvuisa shuamua, omuo Njambi netila cizango cendi mu mitima yetu kuhitila mu Cimbembesi Uakulela, uje ikeye napu vuana vua Njambi kuli yetu.

⁶ Ha ntsimbu ije tuapuile tuvakuzeya, Kilistu uatsililile vaka vupi ha ntsimbu ije yahanguile Njambi.

⁷ Cinapu cuma cacikalu cikuma kuuana muntu atava kutsila muka vusunga. Cipuevene nguavo casa kupua cacasi kuuana muntu uje atava kutsila muntu uacili.

⁸ Vuno honi Njambi nasholola cizango cendi cakama kuli yetu, omo ha ntsimbu ije tuapuile tuvaka vupi kaha Kilistu uatutsililile!

⁹ Omuo ya maninga a Yesu Kilistu, vanatupuisa vaka vusunga ku mesho a Njambi, nankuma, cikahiana cikuma Kilistu kutuamena ku vutenu vua Njambi!

¹⁰ Tuapuile vitozi va Njambi, vuno honi tunapu vavusamba vendi kuhitila ha kutsa kua munendi. Kaha honi omuo tunapu vavusamba va Njambi, tukovoka ha muono ua Kilistu!

¹¹ Vuno honi keti evi lika kuahi, tujolela omuo ha vije vianalingi Njambi kuhitila muli Muene uetu Yesu Kilistu, uje hanohoni natupuisa vavusamba va Njambi.

Kutsa kuhitila muli Andama na Muono kuhitila muli Kilistu

¹² Vupi vuezile hano ha mavu kuhitila mu muntu umolika, nankuma vupi vuendi vuanehele kutsa. Kaha kutsa kuezile ku miyati yoshe ya vantu omuo voshe vanalingi vupi.

¹³ Vupi vuakele ha mavu ntsimbu kanda vahane lishiko, vuno honi kuje kukuakele lishiko, vupi kuvavutandelako.

¹⁴ Vuno honi kuhuma ku ntsimbu ya Andama nakuheta ku ntsimbu ya Mosesa, kutsa cayulile ha vantu voshe, cipue hali vaje kuvalingile vupi ngue mualingile Andama omo kononokele lishiko lia Njambi.

Andama uapuile cimueso ca uje akeja.

¹⁵ Vuno honi vuana vuje kuvuakele ngue vupi, omuo vuana vua Njambi kuvuakele ngue vupi vua Andama kuahi. Muavusunga vene vantu vavengi vanatsi omuo vupi vua muntu umolika. Vuno honi kavumbi ka Njambi kakama cikuma, kaha na vuana vuendi vuakuhona kupangela vuje vuanahana kuli vantu vavengi mu kavumbi ka muntu uje umolika, ikeye Yesu Kilistu vunapu naua vuakama cikuma.

¹⁶ Vuana vua Njambi kuvasa kuvuesekesa nge vupi vua muntu umolika. Munima ya vupi vumolika, kuezile "Kuhisa," Vuno honi munima ya vipi vi-vingi, kuneja vuana vuakuhona kupangela vuje vunaneha "Kukonkama!"

¹⁷ Muavusunga kuhitila mu vupi vua muntu umolika kutsa cayulile omuo ya uje muntu umolika. Vuno honi viuma vije vinasholoka vialingile uje muntu umolika, ikeye Yesu Kilistu vinahiana cikuma! Voshe vaje

vanatambula kavumbi ka Njambi ka miaka yoshe ya yaye vanavapuisa vaka vusunga ku mesho endi vakayula mu muono kuhitila muli Kilistu.

¹⁸ Nankuma, nge ha vupi vumolika vantu voshe vanavahisa, mu ngila eyi vene cipangi cimolika ca kukonkama cinapatula vantu voshe nakuvahana muono.

¹⁹ Kaha nge vantu voshe vavapuisile vaka vupi hakuhona kuononoka kua muntu umolika, mu ngila eyi vene voshe vakavapuisa vaka vusunga ku mesho a Njambi ha kuononoka kua muntu umolika.

²⁰ Lishiko liasholokele linga vilinga via vupi vilane, vuno honi kuje kuvualanene vupi, kavumbi ka Njambi kalanene cikuma.

²¹ Nankuma, nge omo vupi vuayulile ha kutsa, mukemo vene naua kavumbi ka Njambi kalinakuyula ha vusunga, nakututuamenena ku muono ua yaye ya yaye kuhitila muli Yesu Kilistu Muene yetu.

6

Kutsa kuhuma ku vupi vuno honi kuyoya muli Kilistu

¹ Nankuma, vikahoni tukahandeka? Nkuma tunapande kutualelelaho kuyoya mu vupi ngeci kavumbi ka Njambi kalane ndi?

² Houe keti ngoco! Tunatsi ku vupi, kaha vatihoni tuasa kuyoyelamo?

³ Omuo muavusunga munatantekeya ngueni omo vatumbuitikile hamo nuli Kilistu Yesu, vatumbuitikile mu kutsa cendi.

⁴ Kaha hakutumbuitika, tuatsile hamo nendi kaha vatutsindile hamo nendi, ngeci, ngue omo Kilistu vamusanguile ku vatsi na vumpau vua Ishe, ngeci netu tunapande kuyoyela mu muono uauha.

⁵ Omuo nga tunapu hamo nendi mu kutsa cendi, mu ngila eyi vene tukapua hamo nendi ha kusanguka cendi.

⁶ Kaha tuatantekeya ngueto vuntu vuetu vualaja vavushukikile hamo na Kilistu ha cilindakano, ngeci muvila ua vupi vaunongese, ngeci keti tupue naua tuvandungo va vupi.

⁷ Kaha omo tutsa, vatuzitula ku nzili ya vupi.

⁸ Omuo tunatsi na Kilistu, tutsiliela ngueto tukayoya naua hamo nendi.

⁹ Omuo tuatantekeya ngueto Kilistu uasangukile ku vatsi kaha kakatsi naua kuahi, kutsa kukuesi na nzili naua hali ikeye.

¹⁰ Kaha omuo ikeye uatsile, kakatsiho naua ku vupi, kaha honi alinakuyoyela muli Njambi.

¹¹ Mu ngila eivene munapande kuanuka ngueni munatsi, kuesakesa na vupi, vuno honi muli nakuyoya muli Njambi hali Kilistu Yesu.

¹² Keti mutave vupi vuyule mu mivila yeni ije kuye kuyoya yaye, mukuononoke mashungu auo.

¹³ Cipue vilio vieni keti muviecelele ku vupi mukuvipangesa mu viuma via kuhenga-henga vuno honi likundikeni kuli Njambi, ngue vantu vaje vavahumisa ku kutsa nakuvaneha ku muono, kaha kundikeni vilio vieni vioshe kuli Njambi ngeci vavipangesa mu viuma via vusunga.

¹⁴ Omuo vupi kuvuapandele ku miyula kuahi, omuo kumuesi nakuyoya ku Lishiko lia Mosesa kuahi vuno honi, mu kavumbi ka Njambi.

Vandungo va vusunga

¹⁵ Vatihoni tuhandeka? Nkuma tunapande kulinga vupi, omuo kutuesi ku Lishiko lia Mosesa vuno honi tuli mu kavumbi ka Njambi ndi? Houe keti ngoco.

¹⁶ Muavusunga muatantekeya ngeci omo mulikundika yeni vavenia ngue vandungo kukuononoka muntu umo, munapu mu vandungo va uje muene

imuli nakuononoka, cipue ku vupi vuje vuneha kutsa, cipue hakuononoka, kuje kuneha kumipuisa vaka vusunga ku mesho a Njambi.

¹⁷ Vuno honi tutsatsela kuli Njambi! Omuo cipue laja muapuile mu vandungo va vupi, muononoka na mitima yeni yoshe mu vusunga vuli mu vilongesa vije vimuatambuile.

¹⁸ Kaha vamipatuile ku vupi, munapu vandungo va vusunga.

¹⁹ (Njilinalikuluasesa mezi amasi kuuakuata omuo kuzeya kua mitima yeni ya vuntu.) Kaha ha ntsimbu imo mualikundikile vutuntu kupua vandungo va viuma via mazilo na kapenga. Kaha mu ngila eyi vene hano vene munafuila kulikundika muvambutunu kupua vandungo va vusunga ngeci mulinge viuma via kulela.

²⁰ Omo muapuile vandungo va vupi, kumuapatukile ku vusunga.

²¹ Vuno honi vikahoni muauaneneho hakulinga viuma vije vimuli nakuivuila shuamua? Fuetu ya viuma vije inapu kutsa!

²² Vuno honihoni vanamipatula ku vupi, kaha munapu vandungo va Njambi linga mulele kaha mukale na muono uayaye.

²³ Kaha omuo fuetu ya vupi inapu kutsa, vuno honi vuana vua Njambi vunapu muono uayaye muli Kilistu Yesu Muene yetu.

7

Cimueso ca vulo

¹ Vavusamba vange, mua vusunga muasa kuvuisisa evi vinjihandeka kuli yeni, omuo yeni voshe muatantekeya Lishiko lia Mosesa. Lishiko lia Mosesa lili na nzili hali vantu omo valinakuyoya lika.

² Mpuevo uakushomboka vanamukutu na Lishiko kuli yala liendi, omo yala liendi ali nakuyoya, vuno honi nga yala liendi atsa, kaha honi uje mpuevo napatuka ku Lishiko lije lia mukutile kuli yala liendi.

³ Kaha nga uje mpuevo akala na yala ueka naua omo yala liendi acili na kuyoya, kaha vamuhandeka nguavo muka vupangala, vuno honi nga yala liendi atsa, kaha akashomboka kuli yala ueka naua, ou mpuevo napatuka kapu naua muka vupangala.

⁴ Vavusamba vange, neni naua cifua cimo, neni naua mu natsi ku lishiko omuo munapu vilio via muvila ua Kilistu, kaha honi munakundama kuli ikeye, uje ivasanguile ku vatsi linga tupangele Njambi vipangi viacili.

⁵ Omuo tuayoyele mu vusitu, mashungu a vupi aje Lishiko lia Mosesa liashangumuine akele nakupanga mu mivila yetu, kaha vioshe vitualingile viatutuelele ku kutsa.

⁶ Vuno honi, tunapatuka ku Lishiko lia Mosesa, omuo tuatsile ku cije catupuisile vinzinda. Kutuesi naua nakupanga mu ngila ya laja ya Lishiko lia Mosesa lia kusoneka, vuno honi mu ngila yaiha ya Cimbembesi.

Lishiko lia Mosesa na vupi

⁷ Kaha honi, tunapande kuhandeka ngueto Lishiko likelio liapua vupi ndi? Houe keti ngoco! Vuno honi liapuile Lishiko lije lianjilingisile linga njitantekeye vupi. Nga Lishiko lia Mosesa kuliahandekele ngualio, "Keti uliveyele cuma ca mukueni," Nga ku njatantekeyele lishungu eli.

⁸ Vuno honi vupi vua uanene muhela mukushangumuna mashungu a vupi amengi muli yange. Nga Lishiko liahi, nga vupi kuvuesi na nzili.

⁹ Nange vene ha ntsimbu imo njayoyele kuakuhona Lishiko, vuno honi omo lishiko liezile, vupi vuakele na nzili,

¹⁰ kaha njatsile. Kaha Lishiko lije liapandele kuneha muono, lianehele kutsa kuli yange.

¹¹ Kaha vupi vuauanene muhela, kaha mu nzili ya lishiko vupi vuanjikuisile na kunjitsiha.

¹² Kaha Lishiko lia Mosesa likelio liapua lia kulela, naua na Lishiko liapua lia kulela na vusunga vua cili.

¹³ Vuno honi nkuma eci calumbunuka ngeci cije cacili cikeco canehela kutsa kuli yange ndi? Keti ngoco kuahi! Eci calingiuile omuo vupi, hakupangesa cije cacili, vupi vuanehele kutsa kuli yange, linga cifua cavuo cisholoke ngeci mua vusunga vunapu vupi. Kaha mu nzili ya lishiko vupi vunasholoka kupua vua vupi cikuma.

Nzita mukati ketu

¹⁴ Tuatanekeya nguetu Lishiko lia Mosesa liapua liakucimbembesi, vuno honi yange njinapu muntu ua muvila ua ntsitu, uakulandesa ngue ndungo ku vupi.

¹⁵ Kunjitantekeya vinjilinga, omuo kunjekulinga vije vinjitonda kulinga, vuno honi njikalingi vije njazinda.

¹⁶ Kaha omo nga njilinga vije kunjatondele kulinga, eci njimuesa nguange Lishiko lia Mosesa linapu lia vusunga.

¹⁷ Kaha keti yange vene mua vusunga njili nakulinga viuma evi, vuno honi vupi vuje vuli nakuyoya muli yange.

¹⁸ Omuo njatantekeya nguange kumuesi vucili muli yange, mu vuntu vuange. Cipue muli yange muli lishungu liakulinga via cili, vuno honi ku njasa kuvilinghamo.

¹⁹ Omuo kunjekulinga vucili vuje vunjikatondo kulinga, vuno honi njikalingi vupi vuje kutualelelaha.

²⁰ Nga njilinga cije kunjatondele kulinga, eci cinalumbunuka ngeci keti yange njilinakucilinga, vuno honi vupi vuje vuli muli yange vukevuo vulinakucilinga.

²¹ Kahavene, njinauana nguange Lishiko lia Mosesa eli lilinakupanga, omo njitonda kulinga via cili, kaha haje vene vupi vusholoka.

²² Omuo njivuahelela mu Lishiko lia Njambi mukati ka mutima uange.

²³ Vuno honi njimona Lishiko lieka lilinakupanga mu muvila uange, Lishiko lije lilinakuluisa Lishiko lije linjinatsiliela mu mutima uange. Linanjipuisa cinzinda ca Lishiko lia vupi lije vulinakupanga mu muvila uange.

²⁴ Yangе muntu uakuvindama! Iya honi akanjamena ku muvila ou unjituala ku kutsa?

²⁵ Kutsatselala kuli Njambi hali Muene uetu Yesu Kilistu!

Kaha, mukemuo munjinafu, nge lika njasa kupanga Lishiko lia Njambi na mutima uange lika, vuno honi vuntu vuange vupangela Lishiko lia vupi.

8

Muono mu Cimbembesi

¹ Kukuesi cihiso kuli vaje vali na kuyoya muli Kilistu Yesu.

² Kaha omuo Lishiko lia Cimbembesi, lije litunehela muono muli Kilistu Yesu, linanjipatula ku lishiko lia vupi na kutsa.

³ Njambi ualingile vije lishiko lia Mosesa liahonouele kulinga. Omuo vuntu vuakele vua kuzeya, Uahisile vupi mu vuntu hakutuma Munendi, uje uezile mu cifua ngue cetu ca vuntu, mukuhumisa vupi.

⁴ Njambi uapangele eci ngeci vilinga via vusunga via Lishiko lia Mosesa vavishulise muli yetu vaje vavali nakutuamenena mucimbembesi, keti mu vuntu kuahi.

⁵ Kaha omo vaje vanapu vaka vuntu, vayongola viuma via vuntu, vuno honi vaje vanapu vaka Cimbembesi, vayongola viuma via Cimbembesi.

⁶ Nga cizango ca vuntu cikutuamenena, kaha fueto yaco kutsa vuno honi nga cizango ca Cimbembesi cikutuamenena, kaha fueto yaco inapu muono na ciyulo.

⁷ Muntu uje akatonda via vuntu akempuka citozi ca Njambi, omuo akaviana kukavangeya mashiko a Njambi, muavusunga vene kaha akavangeya.

⁸ Kaha voshe vaje vali nakuvatuamenena ku vuntu kuvasa kuvuahelesa Njambi.

⁹ Kumuekuyoya nge muje vuntu vutonda linga muyoyemo, vuno honi muyoya ngue muje Cimbembesi mucitondelahamo, nga Cimbembesi ca Njambi cikala muli yeni. Uoshe uje kesi na Cimbembesi ca Kilistu, kaha kakundama kuli Kilistu.

¹⁰ Vuno honi nga Kilistu ali muli yeni, cipue mivila yeni inapu ya kutsa omuo vupi, vuno honi vimbembesi vieni vilinakuyoya muli yeni omuo vanamipuisa vaka vusunga ku mesho a Njambi.

¹¹ Nga Cimbembesi ca Njambi, cije casanguile Yesu ku vatsi, cikala muli yeni, kaha uje uasanguile Kilistu ku vatsi ikeye naua akahana muono ku mivila yeni ya kutsa ha Cimbembesi cendi cije cili muli yeni.

¹² Kaha vavusamba vuange, kutuapandele ngue kuyoyela mu vuntu ngue muvuatonda vuntu vuetu kuahi.

¹³ Kaha nga muyoya ku vupi vua vuntu mukatsa, vuno honi nga ku Cimbembesi mutsihia vilinga via muvila ua vupi vua vuntu, kaha mukayoya.

¹⁴ Omuo voshe vaje Cimbembesi ca Njambi cilinakuvatuamenena vanapu vana va Njambi.

¹⁵ Kaha Cimbembesi cije canamihana Njambi camipuisile mu vandungo linga mukale na liova, vuno honi Cimbembesi cije scinamipuisa vana va Njambi, kaha na nzili ya Cimbembesi tulinakutambeka kuli Njambi ngueta, "Abba! Tatetu!"

¹⁶ Cimbembesi ca Njambi calintavasana na Cimbembesi cetu ngeci tu vana va Njambi.

¹⁷ Omuo tu vana va Njambi, tukatambula vikuisulo vije Njambi natulikila vantu vendi, kaha naua tukatambula muli Kilistu vije vianamutulikila Njambi, omuo tuyanda hamo na Kilistu, kaha naua tukakala hamo nendi mu vumpau vuendi.

Vumpau vua kulutue

¹⁸ Yange njasinganieka nguange tuyando otu tutulinakuyanda ntsimbu ino kutuasa kutuseteka na vumpau vuje vukasholoka kuli yetu.

¹⁹ Nankuma, viakutanga vioshe vili na cizango cakama cakuvandamena Njambi ngeci asholole vana vendi.

²⁰ Omuo viakutanga vioshe vavihisile ngeci vipue viuma viangoco, keti ngue ku cizango cavio kuahi, vuno honi capuile cizango ca Njambi linga cipue ngacije. Vuno honi cipue ngocovene kuakele kutsiliela

²¹ nga viakutanga ku litangua limo vikapatuke ku vundungo vua kutsa, kaha vukakale na vumpau vuakupatuka kua vana va Njambi.

²² Omuo tutantekeya ngueta kuheta na ku ntsimbu ino, viakutanga vioshe vili nakulikemanga ngue mpuevo uje atonda kusema.

²³ Vuno honi keti viakutanga lika vilinakulikemanga kuahi, netu naua tuli na Cimbembesi ngue vaje vakulivanga kupua vana va Njambi ngeci atupuisse vana vendi nakupatula mivila yetu.

²⁴ Omuo tunovoka muafua ha kutsiliela, vuno honi kutsiliela kuje kutumona kukeko keti kutsiliela, nkuma iya honi ali nakutsiliela vije vianamono?

²⁵ Vuno honi nga tuli na kutsiliela vije kutuamuene, kaha hanga tucivandamena nakusimpa.

²⁶ Mu ngila iyivene Cimbembesi citukuasa mukuzeya kuetu. Omuo kututantekeya muje vati tunapande kulombela vuno honi Cimbembesi cikeco cikalambelega kuli Njambi na mezi akulikemanga aje kutuasa kutumbula.

²⁷ Kaha Njambi uje amona mu mitima yetu, atantekeya muviafua visinganika via Cimbembesi omuo Cimbembesi cikalambelega kuli Njambi hali vantu vendi ngue ku cizango cendi.

²⁸ Tutantekeya ngueta mu viuma viose Njambi akalingi muacili na vaje vamuzanga, kaha navaje vanasana ku cizango cendi.

²⁹ Kaha vaje vahanguile Njambi vakevo naua vatepele kuvapuisa ngue Munendi, linga Munendi apue uakulivanga kusemuka ha vavengi vakakutsiliela.

³⁰ Kaha vaje vatepele Njambi, vakevo vasanene, kaha vaje vasanene, uavapuisile vaka vusunga ku mesho endi, kaha vaje vapuisile vaka vusunga ku mesho endi vakevo vahanene vumpau vuendi.

Cizango ca Njambi muli Kilistu Yesu

³¹ Kaha ha viuma viose evi, tukahandeka vatihoni? Nga Njambi napu uetu, kaha iya honi asa kutuluisa?

³² Njambi kavianene kuhana munendi umo lika, vuno honi uatueceleleye yetu voshe! Uje uatuhanene Munendi, nkuma kasa kutuhana viuma viose ndi?

³³ Kaha iya honi asa kuvangeya vaje vanahangula Njambi? Njambi ikeye muka kuvapuisa vusunga.

³⁴ Kaha iya asa kuvahisa? Keti Kilistu Yesu, uje uatsile, cipue uje ivasanguile ku vatsi kaha ali ku livoko lia cilio lia Njambi, mukutulambelega kuli Njambi!

³⁵ Kaha iya asa kutuhangununa ku cizango ca Kilistu? Tuyando cipue vukalu, cipue mapakeso cipue njala cipue kuhutuua, cipue vushonde, cipue kutsa ndi?

³⁶ Nge muvanasoneka mu visoneka nguavo,
 “Omuo ya lizina liove tuli muvushonde vua kutsa ntsimbu yoshe,
 valinakutupangesa ngue vampanga vaje vava mukuvatsihia.”

³⁷ Houe, mu viuma viose yetu tunahiana muli ikeye uje uatuzangele!

³⁸ Omuo njatantekeya nguange mua vusunga nacimo cahi casa kutuhumisa ku cizango ca Njambi, cipue kutsa cipue muono, cipue tungelo cipue vaka kusuna cipue vaka nzili vaje vakala muilu, cipue ku ntsimbu ino vene cipue ku ntsimbu ya kulutue,

³⁹ cipue cuma cili muilu, cipue cuma cili ha mavu, nacimo cahi cakutanga casa kutuhumisa ku cizango ca Njambi cije cinapu cetu muli Kilistu Yesu Muene yetu.

9

Njambi na vantu vendi

¹ Njihandeka vusunga muli Kilistu Yesu, kaha kunjesi nakuhandeka makuli. Visinganika viange lelo vilinakuambulula hamo nange hali Cimbembesi Uakulela,

² kaha omo njikahandeka nguange njili na vusua vuakama cikuma, nakuvavala kuje kukuasa kuhua mu mutima uange,

³ njayonguele nguange njakele mu cisingo ca Njambi na kulitepa kuli Kilistu omuo ya vantu vange.

⁴ Kaha ava vanapu vaka Isaleli, vaje Njambi uapuisile vana vendi mukuvasholueta vumpau vuendi, ualingile litavasano navo nakuvahana Lishiko lia Mosesa, vakalemesa mu njivo ya Njambi, kaha vakatambula vikulaheso via Njambi.

⁵ Kaha vanapu vatekuluila va vakukuluila vakutsimana, na Kilistu mu vuntu vuendi, nakundama ku cisemua cavo. Njambi uje muka kuyula viuma vioshe, vamushangazalele miaka yoshe! Amen.

⁶ Kunjesi nakuhandeka nguange cikulaheso ca Njambi cinahonoua, omuo keti vantu voshe va Isaleli vapua vantu va Njambi.

⁷ Ketu voshe vatekuluila va Avilahama vapua vana va Njambi kuahi. Vuno honi Njambi uahandekela kuli Avilahama nguendi, "Kuhitila muli Isake mukemuo lika mukakala na vatekuluila vaje njamikulahesele."

⁸ Eci calumbunuka ngue vana vaje vasemuka ku cisemua ca vuntu keti vana va Njambi, vuno honi vantu vaje vanasemuka omuo cikulaheso ca Njambi vakevo vavatumbula vatekuluila va vusunga.

⁹ Cikulaheso ca Njambi calishulisile ha mezi aua nguaco, "Ha ntsimbu ino vene mungolosika njikahiluka naua, kaha Sala akasema muana ua yala."

¹⁰ Kaha keti eci lika kuahi. Vuno honi omuo vana va Lambeka va vamala vakele na ishavo umolika, ikeye kukuluila yetu Isake.

¹¹ Omo kanda vaje vampa vasemuka naua te kanda valinge viacili cipue viavipi, linga cizango ca Njambi cakuhangula citualeleho,

¹² kaha Njambi ualekele Lambeka nguendi, "Mukuluntu akapangela shongo yendi."

¹³ Nge muvanasoneka mu visoneka nguavo, "Njazangele Yakomba, nakuzinda Isau."

¹⁴ Vikahoni tuhandeka? Nkuma Njambi uakahangu ndi? Houe keti ngoco.

¹⁵ Kaha Njambi uahandekela kuli Mosesa nguendi, "Njikovuila cikeketima hali uoshe uje njikazanga, kaha njikevuila ngozi hali uoshe uje injitonda kuivuila ngozi."

¹⁶ Kaha viuma vioshe kuvikundama kuli vije viatonda muntu cipue vije vialinga kuahi, vuno honi ha cikeketima ca Njambi lika.

¹⁷ Nge muvanasoneka mu visoneka nguavo Njambi uahandekela kuli muene ua Ingito nguendi, "Njakupuisile muene linga njikupangese mukusholola nzili yange nakunjitsimanesa mu lifuti lioshe."

¹⁸ Kaha honi, Njambi ali na cikeketima hali uoshe yatonda, kaha akaluuia mitima ya uoshe uje yatonda.

Vutenu vua Njambi na Cikeketima cendi

¹⁹ Kaha nga umo ueni akanjihula nguendi, "Nga omu mukemo mucinafu, kaha Njambi asa kutupaya vati? Iya asa kuviana cizango ca Njambi?"

²⁰ Kaha yove iya kavusamba kange, linga ulikumbulule na Njambi? Ndeho ya vuma kuyasa kuhula muntu uje uaishongele nguayo, "Nkuma vika uanjimungila muje?"

²¹ Nkuma uje muka kushonga vindeho kesi na nzili yakupangesa vuje vuma muoshe muatondela ndi? Nkuma kasa kushonga vindeho vivali ha

cipama cimolika ca vuma, ndeho imo yakupangesa viuma via seho, kaha ndeho ikuavo yakupangesa viuma viangoco ndi?

²² Kaha eci cinapu cavusunga ha vije vianalingi Njambi. Njambi uatondele kumuesa vukalu vuendi nakumuesa nzili yendi. Vuno honi uasimpile nakuyanda hali vaje uatalele na vukalu, vaje uafuililele kunongesa.

²³ Kaha naua Njambi uatondele kumuesa vumpau vuendi vuakama, vuje vuamuanieni hali yetu vaje amuesa cikeketima, yetu vaje vanavuaheha linga tutambule vumpau vuendi.

²⁴ Kaha omuo tunapu vana vaje vanasana, keti lika hhakati ka Vayunda kuahi, vuno honi naua na hhakati ka vaje keti Vayunda.

²⁵ Kaha evi vikevio Njambi uahandekela mu livulu lia Hosiya nguendi, "Vantu vaje kuvapuile vange
Njikavasana 'Vantu vange.'
vantu vaje kunjazangele
Njikavasana nguange, 'vanjazanga.'

²⁶ Kaha ku cihela kuje kuvavalekele nguavo, 'Keti mu vantu vange,'
Kuje vakavasana nguavo vantu va Njambi ua kuyoya."

²⁷ Kaha Isaya uahandekela hali vaka Isaleli nguendi, "Cipue vantu va Isaleli vanalana nge museke ua ku cikuma ca mema a kalunga, vuno honi vavandende lika vakovoka.

²⁸ Omuo Njambi akasompa vuasi vuasi vantu voshe va hano ha mavu ntsimbu imolika nakumanusula."

²⁹ Ngue muje muahandekela Isaya ha kulivanga nguendi, "Nga Njambi muka nzili yoshe nge katusezeleleko vatekuluila, nge tunapu ngue Sondoma na Ngomola."

Muzimbu Uacili na Isaleli

³⁰ Kaha vikahoni tukahandeka? Tukahandeka ngueto vaje keti Vayunda vaje kuvalipuisile vakevo vavenia vaka vusunga ku mesho a Njambi, vavapuisile vaka vusunga ku mesho endi ha lutsilielo,

³¹ te kanda vantu va Njambi vaje vatondele Lishiko lia Mosesa linga livapuisse vaka vusunga ku mesho a Njambi, kuvaliuanene.

³² Kaha omuo vikahoni? Omuo kuvajendamenene ha lutsilielo vuno honi hali vije vivalingile. Kaha vatsutsukile ha "livue lia kutsutsukisa."

³³ Nge muvanasoneka mu visoneka nguavo,
"Tala njikahaka livue mu Siyone

Lije likatsutsukisa vantu,

Livue lije likavauisa.

Vuno honi uoshe uje atsiliela kuli ikeye kakovu shuamua."

10

¹ Vavusamba vange, vinjitonda cikuma mu mutima uange na lilombelo liange kuli Njambi vinapu vantu vange vovoke!

² Yange njinapu mukaleho uavo omuo vakevo vapua vakakulihana cikuma kuli Njambi, vuno honi kulihana kuavo keti kua mana avusunga.

³ Omuo kuvatantekeyele ngila ije yakapuisa Njambi vantu linga vapue vakavusunga ku mesho endi, vuno honi vakevo vaneseka kupangesa ngila yavo vavenia, ngeci, kuvaliuanene vakevo vavenia ku ngila ya Njambi ije yakapuisa vantu linga vapue vaka vusunga.

⁴ Muafua Kilistu ikeye mamanusuluilo a Lishiko lia Mosesa, linga uoshe uje atsiliela vamupuisse muka vusunga ku mesho a Njambi.

Kuovoka cinapu ca voshe

⁵ Mosesa uasonekele evi hakupuisa muntu linga apue muka vusunga ku mesho a Njambi ha kuononoka Lishiko nguendi, “Uoshe uje ononoka Lishiko akayoya.”

⁶ Vuno honi visoneka vihandeka hakupua muka vusunga ku mesho a Njambi ha lutsilielo vikevio evi nguavio, “Keti ulihule yove vevenia nguove, iya honi akalonda mulu?” (Cinapu ngue uli nashulisa Kilistu ha mavu).

⁷ “Cipue keti ulihule yove vavenia nguove iya akaya ku vukalo vua vaka kutsa?” (Eci cinapu ngue uli nakuhumisa Kilistu ku kutsa).

⁸ Evi vinjili nakuhandeka vikevio evi, “lizi lia Njambi lili muyehi neni, lili kukanua kove na mu mutima uove” likelio, lizi lia lutsilielo lije tuli nakuambulula.

⁹ Nga ulitavela na kanua kove nguove Yesu ikeye Muene nakutsiliela mu mutima uove nguove Njambi uamusanguile ku vatsi, ukovoka.

¹⁰ Muafua ha lutsilielo luetu mukemo vanatupuisa vaka vusunga ku mesho a Njambi, hakulitavela kuetu mukemo tunovoka.

¹¹ Nge muvanasoneka mu visoneka nguavo, “Uoshe uje akatsiliela muli ikeye kakevu shuamua.”

¹² Omuo eci njinahandeka ha vantu voshe omuo kukuesi kuhangula hhakati ka Vayunda na Vangelengu, Kilistu ikeye Muene ua voshe, ikeye akakuisula cikuma voshe vaje vasana kuli ikeye.

¹³ Nge muvanasoneka mu visoneka nguavo, “Uoshe uje akasana lizina lia Muene mukumukuasa akovoka.”

¹⁴ Vuno honi vatihoni vakasana kuli ikeye linga avakuase nga kuvat-silielege? Kaha vati vakatsiliela nga kuvovuile lizi? Kaha vatihoni vakevua lizi nga kuvaliambulule?

¹⁵ Kaha vakambulula vatihoni lizi nga tunganda kuvavatumine? Nge muvanasoneka mu visoneka nguavo, “Cinapu cakuvuahelele cikuma omo tunganda vakeja nakuneha muzimbu uacili!”

¹⁶ Vuno honi keti voshe vanatambula muzimbu uacili. Isaya vavenia alinakuhandeka nguendi, “Muene, iya uatsilielege vije vivovuile kuli yetu?”

¹⁷ Kaha lutsilielo lukahumu hakuivua lizi, kaha na kuivua lizi likahumu hakuambulula via Kilistu.

¹⁸ Vuno honi njihula nguange, muavusunga nkuma kuvovuile lizi ndi? Cilivene valiuvuile, omuo nge muvanasoneka mu visoneka nguavo,

“Mutambi ua lizi liavo uashandokelele mu lifuti lioshe,

Majui avo ahetele naku ntongo ya mavu oshe.”

¹⁹ Kaha njihula naua nguange, nkuma vantu va Isaleli kuvevuisisile ndi? Mosesa ikeye vavenia uapuille uakulivanga kukumbulula nguendi,

“Njikapangesa vaje keti Vayunda vaje kuhona seho

linga vantu vange vakevua cipululu,

Njikapangesa vaje keti Vayunda vakuhona mana

linga vakanienguese vantu vange.”

²⁰ Kaha Isaya nakusimpa uahandekela nguendi,

“Vanjiuanene vaje kuvanjitondele,

njasholokele kuli vaje kuvanjihuile.”

²¹ Kaha Isaya uahandekela naua hali vaka Isaleli nguendi, “Ntsimbu yoshe njikolola mavoko ange mukutambula vantu vaje vakuhona kuononoka nava vaka kutengulukila.”

¹ Kaha njihula nguange, nkuma Njambi naviana vantu vendi ndi? Houe keti ngoco! Nange vene njapua njika Isaleli, mutekuluila ua Avilahama, uaku muyati ua Mbenjamine.

² Njambi kavianene vantu vendi, vaje vahanguile kuhuma ha mbangelo. Yeni muatantekeya nge muvanasoneka mu visoneka mu mutambela uje uhandeka hali Eliya uje ualamblelele Njambi hali vaka Isaleli nguendi,

³ “Muene, vanatsihi tunanguizi va Njambi vove, kaha vanasihula mitula yove, kaha naua vali na kutonda kunjitsiha.”

⁴ Kaha Njambi uamukumbuluile nguendi, “Njalitumbikila vamala vakupua makulukazi atanu na avala (7 0 0 0) vaje kanda valemese kamponia ka mbale.”

⁵ Nankuma, cinapu cuma cimo vene, vuavuno kuli civunga ca cindende ca vantu vanasalaho vaje vahanguile Njambi omuo ya kavumbi kendi.

⁶ Kuhangula cendi cinajendamena ha kavumbi kendi, keti ngue ha vije vivanalingi kuahi. Omuo nga kuhangula ca Njambi caya ngue kuli vije vivanalingi vantu, nge kavumbi kendi kukapuile kavusunga.

⁷ Vikahoni vantu va Isaleli kuvauanene cije vakele nakutonda. Capuile lika civunga cacindende ca vantu vaje vahanguile Njambi vakevo vaciuanene, kaha vaje vasaleleho vapuile tusinda-matuitui kukusana ca Njambi.

⁸ Nge muvanasoneka mu visoneka nguavo, “Njambi navahana cimbembesi cakuhona kulitavasana, mesho akuhona kumona na matuitui akuhona kuvua nakuheta kuli litangua lialelo.”

⁹ Kaha Ndavit ahandeka nguendi,
“Viuno viavo vipue miheto yavo, kaha vatsemo
vanapande kuua, vanapande kuvazangamesa!

¹⁰ Mesho avo apue a vupuputua linga keti vamone,
kaha vakotame miongo yavo mu tuyando tuavo ntsimbu yoshe.”

¹¹ Nankuma njihula nguange, omo Vayunda vatsutsukile, nkuma vauile nakunonga ndi? Houe keti ngoco! Omuo valingile vupi, kuamena kuneja kuli vaje keti Vayunda linga Vayunda vavovuile cipululu.

¹² Kaha vupi vua Vayunda vuanehele vikuisulo viakama ha mavu, kaha kuhutua kuavo kua mu Cimbembesi kuanehele vikuisulo viakama kuli vaje keti Vayunda. Ambahoni omu mukemo vikuisulo viakama cikuma omo vuingi vua Vayunda vanalivuezelela!

Kuamena kuli vaje keti Vayunda

¹³ Njili nakuhandeka honi kuli yeni vaje keti Vayunda. Njilinakulihalesa mu vipangi viange omuo njapua nji kanganda keni vaje keti Vayunda.

¹⁴ Hamo njasa kulingisa vantu vaku muyati uange cipululu, linga njihase kuamenako vamo.

¹⁵ Omuo vavavianene, kaha vantu vamo vavatenguluile linga keti vapue vitozi va Njambi, vuno honi vapue vavusamba va Njambi. Cikapua vatihoni omo vanavatambula? Cikapua ngue muono kuvakakutsa!

¹⁶ Nga mbazuvuila yakulivanga ya mbolo vaihana kuli Njambi, nankuma, namukasha uoshe uamutuntu unapu uendi naua, nga mizi ya muti vaikombela kuli Njambi, kaha na mintango naua inapu yendi.

¹⁷ Vuno honi nga mintango imo ya ku muti ya olive yakukuna vana kuhojola, kaha muntango ua olive ua mu musenge vanainungiyako. Kaha yeni keti Vayunda munapu ngue muti uamumusenge ua olive, kaha honi mulipangela cimbembesi ca vuyoye vua Vayunda.

¹⁸ Nankuma, kumuapandele kuyengula vaje vavahojuele ngue mintango. Vatihoni muhasa kulihalesa? Yeni munapu lika mu mintango, kumue kukuata mizi, vuno honi mizi ikeyo ili nakumikuata.

¹⁹ Vuno honi muhandeka nguenu, "Eyo, vuno honi ije mintango vahojuele linga vanjinungileko yange."

²⁰ Eci cinapu ca vusunga. Vavahojuele omuo kuvatsilielele, vuno honi yeni muatutamene mumuhela ueni omuo munatsiliela. Vuno honi keti mulihalese ha visinganieka evi, munapande kulikolesa kaha mukale na liova.

²¹ Nga Njambi katetela Vayunda vaje vanapu ngue mintango ya cisemua, kaha musinganieka nguenu akamitetela ndi?

²² Hano tumona ngozi ya Njambi nakukaluua cendi. Ikeye napu uakukaluua kuli vaje vanau, vuno honi napu muka ngozi kuli yeni nga mutualelaho mu ngozi yendi. Vuno honi nga kumulingi ngoco, kaha neni naua vakamihojolako.

²³ Nga Vayunda vakaputuka kutsiliela naua, kaha vakavahiluisila naua mumutambela muje muvakele, omuo Njambi asa kulinga ngacije naua.

²⁴ Yeni keti Vayunda munapu ngue muntango ua muti ua olive uamu musenge uje uvanahojola, kaha ngue keti mucifua cauo, vuno honi vanaunungila ku muti ua olive uakukuna. Vayunda vanapu ngue uje muti uakukuna, kaha cikapua cacasi cikuma kuli Njambi kunungilako eyi mintango ivanajokuele ku muti uayo naua.

Cikeketima ca Njambi ku vantu voshe

²⁵ Vavusamba vange kuli vusunga vuakushuekesa vuje njitonda linga mutantekeye, omuo vukamivindika kusinganieka nguenu munapu vakuzangama. Okukukaluua kua mitima yeni vantu va Isaleli keti ngue ku miaka yoshe kuahi, vuno honi kukakalako lika noho vaje keti Vayunda vanapumo kuija kuli Njambi.

²⁶ Omu mukemo vantu va Isaleli voshe muva kavamena. Nge muvana-soneka mu visoneka nguavo, "Muyoyesi akahuma ku Siyone, kaha akahumisa vupi vuoshe kuvatekuluila va Yakomba.

²⁷ Kaha njikalitavasana navo litavasano eli omo njikahumisa vupi vuavo."

²⁸ Omuo vanaviana Muzimbu Uacili, kaha ava Vayunda vanapu vitozi va Njambi omuo yeni keti Vayunda. Vuno honi omuo kuhangula ca Njambi vanapu vavusamba vendi omuo hali vakukuluila vavo.

²⁹ Omuo Njambi kekutengulula visinganieka viendi kuli vaje nahangula na kukuisula.

³⁰ Ngue hali yeni keti Vayunda, kumuononokele Njambi ku senkulu, vuno honi vuavuno munatambula cikeketima ca Njambi omuo hakuhona kuononoka ca Vayunda.

³¹ Mucifua cimo vene, omuo ya cikeketima cimunatambula, Vayunda honi kuvesi nakuononoka Njambi linga navakevo vatambule cikeketima ca Njambi.

³² Omuo Njambi napuisa vantu voshe vinzinda vakuhona kuononoka, linga amuese cikeketima kuli voshe.

Kushangala Njambi

³³ Vufuko vua Njambi vuapua vuavuingi cikuma! Kutantekeya cendi na mana endi viapua viakulova cikuma! "Iya honi asa kulumununa matumbe endi?"

³⁴ Nge muvanasoneka mu visoneka nguavo,

"Iya honi atantekeya mana a Muene?

Iya honi asa kumunangula?"

³⁵ "Cipue iya honi uamuhanene cuma cimo

linga amuhiluisile fueto?"

³⁶ Omuo ikeye uatangele viuma vioshe, kaha viuma vioshe vilinakuyoya muli ikeye nahali ikeye. Kuli Njambi kukale vumpau ku miaka yoshe ya yaye! Amen.

12

Vuyoye mukupangela Njambi

¹ Nankuma, vavusamba vange, omuo cikeketima ca Njambi cakama cikuma kuli yetu, njimilambelega nguange, lihaneni yeni vavenia kuli Njambi ngue cikombelo cakuyoya, likundikeni kuvipangi viendi nakumu-vuahelesa. Okukukeko kulemesa kua vusunga kuje munapande kulinga.

² Keti mulipuisse ngue mu vantu vahano ha mavu, vuno honi ece- leni Njambi atengulule visinganieka via mu mitima yeni. Ambahoni mukatantekeye cizango ca Njambi, vije viacili nevi vimuvuahelesa nevi via kusungama.

³ Omuo vuana njinatambula vua kavumbi ka Njambi, njihandeka kuli yeni voshe nguange, keti musinganieke yeni vavenia kupua vakama cikuma kupulakana muje mumunafu. Vuno honi, muapande kulikehesa muvisinganieka vieni, lhiluleni yeni vavenia ngue ku lutsilielo lueni luje luanamihana Njambi.

⁴ Tuli navilio viavingi mu muvila umo, kaha cimo na cimo cili navipangi viaco.

⁵ Mucifua cimo vene, cipue tunapu tuvavengi, tunapu muvila umolika muli Kilistu kaha yetu voshe vanatunungu kuvilio via muvila umolika.

⁶ Nankuma, tunapande kupangesa vuana vuetu vuakuliseza-seza ngue ku kavumbi ka Njambi, kaje natuhana. Nga vuana vuetu vunapu vuakuam- bulula vunanguizi, kaha tunapande kuambulula vunanguizi kuya ngue nalutsilielo luetu tuli naluo,

⁷ nga vuakupangela, kaha tunapande kupanga vene, nga vuakulongesa, tulungeseni vene,

⁸ nga vuakukolesa vakuetu, kaha tunapande kulinga ngoco vene. Uoshe uje mukakuhana vakuavo napande kuhana na mutima umo, kaha uje uoshe muka nzili napande kupanga cikuma na nzili, uoshe uje amuesa ngozi kuli vakuavo napande kucilinga nakuvuahelela.

Vipangi via Cizango

⁹ Cizango cinapande kutungukua. Zinden viuma vioshe vije vinapu viavipi, kakateyeni kuli vije viacili.

¹⁰ Lizangeni umo na mukuavo, kaha lisingimikeni umo na mukuavo.

¹¹ Nankuma pangeni cikuma na nzili keti mupue vilenda. Pangeleni Muene nakulihakako na mutima uoshe.

¹² Vuaheleleni mukutsiliela kueni, pueni vaka ku simpa mutuyando tueni, kaha lombeleni ntsimbu yoshe.

¹³ Lipangezeleni vije mulinavio navakueni vaka Yesu vaje vana honoua, tambuleni vangenzi mu vinjivo vieni.

¹⁴ Vezikiseni vaje valinakumiyandesa, eyo, vavezikiseni, kaha keti mu- vasinge kuahi.

¹⁵ Vuaheleleni navaje valinakuvuahelela, lileni navaje vali nakulila.

¹⁶ Yoyeni mulitavasano umo na mukuavo. Keti mulihalese, vuno honi likeheseni muvipangi. Keti musinganieke yeni vavenia ngue munapu vakakuzangama.

¹⁷ Nga umo nakupihisila, keti umuhiluisile vupi vuendi naua. Lingeni viacili ku mesho a vantu voshe.

¹⁸ Lingeni viuma vioshe ngue mumunahasela nakuyoya mu ciyulo kuli muntu na muntu.

¹⁹ Keti mulihiluisile vupi ku vupi, vuno honi eceleni vukalu vua Njambi vucilinge. Omuo visoneka vihandeka nguavio, “Yange njikahiluisila vupi, njikavahiluisila fueto yavo, muanahandeka Muene.”

²⁰ Vuno honi nge muvanasoneka mu visoneka nguavo, “Nga citozi cove ali na njala, muhane viakulia, nga ali nampuila, muhane mema anue, omuo hakulinga eci ulinakumulingisa linga evue shuamua.”

²¹ Keti mutave vupi vumihiane, vuno honi hianeni vupi na viuma viacili.

13

Kusingimika vaka nzili yakama

¹ Vantu voshe vapande kuononoka kuli vaka nzili, omuo naumo uahi asa kushika kuvanga Njambi namuhangula, kaha vaka nzili vaje valiko Njambi ikeye navahakaho.

² Nankuma, uoshe uje aluisa vaka nzili kaha naluisa na vije via nashiki Njambi, kaha uoshe alinga evi alinehela cihiso ikeye vavenia.

³ Omuo vakakulinga muacili kuvasa kuivuila liova vakakuyula, vuno honi kuvanga vaje valinga mua mupi. Yove ku uivuila liova muntu uje alina nzili yakama ndi? Nankuma linga muacili kaha na ikeye akakushangazala,

⁴ omuo vanapu vangamba va Njambi valinakumipangela viacili. Vuno honi nga ulinga mua mupi, kaha vovuile liova, omuo nzili yavo yakukuzangamesa inapu ya vusunga. Vakevo vanapu vangamba va Njambi, kaha valinakuneha kuzangamesa ca Njambi kuli vaje valinga mua mupi.

⁵ Nankuma ha cuma eci muapande kuononoka ku vaka nzili yakama, keti ngue hakuzangamesa ca Njambi lika kuahi, vuno honi naua omuo ha visinganieka viacili.

⁶ Eci cikeco naua mulinakufuetela lisimu, omuo vaka nzili yakama vali nakupangela Njambi omuo nga vashulisa vipangi viavo.

⁷ Nankuma fueteni vije vinapu viavo, vafueteni vieni na lisimu lia ku vufuko vueni, kaha mueseni kasingimiko kuli voshe ava.

Kapandi keni kuli umo na mukuavo

⁸ Keti mukale nalikongo kuli umo na mukuavo, likongo munapande kukala nalion linapande kulizanga umo namukuavo. Uoshe uje azanga mukuavo kaha nonoka lishiko.

⁹ Mashiko nguavo, “Keti ulinge vupangala, keti utsihie, keti uive, keti uliveyele cuma camukueni.” Kaha vioshe evi, navieka naua, vanavipuisa lishiko limolika nguavo, “Zanga mukueni ngue muualizanga yove vavenia.”

¹⁰ Nga uzanga mukueni, kaha kukasa kumulinga mua mupi, nankuma, kuzanga, kukekua kuononoka lishiko lia Mosesa lioshe.

¹¹ Yeni munapande kulinga ngacijevane, omuo munatantekeya ngueni ntsimbu inahete ya kuhinduka mutulo. Omuo ntsimbu ya kutuamena ilimuyehi kupulakana muje muyakele omo tuatsilielele hakulivanga.

¹² Vutsiki vuavuno vuhua, litangua vuavuno lituhuka. Tulikeleni kulinga viuma vije viakundama ku milima, kaha tuambateni vitua viakulua navio mumutania.

¹³ Tuendeni muacili, ngue vantu vaje valinakuyoya mu ceke ca mutania, keti kulinga kalua kakuvuano cipue kupenda, cipue kulinga vupangala, cipue lizangamena, cipue kulinga luozu cipue cipululu.

¹⁴ Vuno honi zaleni vitua via Muene Yesu Kilistu, keti muivuilile naua cifua ceni ca vuntu na kukavangeya mashungu aco kuahi.

14

Keti uhise vakueni

¹ Tambuleni vaje vanazeye mulutsilielo, vuno honi keti mulinge vimpata navo ha visinganieka viavo.

² Iutsilielo lua vantu vamo luvatavesa kulia nkala coshe, vuno honi vantu vamo vaje vanazeye mulutsilielo valia lika visapa sapa.

³ Muntu uje alia vioshe keti ayengule muntu uje ke kulia vioshe, kaha uje alia lika visapa sapa keti ahise uje alia nkala coshe, omuo Njambi ikeye namutavesa.

⁴ Yove iyajo linga uhise ngamba yambala? Kuvanga uje Muene yavo ikeye ahangula nga valinga muacili cipue vanahonoua. Omuo Muene yavo akavakolesa linga vase.

⁵ Vantu vamo vasinganieka ngue litangua limo lili naseho kupulakana matangua akuavo, kaha vakuavo naua vasinganieka nguavo matangua oshe apua hamolika. Muntu na muntu napande kukolesa mukusinganieka viendi viampua viacili.

⁶ Vaje Voshe vasinganieka seho ya litangua limo napande alinge mukusingimika Muene, uoshe uje alia cuma coshe napande ku cilia mukusingimika Muene, omuo atsetsela kuli Njambi ha kulia. Voshe vaje vaviana viakulia vimo vaviana kusingimika Muene, kaha atsetsela kuli Njambi.

⁷ Naumo uahi haliyetu aka liyoyela ikeye vavenia, kaha naumo uahi haliyetu akalitsila ikeye vavenia.

⁸ Nga tuyoya, tulinakuyoyela kuli Muene, kaha nga tutsa, tutsila kuli Muene. Nankuma, cipue tuyoya cipue tutsa, tunapu vana va Muene.

⁹ Omo Kilistu uatsile, kaha uayoyele naua mukupua Muene ua vakakuyoya na vatsi.

¹⁰ Nankuma, kuli yove ukali lika visapa sapa, vikahoni uhisa mukueni? Kaha naua yove ukali vioshe, omuo vika uyenguila mukueni? Yetu voshe tukemana kumesho a Njambi na kutusompesa.

¹¹ Omo vavisoneka muvisoneka nguavo,
 “Mua vusunga omo njiyoya,
 vantu voshe vakatsikama kumesho ange,
 kaha vantu voshe vakalitavela nguavo yange Njambi.”

¹² Nankuma, yetu voshe, tukahandeka vietu vavenia kumesho a Njambi.

Keti utsutsuse mukueni

¹³ Nankuma tuecele kulihisa umo namukuavo. Vuno honi uapande kusinganieka linga keti uhake citsutsukiso mungila ya mukueni cipue cakumuuisa.

¹⁴ Muvumo vuange muli Muene Yesu muavusunga njitakekeya nguange kukuesi viakulia viakujuala mua lika liavio, vuno honi nga munatsiliela linga viakulia vimo vinapu viakujuala, nankuma, vipua viakujuala kuli yeni.

¹⁵ Nga uvulumuina vakueni omuo ha cakulia, kaha kuuesi nakumuesa cizango kuahi. Keti utave viakulia vije viulia vinongese muntu uje yanatsililile Kilistu!

¹⁶ Nankuma, keti utave vije viacili ku mesho ove linga vipue nalizina lia lipi.

¹⁷ Omuo vu Muene vua Njambi keti ngue vunapu vuakulia na kunua kuahi, vuno honi vunapu vua vusunga na ciyulo nakujolelela mu Cimbembesi Uakulela.

¹⁸ Kaha nga mupangela Kilistu mungila eyi vene, muvuaheza Njambi, kaha na vantu vamutsiliela naua.

¹⁹ Nankuma, ntsimbu yoshe tunapande kusinganieka ha viuma vineha ciyulo navije vikuasa kukolesa umo na mukuavo.

²⁰ Keti onongese vipangi via Njambi omuo havia kulia lika. Via kulia vioshe viapua via kulela, vuno honi keti muacili kulia cuma cimo cije casa kulingisa umo linga auile mu vupi.

²¹ Cuma cacili kulinga cinapu keti mulie ntsitu nakunua viniu, cipue kulinga cuma cimo cije cistustukisa mukueni.

²² Lutsilielo luje lu muli nallo lutuliken hhakati keni vavenia na Njambi, nakukuisula muntu uje kevu shuamua omo a panga cuma cimo namono nguendi cacili!

²³ Vuno honi nga vakevo vali navimpata hali vije vialia, kaha Njambi navahisa laja omo vavilia, omuo vilinga viavo kuviakundamene ha lutsilielo. Omuo cuma coshe cije kucakundamene halutsilielo cinapu vupi.

15

Vuaheleseni Vakueni keti Yeni Vavenia

¹ Yetu vaje vanakolo mu lutsilielo tunapande kukuasa vaje kanda vakole mu lutsilielo hakuvakuasa kuambata viteli viavo. Kutuapandele kulivuahelesa yetu vaveni.

² Vuno honi tuva voshe tuapande kuvuahelesa vakueto mukuvalingila viacili, linga vakole mu lutsilielo.

³ Omuo Kilistu kalivuahelelese ikeye vavenia kuahi. Vuno honi ngue muvanasoneka mu visoneka nguavo, "Kushaula kuje kuvamishauile kuneja hali yange."

⁴ Vuima vioshe vije vanasoneka mu visoneka vavisonেকে linga vitulongese, linga tusimpe na kulitakamesa kuje kuvanatuhana mu visoneka linga tukale nakutsiliela.

⁵ Kaha Njambi uje ikeye ntsina ya kusimpa na kutakamesa, amihane kuyoya vuino mukati keni umo na mukuavo kuhitila muli Kilistu Yesu,

⁶ linga mu voshe mukashangazale Njambi Ishe ya Muene uetu Yesu Kilistu na lizi limo.

Muzimbu kuli Vaje keti Vayunda

⁷ Nankuma, litambuleni umo namukuavo, ngue muanamitambula Kilistu, linga muhane vumpau kuli Njambi.

⁸ Omuo njimileka nguange Kilistu vamupuisile mukakupangela Vayunda, mukumuesa nge Njambi uapua ua vusunga, mukulingisa vikulaheso viendi kuli vakukululla vavo linga vipue via vusunga,

⁹ kaha naua mukulingisa vaje keti Vayunda linga vashangazale Njambi ha cikeketima cendi. Nge muvanavisonеka muvisoneka nguavo, "Nankuma, njikakushangazala hhakati ka vaje keti Vayunda, njikemba nakukushangazala."

¹⁰ Kaha naua nguavo,
 “Yeni vaje keti Vayunda joleleni hamo na vantu va Njambi!”

¹¹ Kaha naua nguavo,
 “Shangazaleni Muene, yeni voshe keti Vayunda,
 mushangazaleni yeni vantu voshe!”

¹² Kaha naua Isaya ahandeka nguendi,
 “Mutekuluila ua Njesi akasholoka,
 akeja mukuyula vaje keti Vayunda,
 kaha vakahaka kutsiliela kuavo muli ikeye.”

¹³ Kaha Njambi, uje ntsina ya kutsiliela, amishulise na kuvuahelela kuoshe na ciyulo omuo halutsilielo lueni muli ikeye, linga kutsiliela ceni citsialeleleho kukola na nzili ya Cimbembesi Ukulela.

Omuo vikahanoni Paulu ua vasonekelele na kusimpa

¹⁴ Vavusamba vange, yange vavenia njinamono nguange muavusunga yeni munashulu na vucili, kaha muli na mana oshe, kaha naua muasakuli-longesa umo na mukuavo.

¹⁵ Vuno honi mu mukanda ou njinasimpi ha kusoneka viuma vimo njamianukisa. Njinasiimpi omuo ha kapandi kaje kananiihana Njambi,

¹⁶ ha kupua ngamba ya Kilistu Yesu hakupangela vaje keti Vayunda. Njili-nakupanga ngue kasasendote mukuambulula Muzimbu Uacili ua Njambi, linga vaje kenti Vayunda vapue nkombelo yakuvatambula kuli Njambi, ije ivanalelesa kuli Cimbembesi Ukulela.

¹⁷ Muvumo muli Kilistu Yesu, njihasa kulishasha hakupangela Njambi.

¹⁸ Omuo njikasimpa nakuhandeka lika vije vianalingi Kilistu kuhitila muli yange mukutuamenena vaje keti Vayunda linga vononoke Njambi. Nalingi evi muli mezi na vilinga,

¹⁹ na nzili ya vikomoueso na vitakeyeso, na nzili ya Cimbembesi ca Njambi. Nankuma, kuhuma ku Yelusalema na kuheta ku Ilikiume, njinamanesa kuambulula Muzimbu Uacili ua Kilistu.

²⁰ Cizango cange ntsimbu yoshe cinapu kuambulula Muzimbu Uacili mumitambela ije kanda vovue via Kilistu, kuteua njikatungila ha luvula luanahindi laja muntu ueka.

²¹ Ngue muvanasoneka mu visoneka nguavo,
 “Vaje kuvavalekele via hali ikeye vakamumona,
 kaha vaje kuvevuile, vakevuisisa.”

Vutumbe vua Paulu vuakuya ku Loma

²² Kaha evi vikevo vianjihonouesele vintsimbu viavingi kuija kuli yeni.

²³ Vuno honi omo honi njamanesa vipangi viange mu vihela evi, kaha njatondele ha miaka yayingi linga njije njakumimone,

²⁴ njinatsiliela kulinga ngoco vene. Njitonda kumimona ha vungenzi vuange vuakuya ku Sepeine, linga muakunjikuase hakuya kuje, kaha njikahandeka neni mu matangua amandende lika.

²⁵ Kaha hano vene njili nakuya ku Yelusama nakupangela vantu va Njambi kuje.

²⁶ Omuo vikungulukilo viamu Masendonja na mu Akaya vanasinganieka kuhanako mulambu mukukuasa tuhutu hhakati ka vantu va Njambi mu Yelusalema.

²⁷ Viapuile visinganieka viavo vavenia lika, vuno honi cilivene ha cuma eci, vakevo vakele na likongo lia kuvakuasa. Omuo Vayunda valipangelele vikuisulo viavo via cimbembesi na vaje keti Vayunda, kaha vaje keti

Vayunda vanapande kupangesa vikuisulo viavo via vufuko mukukuasa Vayunda.

²⁸ Omo njinamanesa vipangi evi nakuneha vimbongo vioshe kuli vakevo vije vivanavakunguluila, kaha njikaya ku Sepeine nakumisikamesa ha vungenzi vange vua kuya kuje.

²⁹ Kaha omo njikeya kuli yeni, njatantekeya nguange njikeya nakushula kua vikuisulo via Kilistu.

³⁰ Njimilambelega vavusamba vange, kuhitila muli Muene uetu Yesu Kilistu na kuhitila mu cizango ca Cimbembesi, lipandakaneni hamo nange mukunjolombelega cikuma kuli Njambi.

³¹ Lombeleni linga njikahone kukala na vushonde kuli vakakuhona kutsiliela mu Yundeya, kaha naua vipangi viange mu Yelusalema vakavimbule vantu va Njambi vaje vali muje.

³² Nankuma, njikeya kuli yeni nakuvuahelela kuoshe, nga cinapu cizango ca Njambi, na kuvuahelela mukumisikamesa.

³³ Kaha Njambi, ntsina ya ciyulo, akale neni voshe. Amen.

16

Vihindu via Paulu kuli vantu va mu Loma

¹ Njikundika muanetu uampuevo Fuivi kuli yeni, uje muka kupangela cikungulukilo ca ku Senkili.

² Mutambuleni mu lizina lia Muene nge muje muvakalingi vantu va Njambi, kaha mukuaseni vioshe vije atonda kuli yeni, omuo ikeye uapua kavusamba uacili kuli vantu vavengi na kuli yange naua.

³ Vihindu kuli Pilisika na Akuila, vaka kupanga nange mu vipangi via Kilistu Yesu,

⁴ vakevo veecelele muono uavo omuo yange. Njatsetsela, keti yange lika, vuno honi naua na vikungulukilo vioshe via vaje keti Vayunda.

⁵ Vihindu naua ku cikungulukilo ca vaje vakakungulukila mu njivo yavo. Vihindu kuli kavusamba kange Epaaenetase, uje uapuile yala uakulivanga kutsiliela muli Kilistu mu mumbonge ya Asiya.

⁶ Vihindu kuli Maliya, uje uamipangelele cikuma.

⁷ Vihindu naua kuli Andolonikase na Njuniyase, vakueta Vayunda vaje mutuakelelele mu kamenga, vapua vakutsimana hhakati ka tunganda, kaha vapuile vaka Yesu ntsimbu kanda yange njitsilie.

⁸ Vihindu viange kuli Ampiliatase, kavusamba uange ha kilitombola muli Muene.

⁹ Vihindu naua kuli Ambanase, mukueta mu vipangi via Kilistu, na kuli Sitacise kavusamba kange ua cizango.

¹⁰ Vihindu kuli Apelese, uje kulungua cendi muli Kilistu vanacishangala. Vihindu kuli vaje vanakundama ku ntanga ya Alisitombolase.

¹¹ Vihindu kuli Helondione, mukueta Kayunda, na kuli vaka Yesu mu ntanga ya Nasisase.

¹² Vihindu viange kuli Talafaena na kuli Talafosa vaje vapanga mu vipangi via Muene, na kuli kavusamba kange Pelesise, uje napanga cikuma vipangi via Muene.

¹³ Vihindu kuli Lufase, uje uakuhangula muli Muene, hamo na vaina vaje vakele nakunjiniunga ngue nji munendi.

¹⁴ Vihindu kuli Asinikilitase na Felengone na Helemese na Patolombase na Helemese na vakueta voshe muli Yesu vali hamo navo

¹⁵ Vihindu kuli Filolongese na Njuniyase na Neliase na ndumbuendi uampuevo, na kuli Olimpase na kuli vantu voshe va Njambi vaje vali hamo navo.

¹⁶ Kaha lihinduiseni umo na mukuavo nakulitsuemba ca kulela. Vikungulukilo vioshe via Kilistu vanamimeneka.

Vilongesa viakumanesela

¹⁷ Njimilomba vamuonetu nguange, Zangameni kuli vaje vaneha kuli hangunuka nakutanganesa lutsilielo lua vantu nakuluisa vilongesa vije vimuatambuile. Vashondolokeni!

¹⁸ Kaha omo voshe vaje valinga viuma evi, kuvesi nakupangela Kilistu Muene yetu vuno honi vali nakupangela lika mazimo avo, kaha na mezi avo akukokueya na hendekesi yavo yakuzembeleka vakuise vantu vakuhona mulonga.

¹⁹ Omo vantu voshe vanovu kulongua kueni ku muzimbu uacili kaha acuma eci njili nakuvuahelela cikuma hali yeni. Njitonda nguange mupue vaka mana kuviuma viacili, vuno honi mpueni vakakuhona mulonga kuviuma via vupi.

²⁰ Kaha Njambi ua ciyulo, vuavuno akatsena Satana muintsi ya viliato viendi.

Kavumbi ka Muene yetu Yesu kakale hamo neni.

²¹ Mukuetu Timoteo muvipangi, alinakumihana vihindu, na Lusiyasi na Njasone na Sosipata vakuetu Vayunda.

²² Kaha yange Teshase muka-kusoneka mukanda ou njamitumu vihindu muli Muene.

²³ Ngayase, muka kunjijumbula, uje mu njivo yendi cikungulukilo cikali-uanena, na Elastase uje mukakutulika cikuama ca nganda, namuanetu Kuatase, vanatumu vihindu viavo kuli yeni.

²⁴ Ciyulo ca Muene Yesu Kilistu cikale neni. Amen!

Lilombelo liakumanusuila lia Vishangazala

²⁵ Nankuma vumpau vukale kuli Njambi! Ikeye asa kumipangesa linga mukolese mulutsilielo lueni, kuya ku muzimbu ua cili njikambulula via Yesu Kilistu, nakuya kukusolola kua vusunga vuakushueka vuje vuvashuekele hume laja.

²⁶ Vuno honi vuje vusunga vanavunehe ambanza mutania muelu muvisoneka via tunanguizi va Njambi tua Njambi, nakushika ca Njambi ua miaka yoshe vanavutantekeyesa kuli vaje keti Vayunda voshe, linga voshe vatsiliele nakuononoka.

²⁷ Kuli Njambi umo lika uje ua mana oshe, kukale vumpau kuhitila muli Yesu Kilistu ku miaka yoshe ya yaye! Amen!

Mukanda ua kulivanga ua Paulu kuli vaka KOLINTE Citsindikisi

¹ Kuhuminina kuli yange Paulu uje ivasanene ku cizango ca Njambi kupua kanganda ua Kilistu Yesu, njili na Sosetane muanetu.

² Njili nakusonekela Ku cikungulukilo ca Njambi cije cili ku Kolinte, kuli vaje vanakundama kuli Kilistu Yesu, vaje vavasanene nguavo vantu va kulela va Njambi hamo na voshe vaje vali mu mitambela yoshe ije ikasana ha lizina lia Muene Yesu Kilistu, ikeye muene uavo na muene uetu.

³ Kavumbi kakaleneneni na ciyulo kuhuminina kuli Njambi Tatetu na Muene Yesu Kilistu.

Vikuisulo muli Kilistu

⁴ Ntsimbu yoshe Njikahana citsantselo kuli Njambi, hali yeni omuo ya kavumbi ka Njambi kaje kavamiahane yeni muli Kilistu Yesu,

⁵ linga mu viuma vioshe mupue vakupita muli ikeye na vihandeka vioshe na mana oshe,

⁶ cipue vene vukaleho vua Kilistu vanavushulisisa hali yeni,

⁷ linga keti muhonoue cimo mu vuana vua Cimbembesi, omo muli nakuvandamena cikuma kuma kusholoka kua Muene uetu Yesu Kilistu,

⁸ ikeye uje akamikolesa noho na kumamanusuililo, linga keti vakamiuane na mulonga mulitangua lia Muene uetu Yesu Kilistu.

⁹ Njambi uapua kulungua uje muli ikeye vanamisanene kupua vumo na munendi Yesu Kilistu Muene uetu.

Mahangununo mu cikungulukilo

¹⁰ Njimilambelesa yeni vamuene, mu lizina lia Muene uetu Yesu Kilistu, linga yeni mu voshe mu litavasane kaha naua linga keti hakale mahangununo hhakati keni, vuno honi linga mulitombole mu mana amo na viyongola vimo.

¹¹ Omuo vantu vaku Koloe vanacambulula kuli yange nguavo kuli kulicokota hhakati keni vamuene.

¹² Njilumbununa ngeci umo na umo ueni ahandeka nguendi, "Njakundama kuli Paulu," cipue nguendi, "Njakundama kuli Apolo," cipue nguendi "Njakundama kuli Kefase," cipue nguendi "Njakundama kuli Kilistu."

¹³ Nkuma Kilistu vamutepe ndi? Nkuma Paulu vamushukikile omuo yeni ndi? Cipue nkuma vamimbuitikile mu lizina lia Paulu ndi?

¹⁴ Njitsantsela ngeci kunjambuitikile cipue umo kuli yeni kuvanga lika Kilispase na Ngayase,

¹⁵ linga nauomo uahi ase kuhandeka nguendi vamumbuitikile muli lizina liange.

¹⁶ (Njambuitikile naua ntanga ya Setefanase. Kuhuma hali ava naua kunjitantekeya indi njambuitikileho umo naua.)

¹⁷ Omuo Kilistu kanjitumine mukumbuitika vuno honi mukuambulula muzimbu uacili, keti na mana a vuntu, linga cilindakano ca Kilistu keti vacihuise nzili yaco.

Kilistu ikeye Nzili na Mana a Njambi

¹⁸ Omuo lizi lia cilindakano linapu lia vulema kuli vaje vananongo, vuno honi kuli yetu vaje vavanovola linapu nzili ya Njambi.

¹⁹ Omuo vacisoneka nguavo, “Njikanongesa mana a vaka kuzangama, nakuvuisisa ca vaka kulilongesa njikacipihisa.”

²⁰ Nkuma ali kuli yala ua mana? Nkuma ali kuli mulongisi? Nkuma ali kuli muka vimpata ua matangua ano? Nkuma Njambi kalingile mana a mavu ku apuisa vulema ndi?

²¹ Hume laja mu mana a Njambi, mavu katantekeye Njambi kuhitila mu mana auo, mavu avuahelesele Njambi kuhitila mu viuma via ngoco vije vituambulule mukuovola vaje vaka kutsiliela.

²² Omuo Vayunda vakatondo vimueso kaha va Ngelengu vakatondo mana,

²³ vuno honi yetu tuambulula kushukika ca Kilistu ha cilindakano, livue liakutsutsuka kuli Vayunda kaha liapua lia vulema kuli vaje keti Vayunda,

²⁴ vuno honi kuli vaje vavanasana voshe Vayunda na va Ngelengu, Kilistu ikeye nzili ya Njambi na mana a Njambi.

²⁵ Omuo vulema vua Njambi vunapu vua mana kupulakana vantu, na kuzeya ca Njambi cinapu ca nzili kupulakana vantu.

²⁶ Vamuanetu singaniekeni muje mumuafuile omo vamisane, keti vuingi vueni vuoshe muapuile vaka mana kuya mucinafulamo mavu, keti voshe vapuile va nzili, keti vuingi vuavo vasemukile muacili.

²⁷ Vuno honi Njambi uahanguile via vulema ha mavu linga apayese vaka mana, naua Njambi uahanguile vije via kuzeya hano ha mavu linga apayese vaka nzili,

²⁸ Njambi uahanguile vije via kulikehesa na vije viakusembulula ha mavu, na vuima vije kuviesiko, linga ahonouese viuma vije vivanamono nguavo vili naseho kupua viangoco,

²⁹ linga keti muntu alihalese ku mesho a Njambi.

³⁰ Ikeye ntsina ya vuyoye vueni muli Kilistu Yesu, uje Njambi yanapuisa mana etu, vusunga vuetu, nakulela cetu na vovoke vuetu,

³¹ nankuma ngue muje muvanacisoneka nguavo, “Eceleni uoshe uje alihalese, alihalesele muli Muene.”

2

Muzimbu ua hali Kilistu Uakushukika

¹ Omo njezile kuli yeni vamuanetu, kunjezile nakuambulula kuli yeni vakaleho vua Njambi muku likuasesa mezi akama cipue mana.

² Omuo kunjatondele kutantekeya cipue cimo cahi hakati keni kuvanga lika Yesu Kilistu uje ivashukikile ha cilindakano.

³ Kaha njakele neni mu kuzeya na mu liova cikuma na kujaja,

⁴ kaha vihandeka viange na muzimbu uange kuviakele na mezi avu-tongue a mana, vuno honi na citantekeyeso ca Cimbembesi ua nzili,

⁵ ngeci linga lutsilielo lueni keti lukundame mu mana a vantu vuno honi mu nzili ya Njambi.

Mana a Njambi

⁶ Honi kuli vaje vanakolo mu mana tukahandeka navo mu mana, cipue vene keti mana a ntsimbu ino cipue a vaka kuyula va ntsimbu ino, vaje nzili yavo ikahua.

⁷ Vuno honi tukahandeka vushueke na mana a Njambi akulishueka, aje Njambi nahangula omuo ya vumpau vuetu tele ntsimbu kanda mavu aputuke.

⁸ Na umo uahi hali vaka kuyula va ntsimbu ino vovuisisile eci, nga vovuisisile ngue kuvashukikile Muene ua vumpau.

⁹ Vuno honi ngue muje vacisoneka nguavo,
 “Cije lisho ku liamuene cipue lituitui kulievuile,
 cipue mutima ua muntu kuuasinganiekele nguavo cikalingiua,
 vikevio vije Njambi navuahelela vaje vamuzanga,”

¹⁰ Njambi na tusholuela laja kuhitila mu Cimbembesi. Omuo Cimbembesi cikatondo viuma vioshe, cipue vene viuma viakulova via Njambi.

¹¹ Nkuma keti cimbembesi ca muntu cije cili muli ikeye cikeco citantekeya visinganieka viendi ndi? Nankuma mu ngila imo vene naumo uahi atantekeya mana a Njambi kuvanga lika Cimbembesi ca Njambi.

¹² Honi kutuatambuile cimbembesi ca mavu, vuno honi Cimbembesi cije cihuminina kuli Njambi, linga tuvuisise vuana vuanatuhana Njamba.

¹³ Tuahandeka evi mu mezi aje keti akutulongesa ku mana a vuntu vuno honi ku mezi aje atualilongesele kuli Cimbembesi, kulumbununa vusunga vua ku cimbembesi kuli vaje vali na Cimbembesi.

¹⁴ Muntu uje uakuhona cimbembesi kekutambula mavuana a Cimbembesi ca Njambi, omuo anapu akuhona seho kuli ikeye, kaha kasa ku evuisisa omuo anapu aku Cimbembesi.

¹⁵ Muntu uaku cimbembesi akasompo viuma vioshe, vuno honi ikeye naumo uahi asa kumusompa.

¹⁶ Ngue muvihandeka visoneka nguavio,
 “Nkuma iya atantekeya mana a Muene
 linga amushike?”

Vuno honi tuli na mana a Kilistu.

3

Vangamba va Njambi

¹ Vuno honi vamuonetu, kunjasele kuhandeka kuli yeni ngue vantu vaje vayoya mu cimbembesi, vuno honi ngue vantu vaje vayoya mu vuntu, ngue tukeke muli Kilistu.

² Njamilisile na mavele keti na via kulia via kukola, omuo tele kanda mucili vuaheselelelvio, kaha cipue hano vene kanda mulivuahelele,

³ omuo hanga mucili ku vuntu. Omuo nga hanga hhakati keni ha cili cipululu na lifuua, nkuma keti yeni vaka mavu, vantu vaje vayoya kufutisi ya mavu ndi?

⁴ Nkuma nga omo umu ahandeka nguendi, “Yange njakundama kuli Paulu,” kaha mukuavo nguendi, “Yange njakundama kuli Apolo,” Nkuma yeni keti mu vantu va mavu ndi?

⁵ Nkuma Apolo ikeye iya? Nkuma Paulu ikeye iya? Tu vangamba lika kuhitila muli uje imuatsilielege, kuya muje Muene uacihanene kuli umu na umu.

⁶ Yange njakunine, kaha Apolo uetilile mema, vuno honi Njambi ikeye uakolesele.

⁷ Nankuma muka kukuna cipue muka kuitilila na umu uahi ali naseho, vuno honi kuvanga lika Njambi uje muka kukolesa.

⁸ Muka kukuna na muka kuitilila voshe vanalieseka. Kaha umu na umu akatambula fueto kuya kuvipangi viendi.

⁹ Omuo tunapu vamo mu vipangi via kupangela Njambi, kaha yeni munapu lihia lia Njambi,

Naua munapu njivo ya Njambi.

¹⁰ Kuya ku kavumbi kaje kanjihanene Njambi, ngue muka kutunga uavutongue njajalele luvula, kaha muntu ueka naua alinakutungilahoh. Kaha muntu ueka napande kuzangama muje muatungilahoh.

¹¹ Omuo nalumo luahi luvula lueka luje muntu asa kujalaho kupulakana luje luvanajala laja lukeluo Yesu Kilistu.

¹² Honi nga muntu umo atunga haje ha luvula na ngolinde, na siliva, na mavue a seho cikuma, na viti na mula cipue na vishati,

¹³ muntu na muntu vipangi viendi vikasholoka, omuo Litangua lia Muene lika visholola, omuo vikasholoka na tuhia, tuhia tukeseka cifua muka ca vipangi cije muntu na muntu napanga.

¹⁴ Nga vipangi vije viatungile muntu na muntu uoshe ha luvula vili muacili, kaha akatambula vuana.

¹⁵ Kaha nga vipangi via muntu na muntu uoshe vaka viuemeka, kaha nacimo cahi cakauanaho, cipue vene ikeye liavenia vaka muovola, vuno honi kuhitila lika ngue unaputumuka mu tuhia.

¹⁶ Nkuma yeni kumuatantekeyele ngeci muapua mu njivo ya Njambi, kaha ngeci Cimbembesi ua Njambi uakala muli yeni ndi?

¹⁷ Nga muntu apihisa njivo ya Njambi, kaha na Njambi akamupihisa. Omuo njivo ya Njambi yapua lika ya kulela, kaha ije njivo ya Njambi ikeyo vene yeni.

¹⁸ Keti kukale muntu umo alikuise ikeye vavenia. Nga hhakati keni hali umo asinganika nguendi ali na mana a matangua ano, mueceleni apue cilema ngeci akapue ua mana.

¹⁹ Omuo mana a mavu ano apua a vulema kuli Njambi. Omuo vacisoneka nguavo, "Akakuata vaka mana mu kuzangama cavo,"

²⁰ kaha naua nguavo, "Muene atantekeya ngeci visikanika via vaka mana viapua viangoco."

²¹ Nankuma keti kukale muntu cipue umo alihalese omuo ya vantu. Omuo viuma vioshe vinapu vieni,

²² cipue vene Paulu, cipue Apolo, cipue Kefase, cipue mavu, cipue muono, cipue kutsa, cipue ntsimbu ino, cipue kulutue, vioshe vinapu vieni,

²³ kaha yeni munapu vantu va Kilistu, kaha Kilistu napu ua Njamba.

4

Tunganda va Kilistu

¹ Omu mukemo muntu muanapande kutuambatelamo ngue vangamba va Kilistu, na vaka kuniunga vusueke vua Njambi.

² Kaha cuma cije citondeka cikuma kuli vakakuniunga ngeci vapue vantu vakukonkama.

³ Vuno honi kuli yange cinapu cuma ca cindende ngeci linga yeni munjisompe cipue na mpunga ili yoshe ya vantu. Cipue vene yange vavenia kunjekulisompa.

⁴ Kunjitantekeyaho cipue cimo cije cakuliluwa naco yange vavenia, vuno honi cipue ngoco kucimuesa ngue kunjesi na mulonga. Vuno honi muene ikeye uje akanjisompo.

⁵ Nankuma keti musompe ntsimbu kanda iyete, ntsimbu kanda Muene eje, uje akaneha ku ceke viuma vije hano vialisueke mu milima nakusholola mashungu a mutima. Ambahoni muntu ku muntu akatambula vije via mupande kuhuminina kuli Njambi.

⁶ Njinalingi vioshe evi kuli yange vavenia na kuli Apolo omuo yeni, vamuaneu ngeci mulilongesele kuli yetu linga keti mupulakane vije vivanasoneka, ngeci keti kukale umo ueni alihalesele ku umo kaha asembulule mukuavo.

⁷ Nkuma iya akamona cuma ca kuliseza muli yeni? Vika muli navio vije kumuatambuile? Ambahoni nga muacitambuile, kaha vika mulihalesa ngue ku capuile vuana?

⁸ Muli laja na viuma vioshe vimutonda! Kaha laja naua munapu vaka kufuka! Kuakuhona yetu munapu vimiene! Kaha munapande ngeci muyule, linga netu tuase kuyula neni!

⁹ Omuo njiyongola ngeci Njambi natuhaka yetu tunganda ngue vaku-manusuila ku voshe, ngue vaje vantu va vanasompela kutsa, tunapu cimueso ku vaka mavu, naku tungelo naku vantu.

¹⁰ Tuvilema omuo ya Kilistu, vuno honi yeni muvaku zangama muli Kilistu, yetu tuvakuzeya, vuno honi yeni muva kutakama. Yeni vamingimika, vuno honi yetu vatushaula.

¹¹ Kuntsimbu ino tunantsi njala na kuvua mpuila, tuzala via kutavuozoneka nakutuyandesa kaha kutuesi na membo,

¹² kaha tukapanga cikuma na mavoko etu vavenia. Omo vatusinga, yetu tukuisula, omo vatupakesa, yetu tutualelelaho kuimana ngoo,

¹³ Kaha nga vatushaula, yetu tukeseka kulitavasana, tunapu kaha honi tunapu ngue vilinge via ngoco via ha mavu, kuvuima vioshe na kuntsimbu ino.

¹⁴ Kunjasonekele eci ngeci yeni muvue shuamua, vuno honi mukuminan-gula ngue vana vaje vanjazanga.

¹⁵ Kaha nga cipue vene muli navaka kuimanena vavengi vaje kuvasiua kuvatanda muli Kilistu, vuno honi kumuesi navaishueni vavengi. Omuo yange njapuile ishueni muli Kilistu Yesu kuhitila mu muzimbu uacili.

¹⁶ Ambahoni njimisindiya nguange mpueni vaka kunjitemuinina.

¹⁷ Nankuma njituma Timateo kuli yeni, muana uje injazanga uakulongua muli Muene, linga amianukisa vingila viange muli Kilistu, ngue muje munjika vilongeselamo kuoshe mu vikungulukilo vioshe.

¹⁸ Vamo vanapu vaka kulihalesa, nguevene kunjezile kuli yeni.

¹⁹ Vuno honi njili nakuija kuli yeni vuavuno, nga cizango ca Muene citava, kaha kunjikauana lika vihandeka via vantu ava vaka kulihalesa vuno honi nzili yavo.

²⁰ Omuo vumuene vua Njambi kuvuapuile lika mukuhandeka vuno honi na mu nzili.

²¹ Nkuma vika mutonda? Mutonda njije kuli yeni na likote indi na cizango mu cimbembesi ca kulikehesa?

5

Vupangala mu cikungulukilo

¹ Vana cambulula vene nguavo kuli cikuma vupangala hakati keni, vuje cipue hhakati ka vaje vakakuhona kutsiliela kuvekuvulinga, omuo yala alinga vupangala na mpuevo ya ishe.

² Kaha muli nakulihalesa! Nkuma kumuapandele kupihilila ndi? Kaha uoshe uje nalingi eci vamuhumise hhakati keni.

³ Cipuevene nguavo kunjesi neni mu vuntu, vuno honi njili neni mu cimbembesi. Kaha nga kunjili, njinasompo laja

⁴ mu lizina lia Muene Yesu hali yala uje nalingi viuma evi. Omo mukukungulukika hamo, kaha cimbembesi cange cili neni hamo na nzili ya Muene yetu Yesu,

⁵ haneni ou yala kuli Satana linga anongese muvila, ngeci cimbembesi cendi vakacovole ha litangua lia Muene Yesu.

⁶ Kulihalesa ceni keti cacili, nkuma kumutantekeya ngueni cimbaluila cacindende casa kufutunuisha mukasha uoshe ndi?

⁷ Humiseni cimbaluila calaja linga mupue mukasha uauha, ngue muje cilivene mumulimo vakuhona cimbaluila, omuo Kilistu ikeye napu muna mpanga ua paseka yetu kaha vana munkombelela laja.

⁸ Nankuma tuyeni tuvuahelele Ciuano eci, keti na cimbaluila calaja, cikeco cimbaluila ca vungungu na vupi, vuno honi na mbolo yakuhona cimbaluila ya kulela na vusunga.

⁹ Njasonেকে mu mukanda uange nguange yeni keti mukalehamo na vantu vaje vakakulinga vupangala,

¹⁰ kunjilumbununa nguange vupangala vua hano ha mavu, cipue vaje vaka cipululu na vezi, cipue vaje vaka kulemesa tumponia, ambahoni acuma eci yeni munapande kuhuma a mavu aua.

¹¹ Vuno honi njimisonেকে nguange keti mukalehamo na uoshe uje alitumbula ikeye liavenia nguendi muka kutsiliela nga ikeye ali na mulonga uakulinga vupangala cipue cipululu, cipue ikeye ali na kulemesa tumponia, muka kushaula, muka kupenda, cipue muizi. Ketu mueseke cipue kulia na muntu uacifua eci.

¹² Vikahoni nkuma vinjilinga nga njisompa vaje vali hambanza? Nkuma keti vaje vali mukati ka cikungulukilo vakevo vamunapende kuvasompa indi?

¹³ Njambi akasompo vaje vali hambanza. Ngue muje muvihandeka visoneka nguavio, “Humiseni uoshe muka vupi uje ali hhakati keni.”

6

Kulisompesa yeni vavenia ku Vinzango

¹ Omuo nga hhakati keni hali umo ali nienga hali munaina, nkuma napande kuya kuvaka lishiko vaje vaka kuhona kulela kupulakana kuya ku vantu vakulela va Njambi ndi?

² Nkuma kumutantekeya ngueni vantu va Njambi vakulela vakasompa mavu ndi? Kaha nga mavu vakasompa kuli yeni, kaha muhonoua vati kusompa vimpande via vindende?

³ Nkuma kumutantekeya ngueni yetu tukasompa tungelo ndi? Kaha tukahonoua vati honi kusompa viuma vije viakundama ku vuyoye ovu!

⁴ Nankuma nga muli na vimpande via cifua eci, nkuma vika mukavitala kuli vaje kuvasingimikiua mu cikungulukilo?

⁵ Njilinkuhandeka evi linga shumua imikole. Nkuma hhakati keni kukuesi yala ali na mana cikuma linga ase kusompa kulinienga cije cili hhakati ka vaka kutsiliela ndi?

⁶ Vuno honi muka kutsiliela atuala mukuavo muka kutsiliela ku lishiko mukulisompa kuli vaje vakakuhona kutsiliela?

⁷ Cije cineha linga mulituale umo na mukuavo kuvaka lishiko cimuesa ngeci muahonoua. Nkuma vakahoni kumutavela linga vamipihisile? Nkuma vakahoni kumutavela linga vamikuise?

⁸ Vuno honi yeni vavenia mukapihisa na kuiva, cipue kuli vamuanoko.

⁹ Nkuma kumutantekeya ngueni vaka vupi ku vakasuana vumuene vua Njambi ndi? Ketu vamikupangale, cipue vikuizi cipue vaka kulemesa tumponia cipue vaka kulinga vupangala cipue vundeyi,

¹⁰ cipue vaka kuiva cipue vaka cipululu cipue vaka kupenda cipue vaka kushaula cipue mihuza navakevo kuva kasuana vumuene vua Njambi.

11 Kaha na hhakati keni vamo muapuile ngue vakevo, vuno honi vamikushile na kumilelesa, vamipuisile vaka vusunga mu lizina lia Muene Yesu Kilistu na mu Cimbembesi ua Njambi yetu.

Pangeseni Mivila yení ku Vumpau vua Njambi

12 “Viuma vioshe viapua via lishiko kuli yange,” vuno honi keti viuma vioshe vije viasa kunjikuasa. Viuma vioshe viapua via lishiko kuli yange. Vuno honi yange kunjikapu nji ndungo ku cuma coshe.

13 Viakulia viapua via lizimo, kaha lizimo liapua lia viakulia. Vuno honi Njambi akapihisa vioshe. Nankuma mivila kuvahupangelele kulinga vupangala vuno honi ukeuo vaupangelele Muene, kaha Muene vamupangelele mu mivila.

14 Kaha Njambi uje uasanguile Muene ikeye naua akatusangula na nzili yendi.

15 Nkuma kumutantekeya nguene mivila yení yapua vilio via Kilistu? Nankuma njasa kuambata vilio via Kilistu na kuvipuisa vilio via cinkoyi ndi? Kuahi!

16 Nkuma ngeci kumutantekeya nguene uoshe uje alipandakana ikeye vavenia na cinkoyi apua mivila humo nendi ndi? Omuo ngue muje muvacisoneka nguavo, “Vavali vakapua mivila umo.”

17 Vuno honi uoshe uje nalipandakana kuli Muene napu Cimbembesi umo nendi.

18 Humeni kuvupangala. Kaha vupi voshe vueka vuje muntu a linga vunapu vua hambanza lia amuvila uendi, vuno honi muntu uje alinga vupangala akalingi vupi vua kuluisa mivila uendi vavenia.

19 Nkuma kutantekeya nguove mivila uove uapua njivo ya Njambi ya Cimbembesi ua kulela uje ali muli yove, uje yuli nendi kuhuminina kuli Njambi ndi? Kaha yení kumuakundamene kuli yení vavenia,

20 yení vamilandele na ndando. Nankuma shangazaleni Njambi mu mivila yení.

7

Vihula via hali Vulo

1 Honi kuya kuvimpande vije vimuasonekele, cacili kuli yala kuhona kulinga vupangala na mpuevo.

2 Vuno honi omuo ya vieseko vua vupangala, kaha yala uoshe napande kukala na mpueyendi kaha naua na mpuevo uoshe napande kukala na yaliendi.

3 Kaha yala napande kulinga vije via mupande kuli mpueyendi, kaha na mpuevo naua napande kulinga mumo vene kuli yaliendi.

4 Omuo mpuevo kesi na nzili yakuyula mivila uendi vavenia, vuno honi kuvanga yaliendi, mu ngila imo vene yala kasa kuyula mivila uendi vavenia, vuno honi kuvanga mpueyendi.

5 Ketí muli vianene umo na mukuavo, kuvanga nga mualitavasana ha cuma cimo linga mulihane yení vavenia mukulombela, vuno honi munima yavio munapande kulipandakana hamo naua, kuteua Satana linga keti amieseka omuo yakuhona kuli hilula yení vavenia.

6 Njilínakuhandeka evi mukumitavesa, vuno honi keti ngue kumishika.

7 Njitonda nguange ngue muva voshe muapua ngue muje munjili yange, vuno honi muntu uoshe ali na vuana vuamutela vuje vuhuma kuli Njambi, ou vueka kaha mukuavo vueka.

⁸ Kuli vazike na kuli vantuluue njihandeka nguange cacili kuli vakevo kukala muje vene kuakuhona kuliambata ngue muje mu njilimo yange.

⁹ Vuno honi nga kuvasa kulihilula vakevo vavenia kaha vanapande kuambata, omuo cacili kuambata kupulakana kukala nantuima ya mashungu.

¹⁰ Kuli vaje vaka kuliamba njili nakumishika, keti yange vuno honi Muene ngeci, mpuevo kapandele kulitepa na yaliendi,

¹¹ (vuno honi nga alitepa na yaliendi napande kukala muzike cipue kulihiluisa na yaliendi), kaha na yala kapandele kukondola mpueyendi.

¹² Ku voshe njilinakuhandeka eci, keti Muene, nguange nga muanoko ali na mpueyendi uje keti uakutsiliela, kaha atava kukala nendi, kaha kapandele kumukondola.

¹³ Nga mpuevo uoshe uje ali na yaliendi uakuhona kutsiliela, kaha atava kukala nendi kaha kapandele kumukondola.

¹⁴ Omuo yala uje uakuhona kutsiliela vanamulelesa kuhitila muli mpueyendi, kaha na mpuevo uje uakuhona kutsiliela vanamulelesa kuhitila muli yaliendi. Keti ngoconi vana veni vakapua vakuhona kulela, vuno honi muje mucilimo vanapu vakulela.

¹⁵ Vuno honi nga mukuavo uje uakuhona kutsiliela ashunguiya kulitepa, cifue ngocovene, kaha ha mulonga ou munaina ua yala cipue uampuevo napatuka, omuo Njambi uatusanenene ciyulo.

¹⁶ Yove mpuevo nkuma utantekeya vati nguove uasa kukovola yaliove? Kaha nove naua yala nkuma utantekeya vati nguove uasa kukovola mpueyove?

Yoya ngue muje muakusanenenemo Njambi

¹⁷ Muntu uoshe napande kuyoya vuyoye vuje Muene namuhana, kaha na muje Njambi namusanenemo. Eli likelio lishiko liange mu vikungulukilo vioshe.

¹⁸ Nkuma muntu uoshe ualovokele laja ha ntsimbu ije ivamusanene ndi? Kaha keti ahumise cimueso cije cimuesa nguavo nalovoka laja. Muntu uoshe uje ivasanene tele kanda alovoke ha ntsimbu ije ivamusanene ndi? Kaha ngoconi kaha keti alovoke.

¹⁹ Kulovoka cipue kuhona kulovoka kucilumbununa cimo, vuno honi kutulika mashiko a Njambi.

²⁰ Omuo muntu ali uoshe napande kukala mungila ije ivamusanene nayo.

²¹ Nkuma uapuile undungo omo vakusanene ndi? Nankuma keti uhakeleko mana, vuno honi nga uasa kuuana kupatuka cove, likuasese ntsimbu yove.

²² Omuo uoshe uje ivasanene muli Muene ngue ndungo ikeye napu muntu uakupatuka ua Muene. Kaha mu ngila imo vene uje uapuile uakupatuka omo vamusanene, ikeye napu ndungo ua Kilistu.

²³ Vamilandele na ndando, ngeci keti mupue vandungo va vantu.

²⁴ Nankuma vamuuanetu, mu ngila yoshe ije ivakusanenemo, muje vene kalamo na Njambi.

Vihula via hali Vazike na Vantuluue

²⁵ Honi kuya kuli vije vimuahandekela hali vazike, kunjesi na cimo cahi cinjishika cije cihuminina kuli Muene, vuno honi njihana viyongola viange ngue umo uje ha kuya ku cikeketima ca Muene napu muka vusunga.

²⁶ Njasinganieka nguange kuya ku vieseko vije vili nakulingiua hano, cacili kuli muntu kukala muje vene mualimo.

²⁷ Nkuma vakukutu ku mpueyove ndi? Kaha keti utonde kupatuka. Nkuma uapatuka kuli mpueyove ndi? Kaha keti utonde vulo.

²⁸ Vuno honi nga yala ambata kaha kalingi vupi, kaha nga mpuevo ashomboka kaha kalingi vupi. Vuno honi vaje vambata vakakala na makalu a hano ha mavu, vuno honi yange njitonda nguange keti mukale nauo.

²⁹ Vamuanetu vinjilumbununa evi, ntsimbu ije ivahanguile ili muyehi, nankuma kuhuma hano honi eceleni voshe vaje vanambata vayoye ngue kuvambatele,

³⁰ kaha na vaje vali navusiua vakale ngue kuvesi mu vusiua, na vaje vajolela vapue ngue kuvesi mu nzoleda, kaha na vaje vakakulanda vapue ngue vaje kuvesi na viuma,

³¹ kaha na vaje valinakupangela vufuko vua hano ha mavu, vapue ngue kuvavupangelele. Omuo viuma via hano ha mavu vikahiti lika.

³² Njitonda nguange mupatuke kuvishoti, yala uakuhona kuambata ikeye ali na cishoti lika ha vipangi via Muene, muje vati asa kuvuaheleselamo Muene.

³³ Vuno honi yala uakuambata ikeye ali na cishoti ca viuma vije via hano ha mavu, muje vati muasa kuvuaheleselamo mpueyendi,

³⁴ Kaha viyongola viendi viampua via kuli hangununa. Kaha na mpuevo uje uakuhona kushomboka cipue uje kanda alimone na yala ikeye ali nacishoti ku vipangi via Muene, muje vati muasa kulelesa muvila uendi na cimbembesi, vuno honi mpuevo uakushomboka ikeye ali nacishoti ku viuma via hano ha mavu, muje vati muasa kuvuaheleselamo yaliendi.

³⁵ Njihandeka eci omuo ya kumikuasa ceni, kunjitondo kumiteuesa. Vuno honi linga mukale mu ngila yacili ya kusungama ya kuhona lihangu-nuno mukulihana kuli Muene.

³⁶ Kaha nga muntu umo asinganieka nguendi kesi nakulinga muacili kuli muna mpuevo uje ya nalama, kaha nga mashungu endi anapu akama cikuma, kaha napande kulinga muje muatondelamo, nankuma vanapande kuliambata kuvalingi vupi.

³⁷ Vuno honi uoshe uje natambula eci mu mutima uendi, kuakuhonoua kumusindiya vuno honi asa kuendesha mashungu endi, mukumuniunga kupua mpueyendi uje kanda alimone na yala kaha akalinga muacili.

³⁸ Nankuma uoshe uje ambata uje mpuevo kanda alimone na yala alinga muacili, vuno honi uje kamuambata alinga muacili cikuma.

³⁹ Mpuevo vanamukutu kuli yaliendi mu miaka yoshe ije yaliendi ayoya, nga yala atsa, napatuka kushomboka naua kuli yala uoshe uje yatonda, kuvanga lika kuli yala uje ali muli Muene.

⁴⁰ Vuno honi mukusompa cange ou mpuevo napu uakuvuahelela nga akala muje vene muali, kaha njasikanieka ngeci nange vene njili na Cimbembesi ua Njambe.

8

Cihula caha Viakulia Viakukombelela Tumponia

¹ Honi kuya ha via kulia vije viakukombelela ku tumponia, tutantekeya ngueto, "Tuvavoshe tuli namana." Mana aje akalingisa muntu linga alihalese, vuno honi cizango cikeco citungisa.

² Nga kuli umo akasinganieka nguendi atantekeyako vimo, vuno honi katantekeya kuya muje muanapandele kutantekeyelamo.

³ Vuno honi nga uoshe uje azanga Njambe, ou vanamutantekeya omuo ya Njambe.

⁴ Nankuma kuya ku kulia viakulia vije viakukombeleda tumponia, tuntekeya ngueta kamponia cilivene kekuyoya, kaha kukuesi Njambi ueka vuno honi umo.

⁵ Omuo cipue vene nga kuvali vaje vavasana nguavo, “vanjambi,” mulu cipue hano ha mavu, cilivene ngue muje mukuli “vanjambi” vavengi na “vimuene” vavengi,

⁶ vuno honi kuli yetu kuli lika Njambi umo, Tatetu, kaha kuli ikeye kukeko kuahuma viuma viose, kaha muli ikeye mukemo tuyoyela, ikeye Muene umo lika, Yesu Kilistu, ikeye uje muli ikeye muli viuma viose kaha muli ikeye mukemo tuyoyela.

⁷ Vuno honi keti vantu vose vantekeya mana aua, vuno honi vamo hanga vacili na citema cakulemesa tumponia, vakali viakulia vije vivanakombeleda ku tumponia, kaha visinganika viavo hakupua via kuzeya vinajuala.

⁸ Viakulia kuviasa kutuneha kuyehi na Njambi, nacimo cahi casa kutuasa cipue nga kutuvili, kaha nacimo cahi naua cituua naho cipuevene tuvili.

⁹ Kaha zangameni lika kuteua eci kupatuka ceni linga keti cikapue citsutsiso kuli vaje vanazeye.

¹⁰ Omuo nga muntu umo akumona, yove yala uje ua mana, uatumama ku mesa mu njivo ya tumponia, nkuma kasa kusimpa nga visinganika viendi viazeye linga alie viakulia vije vivanakombeleda ku tumponia ndi?

¹¹ Omuo ya mana ove kaha uje yala uakuzeya akanonga, muanoko uje omuo ya ikeye mukemo Kilistu uantsile.

¹² Kaha nga ulinga vupi kuli muanoko nakuvulumuna visinganika viendi omo vinazeye, kaha uli nakulinga vupi kuli Kilistu.

¹³ Nankuma nga viakulia vilingisa muanoko linga alinge vupi, kaha kunjikalihoni ntsitu naua, kuteua njilingisa muanetu kuuila mu vupi.

9

Kapandi na Vipangi via Kanganda

¹ Nkuma kunjapatukile ndi? Nkuma keti nji kanganda ndi? Nkuma kunjamuene Yesu Muene uetu ndi? Nkuma keti yeni vushuka via vipangi viange muli Muene ndi?

² Nga honi kuveka keti yange kanganda, cilivene kuli yeni njinapu nji kanganda, omuo yeni munapu kasateso ka vunganda vuange muli Muene.

³ Kaha eci cikeco kuliluila cange kuli vaje vanjeseka.

⁴ Nkuma kutuesi nakapandi ha viakulia na viakunua ndi?

⁵ Nkuma kutuesi nakapandi kakutusindikiya kuli mpueyetu, ngue vakuetu tunganda na vamuanaye ya Muene na Kefase ndi?

⁶ Nkuma kuvanga lika Mbanambasa nange yetu lika vaje kuvesi na kapandi kakuhona kupangela vuyoye ndi?

⁷ Nkuma iya akapanga ngue lisualale kaha alifueta ikeye vavenia? Nkuma iya akuna lihia lia mikolovozi ya viniu kuakuhona kulia ku vushuka vuayo? Nkuma iya akaniungu vampanga kuakuhona kunua mavele avo?

⁸ Nkuma njili nakuhandeka evi na nzili yakama ya vuntu ndi? Nkuma lishiko kulihandeka evi vene viakulifua ndi?

⁹ Omuo vanacisoneka mu lishiko lia Mosesa nguavo, “Keti mukute ngombe ku kanua omo oku alinakujungula vinona.” Nkuma Njambi nahakela lika mana vangombe ndi?

¹⁰ Nkuma cilivene kekuhandeka evi vioshe omo yetu ndi? Vacisonekele omuo yetu nguavo, omuo uoshe uje muka kulima napande kulima mu kutsiliela kaha na muka kujungula napande kujungula mu kutsiliela kumutambela ua vimbuto viendi.

¹¹ Nga tunakunu vimbuto via Cimbembesi hhakati keni, nkuma kucipu cuma cakama cikuma nga tuteja vuana vuje vuli muli yeni ndi?

¹² Nga kuli vamo vaje vali navukuasi vuje vuhuminina kuli yeni, nkuma kutuesi navuo mu vuingi ndi?

Cipue ngoco vene kutualikuaseseleko muacili aka kapandi. Vuno honi tunapande kuyanda mu viuma vioshe kupulakana kutanganesa muzimbu uacili ua Kilistu.

¹³ Nkuma kumutantekeya ngueni vaje valinakupanga mu njivo ya Njambi vakauana viakulia viavo mu njivo ya Njambi, kaha na vaje vakapanga ha mutula vakalipangela kombelo ije ivakankomelela ha mutula ndi?

¹⁴ Mungila imo vene, Muene uashikile nguendi vaje vambulula muzimbu uacili vanapande kuuana vuyoye vuavo ku muzimbu uacili.

¹⁵ Vuno honi kunjali kuasesele cipue cimo kukapandi aka, kaha naua kunjesi nakusoneka eci linga aka kapandi kapue kange, omuo cacili njitse kupulakana kutavesa muntu uoshe kunjijhumisa eci kulihalesa cange.

¹⁶ Omuo nga njambulula muzimbu uacili, cije cinjilinga yange linga keti njilihalese, omuo canjipande yange kuambulula, kaha cikafua vati vukalu kuli yange nga kunjambulula muzimbu uacili.

¹⁷ Omuo nga njilinga eci cuma muayilamo cizango cange, kaha nji-natambula vuana, vuno honi nga keti muayilamo cizango cange, kaha vananjikundika cipangi eci.

¹⁸ Nkuma honi vuana vuange vuka? Hali eci omuo mukuambulula cange hamo njikapuisa muzimbu uacili kupua ua vuana cakuhona ndando, kuakuhona kupangesa kapandi kange mukushula ku muzimbu uacili.

¹⁹ Omuo cipuevene nguavo njapatuka kuli muntu uoshe, vuno honi njalipuisa yange vavenia ndungo ku voshe, linga njiuane vantu vavengi.

²⁰ Kuli Vayunda njezile ngue nange nji Kayunda linga njivanganiale Vayunda, kaha kuli vaje vali muintsi lia lishiko lia Mosesa njezile ngue uje ali muintsi lia lishiko lia Mosesa, vuno honi cipuevene yange kunjesi muintsi lia lishiko lia Mosesa, vuno honi linga njivanganiale vaje vali muintsi lia lishiko.

²¹ Kuli vaje kuvesi muintsi lia lishiko lia Mosesa njezile ngue umo uje kesi muintsi lia lishiko lia Mosesa, eci kucilumbununa ngeci kunjesi muintsi lia lishiko lia Njambi vuno honi njili muintsi lia lishiko lia Kilistu linga njivanganiale vaje kuvesi muintsi lia lishiko.

²² Kuli vaka kuzeya mu cimbembesi njapuile muka kuzeya, linga njinganiale vaje vaka kuzeya. Kaha njinalipuisa viuma vioshe ku vantu voshe, linga njase kukuovolako vamo.

²³ Njili nakulinga vioshe evi omuo ya muzimbu uacili, linga njiuaneko vikuisulo viamo.

²⁴ Nkuma kumutantekeya ngueni vaka kushatuka voshe vakaliluisa, vuno honi umo lika ikeye akatambula vuana, nankuma neni shatukeni linga mukatambule vuana.

²⁵ Muka kuliluisa uoshe akalivuahesela mu vuima vioshe. Vakevo vaka cilingi linga vatambule cilongo cije ca kantsimbu lika, vuno honi yetu linga tukatambule cilongo ca yaye.

²⁶ Nankuma yange kunjekushatuka mua ngoco, kunjekulua na vinkome ngue uje apupa mu mpuzi,

²⁷ vuno honi yange njikakolesa muvila uange na vinkombe naku upuisa ndungo yange linga munima ya kuambulula ku vakuetu, linga yange vavenia keti njikahonoue kuuana fueto.

10

Vinangulo via ha Tumponia

¹ Vamuanetu njitonda linga mutantekeye nguange vakukuluila vetu voshe vakele muintsi lia lishelua, kaha voshe vahitile mu mema a kalunga.

² Kaha voshe va vambuitikile kuhitila muli Mosesa mu lishelua na mu mema a kalunga,

³ kaha voshe valile viakulia via kulifua viaku cimbembesi,

⁴ kaha voshe vanuine via kunua via kulifua viaku cimbembesi omuo vanuine mu Livue lia ku cimbembesi lije lia vaka vangeyele, kaha lije Livue liapuile Kilistu.

⁵ Cipue ngocovene Njambi kavuahelelele kuli vamo vavo, omuo vatsililile mu mpambo.

⁶ Honi evi viuma vinapu cinangulo kuli yetu, keti tushunguiye vupi ngue muje muvalingile vakevo.

⁷ Ketu mulemese tumponia ngue muje muvalingile vamo vavo, ngue muje muvacisoneka nguavo, "Vantu vatumamene mu kulia na kunua kaha vemanene mukukina."

⁸ Kutuapandele kulinga vupangala ngue muje vamo vavo valingile, kaha voshe makulukazi avala na vatatu vatsile litangua limo.

⁹ Kutuapandele kueseka Muene, ngue muje muvalingile vamo vavo kaha voshe vavashumine ku manoka na kutsa.

¹⁰ Kaha kutuapandele kulinienieta ngue muje muvalingile vamo vavo kaha vavanongesele kuli Mukakunongesa.

¹¹ Honi viuma viosevi evi vialingiuile kuli vakevo kupua ngue cinangulo, vuno honi vavisonekele kupua ngue vishika kuli yetu, omuo tuli na kuyoya ku ntsimbu ya mamanusulo.

¹² Nankuma nga kuli umo asinganieka nguendi asa kuimana ngoo kaha napade kuzangama linga keti aue.

¹³ Nacimo cahi ceseko civamieseka naco cije keti ca mualolo kuli muntu. Njambi uapua uakulongua, kaha kamitavesa linga vamieseke vieseko vije vipulakana nzili yeni, vuno honi asa kumieseka na ceseko cije casa nana kumisholueta na ngila ije imuasa kuteuelamo, linga muase kuimana ngoo nalukakateya.

¹⁴ Nankuma honi vamuanetu vanjazanga, teueni kulemesa tumponia.

¹⁵ Njilinakuhandeka ngue ku vantu vaje vana nanguka, kaha lisompeni yeni vavenia hali evi njili nakuhandeka.

¹⁶ Nganja ya cikuisulo ije tukakuisula, Nkuma keti kulipandakana mu maninga a Kilistu ndi? Kaha nkuma na mbolo ije tukapazula, Nkuma keti kulipandakana mu muvila ua Kilistu ndi?

¹⁷ Omuo kuakala lika mbolo imo, kaha netu vaje vavengi tunapu muvila umo lika, omuo tuvoshе tukali mbolo imo lika.

¹⁸ Singaniekeni ha vantu va mu Isaleli, nkuma keti vakevo vaje valipangele mu kulia vinkombelo via ha mutula ndi?

¹⁹ Nkuma vika njilumbununa honi? Nkuma via kulia vije vivakalambuila ku tumponia viasa kupua cili coshe, indi nkuma kamponia asa kupua cili coshe ndi?

²⁰ Kuahi vuno honi njilinakuhandeka ngeci vinkombelo vivaka lambuila vaje vaka kuhona kutsiliela vaka vilambuila ku mahamba keti kuli Njambi, kunjitondo nguange neni mukale hamo na mahamba.

²¹ Kumuasa kunuina mu nganja ya Muene kaha naua na kunnuina na mu nganja ya mahamba. Kaha kumuasa kulia ku mesa ya Muene kaha naua na kulia ku mesa ya mahamba.

²² Nkuma tuapande kulingisa Muene linga evue cipululu ndi? Nkuma yetu tuvakukolesa kupulakana ikeye ndi?

²³ "Viuma vioshe viakala na lishiko," Vuno honi keti viuma vioshe viapua vioseho. "Cilivene viuma vioshe viakala na lishiko," Vuno honi keti viuma vioshe vitungisa.

²⁴ Muntu uoshe keti atonde vucili vuendi, vuno honi atonde vucili vua kavusamba kendi.

²⁵ Lieni vioshe vije vivalandesela ku cihela cakulandesela ntsitu kuakuhona kuihula kuje kuvihuminina linga mitima yeni keti imihise.

²⁶ Omuo visoneka vihandeka nguavio, "Mavu apua a Muene, na viuma vioshe vije vilimo."

²⁷ Kaha nga umo ua vaje vakakuhona kutsiliela amilania ku kulia ca cinguezi, kaha mutonda kuya, kaha lien vioshe vije vivanamivuahesela cakuhona kuihula cihula ca kuje kuvihuminina linga mitima yeni keti imihise.

²⁸ Vuno honi nga muntu umo ahandeka kuli yeni nguendi, "Evi vanavil-ambula kupua nkombelo." kaha honi keti uvilie omuo ya mulonga ua uje uakulekele, na mulonga uavisinganieka viovie.

²⁹ Njilumbununa nguange visinganieka viendi keti vieni linga keti muvilie,

Omuo nkuma vika kupatuka cange vacisompa ha visinganieka via muntu ueka?

³⁰ Kaha nga citsantsela oku njilia, nkuma vati honi vahandeka hali yange viuma via vipi omuo yakuhana citsantsela?

³¹ Nkuma cipue mulia cipue munua cipue vioshe vimulinga, vilingeni vioshe ku vumpau vua Njambi.

³² Keti muhane mulonga kuli Vayunda cipue kuli Vangelengu cipue ku cikungulukilo ca Njambi,

³³ ngue muje munjili nakueseka kuvuahesela vantu mu viuma vioshe vinjili nakulinga, kunjekutonda vucili vuange vavenia lika, vuno honi vucili vua vavengi, linga vase kuovoka.

11

¹ Njitemunuiseni ngue muje yange munjikatemunuisa Kilistu.

Kufuika ku Mutue mu Kulemesa

² Njimishangazala yeni omuo mukanjivuluka mu viuma vioshe naku-tualelaho kukavangeya vilongesa ngue muje vene munja mihanenevio.

³ Vuno honi njitonda linga ngeci muvuisise ngeci mutue ua yala uoshe uapua Kilistu, kaha mutue ua mpuevo uapua yaliendi, kaha mutue ua Kilistu uapua Njambi.

⁴ Kaha yala uoshe uje alombela cipue anangula oku nafuiki ku mutue uendi, kaha kasingimikile mutue uendi.

⁵ Vuno honi mpuevo uoshe uje alombela cipue anangula cakuhona kulifuika ku mutue uendi kaha kasingimika mutue uendi, mucifua cimo vene vinkambu viendi ngue vanavitehula.

⁶ Vuno honi nga mpuevo kafuiki ku mutue uendi, kaha napande kutehula vinkambu viendi, vunoni nga cishaula kuli mpuevo kulitehula vinkambu viendi, kaha napande kuzala citambala.

⁷ Omuo yala kapande kufuika mutue uendi, omuo ikeye uapua cifua na vumpau vua Njambi, vunoni mpuevo uapua vumpau vua yala.

⁸ Omuo yala kuvamutangele kuhuminina kuli mpuevo, vunoni mpuevo vamutangele kuhuminina kuli yala.

⁹ Omuo yala kuvamutangelele mpuevo, vunoni mpuevo vamutangelele yala.

¹⁰ Omu mukemo mpuevo napande kuzala citambala ku mutue uendi omuo ya tungelo.

¹¹ Cipue ngocovene, muli Muene mpuevo kalimanena likaliendi kuakuhona yala kaha cipuevene yala kalimanena likaliendi kuakuhona mpuevo.

¹² Omuo ngue muje mpuevo vamutangele kuhuma hali yala, mucifua cimovene yala ikeye honi nasemuka kuli mpuevo. Kaha viuma vioshe viahuminina kuli Njambi.

¹³ Lisompeni yeni vavenia, nkuma cacili mpuevo kulombela kuli Njambi oku kalifuikile ku mutue ndi?

¹⁴ Nkuma keti ciyoyelo ca viuma cikeco camilongesa yeni ngeci nga yala ali na vinkambu vialaha evuisa shuama,

¹⁵ vunoni nga mpuevo ali na vinkambu vialaha, nkuma keti cikeco kulihalesa cendi ndi? Omuo vinkambu viendi vamuhanavio kupua kulifuika cendi.

¹⁶ Nga muntu uoshe atualelelaho lutue kulinga vimpata, kutuesi na cisemua ceka naua, cipue mu vikungulukilo via Njambi.

Mesa ya Muene

(Mateu26:26-29; Mako14:22-25; Luka22:14-20)

¹⁷ Vuno honi ha vishika vimo kunjimishangazala, omuo yeni nga muli-
uana hamo kaha kuliuana ceni kucekupua cacili vunoni cakupihisa.

¹⁸ Cakulivanga, omuo muli uana hamo hakupua cikungulukilo, njili-
nakuivua ngeci kuli mahangununo hhakati keni, kaha njili nakucitsiliela.

¹⁹ Cilivene hanapande kukala lihangununo hhakati keni linga vavatan-
tekeyeleho vaje vali na vusunga.

²⁰ Kaha omo muli uana hamo, keti ngue muli nakulia mesa ya Muene.

²¹ Kaha omuo muli na kulia, muntu na muntu ali nakuya kulutue na via
kulia viendi, kaha mukuavo natsi njala mukuavo ikeye napende.

²² Vika! Nkuma kumuesi na vinjivo via kulilamo na via kunuinamo
ndi? Cipue nkuma mukasembulula cikungulukilo ca Njambi nakuvuisa
shuamua vaje kuvesi na cimo ndi? Nkuma vika honi njikahandeka kuli
yeni? Nkuma njimishangale mu cuma eci ndi? Houe kunjilingimo.

²³ Omuo vije vinjatambuile kuli Muene vikevio vije njamihanene yeni,
ngeci Muene Yesu ha vutsiki vuje omo vamuendele vungungu uambatele
mbolo,

²⁴ kaha hanima yakuhana citsantselo, uambatele mbolo na kuipazula na
kuhandeka nguendi, "Ou ukeuo muvila uange uje uvanamihana yeni, kaha
lingeni eci mukunjivuluka."

²⁵ Mu ngila imo vene uambatele nganja naua hanima ya mesa kaha
uahandekela nguendi, "Eyi nganja inapu litavasano lialiha mu maninga
ange. Lingeni eci ntsimbu yoshe omo munuinamo mukunjivuluka."

²⁶ Omuo ntsimbu yoshe muli na kulia eyi mbolo na kunuina mu nganja eyi, kaha mukulinga eci muli nakuhana vukaleho vua kutsa ca Muene noho akeja.

²⁷ Nankuma uoshe uje alia mbolo cipue anua ku nganja ya Muene kuakuhona kasingimiko ali na mulonga ua upi uakuluisa muvila na maninga a Muene.

²⁸ Eceleni muntu uoshe alihilule ikeye vavenia, ntsimbu kanda alie mbolo na kunuina mu nganja.

²⁹ Omuo muntu uoshe uje alia na kunua kuakuhona kutantekeya muje vika uje muvila ualia na nganja ije yanuina, kaha alinehela kusompa hali ikeye vavenia.

³⁰ Omu mukemo vuingi vueni muazeye na kuvavala, kaha vamo vanatsi.

³¹ Vuno honi nga tulisompa yetu vavenia mu vusunga, kaha kuvapandele kutusompa.

³² Vuno honi nga vanatusompo kuli Muene, kaha vanatuhaka mu ngila ya cili linga keti vatuhisile hamo na vaka mavu.

³³ Nankuma vamuanetu nga muliuana hamo mu kulia, litateleni umo na mukuavo,

³⁴ nga kuli umo natsi njala napande kulila ku njivo yendi, linga honi omo muliuana hamo keti linga vamihiye, kaha ha viuma vikuavo njikahana vishika omuo njikeja.

12

Vuana vua kuhuminina kuli Cimbembesi Uakulela

¹ Vamuatetu kuya ha mavuana a cimbembesi, kunjitondo linga mukale kunzimba.

² Muatantekeya ngeci omo muapuile vaka kuhona kutsiliela, kaha vintsimbu viavingi vamtanganesele na kumizimbalesa ku tumponia vatu-veveve.

³ Nankuma njitonda nguange mutantekeye nguenu naumo uahi uje asa kuhandeka mu Cimbembesi ca Njambi evi nguendi, "Yesu asingue!" kaha naumo uahi naua asa kuhandeka nguendi, "Yesu ikeye Muene," kuakuhona Cimbembesi Uakulela.

⁴ Vuno honi kuli mavuana akuliseza seza, vuno honi Cimbembesi uapua umo lika.

⁵ Kaha kuli vipangi viakuliseza seza, vuno honi Muene uapua umo lika.

⁶ Kaha kuli muakupangela muakuliseza seza, vuno honi Njambi umo lika ikeye akavituanene viosehe kuli uoshe.

⁷ Ku muntu na muntu vanamuhana vukaleho vua Cimbembesi omuo ha vuima viacili.

⁸ Ku umo vanamuhana kuhitila mu Cimbembesi ca muzimbu ua mana, kaha mukuavo vanamuhana mangana kuya ku Cimbembesi uje vene ua kulifua.

⁹ Ueka vanamuhana lutsilielo kuli Cimbembesi uakulifua, kaha mukuavo vanamuhana vuana vua kukanguisa kuli Cimbembesi ujevene umo lika.

¹⁰ Kaha kuli mukuavo vanamuhana vinzili via vikomoueso, mukuavo vanamuhana kuambulula vunanguizi vua Njambi, mukuavo vanamuhana mana akunongonona vifua via vimbembesi, kaha mukuavo vanamuhana kuhandeka mu vindaka via kuli sezaseza, kaha naua ueka vanamuhana kunungulula vindaka.

13

Cizango

¹ Kaha nga njihandeka mu vindaka via vantu cipue na via tungelo, vuno honi kunjesi na cizango, kaha njinapu lika ngue kutenda ca ngongi cipue kuohia ca ngenzo.

² Kaha nga njili na nzili ya vunanguizi, na kuvuisisa vushueke vuoshe na mana oshe, kaha nga njili nalutsilielo luoshe luje luasa kuumisa minkinda, vuno honi kunjesi na cizango kaha njinapu uangoco.

³ Kaha nga njihana vioshe vije njili navio, kaha naua nga njilihana muvila uange linga vautsimike, vuno honi kunjesi na cizango kaha nacimo cahi cinjiuanaho.

⁴ Cizango capua kusimpa na ngozi, cizango kucapuile cipululu cipue kulihalesa,

⁵ kucekushaula cipue kulivua, cizango kucekulilinga cikeco vavenia, cipue kuniengua, kucakele nankulundundu.

⁶ Cizango kucekuvuahelela ha viuma via vupi, vuno honi cikavuahelela ha viuma via vusunga.

⁷ Cizango cakala na viuma vioshe, cakala na lutsilielo ku viuma vioshe, cikatsiliela viuma vioshe, kaha cakala na lukakateya ku vuima vioshe.

⁸ Cizango kucekuhua, vuno honi vunanguizi vukahita lika, nakuhandeka mu vindaka kuoshe kukahua, kaha na mana nauo akahita lika.

⁹ Omuo mana etu keti a kusungama kaha na vunanguizi vuetu keti vua kusungama,

¹⁰ vuno honi omo viakusungama vikeja, kaha vije via kuhona kusungama vikahua.

¹¹ Omuo njapuile nji kanike, njapuele nakundeka ngue kanike, njakele nakusinganieka ngue kanike, njakele nakulinga viuma ngue kanike, vuno honi omo njakolele kupua yala njalikelele kulinga viuma via vuanike.

¹² Omuo hano honi tulinakumona lika vuima ngue tuli nakavimona muka likengelo, ambahoni tukamona mesho na mesho. Kaha vije njatan-tekeya hano vinapu viavindende, vuno honi njikevuisisa muakushula, cipuevene njavivuisisa laja mukushula.

¹³ Nankuma lutsilielo, na kutsiliela na cizango, ha viuma evi vitatu vuoshe, vuno honi cakamaho hali evi vioshe capua cizango,

14

Mavuana akuavo naua a Cimbembesi

¹ Kavangenyi ngila ya cizango na kushunguiya cikuma mavuana a cimbembesi, cikuma kuma mavuana a nangula vunanguizi.

² Omuo umo uje kahandeka mu vindaka kekuhandeka ku vantu vuno honi akahandeka kuli Njambi, omuo naumo uahi asa kumuivuisisa, vuno honi ahandeka viuma via vushueke mu Cimbembesi.

³ Mu ngila ikuavo naua, uje ahandeka vunanguizi akahandeka ku vantu mu kuvakolesa naku vasimpisa na kuvazembeleka.

⁴ Uje uoshe akahandeka mu vindaka akalikuasa ikeye vavenia lika, vuno honi uje muka kuhandeka via vunanguizi ikeye akakuasa cikungulikilo.

⁵ Honi njitonda linga muva voshe muhandeke mu vindaka, vuno honi cakama cikuma njitonda nguange munangula. Uje anangula ali cikuma na seho kupulakana uje ahandeka mu vindaka, kuvanga nga kuli umo uje anungulula vije via handeka, linga vikuase cikungulukilo coshe.

⁶ Honi vamuanetu nga njija kuli yeni oku njihandeka mu vindaka, kaha nkuma honi njikamikuasa vati kuvanga mpamo njiminehele kusholuela cimo cipue mana cipue vunanguizi cipue vilongesa.

⁷ Nga cipuevene viakuimbisa vije viakuhona muono vije ngue mbendo cipue kalialia, nga kuviohuo muacili, kaha nkuma muntu asa kutantekeya vati vije vivemba?

⁸ Kaha nga lupembo kuluohuo muacili, nkuma iya honi asa kuli vuahe-sela nzita?

⁹ Mucifua cimo vene neni naua nga muhandeka mu vindaka vije kuvivuika, nkuma vati honi muntu umo asa kutantekeya vije muhandeka? Omu mukahandekela lika mu mpunzi.

¹⁰ Cilivene hano ha mavu hali miyati yaingi ya kuliseza, vuno honi yoshe ili naseho.

¹¹ Vuno honi nga kunjitantekeya muje vije viulumbununa uje muyati, kaha njikapua nji mungezi kuli uje ahandeka kaha na uje ahandeka akapua mungezi kuli yange.

¹² Mu ngila imovene neni naua omuo muli nakutonda cikuma vije vivihandeka cimbembesi, asekeneni kutonda mavuana aje atunga cikungulukilo.

¹³ Nankuma, uje ahandeka mu vindaka napande kulomba nzili ya kunungulula.

¹⁴ Omuo nga njilombela mu vindaka, cimbembesi cange cilombela vuno honi mana ange ali kuvieka.

¹⁵ Nkuma njilinge vika honi? Njikalombela na cimbembesi kaha naua njikalombela na mana, kaha njikemba na cimbembesi kaha naua njikemba na mana.

¹⁶ Ketu ngoconi nga mushangazala Njambi na cimbembesi, nkuma vati honi muntu uje ahuminina kuka ahandeke nguendi "Ameni" ku kutsantsela ceni? Omuo ikeye katantekeya vije muli nakuhandeka.

¹⁷ Omuo yeni muasa kuhana citsantselo ceni muacili cikuma, vuno honi veka kucivakuasa cipue cimo.

¹⁸ Njitsantsela kuli Njambi ngeci njikahandeka mu vindaka cikuma kupulakana yeni voshe.

¹⁹ Vuno honi lika mu cikungulukilo njapande kuhandeka lika mezi atanu na mana ange linga ngeci njituamenene vakueto kupulakana kuhandeka mezi makulukazi (1 0 0 0) mu vindaka.

²⁰ Vamuanetu, keti mupue ngue vanike mukusinganieka ceni, pueni tukeke mu viuma via vipi, vuno honi kusinganieka ceni cipue ca vukuluntu.

²¹ Muvisoneka vanasoneka ngeci,

Muene nahandeka nguendi,

"Kuhitila mu vantu vakuhandeka vindaka via vungezi

Na kuhitila mutunua tuavangezi.

Mukemo njikahandeka ku vantu ava,

vuno honi cipue ngoco kuvakanjivuila."

²² Kaha kuhandeka mu vindaka keti cimueso ca vaka kutsiliela vuno honi ca vaka kuhona kutsiliela, kaha vunanguizi keti vuavakakuhona kutsiliela vuno honi vua vakakutsiliela.

²³ Nankuma nga cikungulukilo coshe cilikunguilila hamo na kuhakan-deka mu vindaka, kaha vantu veka cipue vakakuhona kutsiliela vakovela, nkuma kuvakahandeka nguavo muazaluka indi?

²⁴ Vuno honi nga voshe vahandeka vunanguizi, kaha uje mukakuhona kutsiliela cipue muntu uje ahuminina kuka akovela, voshe vakatsiliela nguavo cilivene muka vupi kaha voshe vaka musopa nguavo mukavupi,

²⁵ kaha vushueke vua mutima uendi vakavusholola, kaha akatsikama a mavuli nakulemesa Njambi, nakulitavela nguendi, "Muavusunga Njambi ali hakati keni!"

Kasingimiko mu Cikungulukilo

²⁶ Nkuma vika honi tukahandeka vamuanetu? Omuo mukaliuana hamo kaha umo na umo ueni ali na muaso, mukuavo ali na cilongesa, mukuavo ali na kusholola, mukuavo ali na kuhandeka mu vindaka, cipue mukunungulula, kaha viuma viose evi vavilinge mu kukuasa cikungulukilo.

²⁷ Nga muntu umo ahandeka mu vindaka, kaha kukale vavali cipue vatatu vahandeke kaha umo na umo napande kuhandeka anstimbu yendi, kaha umo anungulule.

²⁸ Vuno honi nga kukuesi umo uje anungulula kaha vose vanapande kuholoka mu cikungulukilo, kaha napande lika kuhandeka kuli ikeye vavenia na kuli Njambi.

²⁹ Aceleni vavali cipue vatatu tunanguizi va Njambi vahandeke, kaha vakuavo vanapande kuhilula vije vivalinakuhandeka.

³⁰ Kaha nga kusholola vanacimuesa kuli mukuavo uje natumama kuyehi, kaha uje mukakuhandeka uakulivanga napande kuholoka.

³¹ Omuo muvavoshe muasa kuhandeka vunanguizi umo na umo, linga vose valilongese na kulitakamesa.

³² Kaha cimbembesi ca tunanguizi va Njambi cakala muintsi lia tunanguizi va Njambi.

³³ Omuo Njambi keti Njambi uampindangano vuno honi uapua ua ciyulo. Ngue muvikungulukilo viose via vantu va Njambi vakulela,

³⁴ vampuevo vanapande kuholoka mu vikungulukilo. Omuo kuva-vatavesele kuhandeka vuno honi vanapande kuononoka ngue muje mulihandeka lishiko.

³⁵ Nga kuli vimo vije vashunguiya kutantekeya, vanapande kuihula va yaliavo ku vinjivo viavo. Omuo cinapu cuma ca shuamua cikuma mpuevo kuhandeka mu cikungulukilo.

³⁶ Vati! Nkuma lizi lia Njambi lihuma kuli yeni indi? Cipue nkuma kuli yeni lika liezile indi?

³⁷ Nga uoshe asinganieka nguendi ikeye napu kananguizi ua Njambi, cipue ali na vuana vua cimbembesi, napande kunanguka ngeci evi njilinakusoneka kuli yeni vinapu lishiko lia Muene.

³⁸ Kaha nga muntu katantekeyele evi, kaha nendi naua kuva kamutan-tekeya.

³⁹ Ngeci vamuanetu, shunguiyeni kuhandeka vunanguizi, vuno honi keti muvindike vaje vahandeka mu vindaka.

⁴⁰ Vuno honi vuima viose viapande kulingiua muacili na muje muviaiamo.

15

Kusanguka ca Kilistu

¹ Honi vamuanetu njimivulukisa nguange mucifua muka muje njambu-luile kuli yeni muzimbu uacili, uje umuatambuile, uje umunemana naho,

² uje umunovoka nauo, nga mukakateya ku lizi lije njambu-luile kuli yeni. Keti ngoconi muatsiliela muangoco.

³ Omuo vije njatambuile njavihanene kuli yeni kupua via kulivanga via seho, ngeci Kilistu uatsililile vipi vuetu, kuya muje muvihandekelamo visoneka,

⁴ nguavo vamutsindile, kaha vamusanguile ha litangua lia mucitatu kuya muje muvihandekelamo visoneka,

⁵ kaha ngeci uasholokele kuli Kefase, ambahoni kuli vaje likumi na vavali.

⁶ Ambahoni naua uosholokele kuli vamuhanetu vavengi kupulakana vihita vitanu (500) a ntsimbu imo lika, vamo vavo vacili nakuyoya, vuno honi cipuevene vamo vanatsi.

⁷ Ambahoni uosholokele kuli Tiango, ambahoni na ku tunganda voshe.

⁸ Kaha hakumanusuila ku viuma vioshe ambahoni uasholokele na kuli yange naua uje uasemukile vuvishu.

⁹ Omuo yange njinapu uamundende ku tunganda, uje kafuila kumutum-bula kanganda, omuo yange njayandesele cikungulukilo ca Njambi.

¹⁰ Vuno honi omuo ya kavumbi ka Njambi mukemo njili muje munjilimo, kaha kavumbi kendi hali yange kukapuile kangoco. Cipue ngoco, njapan-gele cikuma kupulakana voshe, cipuevene keti yange, vuno honi kavumbi ka Njambi kaje kali nange.

¹¹ Cipuevene nguavo yange cipue vakevo, nankuma yetu tuambulula kaha yeni honi muatsilieele.

Kusanguka ca Vatsi

¹² Honi nga Kilistu vamuambulula nguavo vamusanguile ku vatsi, nkuma kuija vati ngeci vamo veni vahandeka nguavo kukuesi kusanguka kuvatsi?

¹³ Vuno honi nga kukuesi kusanguka ku vatsi, kaha ngue Kilistu kuvamusanguile.

¹⁴ Nga Kilistu kuvamusanguile, ambahoni kuambulula cetu cinapu ca ngoco kaha na lutsilielo lueni lunapu lua ngoco.

¹⁵ Kaha tunauaniua nguetu kutuesi nakuimanena Njambi muacili, omuo tuahanene vukaleho vua Njambi ngeci uasanguile Kilistu, nga cilivene vatsi kuvakasanguka kaha na Njambi vene kasanguile Kilistu.

¹⁶ Omuo nga vatsi kuvakasanguka, kaha na Kilistu naua kuvamusanguile.

¹⁷ Nga Kilistu kuvamusanguile, kaha kutsiliela kueni kunapu kuangoco kaha hangavene mucili mu vipi vueni.

¹⁸ Ambahoni na vaje naua vanatsila muli Kilistu vananongo.

¹⁹ Nga omuo ya vuyoye ovu lika tunatsiliela muli Kilistu, kaha hali voshe, yetu vanapande kutuivuila cikuma ngozi.

²⁰ Vuno honi muavusunga vene Kilistu vamusanguile ku vatsi, vushuka vuakulivanga kuli vaje vanatsi.

²¹ Omuo kuihitila mu muntu mukemo kutsa cezile, kaha muli muntu naua mukemo muhuminina kusanguka ca vatsi.

²² Omuo kuhitila muli Andama vantu voshe vatsa, mucifua cimovene naua kuhitila muli Kilistu vantu voshe vakayoya.

²³ Vuno honi umo na umo akasanguka kuya mungila yendi, Kilistu ikeye vushuka vua kulivanga, kaha omuo akuija kuendi vaje vanakundama muli Kilistu.

²⁴ Ambahoni kuija ma manusuilo, omuo Kilistu akahana vumuene kuli Njambi Tate hanima yakunongesa lishiko lioshe na nzili yakama yoshe na nzili.

²⁵ Omuo napande kuyula kuvanga noho nahaka vitozi viendi vioshe muitsi lia viliato viendi.

²⁶ Kaha citozi ca kumanusuila kunongesa cikapua kutsa.

²⁷ Omuo Njambi nahaka viuma vioshe linga vipangele muitsi lia viliato viendi, vuno honi omuo visoneka vihandeka nguavio "Viuma vioshe

navihaka linga vipangele muitsi liendi," Calimuesa cilivene ngeci kucakundamene kuli Njambi, uje aka viuma vioshe muitsi lia Kilistu.

²⁸ Omuo viuma vioshe vanavihaka kuli ikeye, ambahoni na muana ikeye vavenia akalihana kuli uje nahaka viuma vioshe muitsi liendi, linga Njambi apue cuma coshe kuli muntu uoshe.

²⁹ Honi nkuma vantu va lumbununa vika omo vavambuitika nguavo kuimanene vatsi? Nga vatsi vekevo kuvakasanguka, Nkuma vati vantu vavambuitika mukuvemanena?

³⁰ Nkuma vika njili mu makalu ntsimbu yoshe?

³¹ Vamuanetu njili nakuluisa kulihalesa cange hali yeni cije njili naco muli Kilistu Yesu muene yetu, njikatsi ha litangua na litangua!

³² Vika njiuanaho nga njihandeka mu vuntu nguange, njaluile na vikashama ku Efeso, nga vakakutsa kuvakasanguka, "kaha tuyeni tulie na kunua omuo imene tutsa."

³³ Ketu vamikuisse "omo vantu vavapi vapihisa visinganieka viacili."

³⁴ Hilukeni kuvisinganieka vieni via cili, kaha ketu mukalingeho vupi naua, omo vamo kuvesi na mana a Njambi njihandeka eci na shuamua yeni.

Kusanguka ca muvila

³⁵ Vuno honi umo akehula nguendi, "Nkuma vakakutsa vakavasanguka vati? Kaha namuvila uacifua muka vakeja nauo?"

³⁶ Yeni vantu vavilema vije mukuna kuvie kuija ku muono kuvanga noho vinatsi.

³⁷ Kaha vije vimukakunu ketu ukeuo muvila uje ukakalako, vuno honi nona, yatiliku cipue nona yacili yoshe.

³⁸ Vuno honi Njambi akahana mivila kuya muje muanahanguilamo, kaha ku nona na nona ili yoshe na muvila uayo.

³⁹ Omuo ketu mivila yoshe yapua ya kulifua, vuno honi kuli umo uacifua ca vantu, mukuavo ua tusitu ukuavo ua tuzila kaha na ukuavo ua vantsi.

⁴⁰ Kaha kuli mivila ya muilu na mivila ya ha mavu, vuno honi vumpau vua muilu vuapua vumo, kaha vumpau vua ha mavu vuapua vueka naua.

⁴¹ Kuli vumpau vumo vua litangua, kaha vukuavo vumpau vua ngonde, kaha vukuavo naua vumpau vua vitangatanga, omo tangatanga ya liseza ku tangatanga ikuavo mu vumpau.

⁴² Nankuma omo mukemove ne mucinafu na kusanguka ca vatsi. Omo cije civanakunu cikanonga, vuno honi cije civasanguka kucikanongo.

⁴³ Vaukuna kua kuhona kasingimiko, kaha vasanguka mu vumpau, kaha naua vaukuna mu kuzeya, vuno honi vasanguka mu nzili.

⁴⁴ Vakautsindi oku ucili muvila ua vuntu, vuno honi vakausanguka uku uli mu cimbembesi, kaha nga kuli muvila ua vuntu, kaha kuli na muvila ua cimbembesi naua.

⁴⁵ Nankuma vacisoneka ngeci, "Yala uakulivanga Andama, uapuile muntu uakuyoya," vuno honi Andama uamamanusuilo uapuile muntu uakuyoya uakuhana cimbembesi.

⁴⁶ Vuno honi ketu via ku cimbembesi viapua via kulivanaga, vuno honi via vuntu, kaha ambahoni via ku cimbembesi.

⁴⁷ Muntu uakulivanga uahumininine a mavu, uje muntu uakuhuma mpumputa, kaha muntu uamucivali uahumine muilu.

⁴⁸ Ngue muje uapuile muntu ua kuhuma ku mpumputa, mukemo vene muvanafu na vaje vahuma ku mpumputa, kaha ngue muje naua muanapu

muntu uje uakuhuma muilu, mukemo vene muvanafu na vaje vahuma muilu.

⁴⁹ Ngue mujevene mutunasemuka ku cifua ca muntu uje uahumine ku mpumpupa, mukemo vene naua tukakala na cifua ca muntu uje uahumine muilu.

⁵⁰ Vamuanetu njimileka evi nguange muvila na maninga kuviasa kusuana vumuene vua Njambi, mucifua cimovene cipue cuma cije casa kunonga kucasa kusuana cuma cije kucenonga.

⁵¹ Taleni, njilinakumileka vushueka, tuvavoshe kutukatsi, vuno honi tu vavoshe vakatuhimpula.

⁵² Mukantsimbu lika ngue muje mulikakapula lisho, aluneta yamanusuilo. Omuo luneta lunkoya, kaha vatsi vakavasangula, kuakuhona kunonga naua, kaha vaka tuhimpula.

⁵³ Omuo muvila ou uakunonga unapande kuzala uje uakuhona kunonga, omuo muvila ou ua kutsa unapande kuzala uje uakuhonoua kutsa.

⁵⁴ Omuo cije cakunonga nga cizala cije cakuhonoua kunonga kaha cije cakutsa nga cizala cije cakuhona kutsa ambahoni cilishulisise kuhandeka cije civasasoneka nguavo, "Kutsa vanacimanusula mu kuhiana!"

⁵⁵ "Tala kutsa, nkuma kuhiana cove cili kuli?"

Tala kutsa, vusungu vove vuli kuli?"

⁵⁶ Vusungu vua kutsa vuapua vupi, kaha nzili ya vupi yapua lishiko lia Mosesa.

⁵⁷ Vuno honi tutsasela kuli Njambi uje akatuhana kuhiana kuhitila muli Muene uetu Yesu Kilistu.

⁵⁸ Nankuma vamuanetu vange vanjazanga, imaneni ngo kuakuhona kulininganga. Ntsimbu yoshe pangenzi na nzili mu vipangi via Muene, kumuntatekeya ngueni vipangi vieni vije muli nakupanga muli Muene kuviyi muangoco.

16

Mulambu uakukuasa vaka Kutsiliela

¹ Honi kuya ku vipande viakukuasa vantu va Njambi vakulela, ngue muje munjashikilile vikungulukilo viaku Ngalatiya, ngecivene neni munapande kucilinga.

² Lia calumingu na calumingu, umo ku umo ueni napande kutulikako cuma cimo kumukulo, ngue muje mumunaselamo, linga omo njikeya keti kukakale naua vije viakukuasa.

³ Kaha omo njiheta, njikatuma vaje vamunahangula namikanda linga vakambate vuana vueni ku Yelusalema.

⁴ Nga cimuesa ngeci nange naua njinapande linga njiyeko, kaha vakaya hamo nange.

Matumbe a Paulu

⁵ Njikamimeneka hanima yakuhita mu Masendoniya, omuo yange njinapande kuhita mu Masendoniya,

⁶ kaha njikakala neni cipue ku ntsimbu ya cisika, linga honi mukanjikuase muvuasi muvungezi vuange koshe kuje kunjikaya.

⁷ Omuo kunjitondo kumimona lika na kumihitilila kuahi, vuno honi njatsilila kukala neni mu vintsimbu, nga Muene acitavesa.

⁸ Vuno honi njikakala mu Efese noho ha litangua lia Pantekosita.

⁹ Omuo vananjishokuelela cikolo cakama cakupanga vipangi viacili, kaha vavengi vakakunjiluisa.

¹⁰ Omuo Timateo a keja, munapande kumutambula muacili hhakati keni, omuo ali nakupanga vipangi via Muene, ngue yange.

¹¹ Nankuma keti kukale umo amuyengule, mukuaseni vuasi muvungezi vuendi mu ciyulo, linga ahiluke kuli yange, omuo njamuvandamena hamo na vamuanetu.

¹² Kaha ali muanetu Apolo, ntsimbu yoshe njikamusindiya cikuma linga akeje nakumimeneka hamo na vamuanetu vakuavo, vuno honi te keti cizango cendi kuija vuavuno vene, vuno honi akeja omo akauana ntsimbu.

Mezi amamanusuilo

¹³ Taleleni, imanene ngo mulutsilielo lueni, mpueni vaka kusimpa, mpueni vaka kukolesa.

¹⁴ Eceleni vioshe vije vimulinga muvilinge mu cizango.

¹⁵ Vamuanetu honi muatantekeya ngueni, ntanga ya Setefanase ikeyo yapuile ya kulivanga kutenguluka mu Akaya, Kaha valihana vakevo vavenia kuvipangi via vantu va Njambi vakulela,

¹⁶ kaha njimilambelega ngeci mukave vantu ava na kuli va kakupanga vakuavo na vakakuhundangana hamo navo.

¹⁷ Njavuahelele cikuma hakuija ca Setefanese na Fotunatase na Akaikase, omuo vakevo vanapumo mukunjikuasa omo yeni muvahiko.

¹⁸ Omuo vanavuahelesa cimbembesi cange, neci ceni naua. Vantu vanga cije vanapande kuvanuka naua.

¹⁹ Vikungulukilo via ku Asiya viatuma vihindu. Akuila na Pilisila, hamo lika na cikungulukilo ca mu njivo yavo, vamimeneka muli Muene.

²⁰ Vamuanetu vanamimeneka. Lihinduiseni umo na mukuavo nakulitsemba ca kulela.

²¹ Yange Paulu njili nakusoneka vihindu evi na livoko liange vevenia.

²² Nga uoshe kesi na cizango hali Muene, vamousinge! Muene uetu Ija!

²³ Kavumbi ka Muene Yesu kakale neni.

²⁴ Cizango cange cikale neni mu va voshe muli Yesu Kilistu. Amen.

Mukanda ua mucivali ua Paulu kuli vaka KOLINTE Citsindikisi

¹ Mukanda uakuhuminina kuli yange Paulu, kanganda ua Kilistu Yesu ku cizango ca Njambi, njili na Timateo muanetu.

Tulinakusonekela ku cikungulukilo ca Njambi cije cili ku Kolinte, naku vantu va Njambi vakulela voshe vaje vali mu Akaya muoshe.

² Kavumbi na ciyulo vikale kuli yeni vije vihumina kuli Njambi Tatetu na Muene Yesu Kilistu.

Paulu ahana Citsatselo kuli Njambi

³ Tushangazala Njambi Ishe ya Muene uetu Yesu Kilistu, Tate ua cikeketima, ikeye Njambi kuje kukahumu vukuasi vuoshe!

⁴ Ikeye mukakutuzembeleka mu tuyando tuetu tuoshe, ngeci netu linga tuase kuzembeleka vaje vali mu tuyando tuakuliseza seza, na kuzembeleka cije kuatuzembeleke naco yetu ca kuhuminina kuli Njambi.

⁵ Ngue muje mutukalipangela mu vuingi mu tuyando tua Kilistu, mukumuo vene naua tuli nakulipangela mu vuingi mu vukuasi vua Kilistu.

⁶ Nga tuyanda, tuyandela kuzembeleka na kuovoka ceni, cipue nga vatuzembeleka kaha neni naua vamizembeleke, kuzembeleka cije cimihela lukakateya na kusimpa mu tuyando tuakulifua tuje tutulinakuyanda netu naua.

⁷ Nankuma, kutsiliela cetu muli yeni cakolo, omuo tuatantekeya ngueta ngue muje mutuli nakulipangela hamo mu tuyando tuetu, mukemuo naua vene mutukalipangela hamo mukuzembeleka cetu.

⁸ Vamuatetu omuo kututondo linga mukale kunzimba ha tuyando tuje tuahitilemo tele tuli mu Asiya. Omuo tuakele mulamba cikuma, ngeci kutuakele nakutsiliela ngueta tukayoya naua.

⁹ Tuayonguele ngueta kutsa vene vacihakele hali yetu, vuno honi eci calingiule ngeci keti tulitsilie yetu vavenia, vuno honi kuvanga kuli Njambi lika uje muka kusangula vatsi.

¹⁰ Uatuhumisile mu vushonde vuakama vua kutsa, kaha akatuovola, hali ikeye tunahaka kutsiliela cetu ngeci akatuovola naua.

¹¹ Neni naua munapande kutukuasa na malombelo eni ngue muje muli nakutukuasa ha malombelo eni akutulombelela, linga vavengi vakahane citsatsela omuo yetu na omuo ya cikuitsulo civatuhanene yetu cinapu cikumbululo ku malombelo amengi.

Paulu Atengulula matumbe endi

¹² Omuo kulihalesa cetu kuokekua oku, vukaleho vua visinganieka vietu via kuyoya cetu hano ha mavu, kaha cikuma vene na hali yeni, nakulela na vusungu vuakuhuma kuli Njambi keti na mana a vuntu kuahi vuno honi na kavumbi kakuhuma kuli Njambi.

¹³ Omuo tukamisonekela lika vije vimuasa kutanda na kuvuisisa. Kaha njitsiliela ngeci mukaviuvuisisa mukushula.

¹⁴ Ngue muje mumunovuile ku vimo, ngeci muapande kulihalesa omuo yetu kaha netu naua tulihalesa omuo yeni ha litangua lije lia Muene uetu Yesu.

¹⁵ Omuo cilivene njavitantekeye viuma evi, njatondele kuija kuli yeni hakulivanga linga ngeci muvuahalele luvali.

¹⁶ Njatondele kumimenekela ha vungenzi vuange vuakuya ku Masendoniya, kaha naua nahakuhilukamo kuhuma ku Masendoniya, ngeci njiuane ngila yakunjikuasa ha vungenzi vuange vuakuya ku Yundeya.

¹⁷ Omo njatondele kulinga eci, nkuma njakele na mitima ivali ndi? Cipue nkuma njikalingi matumbe ange ngue vaka mavu vaje valivuahelela kuhandeka nguavo “Eyo,” na “kuahi,” ha ntsimbu imolika ndi?

¹⁸ Ngue muje cilivene Njambi uapua uakulongua, lizi lietu kuli yeni kuliapuile, “Eyo” na “kuahi.”

¹⁹ Omuo Yesu Kilistu Muna Njambi, uje ituambulule hhakati keni, kuli yange na Silase na Timateo, kapuile “Eyo” na “kuahi” vuno honi muli ikeye ntsimbu yoshe muakala lika “Eyo,”

²⁰ Omuo vikulaheso vioshe via Njambi vikauana “Eyo” yavio muli ikeye. Omuo ha cuma eci mukemo tukahandeka “Ameni,” kuhitila muli ikeye ku vumpau vua Njambi.

²¹ Vuno honi Njambi ikeye akatukolesa ngo muli Kilistu, na kutuvuavesa yetu.

²² Nahaka kapateso kendi hali yetu, na kutuhana Cimbembesi cendi mu mitima yetu kupua ngue vikulaheso vije vianatutulikila kulutue.

²³ Vuno honi njitumbula Njambi kupua mukaleho uange, atantekeya mutima uange! Mu ngila ya kumitetela njayonguele ngeci keti njiye ku Kolinte.

²⁴ Keti ngue tuli nakumisindiya vije vimunapande kutsiliela kuahi, tulinakupanga hamo neni omuo yanzolela yeni, omuo yeni munemana ngoo mu lutsilielo lueni.

2

¹ Omuo, njayonguele mu mutima uange nguange kunjikejaho naua kuli yeni nakumiuvuisa kupihia ku mitima.

² Omuo nga njikamiuvuisa kupihia, kaha iya naua akanjivuisa kuvuahelela nkuma keti vakevo vene vaje vanjinovuisa kupihia ndi?

³ Kaha njasonekele ngue muje vene munjasonekelelemo, linga omuo njikeja keti njikakale mulamba kuli vaje vanapande kunjivuahahelela, omuo njamitsiliela yeni voshe, ngeci nzolela yange ikeyo vene nzolela yeni muvavoshe.

⁴ Njamisonekelele nakupihilila cakama cikuma na kulinienga mu mutima na misozi yaingi, ngeci keti njimipihise ku mutima, vuno honi linga mutantekeye cizango cakama cije cinjakala naco hali yeni.

Kumukonekela uje Navulumuna

⁵ Vuno honi nga umo na vulumuina mukuavo, kavulumuinine cikuma yange ngue muje muanavulumuina yeni voshe, omuo kunjatondele ngeci njipue uamukalu kuli ikeye.

⁶ Omuo eci cinapumo kuli muntu uje ivanahana kashitiko kuli vantu voshe vavengi.

⁷ Kaha naua cipue ngocovene munapande kumukonekela na kumuzembeleka, keti ngoconi akakala na vusiua cikuma.

⁸ Nankuma njimilomba nguange mu mumuese cilivene nkumani muamuzanga.

⁹ Omuo eci cikeco canehesele linga njisoneke uje mukanda, ngeci njase kumieseka na kumona nga yeni muononoka mu vioshe.

¹⁰ Muntu uoshe uje imukonekela nange naua njimukonekela, kaha vije vinjinakonekela, nga njakonekela vioshe kaha cinapu omuo yeni ku mesho a Kilistu,

¹¹ linga Satana keti atuhiane, omuo yetu kutuesi kunzimba namatumbe endi.

Kulishoshomuena ca Paulu mu Tolouasi

¹² Omo njaile ku Tolouasi na kuambulula muzimbu uacili ua Kilistu, vanjishokoluelele cikolo kuli Muene.

¹³ Vuno honi njaliniengele cikuma omo kunjauanene muanetu Tito kuje. Nankuma njavasezele, nakutualelelaho kuya ku Masendoniya.

Kuhiana kuhitila muli Kilistu

¹⁴ Vuno honi njitsantsela kuli Njambi, uje kuitila muli Kilistu ntsimbu yoshe akatutuamenena yetu mu kuhiana, kaha kuhitila muli yetu akashanduola luengo luacili lua mana endi kuoshe.

¹⁵ Omuo tuapua ngue luengo luacili lua Kilistu kuli Njambi hhakati kavaje vali na kuovoka na hhakati kavaje vali nakunonga.

¹⁶ Kaha kuli vamo napu luengo liakuhuma kukutsa nakuya kukutsa, kaha ku veka napu luengo lua kuhuma ku muono nakuya ku muono. Nkuma iya honi napuisamo ha vuima evi?

¹⁷ Omuo kutuafuile ngue vaje vakalandesa lizi lia Njambi, vuno honi ngue vamala va vusunga vaje vavanatumu kuli Njambi, ku mesho a Njambi tuhandeka muli Kilistu.

3

Vangamba va Litavasono Lialiha

¹ Nkuma tuaputuka kulinzumboka yetu vavenia naua ndi? Cipue nkuma yetu tunapande kulinga ngue muje mu vakalingi veka, kukala na mikanda ya vukaleho vuetu kuli yeni cipue yakuhuma kuli yeni ndi?

² Yeni vene vavenia munapu mukanda uetu uavukaleho, uje vanasoneka mu mitima yeni linga vautantekeye na kuutanda kuli vantu voshe.

³ Kaha yeni mumuesa ngeci munapu mukanda uakuhuma kuli Kilistu uje utunaneha yetu. Uje keti uakusoneka na tinta, vuno honi na Cimbembesi ua Njambi uakuyoya, keti uakusoneka ha vitale via mavue vuno honi ha vitale via mitima ya vantu.

⁴ Oku kukeko kusimpa kuje tuli naco kuhitila muli Kilistu hali Njambi.

⁵ Ketu ngue nguavo yetu vavenia tuasa kulinga cili coshe cije cija kuli yetu vuno honi vioshe vije vituasa kulinga vikahuminina kuli Njambi.

⁶ Ikeye na tuasesa kupua vangamba valitavasano lia lihia, lije keti liakusoneka, vuno honi lia mu cimbembesi. Omuo liakusoneka lineha kutsa, vuno honi lia Cimbembesi lineha muono.

⁷ Honi nga vije vipangi vianehele kutsa vavicokuele mu visona ha livue, kaha viezile na vumpau vuangacije ngeci vaka Isaleli kuvasele kutala ku cihanga ca Mosesa omuo ya kuviakula cipue vene omuo capuile cakutsitsivala.

⁸ Nkuma vipangi via Cimbembesi kuvikapu via vumpau cikuma kuma ndi?

⁹ Omuo nga kuakele vumpau mu vipangi vije vianehele cihiso. Kaha vipangi vije via vusunga vinapande kuvipulakana cikuma ku vumpau.

¹⁰ Cilivene ha cuma eci, cije cakeleho na vumpau kucesiho naua na vumpau, omuo ya vumpau vije vua cihiana.

¹¹ Omuo nga vije viatsitsivalele viezile na vumpau kaha vukahiana vati vumpau vuje vua viuma vije kuviekuhua.

¹² Nankuma tuli na kutsiliela eci, kaha tunasimpi cikuma.

¹³ Yetu kutuapuile ngue Mosesa uje uafuikile lilesu ku cihanga cendi ngeci vantu va Isaleli keti vamone vumpau vuje vuakele nakutsitsivala.

¹⁴ Vuno honi mana avo va akolesele, omuo kuneha na ku litangua lino omuo nga vatanda litavasano lia laja, lije lilesu lia kulifua hangavene liakala liakuhona kufukula omuo kuvanga lika kuhitila muli Kilistu amba lihume.

¹⁵ Eyo, nakuneha na ku litangua lino ntsimbu yoshe nga vatanda Lishiko lia Mosesa, kaha mu mana avo vanuka lika lije lilesu.

¹⁶ Vuno honi omuo muntu nga atengulukila kuli Muene kaha lije lilesu vana lihumisa.

¹⁷ Honi Muene ikeye Cimbembesi kaha kuje kuli Cimbembesi ca Muene kukeko kuli kupatuka.

¹⁸ Kaha yetu voshe na vihanga via kuhona kufukula lilesu vaje vamuesa vumpau vua Muene vanatuhimpula mucifua cendi kuhuma haseteko imo ya vumpau nakuya haseteko yeka, omuo eci cihuminina kuli Muene ikeye vene Cimbembesi.

4

Vufuko vua Cimbembesi vua mu Vindeho via Vuma

¹ Nankuma, omuo kuhitila mu cikeketima ca Njambi ngeci tuli na vipangi evi, kaha keti tuzeye.

² Tunaviana viuma via vushueke via shuamua, kutuekupangesa makuli kaha naua kutuekuhandeka lizi lia Njambi mu makuli. Vuno honi hakuhandeka vusunga tulizumboka yetu vavenia kumana a muntu uoshe ku mesho a Njambi.

³ Kaha cipue vene nga muzimbu uacili uetu vanaushueke, kaha vanaushuekele lika kuli vaje vanonga.

⁴ Kuli vakevoni njambi ua mavu aua napuisa mana a vaje vaka kuhona kutsiliela vupuputua linga keti vamone ceke ca muzimbu uacili ua vumpau vua Kilistu, ikeye uje cifua ca Njambi.

⁵ Omuo vije vitukambulula kutuekuliambulula yetu vavenia, vuno honi Yesu Kilistu hakupua Muene, kaha netu naua tunapu vangamba veni omuo ya Yesu.

⁶ Omuo Njambi ikeye vene uahandekela nguendi, "Eceleni ceke citue ha milima," Njambi ikeye vene uatuililile mu mitima yetu mukutuhana ceke ca mana a vumpau vua Njambi ku mesho a Kilistu.

⁷ Vuno honi tuli na vufuko ovu mu vindeho via vuma mukumuesa ngeci nzili yakama yakala kuli Njambi keti kuli yetu.

⁸ Tukakala mu vukalu mu vi ngila via kuli seza seza, vuno honi kekutuhiana, akatukuomouesa vuno honi ku ekutumanusula kutsiliela coshe.

⁹ Vakutupakesa vuno honi kekutuseza, vaka tuvulumuina vuno honi kuvekutunongesa.

¹⁰ Ha vintsimbu vioshe tukambata kutsa ca Yesu mu mivila yetu, linga muono ua Yesu vaumone mu mivila yetu.

¹¹ Omuo tuyoya ntsimbu yoshe tuli mu makalu akutsa omuo ya Yesu, linga muono ua Yesu ulimuese mu mivila yetu, ije yasa kutsa.

¹² Nankuma kutsa cili nakupanga muli yetu, vuno honi muono uli na kupanga muli yeni.

¹³ Nankuma omuo tuli na Cimbembesi ca kulifua ca lutsilielo ngue muje muakala naco uje uasonekele nguendi, "Njatsilielele kaha njahandekela," Netu naua tutsiliela ngeci tukahandeka.

¹⁴ Ha kutantekeya ngeci uje uasanguile Muene Yesu akatusangula netu naua hamo na Yesu nakutuneha yetu hamo neni ku mesho endi.

¹⁵ Omuo vioshe evi vinapu omuo yeni, linga omuo kavumbi kaheta ku vantu vavengi cikuma nkuma kaha kavuezelela kuhana kutsatsela ku vumpau vua Njambi.

Kuyoya ha Lutsilielo

¹⁶ Nankuma keti tuhonoue. Cipue vene oku muvila uetu uahambaza uli na kuzeya vuno honi muvila uetu uamu ntimu vali nakuulinga vuha ntsimbu yoshe.

¹⁷ Omuo tuyando otu tua ntsimbu ya indende tuli nakulingisa yetu kulivuahesela kutambula kavumbi kayaye kaje kakama cikuma kupulakana tuyando tuje.

¹⁸ Omuo yetu kutueku yongola viuma vije vivamona vuno honi viuma vije kuvekumona, omuo viuma vije vivamona viapua via kantsimbu lika vuno honi viuma vije kuvamono viapua via yaye.

5

Limbo lietu lia Muilu

¹ Omuo tutantekeya ngueto, nga mbalaka ya hano ha mavu ije ituakalamo vainongesa tuli na njivo kuli Njambi, njivo ije keti yakutunga na mavoko vuno honi ya yaye muilu.

² Hano cilivene tuli nakulikemanga, kaha tushunguiya cikuma Njambi linga atuzike muvila uje ukapua ngue njivo yetu ya muilu.

³ Linga hakuuzala kaha keti tukakale vuntselentsele.

⁴ Omuo tucili na kuyoyela mu mbalaka eyi, tututumuisa na tuyando, keti ngue nguavo tutonda linga vatuhumise muvila ou uaka ntsimbu lika, vuno honi linga hanga vene vatuzikeuo ngeci uje muvila uakutsa vaumine ku muono.

⁵ Uje natuvuahesela cuma eci ikeye vene Njambi uje natuhana Cimbembesi kupua fueto ya kushulisisa cikulaheso.

⁶ Nankuma ntsimbu yoshe tuna simp cikuma. Tuatantekeya ngueto omuo tucili kuimbo mu muvila kaha tuli kulahako na Muene.

⁷ Omuo tukende na lutsilielo keti na mesho.

⁸ Tuasimpi cikuma kaha tuasa kuhuma mu muvila ou nakuya kuimbo kuli Muene.

⁹ Nankuma cipue tuli kuimbo indi tuvahiko, vitukandondoni kumuvuahelesa.

¹⁰ Omuo tuva voshe tunapande kusholoka ku citumamo ca kusompa ca Kilistu, linga umo na umo atambule vucili cipue vupi kuya ku vije vianapanga mu muvila.

Vusamba na Njambi kuhitila muli Kilistu

¹¹ Nankuma, omuo ya kutantekeya kuivula Muene liova, tusindiya vantu vuno honi Njambi ikeye atantekeya muje mutuafula kaha njatsiliela nguange neni vene naua muacitantekeya mu mana eni.

¹² Kutuesi nakuli zumbuoka yetu vavenia kuli yeni naua vuno honi kumihana cije cilingisa linga mulihalese omuo yetu, ngeci linga neni cimiasiuse kukumbulula vaje vali na kulihalese vakevo vavenia ku mesho a vantu keti ngue ha vilinga viavo.

¹³ Omuo nga yetu kutuesi nakusinganieka muacili, kaha cinapu omuo ya Njambi. Kaha nga naua tusinganieka muacili kaha cinapu omuo yeni.

¹⁴ Omuo cizango ca Kilistu cikeco cikatuendesa, omuo cilivene tutantekeya ngueto umo uatsililile voshe. Nankuma voshe vanatsi.

¹⁵ Kaha uatsililile voshe, linga voshe vaje vayoya keti valiyoyele vakevo vavenia vuno honi hali ikeye uje omuo yavo ngeci uatsile kaha vamusanguile.

¹⁶ Nankuma hume hano honi, kutukambata muntu uoshe kuya ku cifua ca vuntu, cipuevene nguavo ntsimbu imo tuambatele Kilistu mu cifua ca vuntu, vuno honi kutuka kutukamuambatamo naua.

¹⁷ Nankuma, nga kuli umo uje ali muli Kilistu, kaha napu kutanga ca ciha. Kaha via laja vinahiti, taleni, viavihia vineja.

¹⁸ Vioshe evi vihuma kuli Njambi, uje kuhitila muli Kilistu uatukonekelele linga tuije kuli ikeye kaha uatuhanene cipangi ca kulikonekela umo na mukuovo.

¹⁹ Kaha kuhitila muli Kilistu, Njambi uakonekelele mavu naku aneha kuli ikeye vavenia cakuhona kutanda milonga yavo ije yakuvaluisa nayo kaha nakundika kuli yetu muzimbu uakulikonekela umo na mukuavo.

²⁰ Nankuma, yetu tunapu vaka kuimanena Kilistu, Njambi alina kumilania kuhitila muli yetu. Tumilambelega hali Kilistu, likonekeleni kuli Njambi.

²¹ Kaha omuo yetu, Njambi uamupuisile muka vupi uje katantekeyele vupi, linga kuhitila muli ikeye ngeci tupue vaka vusunga kuli Njambi.

6

¹ Hakupua vaka kupangela hamo na Njambi, tumilambelega ngueto keti mutambule kavumbi ka Njambi nakukecela linga kaye mungoco.

² Omuo Njambi nahandeka nguendi,
“Omuo ntsimbu yacili yahetele
njamivuililile,

kaha njamikuasele ha litangua lia kuovoka.”

Taleni, honi ntsimbu yacili ino, taleni, honi litangua lia kuovoka lino.

³ Kaha tuli na kueseka linga keti tuhake citsuntsuiso mu ngila ya muntu uoshe, linga keti vakauane mulonga na vipangi vietu.

⁴ Vuno honi hakupua vangamba va Njambi tulihana yetu vavenia mu vioshe kuhitila mu lukakateya luakama, na mu tuyando, na mu lamba, na mu vitanga,

⁵ na mu vipumpu, na mu tumenga, na mu kulua, na mu kuhundangana, na mu cilavu lavu, na mu njala,

⁶ na mu kulela, na mu mana, na mu kusimpa, na mu ngozi, na mu Cimbembesi Uakulela, na mu cizango ca vusunga,

⁷ na mu kuhandeka ca vusunga, na mu nzili ya Njambi, na mu vitua via vusunga via ku livoko lia cilio na lia cimoshue.

⁸ Mu kasingimiko na mukuhona kasingimiko, mukutushaula na muku tushangazala. Vali nakutuambata ngue tuvaka makuli vuno honi tuvaka vusunga,

⁹ ngue vaje kuvatutantekeya, vuno honi vatutantekeya, ngue vaje vanatsi, kaha taleni tuyoya ngue vaje vali hakashitiko, vuno honi kanda vavatsihe,

¹⁰ ngue vaje vali mu vusiua, vuno honi ntsimbu yoshe tujolela, ngue vihutu, vuno honi tukapuisa vantu vavengi kupua vaka kufuka, ngue vaje kuvesi nacimo, vuno honi tuli navioshe.

¹¹ Tunahandeka mua vusunga kuli yeni vaka Kolinte, tunashokolola mitima yetu kuli yeni.

¹² Kutuesi nakuvindika cizango cetu kuli yeni, vuno honi yeni muli nakuvindika cizango ceni kuli yetu.

¹³ Kaha omuo yeci, njihandeka kuli yeni ngue vana vange, shokololeni mitima yeni neni naua.

Cinangula ca ha Kushongangeya ca vaka kuhona Kutsiliela

¹⁴ Keti mupangele hamo na vaje vaka kuhona kutsiliela. Omuo nkuma vusamba muka vuliho hali vaka vusunga na vaje vaka kuhona kutsiliela? Cipue nkuma vumo muka vuli ha ceke na milima?

¹⁵ Nkuma vumo muka vuliho hali Kilistu na Satana? Cipue nkuma kulifua muka ciliho hali vaka kutsiliela na vaka kuhona kutsiliela?

¹⁶ Nkuma Njivo ya Njambi ili na litavasano muka na tumponia? Omuo yetu tunapu Njivo ya Njambi, Njambi ua kuyoya, ngue muje muahandekela Njambi nguendi,

"Njikakala muli vakevo

nakuenda hakati kavo,

kaha njikapua Njambi yavo,

kaha navo vakapua vantu vange."

¹⁷ Nankuma, Muene nahandeka nguendi,

"Humeni muli vakevo,

kaha litepeni navo.

Kaha keti mukuate via mazilo,

ambahoni njikamitambula.

¹⁸ Kaha Muene Uanzili yoshe nahandeka nguendi,

Njikapua nji Ishueni,

kaha mukapua vana vange va vamala na va vampuevo."

7

¹ Nankuma vamuonetu, omuo tuli na vikulaheso evi tuyeni tulilelese yetu vavenia ku viosehe vije vijualesa muvila na Cimbembesi. Kaha tuyeni tulilelese mua vusunga omuo yakuivula Njambi liova.

Nzolela ya Paulu

² Tushokolueleni mitima yeni, naumo uahi utunapihisila, kaha naumo uahi utunazimbalesa lutsiluelo luendi kaha naumo uahi utunakuisa.

³ Kunjesi nakuhandeka evi mu kumisompa, ngue muje munjahandekela hakulivanga nguange muli mu mitima yetu, tukatsa hamo na kuyoya hamo.

⁴ Njili na lutsiluelo luakama muli yeni, njili nakulihalesa cikuma muli yeni, kaha njashulu na kusimpa na mu tuyando tuetu tuoshe njili na nzolela yakama.

⁵ Omuo cipuevene tuezile mu Masendoniya mivila yetu kuyahuimine vuno honi ntambu yoshe tuakele mulamba kulua na veka kaha naliova muli yetu.

⁶ Vuno honi Njambi uje muka kusimpisa vaje vanazeye, uatusimpisile mukuija ca Tito,

⁷ kaha keti lika hakuija cendi lika vuno honi naua nakusimpa cije civamusimpisile muli yeni ngue muje muatulekele cishota mitima ceni, nakulila ceni, na cizango ceni cakama cikuma hali yange linga nzolela yange ipue yakama cikuma.

⁸ Omuo cipuevene njamivuisile vusiua na mukanda uange, kunjali payele (cipuevene nguavo njalipaye), omuo njamuene negci uje mukanda uamivuisile vusiua cipuevene capuile mukatsimba lika.

⁹ Ngue muje mucinafu njivuahelela, keti ngue nguavo omuo muakele na vusiua vuno honi omuo vusiua vueni vuapuile vua kutenguluka ku

vupi vueni omuo muovuile vusiua vua vunjambi, kaha kumuayandele muangoco homo yetu.

¹⁰ Omuo vusiua vua vunjambi vukanehe kutenguluka cije cituala kukuo-voka kaha kucekuneha kulipaya, vuno honi vusiua vua mavu vukanehe kutsa.

¹¹ Omuo taleni vusunga vua vusiua vua vunjambi vuje vivunaneha muli yeni, cilivene muje muvunamuesa vusunga vueni, taleni vutenu vuje vuasholokele, kuli komokela eci, cishota mutima eci, na cizango cakama eci, na kashitiko kakama aka. Mu vintsimbu vioshe mualimuesa yeni vavenia ngeci kumuesi na mulonga mu cuma eci.

¹² Nankuma cipue vene njamisonেকেলেle mukanda, kuuapuile ya mulonga ua umo uje ualingile vupi cipue ha mulonga ua umo uje uayandele omuo ya vupi, vuno honi linga cizango ceni cakama hali yetu linga cisholoke kuli yeni ku mesho a Njambi.

¹³ Nankuma vatuzembeleka.

Kaha mukutuzembeleka cetu tuavuahelele cikuma omuo ya nzolela ya Tito, omuo mana endi anahuimi omuo yeni.

¹⁴ Njalihalesele kuli ikeye omuo yeni, kunjevuile shuamua vuno honi omuo ngue muje vene vioshe vije vituahandekela kuli yeni viapuile via vusunga, nankuma kulihalese cetu kuli Tito capuile ca vusunga.

¹⁵ Kaha cizango cendi hali yeni capua cakama cikuma omuo nga anuka kuononoka ceni voshe, na liova nakujaja cije cimuumutambuile naco.

¹⁶ Njivuahelela omuo njili na lutsilielo lua kusimpa muli yeni.

8

Kuhana ca Vaka Yesu

¹ Vamuanetu tutonda linga mutantekeye, ha kavumbi ka Njambi kaje kavanamuesa mu vikungulukilo via Masendoniya,

² omuo cipuevene vakele muvieseko viakama, vuno honi nzolela yavo yapuile yakama ngeci vakele nakuhana na mutima umo oku cipuevene vapuile vihutu cikuma.

³ Omuo vakele nakuhana muvaselelemo muoshe, ngue muje munjicam-buluilamo, vakele nakuhana kupulakana muvije vivakele navio. Kuya ku cizango cavo,

⁴ vakele nakutulambelega linga tulipandakane mukulinga cipangi eci cakukuasa vantu vakulela va Njambi.

⁵ Omu keti mukemo mutuayongoluelemo, vuno honi hakulivanga vali-hanene vakevo vavenia kuli Muene nakuli yetu ku cizango ca Njambi.

⁶ Nankuma tuananguile Tito omuo ikeye hakupua uje uaputukile laja, napande kumanusula naua na hhakati keni cipangi eci ca kavumbi.

⁷ Honi ngue muje mu mulinakutualelelaho kukala muacili mu lutsilielo, na mukuhandeka, namu mana, na muvusunga vuoshe, na mucizango ceni hali yetu, taleni tutonda naua ngueto mutualeleleho kulinga muacili namu cipangi eci ca kavumbi naua.

⁸ Njilinakuhandeka eci keti ngue cishika, vuno honi kushulisisa kukolesa ca vakueni ngeci na cizango ceni naua capua ca vusunga.

⁹ Omuo muatantekeya kavumbi ka Muene Yesu Kilistu, ngeci cipuevene ikeye uapuile muka kufuka, vuno honi omuo yeni uapuile cihutu, ngeci omuo ya kuhutua cendi linga mupue vaka kufuka.

¹⁰ Kaha mu cuma eci njihana visinganika viange, cacili kuli yeni hano vene kumanusula vije vimuaputukile muaka uali, vije keti lika vimualingile vuno honi muavilingile omuo muatondele kuvilinga,

¹¹ linga kulivuahehela ceni mukucishunguiya hamo vacipuisa mumo nakucimanesa ceni na vije muli navio.

¹² Omuo nga kulivuahehela kucili, kaha vanacitambula kuya ku vije muntu ali navio, keti ngue kuya ku vije muntu kesi navio.

¹³ Kunjesi nakulumbununa nguange vakueni vavehuse kaha yeni mukale na citeli,

¹⁴ vuno honi yeni omuo muli na viavingi ha ntsimbu ino, cinapu cacili ngeci munapande kukuasa vaje vanajena. Ambahoni, omo neni naua mukajena kaha vakevo vali na viavingi, kaha navo naua vakamikuasa. Mu ngila eyi vene muva voshe vanamipuisa hamo.

¹⁵ Ngue muje muvanacisoneka nguavo, "Uje uakunguluile viavingi kesi na cimo cahi, kaha uje uakunguluile viavindende kajenene."

Tito na Vakuavo

¹⁶ Vuno honi kutsantsela cikale kuli Njambi uje akahaka kushungozola cakama cakulifua hali yeni mu mutima ua Tito.

¹⁷ Omuo ikeye katambuile lika kulomba cetu, vuno honi uakolesela mukumikuasa mu cizango cendi vavenia ngeci akeja kuli yeni.

¹⁸ Tulinakutuma hamo nendi muanetu uje uakutsimana hhakati ka vikungulukilo viose omuo ya kuambulula cendi ca muzimbu uacili.

¹⁹ Kaha keti evi lika, vuno honi vanamuhangula ku vaka vikungulukilo linga ende netu mu vipangi evi via kavumbi vije vituli nakulinga, omuo ya vumpau vua Muene nakumuesa vucili vuetu.

²⁰ Tulinakulinga muacili linga keti kukakale umo akatupaye ha vuana ovu vuacili vuje vutuli nakulinga.

²¹ Omuo tutonda kulinga lika viakasingimiko, keti lika ku mesho a Muene vuno honi naua naku mesho a vantu.

²² Kaha tulinakutuma vakevo na muanetu uje ituneseka lualuingi kaha tunamuuana kupua ualukakateya mu viuma viose, vuno honi uapua uakuluangua cikuma kupulakana laja omuo ya kutsiliela cendi cakama muli yeni.

²³ Kaha hali Tito ni, napu mukuasi na mukuetu mutukapangela mu vipangi vieni, kaha hali vamuanetu ni, vanapu tunganda va vikungulukilo, vumpau vua Kilistu.

²⁴ Nankuma mueseni ava vantu vukaleho vua cizango ceni na vika vije yetu tukalihalesela muli yeni, linga vikungulukilo vavimone.

9

Kukuasa Vaka Kutsiliela Vakujena

¹ Honi kucesi na seho naua yange kumisonekela ha vukuasi vua vantu vakulela va Njambi.

² Omuo njatantekeya ngeci muakala na cizango cakukuasa, cije cinjikalihalesela omuo yeni kuli vantu vamu Masendoniya, njikahandeka nguange vaka Akaya vanalivuahehela vualumo hume muakauli kukuasa, kaha cizango ceni cinatakamesa vavengi vavo.

³ Vuno honi njilina kutuma vamuanetu linga kulihalesa cetu hali yeni ha cuma eci keti ciye muangoco, linga mulivuahehesele vualumo, ngue muje munjahandেকেle nguange mulinge.

⁴ Keti ngoconi, hamo nga vaka Masendoniya vamo veja nange kaha nakuuana nguavo yeni kumualivuaheheselele vualumo, kaha tukevua shuama, nacimo cahi vakahandeka hali yeni omuo vamitsiliela laja.

⁵ Nankuma, njacisinganiekele ngeci cinapande kutuma vamuaneu linga valivange kuija kuli yeni kanda yange, linga mulivuahelela vualumo vuana vuje vumuakulahesele, linga cimuese ngeci mulinakuhana omuo mutonda kucilinga keti ngue valinakumisindiya.

⁶ Anukeni eci ngeci uoshe uje akuna via vindende hakatia naua via vindende, kaha uoshe uje akuna viavingi hakatia naua viavingi.

⁷ Umo na umo ueni napande kuhana vije vianasinganieka mu mutima uendi ku vihana, keti oku ulinienga, cipue ngue vanakusindiya, omuo Njambi uazanga uje muka kuhana na mutima umo.

⁸ Kaha Njambi asa kukuhana cikuisulo coshe mu vuingi, linga ntsimbu yoshe ukale na viavingi kaha naua uase kukala na viavingi muvuingi, viakulikuasesa ku vipangi viacili.

⁹ Ngue muvana cisoneka nguavo,
 "Akahana voshe vaje vanajena,
 vusunga vuendi vuapua vua yaye."

¹⁰ Kaha uje muka kuhana mbuto kuli muka kuli mukakukuna na mbolo kupua cakulia, akamihana na kuvuezelela viuma vieni nakuvuezelela kutia ca vusunga.

¹¹ Mukafuka mu vingila vioshe linga mukale na ngozi yakuhana cikuma vintsimbu vioshe, kaha kuhitila muli yetu ngozi yeni ikapua citsantsela kuli Njambi.

¹² Omuo cipangi eci cimuli nakupanga keti lika cakukuasa vantu vakulela va Njambi vaje vaka kujena vuno honi naua cinapu kuneha kushula mu vitsantsela viavingi kuli Njambi.

¹³ Omuo ya cipangi cije yeni munamuesa yeni vavenia, vavengi vakalemesa Njambi ha kuononoka cije cinalipandakana nakuambulula ceni ca muzimbu uacili ua Kilistu, kaha omuo ya ngozi yeni mukulipangela navo na veka voshe.

¹⁴ Kaha mu malombe avo hali yeni, mitima yavo ikashota kuli yeni omuo ya kavumbi kakama kaje kanamihana Njambi.

¹⁵ Vitsantsela vikale kuli Njambi omuo ya vuana vuendi vuje kutuasa kulumbununa!

10

Paulu Aluila Vipangi viendi

¹ Yange Paulu, njimilambeleva nakulikehesa na kulionuenesa ca Kilistu, yange uje uakulikehesa omo njilineni, vuno honi njiuakukalua kuli yeni nga kunjesi hamo neni.

² Njimilambeleva ngeci omo njija hamo kunjikamuesa kukaluaa ngue munjitondelamo ku vantu vamo vaje vasinganieka nguavo tuayoya mu futisi ya mavu.

³ Omuo cipue vene tuayoya ha mavu, vuno honi yetu kutuekulua nzita ngue muje muvakalingilamo vaka mavu,

⁴ Omuo vitua vije vitukalu navio keti via hano ha mavu vuno honi vikevo vili na nzili ya Njambi ije yasa kunongesa vimbonge.

⁵ Tukanongesa vimpata na cakutanganesa coshe cije cakulihalesa cije ciluisa mana a Njambi, kaha tukalingi viyongola vioshe kupua vunzinda linga viononoke Kilistu.

⁶ Kaha tukalivuahelela vualumo kuhana kashitiko ku vilinga vioshe vije viakuhona kuononoka, omo nga yeni munapuisamo kuononoka ceni.

⁷ Yeni mukamono lika muje viuma muvisholokelamo hambanza. Nga kuli vamo vakalitanda nguavo vapua vantu va Kilistu, kaha vanapande kusinganieka ngeci netu naua tuapua tuva Kilistu.

⁸ Omuo cipue vene nga njilihalesa cikuma ha nzili yakama ije Muene uahanene mukumitunga yeni kaha keti mukuminongesa, kunjika ivuila shuama.

⁹ Kunjitondo cimuese ngeci njilinakumiteuesa na mikanda yange.

¹⁰ Omuo vamo vahandeka nguavo, “Mikanda yendi yapua yakulema nakukola, vuno honi muvila uendi uapua uakuzeya, kaha navihandeka viendi viapua viakuhona seho.”

¹¹ Vantu ava vanapande kutantekeya ngeci vije vitukahandeka mu mikanda omo tuvahiko, vikevio tukalingi omo kutuli.

¹² Kutuekutonda kulijundula cipue kuliesekesa yetu vavenia navamo vaje vakalijundula vakevo vavenia. Vuno honi omuo nga valieseka vakevo vavenia ku umo na mukuavo, kaha kuvekuivuisisa.

¹³ Vuno honi kutukalihalesa mukupulakana, vuno honi kulihalesa cetu cikapuamo kuya muje Njambi natuhanenamo, eci cipandakana vene na vipangi vije vitunalingi kuli yeni.

¹⁴ Omuo kutuesi na kutualelelaho kulihalesa cetu ngue yetu kutuezile kuli yeni yetu tuapuile vakulivanga kuhuma kulahako kuija kuli yeni, na muzimbu ua cili ua Kilistu.

¹⁵ Kutukalihalesa kupulakana seteko yetu mu vipangi vije vivanalingi vakuetu veka, vuno honi kutsiliela cetu cinapu ngeci lutsilielo lueni linga lulivuezelele, vipangi vietu hhakati keni linga vilivuezelele,

¹⁶ linga tuase kuambulula muzimbu uacili keti kuli yeni lika vuno honi na mu vimbonge vieka, kuakuhona kulihalesa ha vipangi vije vivanalingi laja vakuetu.

¹⁷ Vuno honi ngue muje muvihandeka visoneka kuavio, “Eceleni uoshe uje alihalesa, alihalesele hali Muene.”

¹⁸ Omuo keti muntu uje alijundula ikeye vavenia ikeye uje ivakatambula, vuno honi muntu uje Muene akajundula.

11

Paulu na Tunganda Vamakuli

¹ Njishunguiya ngue munjitavesako kavundende kulinga vulema vuange. Njitaveseni.

² Njilinakumiuvuila cipululu ca vunjambi, omuo njamikulahesa yeni kuli Kilistu mukumihana ngue shombolua ua vusunga kuli yaliendi umo lika.

³ Vuno honi njili nakuteua ngeci ngue muje linoka uakuisile Eva na kuzangama cendi ca makuli, kaha visinganieka vieni vikamituala kulahako nakuhona kuononoka Kilistu na vucili na kusungama.

⁴ Omuo nga muntu umo eja nakuambulula Yesu ueka kupulakana uje ituambulule yetu, cipue nga mutambula cimbembesi ueka kupulakana uje imuatambuile, indi cipue nga mutambula muzimbu uacili ueka uakuliseza na uje umuatambuile, kaha mulihana kuli vikevio mukushula.

⁵ Njisinganieka ngeci kunjapuile njiuamundende kuli ava vavahandeka nguavo tunganda vakama cikuma.

⁶ Cipue vene nga keti njiuakulilongesa mukuhandeka muacili, vuno honi njili na mana mu vingila vioshe tunalumbununa evi muacili kuli yeni mu viuma vioshe.

⁷ Nkuma njalingile vupi mukulikehesa yange vavenia ngeci yeni vamijundule, muje munjambuluile muzimbu uacili ua Njambi cakuhona ndando kuli yeni ndi?

⁸ Njevililile vikungulukilo vieka hakutambula vukuasi kuli vakevo omuo yakumikuasa yeni.

⁹ Kaha omuo njakele neni nakutonda vimo, kunjahanene citeli kuli muntu uoshe omuo vukuasi vuange vuakele nakuhuma kuli muanetu uje uahumine ku Masendoniya. Nankuma njalikelele, kaha njikalikela naua kupua citeli kuli yeni mu vingila vioshe.

¹⁰ Kaha ngue ha vusunga vua Kilistu uje ali hali yange, eci kulihalesa cange kuvakaciholuesa kuluu mu vihela via Akaya.

¹¹ Nkuma vika honi njihandekela eci? Omuo yange kunjamazangele ndi? Njambi atantekeya ngeci njamazanga!

¹² Kaha vije vinjikalingi njikavitualelelaho kuvilinga, linga njika-honouese vihandeka via vaje vakahandeka nguavo kuvipangi viavo viakulihalesa vakapanga hamo netu ngue muje mutukalingi.

¹³ Omuo vantu ava vapua tunganda va makuli, vaka kupanga va makuli vakalipuisa vakevo vavenia ngue tunganda va Kilistu.

¹⁴ Kutukomoka, ngeci cilivene cipue Satana ualipuisile ikeye vavenia ngue kangelo ua ceke.

¹⁵ Nankuma kucasa kupua ca kukomouesa nga vangamba vendi na vakevo naua valipuisa vakevo vavenia ngue vangamba va vusunga, manusuilo avo akalifua na vilinga viavo.

Tuyando tua Paulu ha kupua kanganda

¹⁶ Njihilukilaho naua nguange, eceleni muntu uoshe keti a singanieke nguendi njicilema, vuno honi cipuevene nga mucisinganieka, kaha njitambuleni ngue vene cilema ngeci nange naua linga njikalihaleseko muvundende.

¹⁷ (Vinjili nakuhandeka kunjesi nakuhandeka na nzili yakama ya Muene vuno honi ngue cilema mukulihalesa eci ca kusimpa,

¹⁸ nankuma omuo vavengi vakalihalesa na viuma via mavu, nange naua njikalihalesa)

¹⁹ Omuo yeni muka litavasana muacili na vilema, hakupua yeni vavenia vakuzangama.

²⁰ Omuo yeni mukacitava cipue vene nga muntu amilinga vundungo, cipue amikuasa, cipue amizangamena, cipue uje amikehesa, cipue uje amipupa mbanda ku cihanga.

²¹ Na shuama yange, njihandeka nguange tuazeyele cikuma ha lievi!

Vuno honi vioshe vije muntu atonda linga alihalesele, njilinakuhandeka ngue cilema, nange naua njinapande kulihaleselaco.

²² Nkuma vanapu Vahevelu ndi? Kaha nange vene nji Kahevelu. Nkuma vanapu Vaisaleli ndi? Kaha nange vene nji Kaisaleli, nkuma vapua vatekuilila va Avilahama ndi? Kaha nange vene njimutekuilila ua Avilahama.

²³ Nkuma vapua va ngamba va Kilistu ndi? Kaha yange njapua njiuakama kuvapulakana, njilinakuhandeka ngue muntu uakuzaluka, njinapanga cikuma na kuhundangana, njinakala mu kamenga vintsimbu via vingi na kunjipupa lua luingi nakutonda kunjitsiha lua luingi.

²⁴ Ha vintsimbu vitanu vanjipupile makote makumi auana kuhumisako likote limo kuli vakuluntu va Vayunda.

²⁵ Ha vintsimbu vitatu vanjipupile na vivanzi, kaha lumu vanjashele mavue. Kaha ha vintsimbu vitatu omo njendele mu vuato, vuje vuato

vunjendelelemo vavupihisile, ha vutsiki na mutania njakele mu mema a kalunga.

²⁶ Ha mangingi a mengi, njakele mu vukalu vua vindonga, njakele muvukalu ku mihuza, njakele mu vukalu ku vantu vange vavenia, njakele mu vukalu kuli vaje keti Vayunda, njakele mu vukalu mu nganda, njakele mu vukalu mu mpambo, njakele mu vukalu ku mema a kalunga, njakele mu vukalu kuli vaka kutsiliela va makuli.

²⁷ Njahundanganene na kupanga cikuma, kunjakele na kukosa ku vintsimbu viavingi, njakele mu njala na mpuila, vintsimbu via vingi cakuhona via kulia, njakele mulisika nakuhona vizalo.

²⁸ Kaha ku vikuavo viekani, kuli vukalu vua ha litangua na litangua hali yange vuakushoshomua vikungulukilo vioshe.

²⁹ Iya nazeye, nkuma yange kunjazeyele ndi? Iya ivauisilile mu vupi, nkuma yange kunjanienguele indi?

³⁰ Kaha nga njilihalesa njikalihalesa ha viuma vije vimuesa kuzeya cange.

³¹ Njambi na Tate ya Muene Yesu, uje ikeye uakukuisula vintsimbu vioshe natantekeya nguendi kunjekukuisa.

³² Ku Ndamasika nguvulu uje uakele muintsi lia Muene Aletasa uaniungile nganda ya Ndamasiku linga vanjikute.

³³ Vuno honi vanjisosele mu mutonga kuhitila mu njanena mu civumbe, kaha njovokele ku mavoko endi.

12

Vimona na Visolola via Paulu

¹ Njapande kulihalesa cipue vene nacimo cahi cinjasa kuuanaho, vuno honi njitualelelaho na vimona na visolola via Muene.

² Njatankekeya yala umo muli Kilistu uje ha miaka makumi auana laja vamutuatele ku lilu lia mucitatu, yanini honi indi capuile ku muvila indi keti ku muvila kunjitankekeya, Njambi lika ikeye atantekeya.

³ Kaha njatankekeya ngeci yala ou vamutualele mu lihia lia Njambi yanini honi indi mu muvila cipue keti mu muvila kunjitankekeya, Njambi lika ikeye atantekeya.

⁴ Kaha njovuile viuma vije kuvasa kuviambulula, vije muntu kasa kuhandeka.

⁵ Hakuimanenako ou yala njilihalesa, vuno honi hakulimanena yange vavenia kunjikalihalesa, kuvanga lika via kuzeya cange.

⁶ Kaha cipue vene nga njitonda kulihalesa, kunjikapu njicilema, omuo njikahandeka vusunga. Vuno honi kunjitondo kucilinga, linga keti muntu umo asinganieke cikuma hali yange kupulakana vije viamona muli yange cipue vievua kuli yange.

⁷ Kaha hakulinga yange keti njilihalese cikuma na vuingi vua visolola, ngeci vanjihakele mbimbo mu muvila, linga kanganda ua satana anjipakese, ngeci keti njilihalese cikuma.

⁸ Njalamblele Muene ha vintsimbu vitatu hali eci, linga cinjiseze.

⁹ Vuno honi uahandekela kuli yange nguendi, “Kavumbi kange kanapu kakama hali yove, omuo nzili yange yapua ya vusunga mukuzeya.” Kaha njikavuahelala cikuma nakulihalesa ha kuzeya cange linga nzili ya Kilistu ihuimine hali yange.

¹⁰ Omuo ya Kilistu, njapuisamo na kuzeya, na vituka, na kuhundangana, na mapakeso na lamba, omuo nga njinazeye, ambahoni njikolesa.

Kushota Mutima ca Paulu hali vaka Kolinte

¹¹ Njilinakulinga ngue njicilema, muanjisiindiyiye linga njifuemo, omuo yeni muanjitavesele. Omuo kunjapuile njiuamundende kuli vaje valitumbula vavenia nguavo tunganda vakama, cipue vene yange nji muntu lika.

¹² Vimueso via kanganda ua vusunga va vililingile hhakati keni mukusimpa coshe, na vimueso na vikomoueso na vipangi via kuhiana

¹³ Nkuma vamikehesele vati hhakati ka vikungulukilo vieka, oku yange kunjapuile citeli kuli yeni? Njikonekeleni ku kupihisa eci!

¹⁴ Honi njali vuahesela vualumo mukumimeneka ha ntsimbu ya mucitatu. Kaha kunjikapu citeli, omuo kunjitondo vije vinapu vieni vuno honi yeni, omuo vana kuvapandele kuniunga visemi vavo, vuno honi visemi kuniunga vana vavo.

¹⁵ Njikavuahelala cikuma kuhana na kunjihana omuo ya miono yeni. Nga yange njimizanga cikuma, Kaha nkuma yange cinapande kunjizanga kavundende ndi?

¹⁶ Vuno honi taveni ngeci yange kunjapuile citeli kuli yeni, vuno honi mukahandeka ngueni njapuile muka kuzangama na kumikuisa na makuli.

¹⁷ Nkuma njamizangamenene kuhitila muli vaje njatumine kuli yeni ndi?

¹⁸ Njalambebele Tito linga eje kuli yeni kaha njamutumine hamo na muanetu. Nkuma Tito uamizangamenene ndi? Nkuma kutualingile vilinga via cimbembesi umo lika ndi? Nkuma kutuendele mumolika ndi?

¹⁹ Nkuma vintsimbu vioshe muka singanieka ngueni tukalilula yetu vavenia kuli yeni ndi? Ku mesho a Njambi kukeko kutuli nakuhandeka muli Kilistu, kaha vioshe evi vinapu via kutunga ceni vamuhanetu.

²⁰ Omuo njiteua nguange omuo njikeja kaha njikamiuana muje kunjatondele, kaha naua nange mukanjiuana muje kumuatondele. Kaha kukakala kuli cokota, na lifuua, na cipululu, na kuli zanga yeni vavenia, na kulishaula, na kulifueya, na kulihalesa, katumamesi kakuhona kuilamo.

²¹ Njili na kuteua ngeci omuo njikeja naua Njambi yange hamo akanjikehesa ku mesho eni, kaha hamo njikalila omuo ya vantu vavengi vaje valingile vupi laja kaha kuvatengulukile ku kulijualesa, na kuvupangala na ku vilinga via kuteuesa vije vivalingile.

13

Vishika viakumanusuila na Vihindu

¹ Eyi inapu ntsimbu ya mucitatu ije njija kuli yeni. Mulonga uli uoshe uapande kukala na vakaleho vavali cipue vatatu.

² Njananguile vaje valingile vupi hakulivanga na vaje vakuavo voshe, kaha njivanangula hano oku njiuahiko, ngue muje munjalingile oku tele kunjili ha vungenzi vuange vua mucivali, ngeci nga njija naua kaha kunjikavovola,

³ omuo mutonda cimueso ngeci Kilistu ali nakuhandeka muli yange. Kapuile uakuzeya linga amihonoue, vuno honi uapua uanzili muli yeni.

⁴ Omuo vamushukikile mukuzeya, vuno honi uayoya ha nzili ya Njambi. Omuo tuapua vakuzeya muli ikeye, vuno honi mu vusamba neni tukayoya hamo nendi ha nzili ya Njambi.

⁵ Lihiluleni yeni vavenia, linga mumone indi hanga muakakateya ku lutsilielo lueni. Liesekeni yeni vavenia. Nkuma kumuatantekeyele ngueni Yesu Kilistu ali muli yeni ndi? Kuvanga mulihilule keti ngoconi cilivene kaha munahonoua ceseko!

⁶ Njitsiliela nguange mukauana ngueni kutuahonouele.

⁷ Vuno honi tulomba kuli Njambi ngeci keti mulinge viavipi, keti cisholoke ngue yetu tunasa eci ceseko, vuno honi linga mulinge vije via kusungama, cipue vene oku cimuesa ngeci tunahonoua.

⁸ Omuo kutuasa kulinga vioshe hakuluisa vusunga, vuno honi vioshe lika omuo ya vusunga.

⁹ Omuo tunavuahelela ngeci yetu tunapu vakuzeya kaha yeni muvakukolesa. Yetu tulinakulomba lika mutualeleleho lutue.

¹⁰ Njilinakusoneka eci oku njesi hamo neni, linga ngeci omo njija keti cikanjikaluuile mukupangesa nzili yakama ije Muene nanjihana yakutunga kaha keti yakushandola.

¹¹ Cakumanusuila, vamuanetu, saleniho. Kakateyeni kulinga viuma via kulumbunuka, ivuilileni kukulambelega cange, litavasaneni umo na mukuavo, yoyeni mu ciyulo. Kaha Njambi ua cizango na ciyulo akakala neni.

¹² Lihinduiseni umo na mukuavo na kulitsuemba ca kulela.

¹³ Voshe vantu vakulela va Njambi vanatumu vihindu kuli yeni.

¹⁴ Kavumbi ka Muene Yesu Kilistu na cizango ca Njambi na kulitombola ca Cimbembesi Uakulela vikale neni voshe.

Mukanda ua Paulu kuli vaka NGALATA Citsindikisi

¹ Paulu kanganda uje keti uakuhuma ku vantu cipue kuhitila mu muntu, vuno honi kuhitila muli Yesu Kilistu na Njambi Tate, uje uamusanguile ku vatsi,

² yange na vamuanetu voshe vaje vanjili navo, tuli nakutuma vihindu, Ku vikungulukilo via mu Ngalatiya:

³ Kavumbi kakale neni na ciyulo vije vihuma kuli Njambi Tate na Muene yetu Yesu Kilistu,

⁴ uje ualihanene ikeye vavenia ha vipi vietu mukutuhumisa ku vupi ovu vua vuavuno, kuya ku cizango ca Njambi yetu Tatetu.

⁵ Kuli ikeye kukale vumpau ku miaka yoshe ya yaye! Amenii.

Muzimbu Umo Uacili

⁶ Njalikomokela ngeci yeni voshe muahumu vuasi kuli uje uamisanene mu kavumbi ka Kilistu nakutengulukila ku muzimbu ueka.

⁷ Ketu ngue nguavo kuli muzimbu ueka naua, vuno honi kuli vamo vaje vali nakumitanganesa kaha vatonda kutangula muzimbu ua Kilistu.

⁸ Vuno honi cipue vene nga yetu indi kangelo uakuhuminina kuilu, uje akambulula muzimbu ueka uakuliseza na uje utuambulule yetu kuli yeni, kaha apue uakusinga.

⁹ Ngue muje mutunahandeka hakulivanga, nahano hanga naua njici-handeka nguange, nga kukala umo akambulula kuli yeni muzimbu ueka uakuliseza na uje umuatambuile, kaha apue uakusinga.

¹⁰ Nkuma yange njilinakutonda ngeci vantu vanjishangale indi Njambi? Indi nkuma njilinakueseka kuvuahelesa vantu? Nga hanga njicili nakuvuahelesa vantu, ngue kunjapuile nji ngamba ya Kilistu.

Muje Paulu uapuile Kanganda

¹¹ Omuo njitonda linga mutantekeye vamuanetu, ngeci muzimbu uje yange njambulule kuapuile muzimbu uakuhuma ku muntu.

¹² Omuo kunjautambuile kuli muntu, cipue kulilongesauo, vuno honi uezile kuhitila mukusolola ca Yesu Kilistu.

¹³ Omuo munevu vuyoye vuange vualaja mu futisi ya Vayunda, muje vati munjapakesele cikungulukilo ca Njambi muakupihia nakutonda kucinongesa.

¹⁴ Kaha njahianene mu futisi ya Vayunda kupulakana vavengi vaje mutunapuila hamo ku miaka hhakati ka vantu vange, njalihanene cikuma ku vilika via vatatetu.

¹⁵ Vuno honi omo Njambi uje uanjihanguile laja te kanda njisemuke, nakunjisana kuhitila mu kavumbi kendi,

¹⁶ uavuahelele cikuma hakusholola Munendi kuli yange linga njika-muambulule hhakati ka vaje keti Vayunda, kunjaille kuli muntu umo mukunjinangula,

¹⁷ cipue kuya ku Yelusalema kuli vaje vapuile tunganda yange te kanda, vuno honi njaille mu Alambiya kaha naua njahilukile ku Ndamasiku.

¹⁸ Ambahoni munima ya miaka itatu njaille ku Yelusalema mukumenekela Kayafase kaha njakele nendi kuje matangua likumi na atanu.

¹⁹ Vuno honi kunjakamueneko tunganda veka naua kuvanga lika Tiango munaina ya Muene.

²⁰ Muli evi njinasonekela yeni, vusunga vua Njambi kunjesi nakukuisa.

²¹ Ambahoni njaile ku mitambela ya ku Silia na Silisha.

²² Vuno honi hanga vene kuvanjitantekeyele ku vikungulukilo via Kilistu via mu Yundeya,

²³ vovuile lika nguavo, “Uje uatuyandesele vuno honi alinakuambulula lutsilielo luje luatondele kunongesa.”

²⁴ Kaha vahanene vumpau kuli Njambi omuo yange.

2

Paulu na Tunganda Vakuavo

¹ Ambahoni munima ya miaka likumi na iuana njaile naua ku Yelusalema na Mbanambase hamolika na Tito.

² Njaile kuje omuo ya kusolola, kaha njaliuanene navo vaje vantuama vuno honi capuile mu vushueke kaha njavahanene muzimbu uje unjikambulula hhakati ka vaje keti Vayunda, njatondele kutantekeya muacili nguange kunjishatukila cipue njashatukilile viangoco.

³ Vuno honi Tito uje uakele nange kuvamusindiye linga alovoke, cipue vene ikeye uapuile Kangelengu.

⁴ Vuno honi omuo ya vaka kutsiliela vamakuli vaje vezile mu vushueke, vaje vezile mukuseveleka linga vakuende vungungu ha kupatuka cetu kuje tulinaco muli Kilistu Yesu, linga vatupuisse vandungo.

⁵ Kutualihanene kuli vakevo cipue muka ntsimbu lika, tualingile eci linga vusunga vua muzimbu vavutulikile yeni.

⁶ Vuno honi kuli vaje vavakele nakuhana kasingimiko ngue cuma cije caseho, vuno honi muoshe muje muvafuile, kuvalumbunukile ambe cimo kuli yange, Njambi kakele na civembulu, vaje vanjihandeka nguange vantu vakulema kuvahakeleko cimo kuli yange.

⁷ Vuno honi mu ngila ikuavo naua omo vamuene nguavo njakakateya kuambulula muzimbu kuli vaje vakuhona kulovoka, ngue Petulu muje muakakateyele kuambulula muzimbu kuli vaje kulovoka,

⁸ omuo Njambi uje uakele nakupangesa Petulu ha vipangi via vaka kulovoka uapangesele nange naua kuli vaje keti Vayunda.

⁹ Omo vanongonuene kavumbi kaje kavanjihanene, kaha Tiango, na Kayafase, na Iuano vaje vavakele nakuhana kasingimiko ngue vantuama, havanene yange na Mbanambase livoko lia cilio mukupangela hamo, linga tuye kuli vaje keti Vayunda kaha vakevo kuli vaje vakulovoka.

¹⁰ Voshe valombe yetu linga tuanuke tuhutu, eci cikeco cuma cije cinjikatondo kulinga.

Paulu Atenukila Petulu ku Antioke

¹¹ Vuno honi omo Kayafase uezile ku Antioke njamusembuluile ku mesho endi omuo ikeye uapihisile.

¹² Omuo tele kanda vamala vamo veje kuli Tiango, ikeye ualile na vaje keti Vayunda, Vuno honi omo vezile uavashondolokele nakulihumisako ikeye vavenia mukuteua kulovoka.

¹³ Kaha ikeye na vakuavo voshe Vayunda vaputukile kulinga civembulu linga vene cipue Mbanambase na ikeye vamutanguile ku civembulu cavo.

¹⁴ Vuno honi omo njamuene nguange kuvesi nakulinga viakusungama ha vusunga vua muzimbu, kaha njahandekela na Kayafase ku mesho avo voshe nguange, “Nga yove, cili uje Kayunda uyoya ngue uje keti Kayunda

vuno honi keti ngue Kayunda, kaha uasa vati kulinga vaje keti Vayunda linga vayoye ngue Vayunda?"

Vayunda na vaje Ketu Vayunda Vanovoka ha Lutsilielo

¹⁵ Yetu vavenia vaje Vayunda ku cisemua kaha keti vaje keti Vayunda vaka vipi,

¹⁶ tutantekeya nguetu muntu kasa kupua uakusungama ha vipangi lika via lishiko vuno honi kuhitila mu lutsilielo muli Kilistu Yesu, cipue yetu tunatsiliela muli Kilistu Yesu linga tupue vakusungama ha lutsilielo muli Kilistu, keti ku vipangi via lishiko omuo ha vipangi lika via lishiko naumo uahi akapuilaho uakusungama.

¹⁷ Vuno honi nga mukusetela kuetu linga tupue va vusunga muli Kilistu, kaha yetu vavenia tualuanene kupua vaka vipi, kaha nkuma Kilistu ikeye liavenia vupi ndi? Cilivene kuahi!

¹⁸ Vuno honi nga naua njitunga viuma vije vinjalundumuine, kaha njalimono yange vavenia nguange muka kupihisa.

¹⁹ Omuo yange kuhitila mu lishiko njatsile ku lishiko, linga njikayoye kuli Njambi.

²⁰ Vanjishukikile hamo na Kilistu, kaha keti yange naua uje ayoya vuno honi Kilistu ikeye uje ayoya muli yange, kaha na muono uje honi njiyoya mu ntsitu njiyoyela ha lutsilielo muli Muna Njambi, uje uanjizangele nakulihana ikeye vavenia hali yange.

²¹ Kunjasa kuteua kavumbi ka Njambi, omuo nga vusunga vavuuana kuhitila mu lishiko, kaha Kilistu viahi viatsililile.

3

Lishiko cipue Lutsilielo

¹ Eni vilema vaka Ngalatiya! Iya namilouo, ku mesho aveya Yesu Kilistu vamuhanene ku vivunga nakumushukika?

² Maneni njimihule eci lika: Nkuma yeni muatambuile Cimbembesi ha vipangi via lishiko indi vukuvuilila na lutsilielo?

³ Muvilema vati yeni? Hakuputuka na Cimbembesi, nkuma mumanusula honi na ntsitu ndi?

⁴ Nkuma muahitila vene mu viuma viavingi muangoco ndi? Cilivene nga vinayi muangoco.

⁵ Nkuma uje akamihana Cimbembesi nakupanga vikomoueso hhakati keni akavipanga na vipangi via lishiko indi ha kuvuilila na lutsilielo?

⁶ Mukemo vene Avilahama "uatsilielegelele Njambi, kaha vmutandeleleko kupua uavusunga."

⁷ Taleni omu mukemo mucinafu yeni vamala va lutsilielo vaje vakevo vana va Avilahama.

⁸ Kaha na visoneka hakumona vije vilikulutue ngeci Njambi akalinga vaje keti Vayunda kupua vaka vusunga ha lutsilielo, nakuambulula muzimbu mukulivanga kuli Avilahama nguendi, "Muli yove mafuti oshe akakuisuliua."

⁹ Nankuma, vaje voshe vantu vali na lutsilielo vanakuisuliua hamo na Avilahama uje uakele na lutsilielo.

¹⁰ Omuo voshe vaje vajendamena ha vipangi via lishiko, vali muintsi lia cisingo, omuo vavisoneka nguavo, "Nasingiua uoshe uje akaniungu viuma vioshe vije vivasoneka mu livulu lia lishiko nakuvilinga."

11 Honi calumbunuka muacili ngeci naumo uahi muntu ivapuisa uavusunga kuli Njambi ha lishiko, omuo “Uoshe uje alinga vusunga kuhitila mu lutsilielo akayoya.”

12 Vuno honi lishiko kuliakundamene ha lutsilielo, omuo “Uoshe uje avilinga akayoya navio.”

13 Kilistu uatukulile yetu ku cisingo ca lishiko hakupua cisingo omuo yetu omuo vacisoneka nguavo, “Nasingiua uje alishukika ha muti,”

14 linga muli Kilistu Yesu ngeci vije vikuisulo via Avilahama vije kuli vaje keti Vayunda, kaha linga tutambule cikulaheso ca Cimbembesi kuhitila mu lutsilielo.

Lishiko na Cikulaheso

15 Vavusamba vange njihana cimueso ca litangua lioshe mu muono uetu, naumo uahi asa kuhumisa ku litavasano lia muntu cipue kuvuezelelako, hanima ya kulikuta.

16 Honi vikulaheso vivapangelele Avilahama na mutekuluila uendi. Visoneka kuvihandeka nguavio, “Nakuli vatekuluila,” kulumbununa vavengi, vuno honi kulumbununa umo lika, “Nakuli mutekuluila uove,” ikeye Kilistu.

17 Evi vikevio vinjili nakulumbununa: lishiko lije liezile ha miaka vihita viuana na makumi atatu (430) yakunima, kuliayenguile litavasano lia laja lije Njambi ualingile, nakuhumisa cikulaheso cendi.

18 Omuo nga kusuana cakundama ha lishiko, kaha kucesi naua ha cikulaheso, vuno honi Njambi uacihanene kuli Avilahama ha cikulaheso.

19 Kaha omuo vikahoni lishiko? Valihakeleko omuo ya vupi, kuvanga noho hakezila uje mutekuluila uje ivalingilile cije cikulaheso. Lishiko valihanene kuhitila muli tungelo nakulikundika kuli muka kuimanena mukati.

20 Honi muka kuimanena mukati emanena vavengi, vuno honi Njambi uapua umo.

Vutumbe vua Lishiko

21 Nkuma lishiko lilinakuluisa vikulaheso via Njambi ndi? Cilivene kuahi, omuo nga lishiko valihanene nguavo liyoyese, kaha cilivene vusunga ngue vuneja omuo ya lishiko.

22 Vuno honi visoneka vinahaka viuma vioshe ku vupi, linga vioshe vije vivakulahesele ku lutsilielo muli Yesu Kilistu vakavihane kuli vaje vatsiliela.

23 Honi tele kanda lutsilielo luije, vatukutile ku lishiko nakutupuisa vinzinda noho vakasholola lutsilielo.

24 Kaha na lishiko tuakele nakuliendesa kuvanga noho hezilile Kilistu, linga vatupuisse vaka vusunga kuhitila mu lutsilielo.

25 Vuno honi luje lutsilielo luneja, kaha honi kutuapuila naua vinzinda va lishiko.

26 Omuo muli Kilistu Yesu muva voshe munapu vana va Njambi kuhitila mu lutsilielo.

27 Omuo vuingi vueni vaje vavambuitikile muli Kilistu munazala Kilistu.

28 Kukuesi honi Kayunda cipue Kangelengu, kukuesi ndungo cipue uakupatuka, kukuesi yala cipue mpuevo, omuo muva voshe munapu umo muli Kilistu Yesu.

29 Kaha nga munapu muva Kilistu, kaha muvatekuluila va Avilahama, kaha muva kakusuana kuya ku cikulaheso.

4

¹ Njilina kulumbununa nguange uje muka kusuana nga acili kanike kaha akapua ngue ndungo cipue vene oku ikeye vene vavenia vikumba.

² Vuno honi akakala mu mavoko avakakumuniunga na vaje vavanat-siliela kuvanga noho ha litangua lije liatumbuile ishe.

³ Kaha netu vene omo tele tu vanike tuapuile tu vandungo va vimbembesi vije vikendesa mavu.

⁴ Vuno honi omo ntsimbu yahetele, Njambi uatumine Munendi uakuse-muka ku mpuevo, uakusemukila mu lishiko,

⁵ mukukula vaje vakele muintsi lia lishiko linga vatupuisse vana.

⁶ Kaha omuo munapu mu vana, Njambi natumu Cimbembesi ua Munendi mu mitima yetu, uje akalili nguendi, "Amba! Tate!"

⁷ Nankuma, kuhitila muli Njambi kuuapuile naua ndungo vuno honi muana, kaha nga unapu u muana kaha yove muka kusuana.

Kulishoshomuena ca Paulu hali vaka Ngalatiya

⁸ Ku laja, omo tele kanda utantekeye Njambi, muakele mu vundungo kuli vaje ku vuntu keti vanjambi.

⁹ Vuno honi omuo muatantekeya Njambi, cipue omuo honi Njambi namitantekeya, nkuma vati naua muhilukila kuli vije vimbembesi via kuzeya nangoco, vije mutonda naua linga mupue vandungo vavio?

¹⁰ Yeni mukaniungu matangua, na vingonde, na vintsimbu na miaka.

¹¹ Njilina kulishoshomuena nguange hamo nzili yange hali yeni inai muangoco.

¹² Vamuanetu njilinakumulambeleda linga mupue ngue yange, omuo nange naua njinapu ngue yeni. Kumuanjilingile cipue vupi vumo.

¹³ Muatantekeya ngueni omuo yakuvavala mukemo njambuluile muz-imbu kuli yeni ha kulivanga.

¹⁴ Kaha cipue vene cihindu cange capuile vieseko kuli yeni, kumuanjiyen-guile cipue kunjisembulula, vuno honi muanjitambuile ngue kangelo ua Njambi, cipue ngue Kilistu Yesu.

¹⁵ Vikahoni vije muavuahelelele cikuma? Omuo njinapu mukaleho nguange nga casiuile ngue muahumisile mesho eni naku ahana kuli yange.

¹⁶ Nkuma honi njinapu citozi ceni omuo yakumileka vusunga ndi?

¹⁷ Ovo vantu vamuesa cizango hali yeni vuno honi kuakuhona seho, vatonda linga vamitepese kuli yetu linga muzange vakevo.

¹⁸ Omuo ha mulonga uacili, cikapu cacili ntsimbu yoshe kulizanga, kaha keti lika omo nga tulihamo.

¹⁹ Vana yange vacizango, vaje hanga naua njicili mu mushongo uje ngue mpuevo atonda kusema kuvanga noho muatambula Kilistu muli yeni.

²⁰ Njitonda ngue njikale neni hano linga citengulule lizi liange omuo njalishoshomuena hali yeni.

Cimueso ca Hangale na Sala

²¹ Njilekeni, yeni vaje vatonda kukala muintsi lia lishiko, nkuma ku-muekulivua lishiko ndi?

²² Omuo vanacisoneka nguavo Avilahama uakele na vana vavali va vamala, umo uakuli mpuevo ua ndungo kaha mukuavo uakuli mpuevo uakupatuka.

²³ Vuno honi muana uje uakuli ndungo uasemukile kuya ku vuntu, kaha muana uje uakuli uakupatuka uasemukile kuya ku cikulaheso.

²⁴ Honi eci cinapu ngue cisimo, ava vampuevo vanapu matavasano avali. Limo lihuma ku Munkinda ua Sinai, kusemena vana mu vundungo, ou ikeye Hangale.

²⁵ Honi Hangale ikeye Munkinda ua Sinai mu Alambiya, ikeye nemanena Yelusalema ije iliko, omuo ikeye ali mu vundungo na vana vendi.

²⁶ Vuno honi Yelusalema ije ili kuilu ikeyo yakupatuka, kaha ikeye nanetu.

²⁷ Omuo vanacisoneka nguavo,

“Vuaheleleni, yeni vantsimpi vaje kuvekusema!

Lileni nakutambeka na nzolela, yeni vaje kumuesi mu mushongo uakusema!

Omuo vana va uje ivasezele vanapu vavengi

kupulakana vana vendi uje nashomboka.”

²⁸ Honi yetu, vamuanelu, ngue Isake, yetu tu vana vacikulaheso.

²⁹ Vuno honi ngue kuntsimbu ije uje muana uasemukile kuya ku vuntu uapakesele uje uasemukile kuya ku cimbembesi, kaha omu mukemo mucilimo cipue hano.

³⁰ Vuno honi visoneka nkuma vihandeka vika? Vihandeka nguavio, “Sheka mpuevo ua ndungo na munendi, omuo muana uje ua ndungo kasa kukasuana hamo na muana ua uje mpuevo uakupatuka.”

³¹ Nankuma, vamuanelu, yetu keti tu vana va uje ndungo vuno honi va uje mpuevo uakupatuka.

5

Niungeni Kupatuka Ceni

¹ Omuo ya kupatuka mukemo Kilistu natupatula, nankuma, imaneni ngoo kaha keti mulihane naua ku mutiyo ua vundungo.

² Honi yange Paulu, njihandeka kuli yeni nguange nga mutambula kulovoka, kaha Kilistu kakakala na seho kuli yeni.

³ Njihilukilaho naua kunangula ku yala uoshe uje akatambula kulovoka nguange ikeye vanamukutu mukutulika lishiko lioshe.

⁴ Vanamihumisa kuli Kilistu yeni voshe vaje vavapuisa va vusunga ku lishiko, munahumu ku kavumbi.

⁵ Omuo kuhitila muli Cimbembesi ha lutsilielo, tulinakuvandamena kutsiliela ca vusunga.

⁶ Omuo muli Kilistu Yesu kukuesi kulovoka cipue kuhona kulovoka cije cili naseho, vuno honi lutsilielo lupanga kuhitila mu cizango.

⁷ Muakele nakulinga muacili, kaha iya honi uamivindikile kuononoka vusunga?

⁸ Eci kusindiya kucahumine kuli uje uamisanene.

⁹ Kacimbaluila kakandende kakafutunuisa mukasha uoshe.

¹⁰ Njatsiliela muli Muene nguange kumukatambula cuma ceka kupulakana cange, kaha na uje uoshe alinakumiyandesa akauana cisompelo cendi.

¹¹ Vuno honi nga yange vamuanelu, hanga njicilinakuambulula kulovoka, nkuma vikahoni hanga vacinjipakesa? Ha mulonga ou cije citsuntsu-iso ca cilindakano vanacihumisa.

¹² Njitonda linga vaje vantu vaje valinakumitanganesa keti valengesele aha lika, veceleni vatualeleleho nakulipuisa vayunuke.

¹³ Vamuanelu, omuo yeni vamisane mukupatuka, kaha honi keti mupangese kupatuka ceni cipue lisesa lia ku muvila ueni ua ntsitu, vuno honi kuhitila mu cizango pueni vangamba kuli umo na mukuavo.

¹⁴ Omuo lishiko lioshe vanalishulisisa mu lizi limo lika eli ngualio, “Zanga mukueni ngue muua lizanga yove vavenia.”

¹⁵ Vuno honi nga mulishuma nakulivulumuna umo na mukuavo kaha nangukeni linga keti mukalinongese umo na mukuavo.

Cimbembesi na Cisemua ca Vuntu

¹⁶ Vuno honi njihandeka nguange endeni na Cimbembesi kaha keti muvuahesele mashungu aku muvila ua ntsitu.

¹⁷ Omuo mashungu aku muvila ua ntsitu akaluisa Cimbembesi, kaha na mashungu a Cimbembesi akaluisa muvila ua ntsitu, omuo evi kuvialito-mbuele, kaha vikamikingi ku kulinga vije vimutonda kulinga.

¹⁸ Vuno honi nga Cimbembesi cimituamenena kaha kumuesi muintsi lia lishiko.

¹⁹ Honi vipangi via muvila ua ntsitu viapua viangoco: vikevio viapua vupangala, kulijualesa, vilinga via kuteuesa,

²⁰ kulemesa tumponia, vulozi, vutozi, vaka kulua, cipululu, vutenu, vaka kulizanga vavenia, vaka kulitepesa ku vakuavo, vaka cimbembesi ca kuzanga viuano,

²¹ vaka lifuua, vaka kupenda, nakulinga viuma vieka ngue evi. Njiminangula ngue muje naua munjaminanguile hakulivanga, ngeci vaje voshe vakalingi viuma evi kuvakaswana vumuene vua Njambi.

²² Vuno honi vushuka vua Cimbembesi vuapua cizango, nzolela, ciyulo, lukakateya, ngozi, vucili, kukonkama,

²³ kulikehesa na kulihilula, kaha kukuesi lishiko liluisa viuma evi.

²⁴ Kaha vaje voshe vakundama kuli Kilistu Yesu vanashukika muvila ua ntsitu na vilinga viauo na mashungu auo.

²⁵ Nga tuyoyela hali Cimbembesi, kaha tuyeni tuende naua na Cimbembesi.

²⁶ Kutuapandele kupua vaka kulihalesa cipue kuliputuka umo na mukuavo, cipue kuvuila cipululu umo na mukuavo.

6

Liambateseni Viteli via Umo na Mukuavo

¹ Vamuanetu, nga muntu umo vanamuuana na mulonga uli uoshe, kaha yeni vaje vanakulahela munapande kumusungamesa mu cimbembesi ca kulikehesa. Kaha lihiluleni yeni vavenia kuteua mukakovele naua mu ceseke eci.

² Liambateseni viteli via umo na mukuavo, kaha mukulinga eci mukashulisisa lishiko lia Kilistu.

³ Omuo nga uoshe uje asinganieka nguendi napu uakama, vuno honi keti mukemo muanapu, kaha ali nakulikuisa ikeye vavevia.

⁴ Vuno honi muntu na muntu ahilule vipangi viendi vavenia, kaha kuya ku vipangi viendi akasa kulihalesa ikeye vavenia keti hali mukuavo.

⁵ Omuo muntu na muntu akaliambatela citeli cendi vavenia.

⁶ Muntu uoshe uje ivanalongesa lizi akalipangela viuma vioshe viacili na uje namulongesavio.

⁷ Ketu vamikuise, Njambi kuveikumushendumuna, omuo vioshe vije viakuna muntu, vikevio naua viakateja.

⁸ Omuo uoshe uje akuva ku muvila uendi, kaha ku muvila uendi naua kukeko kuakateja kunonga. Vuno honi uoshe uje akuva ku Cimbembesi, kaha ku Cimbembesi naua kukeko kuakateja muono ua yaye.

⁹ Keti tuhone mukulinga viuma viacili, omuo ntsimbu ikeja ije tukateja muacili nga tutualelelaho nalukakateya.

¹⁰ Nankuma, omuo tucili nantsimbu, tuyeni tulinge vucili ku vantu voshe, kaha cikuma kuma ku ntanga ije ya lutsilielo.

Kunangula Cakumanusuila na Cihindu

¹¹ Taleni kuhama ca visona vije njili nakumisonekela na livoko liange.

¹² Vaje vakatondo kuvuahelesa vantu ku ntsitu vakevo vaje vakamisindiya linga mulovoke. Eci vakacilingila lika linga vateue kuvapakesa omuo ya cilindakano ca Kilistu.

¹³ Omuo cipue vene vaje vanalovoka kuvekutulika lishiko, vuno honi vakashunguiya yeni linga mulovoke ngeci vauane vumpau mu muvila ueni.

¹⁴ Vuno honi yange kunjikalihalesa ha lievi, kuvanga lika ha cilindakano ca Muene uetu Yesu Kilistu, uje muli ikeye mavu vanaashukika kuli yange, nange ku mavu.

¹⁵ Omuo kukuesi na mulonga uahi cipue ualovoka cipue kuualovokele, vuno honi cakama kupua uakutanga lualuha.

¹⁶ Ciyulo na cikeketima vikale kuli yeni voshe vaje venda na lishiko eli, na kuli Isaleli ya Njambi.

¹⁷ Kuhuma hano, keti kukale muntu umo anjihane vukalu, omuo njinambata vitamba via Yesu ha muvila uange.

¹⁸ Kavumbi ka Muene uetu Yesu Kilistu kakale na cimbembesi ceni, vamuanetu. Amen.

Mukanda ua Paulu kuli vaka EFESO Citsindikisi

Mukanda kuli vaka Efeso vausonekele ha ntsimbu imo na mukanda ua vaka Kolose ngue mu mukati ka 60-62 AD. Muka kusoneka na

Liambulula vavenia kupua Paulu (1:1). Vaka kulilongesa cikuma ha cuma cimo vanatava nguavo Paulu ikeye uasonekele Efeso cipue ngoco ou mukanda kuuesi na cihindu ca vavenia cije ciuanuia kuva ka Kolose. Muafua hacifua eci camoneka ngue vausonekele linga uzenguluke mu vikungulukilo vimo vili Munganda. Paulu atumbula naua nguendi uakele mu kamenga omo uasonekele mukanda (3:1, 4:1, 6:20). Paulu uahanene mukanda kuli Tatikikase kuya nauo ha vungenzi vuendi kukamona cikungulukilo caku Efeso (6:21-22).

Efeso yapuile Nganda yakama ya vaka Loma hhakati kavinganda via vindende ca muhela mu Asiya. Efeso ye vuikile cikuma muafua vatungile cihela cakama ca kulemesela Kamponia ua va Ngelengu ua mpuevo Atamisi (Vilinga 19:23-31). Cikungulukilo ca Efeso caputukile vuino ha kutualelelaho ca hilukilile munima (Kusolola 2:1-7.)

Paulu ali nakulumbununa ha mbazuvuila ya kulivanga ya mukanda ou omo muje Njambi ua hanguile vantu vendi na kuvasambuesa ku vupi vuavo kuhitila muli Yesu Kilistu. Ali nakusetekesa cikungulukilo ku muvila na njivo. Kilistu ikeye mutue ua muvila na cisimi cakama ca njivo. Mu mbazuvuila ya mucivali ya mukanda Paulu ahana mashiko muvanapande kuyoya muvu Yesu.

Kulumbununa viuma vili mu mukanda:

1.1-2 Paulu aliambulula vavenia na kumeneka va Efeso.

Kaha alumbununa vu sepa vua cikungulukilo na Kilistu (1:33; 21).

Kaha Paulu ali nakusoneka ha ngila vanapande kuyoyelamo vaka Yesu (4:16-20).

Hakumanusula Paulu ahandeka amo mezi akushoka (6:21-24).

Mitende kuhuminina kuli Paulu

¹ Paulu, kanganda ua Kilistu Yesu ku cizango ca Njambi,

Kuli vantu va Njambi vakulela vaje naua vapua vakukonkama muli Kilistu Yesu.

² Njambi tatetu na Muene Yesu Kilistu vamihane ngozi na ciyulo.

Vikuisulo muli Yesu Kilistu

³ Tulemeseni Njambi ikeye Njambi ya Muene yetu Yesu Kilistu kaha ikeye naua ishe. Omuo mukulipandakana kuetu na Kilistu natukuisula navikuisulo vioshe via Cimbembesi mu vihela via muilu.

⁴ Tele kanda vapange mavu. Njambi uatuhanguile laja tupue vendi muli Kilistu, tupue vakulela na kujeneka mulonga ku mesho endi.

Omuo cizango cendi,

⁵ Njambi uayonguelele kulutue ngeci kuhitila muli Yesu Kilistu akatupuisa kupua vana vendi. Eci capuile cakumulema na vutumbe vuendi vavenia.

⁶ Nkuma tulemeseni Njambi ou natumuesa ngozi yendi yakama cikuma muafua ya munendi yazema.

⁷ Mu maninga a Yesu Kilistu tunapatuka na kutusambesa ku vupi vuetu, ovu vukevo vukama vua ngozi yendi yakama cikuma-kuma.

8 Njambi natuhana ngozi museteko yakama! Mukuendelela na mana oshe na mukutantekeya kuoshe.

9 Njambi ualingile vije uatumbuile kulinga kulutue. Uatusholuelele vutumbe vuendi vua vushueke vuasinganiekele kumanesa kuhitila muli Kilistu.

10 Vutumbe ovu vuje Njambi aka vumanesa omo nga ntsimbu ya cili inapuh, akakungulula vioshe via muilu nevi via ha mavu muli Kilistu.

11 Vioshe viuma Njambi ualingile kuya navutumbe vuendi. Njambi uatuhanguile kupua tuvantu vendi kuhitila muli Yesu Kilistu. Ovu vukevuo vutumbe vuendi vua tumbile hume ha katete.

12 Yetu vakulivanga tuakala na likulahelo muli Kilistu tulemeseni vumpau vua Njambi.

13 Neni naua muapuile mu vantu va Njambi omo muazivile lizi lia vusunga, vimpande viacili vije viaminehelele kuovoka. Muakulahelele muli Kilistu, Kaha Njambi namihaka cizivukiso cakupua muvendi haku-mihana Cimbembesi cakulela uje uamikulahesele.

14 Cimbembesi cikeco cinatulingisa cili vene tukasuana vije Njambi nakulahesa vantu vendi, kaha tunasimpi ngeci Njambi a kapatula vantu vendi. Tulemeseni vumpau vuendi!

Lilombelo lia Paulu

15 Muafua ya vioshe evi Njambi vianamilingila hume njevuile kukut-siliela kueni muli Muene Yesu, na cizango ceni kuli voshe vantu va Njambi,

16 kunjalikelele kutsatsela kuli Njambi omuo yeni. Ntsimbu yoshe njikamilombelela.

17 Njili nakutualeleho kulomba kuli Njambi ya Muene uetu Yesu Kilistu, ishe ya ku vumpau amihane Cimbembesi ca mana na ca kusholola linga mutantekeye Njambi muacili.

18 Njili na kulomba kuli Njambi linga amihane ceke ca kutantekeya likulahelo lije liva namisanena na vumpau vuakama vua vufuko vuva kasuana vantu vendi.

19 Naua njikalombo nguange mutantekeye nzili yendi yakama kuli yetu vaka kutsiliela. Ije nzili ipanga muli yetu inapu ngue nzili yakama ije

20 uapangesele omo uasanguile Kilistu ku vatsi nakumutumbika ku livoko liendi lia cilio mu lifuti lia muilu.

21 Kuje Kilistu ikeye muka kushika helu lia voshe vaka kushika muilu, vaka mpoko yakama na vaka nzili na vimiene voshe, ikeye ali na lizina lili helu lia mazina oshe a mpoko ali hano vene na aje akejaho.

22 Njambi nahana nzili yoshe muli Kilistu nakumupuisa mutue ua vioshe mu cikungulukilo.

23 Cikungulukilo cinapu muvila ua Kilistu, na cikungulukilo cinashulu ikeye na ikeye nashulisisa vioshe.

2

Kuhuma ku kutsa kuya ku muono

1 Laja muapuile muvatsi ku Cimbembesi omuo ku muononokele Njambi, nakulinga vupi.

2 Ha ntsimbu ije muakavangeyele vingila via vupi via muno mu lifuti, muononokele suana na muvukambuila ikeye Cimbembesi ou ali na kutu-amenena vantu vaje kuvesi nakuononoka Njambi.

3 Mua vusunga vene tuva voshe tuafuile ngue vakevo ha ntsimbu imo, kaha tuayoyele vene ngue kucisemua ca mashungu etu a vuntu. Tualingile

vije vuntu vuetu na visinganieka via vuntu viakele nakutonda. Muafua kucisemua cetu ca vuntu ngue vantu voshe, tuapandele kuyanda ku vukalu vua Njambi.

⁴ Vuno honi Njambi uapua ua cikeketima cikuma, muafua ha cizango cendi kuli yetu capua cakama cikuma.

⁵ Omo tuatsile ku vupi vuetu ku Cimbembesi, Njambi uatunehele ku muono na Kilistu. Munovoka ha ngozi ya Njambi.

⁶ Hakukala kuetu muli Kilistu Yesu, Njambi uatusanguile mu Cimbembesi hamo nendi ngeci tukayule hamo nendi mulu.

⁷ Ualingile evi kupua cimueso kuli voshe ha vintsimbu vioshe na vije vikejako ha kumuesa vukama vua cikeketima cendi cije kutuasa kuseteka na kavumbi kaje katumuesele muli Kilistu Yesu.

⁸ Munovoka muafua ngozi ya Njambi kuhitila mulikulahelo. Eci keti ngue ha vilinga vieni kuahi, vuno honi cinapu vuana vua Njambi.

⁹ Njambi kamiovuele ha vilinga vieni. Muafua yaevi kukuesi visinganieka linga muntu umo alishashe.

¹⁰ Yetu tunapu vakutanga kuli Njambi, kaha hakukala kuetu muli Kilistu Yesu uatutangelele yetu kulinga vipangi viacili, vije uatu vuaheselelele kulutue ngeci vene tuyoye mu cifua eci vene.

Vumo muli Yesu

¹¹ Singaniekeni ha ntsimbu imo yeni keti mu Vayunda kucisemua, vaje vamisana nguavo “Vakakujeneka kulovoka” ngue ku futisi ya Vayunda, vaje valitumbula nguavo “vaka kulovoka” eci cikalingika kumivila ua muntu namavoko.

¹² Ha ntsimbu ije muahangunukile kuli Kilistu. Muapuile muvangezi kumuakundamene ku vantu va Isaleli vaje Njambi uahanguile. Kumuakele na mutambela mu matavasano, aje emanene ha vikulaheso via Njambi kuli vantu vendi, kaha yeni muayoyele hano ha mavu kua kuhona likulahelo na kujeneka Njambi.

¹³ Muakele kulahako na Njambi ha ntsimbu imo. Vuno honi vanaminehe hayehi muli Kilistu kuhitila mu maninga endi.

¹⁴ Omo Kilistu natunehela ciyulo hakupua Vayunda na vaje keti Vayunda kupua umolika. Uahanene muvila uendi kupua cikombelo, ca kuvujula ciumbe cije cava hangunuine na kuvapuisa vitozi.

¹⁵ Omo uatsile uatupuisile kulikela kukavangeya mashiko a Vayunda hamo nakushika kualio na futisi yalio linga yetu tuovoke. Ualingile eci ngeci vivunga vivali vipue civunga cimolika, linga kukale ciyulo.

¹⁶ Kuhitila ha kutsa cendi ha cilindakano Kilistu uanongesele vizindo viavo. Kuhitila ha cilindakano napandakana vivunga vivali nakuvipuisa muvila umolika nakuvineha hamo na Njambi.

¹⁷ Kilistu uezile nakuambulula muzimbu ua cili ua ciyulo kuli voshe, kuli yeni keti Vayunda vaje vakele kulahako na Njambi na kuli Vayunda vaje vakele kuyehi na Njambi.

¹⁸ Muli Kilistu yetu voshe, Vayunda na vaje keti Vayunda, tuasa kuija ku mesho a Tate mu Cimbembesi ca Njambi.

¹⁹ Nankuma, yeni keti Vayunda kumuapuile honi naua vakakuija, yenhoni munapu mu vandambo hamo na vantu va Njambi, yenhoni munapu vantu va ntanga ya Njambi.

²⁰ Neni naua vanamitungu ha luvula lua tunganda na tunanguizi va Njambi, cisimi caseho cikuma ca mu mbango cikeco Kilistu Yesu vavenia.

²¹ Ikeye muka kukuatela njivo yoshe hamolika na kuyikolesa na kuyipuisa njivo yakulela ya Muene.

²² Muli Yesu yeni vana mitungu mumo na vakueni veka ngeci mupue muhela ua Njambi uakayoyela kuhitila hali Cimbembesi cendi.

3

Vipangi via Paulu kuli vaje keti Vayunda

¹ Kuya kuviuma vije vianapanga Njambi, yange Paulu njili naku-milombelega. Njili mu kamenga muafua ha vipangi via Kilistu Yesu hali yeni keti Vayunda.

² Mua vusunga vene yeni muazivuka ngueni Njambi mu kavumbi kendi nanjihana vipangi evi via kuambulula muzimbu ua cili.

³ Njambi uajomboluele vutumbe vuendi vua kushueka nakuvusholola kuli yange. Njasoneka laja movundende ha cuma eci.

⁴ Kaha nga mutanda vije vinjasoneka muhasa kuvuisisa muje munjike-vuisisa vishueka via hali Kilistu.

⁵ Mu vintsimbu via hanima vantu kuva valekele vishueka evi vuno honi Njambi navisholola alolo hali Cimbembesi cendi kuli tunganda na tunanguizi va Njambi va Njambi vaje vahanguile.

⁶ Cishueka eci, capuile ngeci hali lizi lia muzimbu uacili, vaje keti Vayunda hano honi vali namutambela hamo na Vayunda mu vikuisulo via Njambi vakevo vanapu muvila umo, na kuli pangazela mu cikulaheso ca Njambi cije ca pangele muli Kilistu Yesu.

⁷ Njambi uanjihanene vuana vuakama vua kuambulula mu muzimbu uacili. Ualingile eci kuhitila mu nzili yendi ilina kupanga muli yange.

⁸ Yange njapua nji uamundende ku hiana voshe vantu va Njambi, vuno honi Njambi ua nji hanene vipangi viacili viakuambulula muzimbu uacili kuli vaje keti Vayunda ua vufuko vua Kilistu vuje vua kukomokesa.

⁹ Uanjihanene naua vipangi via kumuesa vantu voshe vutumbe vua vishueka viendi muje mu vukalingiua. Njambi ikeye samatanga ua vioshe, uashuekele vushueka vuendi ku miaka yoshe ya kunima.

¹⁰ Visinganieka viendi hali evi vioshe viapuile kupangesa cikungulukilo kumuesa vaka kusuana na vaka nzili mu lifuti lia muilu muje vati mana endi akalanao mu vioshe.

¹¹ Evi vikevio Njambi uasinganiekele hume ha katete kaha uavi-manusuile kuhitila muli Kilistu Yesu Muene yetu.

¹² Muafua Kilistu na likulahelo lietu muli ikeye tuasahoni kuija mu kusimpa na kutsiliela muli Njambi.

¹³ Nankuma, njimilomba nguange keti muzeye ha tuyando tuange njili naku uana omuo ha liyeni. Muafuila kuziva kalemeso ngueni njalihana kuyandela viuma evi muafua hali yeni.

Cizango ca Kilistu

¹⁴ Muafua ha vutumbe vuakama vua Njambi nja ntsikamene ha mavuli ange naku milombelega ku mesho a tate.

¹⁵ Ikeye ishe ua ntanga yoshe ya hano ha muilu na mavu.

¹⁶ Njilomba kuli Njambi ha vufuko vua vumpau vuendi ngeci amihane nzili hali Cimbembesi cendi linga mukale na nzili mukati ka mitima yeni.

¹⁷ Njilomba nguange Kilistu ayoye mu mitima yeni ha kutsiliela. Kaha naua njilomba nguange mu shalave mizi mu cizango na luvula lueni lupue mu cizango.

¹⁸ Mungila eyi yeni hamolika na vantu va Njambi voshe mukakala na nzili ya kutantekeya muacili vukama vua cizango ca Kilistu ca kuhona kuhua.

¹⁹ Njilomba nguange mutantekeye cizango cendi cipue vene ku muhasa kucitantekeya muacili. Kaha nga mutantekeya cizango cendi mukashulilila na cifua ca Njambi.

²⁰ Njambi asa kulinga vije viuma via kuhiana cikuma mu nzili ili nakupanga muli yetu. Ahasa kupanga mu kuhiana vije vituasa kumulomba cipue kuhiana vije vituasa kusinganieka.

²¹ Kuli Njambi kukale vumpau mu cikungulikilo na muli Kilistu Yesu ku ntsimbu yoshe na ku miaka yayaye Amen.

4

Kulikuta mu muvila ua Kilistu

¹ Njili mu kamenga muafua ya kupangela Muene. Njimilomba muyoye muvu yoye vuaku fuilamo vua vantu vaje Njambi nahangula kupua vendi.

² Ntsimbu yoshe pueni vaka kuononoka na kulikehesa naku vandamena. Mueseni kulikonekela umo na mukuavo mu cizango.

³ Koleseni kutulika muacili vumolika vuana mihana yeni Cimbembesi ca Njambi mu kukala mu ciyulo cije cinamikutu hamolika.

⁴ Muvavoshe munapu mbazuvuila ya muvila umolika. Kuli Cimbembesi ca kulela cimolika. Ngue Njambi muanamihana likulahelo limolika muamisanene.

⁵ Kuli Muene umolika na lutsilielo lumolika na kumbuitika cimolika.

⁶ Kuli Njambi umo ikeye ishe ya voshe, Muene ua voshe, uapanga mu voshe kaha ali mu voshe.

⁷ Umo na umo hali yetu voshe natambula vuana vua cili kuesekesa ku vije Kilistu uahanguile kupangezela.

⁸ Ngue muvanasoneka mu visoneka nguavo,
 “Omo ikeye uaile ku cihela cilahako,
 Uambate vitozi vavengi hamo nendi vaje vakuate
 Nakuhana mavuana kuli vantu.”

⁹ Kaha naua “Ikeye uaile ku cihela cilahako” cinalumbunuka vika? Cinalumbunuka ngeci ha kulivanga uezile muintsi lia mavu akulova.

¹⁰ Uje uezile muintsi lia mavu, ikeye umolika uaile muilu lia melu oshe linga ashulise mavu oshe na ikeye vavenia.

¹¹ Uapuile ikeye ua hanene vuana, uemikile vamo tunganda, vamo kupua tunanguizi va Njambi va Njambi, vamo vapue vaka kuambulula muzimbu uacili, vamo vapue tuniungi vamo valongisi.

¹² Ualingile evi muku vuahesela vantu va Njambi vamupangele, muku-tunga muvila ua Kilistu.

¹³ Eci cikatalelelaho noho tuva voshe tukapua vantu vamolika muafua mulukulahelo luetu muli Muna Njambi muafua tuvavoshe tumutantekeya. Tukapua vantu vakukola mulukulahelo na kuheta haseteko ya kumanesela ya Kilistu.

¹⁴ Kaha kutukapuhu ngue tuvanike naua. Kutukatavesa vaka makuli kutukuisa na vilongesa via makuli vije viakufua ngue mankimba na mpunzi vije vitupekumuna.

¹⁵ Vuno honi hakuhandeka vusunga na cizango, tukakola mu vingila vioshe ngue Kilistu uje napu mutue.

¹⁶ Hali ikeye viluo via muvila vioshe vinali nungakana ha molika kaha muvila uoshe unalikuata hamo mu manunga. Muvila unakolo na kulitunga

ukeuo vavenia mu cizango kuya ku mbazuvuila mu ikapangelamo cipangi cayo.

Muono ua muli Kilistu

¹⁷ Mu lizina lia Muene, njiminangula keti muyoye ngue vantu vaje kuvazivuka Njambi, vaje viyongola viavo viapua viangoco,

¹⁸ kaha kuvuisisa kuavo cili mu milima. Vakevo ku vesi na mutambela mu muono uje uakahana Njambi omuo vakevo vali kunzimba na mu kukaluuisa mitima yavo.

¹⁹ Vakevo kuvesi nashuamua yahi. Vana liecelela na kulinga viuma via vupangala kaha vali na lishungu lia kutualelelaho kulinga viuma evi.

²⁰ Muje keti mukemo mu muali longeselelemo hali Kilistu

²¹ Mua vusunga yeni muaziva laja via hali ikeye kaha ha kupua vaka kumukava vamilongesele vusunga vuje vuli muli Yesu.

²² Vamilongesele kuseza vuntu vueni vua laja vuje vuakele naku miyoyesa muje mu muakele. Vuje vuntu vueni vua laja vavunongesele ha mashungu eni aje amakuli.

²³ Visinganieka vieni vinapande kupua via viha.

²⁴ Kaha munapande kuzala vuntu vua vuha vuje vuva napanga mu cifua ca Njambi. Ovu vuntu vua vuha vunapu vua vusunga cikuma na kulela.

²⁵ Nankuma keti muhandeke makuli naua! Muntu na muntu napande kuhandeka vusunga kuli mukuavo omuo yetu tuva voshe tunapu vilio via mu muvila ua Kilistu.

²⁶ Nga muniengua keti mutave kuniengua kueni cimituale ku vupi. Kaha keti mutokese litangua mu kuniengua lika kuahi.

²⁷ Keti mutave kuhana Satana muhela.

²⁸ Muntu uje uevile kapandele naua kuiva vuno honi aputuka kuononoka na kupanga cikuma linga akale nacimo ca kukuasa vihutu.

²⁹ Keti mulikuasese mezi akupihia omuo muhandeka, vuno honi likuas-eseni mezi acili aje asakutunga vantu kuya kuli vivana honoua ngeci vioshe vimuhandeka vikapue viacili kuli vaje voshe vamitolilila.

³⁰ Kaha keti munienguese Cimbembesi ca kulela ca Njambi. Omuo Cimbembesi ca kulela ca Njambi capua cimueso ca Njambi ca cakumuesa ngue muakundama kuli ikeye. Cimbembesi ca kulela cinapu lishimbikaya ngeci omo litangua lia kumanusuila likeja kaha Njambi aka mipatula.

³¹ Humiseni kushasha kuoshe na vutenu. Keti kukale na kulicokota cipue kulituka umo na mukuavo na matumbe amapi mukati keni.

³² Vuno honi pueni vaka ngozi na vaka cikeketima kuli umo na mukuavo. Lisambueseni umo na mukuavo ngue muana misambuesa Njambi muli Kilistu.

5

Kuyoya mu ceke

¹ Muapande kutemunuisa Njambi omuo muapua vana vendi vakumuya ku mutima.

² Yoyeni vuyoye vua cizango ngue omo Kilistu ua tuzangele na kulilambuila ikeye vavenia hali yetu ngue nkombelo ya luengo luacili.

³ Keti muhane vakueni visinganieka via kuhandeka ngue kuli vupangala, viuma via mazilo na lizangamena hhakati keni, muafua viuma evi keti viacili kupanga ku vantu va Njambi.

⁴ Ku muapandele kuhandeka mezi ashuamua cipue a vulema ku vantu cipue kuhandeka likehelela lia mazilo. Evi keti viuma viacili kuli yeni vuno honi munapande lika kusantsela Njambi.

⁵ Muazivuka ngueni uoshe alinga vupangala, cipue muntu ua mazilo cipue ua lizangamena kakasuana ku Vumuene vua Kilistu novu vua Njambi. Uoshe alinga lizangamena alemesa tumponia.

⁶ Ketu mutave umo amikuisse na mezi a mupulungua, omuo ha viuma evi vukalu vua Njambi vukakala hali vaje vaka kujeneka kuononoka.

⁷ Ketu mulipandakane na vije viva kalingi vantu vacifua canga cije

⁸ Ha ntsimbu imo muakele mu milima vuno honi omuo munapu mu vantu va Muene muli mu ceke. Munapande kuyoya ngue vantu vali mu ceke.

⁹ Ceke cikeco cikakuneha kuteja kuakama ca kusungama na vusunga.

¹⁰ Uaneni vije vivuahelesa Muene.

¹¹ Ketu muambateko mutambela ku viuma viangoco vije viva kalingi vantu, viuma vije vinakundama ku milima vuno honi vishololeni ku ceke.

¹² Cinapu ca shuamua cipue kuhandeka viuma vije vivalinga mu vushueke.

¹³ Omo viuma vioshe visholoka mu ceke, ambahoni vusunga vuacifua cawo vusholoka,

¹⁴ muafua omo ceke cisholola cuma cije cuma cikeco cipua ceke. Omu mukemuo vahandeka nguavio:

“Eni vaka kukosa hindukeni
Sangukeni muhume kuvutsi,
Kaha Kilistu akatuila ceke cendi hali yeni.”

¹⁵ Nankuma, zangameni mu mulina kuyoya. Ketu muyoye ngue vaka kuhona mana vuno honi ngue vaka mana.

¹⁶ Pangesen muacili vintsimbu vije mulinavio, omo matangua ano anapu a mapi

¹⁷ Ketu mupue ngue vilema, vuno honi uvuisiseni vije viazanga Muene ngeci mucipange.

¹⁸ Ketu mupende na viniu vije viasa kumipihisa, vuno honi taveni Cimbembesi ca Njambi cimipangese.

¹⁹ Handekeni umo na nukuavo na mezi a miaso ya Visamo na miaso yakulela. Imbeni miaso na kushangazala kuli Muene mu mitima yeni.

²⁰ Ntsimbu yoshe santeleni kuli Njambi tatetu mu viuma vioshe mu lizina lia Muene Yesu Kilistu.

Katumamesi kava kakuambata na vaka ku shomboka

²¹ Lihaneni umo na mukuavo muafua muka singimika Kilistu.

²² Yeni Vampuevo lihaneni kuli vamala veni, ngue kuli Muene.

²³ Yala ali na mpoko hali mpuevo yendi, ngue omo Kilistu ali na mpoko ha cikungulukilo. Kilistu vavenia ikeye muyoyesi ua cikungulukilo uje ukeuo muvula uendi.

²⁴ Vampuevo vanapande kulihana kuli vamala vavo mu vioshe, ngue cikungulukilo mucikalihana kuli Kilistu.

²⁵ Eni vamala, zangeni vampuevo veni ngue Kilistu mua zangela cikungulukilo, kaha uahanene muono uendi hali cikeco.

²⁶ Ualingile evi mukulelesa cikungulukilo ha kucikusha mu mema na mezi a Njambi.

²⁷ Uatsile kulinga cikungulukilo cimane ku mesho endi mu vumpau vuaco vuoshe, kuakuhona katoma cipue kapenga kamo cipue ceka ha viuma evi, vuno honi mukulela cipue mukuhona mulonga.

²⁸ Mukemuo naua vamala vanapande kuzanga vampuevo vavo ngue muva kazange mivila yavo vavenia. Yala uje azanga mpuevo yendi alizanga ikeye vavenia.

²⁹ Naumo uahi uazinda mivila uendi vavenia. Vuno honi aulisa naku ulela ngue Kilistu vene muakalingi ku cikungulukilo,

³⁰ omuo tunapu vilio via mivila uendi.

³¹ Ngue muvanasoneka mu visoneka nguavo, "Mukemo yala akaseza ishe na ina naku lipandakana na mpuevo yendi, kaha voshe vavali vakapua muvila umo."

³² Kuli cisinkiko cakulova ca vusunga mu visoneka evi, njili nakuhandeka hali via Kilistu na cikungulukilo.

³³ Vuno honi cinenika yeni naua, yala uoshe napande kuzanga mpuevo yendi ngue mualizanga ikeye vavenia, kaha mpuevo uoshe napande kusingimika yala liendi.

6

Vana na visemi viavo

¹ Yeni vana ononokeni kuli visemi veni muafua muakundama kuli Muene. Eci cikeco cuma cacili kucilinga.

² "Singimika isho na noko." Eli likelio Lishiko lia kulivanga muje lije Njambi uakulaheselemo cuma cimo.

³ Eci cikeco cakulahesele, "Nga usingimika visemi vove viuma vioshe vipua viacili kuli yove mu vuyoye vuove kaha ukayoya ntsimbu yakama muno mu lifuti."

⁴ Eni visemi keti muyandese vana veni. Omo muvalela valongeseni mu vilongesa via Muene.

Vangamba na Vamiene vavo

⁵ Eni vangamba, ononokeni vamiene veni va hano ha lifuti. Lingeni eci na mitima ya kasingimiko kavusunga, ngue vene mulina kupangela Kilistu.

⁶ Lingeni eci keti omo valina kumitalelela, muafua mutonda kuvuahesa ku mitima yavo, vuno honi na mitima yeni yoshe lingeni vije viatonda Njambi, ngue vangamba va Kilistu.

⁷ Lingeni vipangi vieni via vungamba nakujolela, ngue mulina kupangela Muene, keti ngue vantu.

⁸ Zivukeni ngueni Muene akafueta muntu na muntu, cipue ngamba cipue ua kupatuka, ha vipangi viendi viacili viali.

⁹ Neni vamiene, lingeni naua cuma cimo kuli vangamba veni muku vapangesa muacili, keti muva teuese. Zivukeni ngueni yeni na vangamba veni muvavoshe muli kuli Muene umolika ali mulu, uje kakele nacivembulu.

Vitua via Njambi

¹⁰ Hakumanusuila, koleseni muli Muene na mu nzili ya vukama vuendi.

¹¹ Zaleni ku vitua vioshe vije Njambi nami hana linga cimiasiuise mukukolesa mukulua na matumbe a Satana.

¹² Yetu kutuesi na kuluisa vantu vuno honi tuli na kulua na vimbembesi via nzili via ha vuntanga ntanga, vaka kushika, vaka mpoko na vinzili ya ha mavu ya milima.

¹³ Hacuma eci zaleni vitua vioshe via Njambi, kaha omo litangua lia vupi likeja cika miasiuisa kuli amena ku citozi kaha cipue muna manusula kuli amena hanga mukemana mbe.

¹⁴ Kaleni na kulivua hesela na vusunga ngue muiva umuna likutilila mu vimbunda. Zaleni kulongua cije cikeco cikapua ngue cuma ca kuohiela ntulo ya ku mivila yeni.

¹⁵ Zaleni mu vinkaku vije vinapu ngue ciyulo cije cihuminina ku muzimbu uacili vije vikamikuasa kuimana mbe mu nzita.

¹⁶ Ntsimbu yoshe ambateni lutsilielo ngue ntelo. Hali evi lika mukasa kuzima mivi ya tuhia ije yali na kuasha Satana.

¹⁷ Ambateni kuovoka kupua litepa lieni na lizi lia Njambi ngue mukuale uje uvana mihana ku Cimbembesi.

¹⁸ Lombeleni mu kulinga viuma evi, lombeni vukuasi kuli Njambi. Ntsimbu yoshe lombeleni ngue omo Cimbembesi mu cimituamenena. Mu cifua eci pueni vakuli vua hesela kaha keti muecele. Lombeleni ntsimbu yoshe ha vantu voshe va Njambi.

¹⁹ Nange naua munjikundikeko, linga Njambi anjihane mezi acili omo njihandeka linga njambulule na ku simpa na kusholola vushueke vua muzimbu uacili.

²⁰ Njimu kakuimanena ua Kilistu linga njambulule ou muzimbu uacili cipue vene njili mu kamenga. Lombeleni linga njisimpe mu kuhandeka ngue mucina fuilamo.

Vihindu via Kumanesela

²¹ Njili nakutuma kuli yeni Tatikikase muanetu ituazanga naua ngamba yetu uakulongua mu vipangi via Muene! Akamihana muzimbu uoshe uahali yanga mutantekeye nguene vati njina hindukilamo

²² Omu mukemo njili nakumutuma kuli yeni, linga akamileke vati yetu voshe mutuna hindukila na kukolesa mitima yeni.

²³ Njambi tatetu na Muene Yesu Kilistu vahane kuli yeni vaka kutsiliela ciyulo na cizango mu kutsiliela.

²⁴ Cikeketima ca Njambi cikale na voshe vaje vazanga Muene uetu Yesu Kilistu na cizango ca ku miaka yoshe.

Mukanda ua Paulu kuli vaka FILIPU Citsindikisi

Paulu uasonekelele ou mukanda kuli vaka kutsiliela va mu Filipu mu miaka makumi atanu na limo na muaka umo hanima ya kutsa ca Yesu (61 AD). Uasonekelele oku tele acili mu kamenga (1: 13), capuile mu Loma. Ou mukanda uasonekelelele ku cikungulukilo cije cakele mu nganda ya Filipu. Tuasa kulilongesaho viavindende ha via Filipu mu livulu lia Vilinga. Filipu yapuile nganda yakama ya mbonge mu Masendonia. Kaha naua yapuile cikungulukilo cakulivanga cije civatungile mu Masendonia. Paulu na Silasi vaputukile eci cikungulukilo hamolika kaha naua vavahakele na mu kamenga ha vutsiki vumo oku tele vacili kuje (Vilinga 16).

Paulu hamo uakele na matumbe amengi mukusoneka ou mukanda. Ualikuasesele vintsimbu vimo mukutsatsela cikungulukilo ha vuana vuje vuvatumine omo vevuile nguavo ali mu kamenga (4: 10-19). Kaha naua uavalumbunuine tumamesi yendi muje vati uakelelelemo mu kamenga kaha uahandekelele viacili hali Timateo na Epafolonditusi ku cikungulukilo (2: 19-30) linga vavatambule muacili nakusingimika vuntuama vuavo.

Muvanavitumbikilamo:

1. Paulu aputuka mukanda mukuhinduisa cikungulukilo ca mu Filipu (1: 1-2).
2. Cakuhatako Paulu ahandeka vimpande vimo via katumamesi kendi na visinganika vije viakala navio (1: 3; 2:30).
3. Ambahoni ahane vishika viavingi via katumamesi muje muvanapande kuyoyelamo vaka Yesu (3: 1; 4:9).
4. Paulu amanusula nakutsantsela vantu va mu cikungulukilo ca mu Filipu ha vuana vuavo kaha nakuvatuma vihindu (4: 10-23).

¹ Kuhaminina kuli yange Paulu na Timateo, vangamba va Kilistu Yesu, Ku voshe vantu va Njambi muli Kilistu Yesu vaje vali ku Filipu, hamo na vantuama na vakuasi va cikungulukilo:

² Kavumbi na ciyulo vikale kuli yeni vije vihaminina kuli Njambi Tatetu na Muene Yesu Kilistu.

Lilombelo lia Paulu ku Vantuama vendi

³ Njikatsantsela Njambi yange mu vintsimbu vioshe vije njikamianuka.

⁴ Mu malombelo ange oshe hali yeni voshe, njikalombela na nzolela,

⁵ kutsatsela muje mutunapangela hamo mu vipangi via muzimbu uacili kuhuma ha litangua lia kulivanga nakuheta kulelo.

⁶ Cilivene njatantekeya nguange uje uaputukile cipangi cacili muli yeni akacituaelelelaho nakukufua ha litangua lia Yesu Kilistu.

⁷ Canjipande yange kuvua ngacije hali yeni voshe, omuo njamihaka ku mutima uange, omuo yeni voshe muli hamo nange mu kavumbi, mu vioshe, cipue njili mu kamenga, cipue mukuamena na mukukolesa muzimbu uacili ngoo.

⁸ Omuo Njambi ikeye mukaleho uange uje atantekeya muje vati njiminda yeni voshe na cizango cije cihuminina kuli Kilistu Yesu.

⁹ Kaha eli likelio lilombelo liange nguange cizango ceni cituaeleleleho mukukola cikuma, na mana nakumona ca vusunga,

¹⁰ linga muase kumona viacili nakupua vakulela nakuhona kapayo ha litangua lia Kilistu,

¹¹ mukashula na vushuka vuacili vuje vukeya kuhitila muli Yesu Kilistu ku vumpau nakushangazala ca Njambi.

Kuyoya cinapu Kilistu

¹² Njitonda yeni vavusamba vange mutantekeye ngeci vije vinalingia kuli yange vinakuasa kutuala muzimbu uacili kulutue.

¹³ Ha cuma eci linga vaka kuniunga lipela na voshe vatantekeye ngeci njili mu kamenga omuo ya Kilistu.

¹⁴ Kaha vaka kutsiliela vavengi vanakolesa muli Muene omuo ya kukala kuange mu kamenga, kaha vanasimpi cikuma mukuambulula lizi lia Njambi kuakuhona liova.

¹⁵ Vamo cilivene vambulula Kilistu na lifuua na vimpata, vuno honi vamo na cizango cacili.

¹⁶ Ava vakukotokela vacilinga omuo ya cizango, vatantekeya ngeci yange vananjihaka mu kamenga omuo yakuamena muzimbu uacili.

¹⁷ Ava vakulivanga vambuluile Kilistu na cimbembesi ca kulihalesa, keti mu vusunga vuno honi valinakuyongola ngeci vavuezeleleko ku tuyando tuange omuo njili mu kamenga.

¹⁸ Kaha vatihoni? Muli ili yoshe ngila, cipue mu kulikuisa cipue mu vusunga vumbanda lika valinakuambulula Kilistu, kaha ha cuma eci njivuahelela.

¹⁹ Cilivene, kaha njikavuahelela. Omuo njatantekeya nguange kuhitila mu malombelo eni nakukuasa ca Cimbembesi ca Yesu Kilistu vikanjipatula.

²⁰ Cizango cange cakama na kutsiliela cange ngeci kunjikevu shuama vuno honi nakusimpa coshe hano na vintsimbu vioshe Kilistu vakamuhana kasingimiko mu muvila uange, cipue mu kuyoa cange cipue mu kutsa cange.

²¹ Omuo kuli yange kuyoya cinapu Kilistu, kaha kutsa cinapu nganio.

²² Nga muono hanga ucikala mu muvila, kaha eci cilumbununa vipangi viacili hali yange. Kaha tahi kunjasa kuhandeka cuma muka njapande kuhangula.

²³ Vananjipalakana ku viuma evi vivali. Cizango cange cinapu kuya nakukala na Kilistu, eci cikeco cinahiana cikuma.

²⁴ Vuno honi cakama cikuma omuo yeni, nga kunjacyoya tahi.

²⁵ Njatantekeya muacili cuma eci, nankuma njatantekeya nguange njikakala nakutualelelaho neni voshe, omuo yakuvuezelela ceni nakuvuahelela mu lutsilielo,

²⁶ ngeci muli yange mukase kulihalesa kuje kuneha vumpau muli Kilistu Yesu omuo yakuija cange naua kuli yeni.

²⁷ Kaha katumamesi keni mu vuyoye kapue lika kaseho ya muzimbu uacili ua Kilistu linga hamo njikeja nakumimona cipue hamo njiuahiko, njikevue nguavo muakolesa mu cimbembesi cimo lika, na mana amo aje atsilila noku noku omuo ya lutsilielo lua muzimbu uacili,

²⁸ keti mukale na liova lia vitozi veni. Eci cikeco cimueso kuli vakevo ngeci mukavahiana, vuno honi ya kuovoka ceni cije cihuminina kuli Njambi.

²⁹ Omuo vanamitumbuilaco nguavo omuo ya Kilistu, kumukatsiliela lika vuno honi naua mukayanda omuo yendi,

³⁰ neni muakundama ku nzita ije muamuene njakele nayo, naua hangavene ikeyo ije muli nakuivua injicili nayo.

2

Kulikehesa ca Kilistu na Vukama Vuendi

¹ Kaha nga kuli kulikolesa kumo muli Kilistu, kaha nga nakuzembeleka kumo kuhuma ha cizango cendi, kaha nga muli nakulitombola kumo muli Cimbembesi, nga ngozi imo cipue nga kulitetela,

² kaha njipuiseni uakuvuahelela mukukala na mana amo, na cizango cimo, nakupua umo mu cimbembesi na mana amo.

³ Keti mulinge cuma cimo na viyongola via cipululu cipue nakulishasha, vuno honi mukulikehesa kaha ambateni vakueni muvulemu kupulakana yeni vavenia.

⁴ Keti mukale lika kulivuahelesa yeni vavenia vuno honi lingeni vije vivuahelesa na vakueni naua.

⁵ Kaleni na mana aua mukati keni, aje anapu eni muli Kilistu Yesu:

⁶ Uje cipuevene uakele mu cifua ca Njambi,
vuno honi kayonguele kupua hamo na Njambi cuma cakukakateya.

⁷ Vuno honi ualipuisile ikeye vavenia uakuhona seho,
ualiambatele ngue ngamba,

kaha uasemukile mucifua ca vuntu.

⁸ Omuo uakele mucifua ca vuntu, ualikehesele ikeye vavenia nakuononoka noho kutsa,
cipue vene ha kutsa ca ha cilindakano.

⁹ Nankuma, Njambi namujundula cikuma
nakumuhana lizina lije lili helu lia mazina oshe,

¹⁰ linga ha lizina lia Yesu livuli lili lioshe likatsikama,
mulu, na ha mavu, na muntsi lia mavu,

¹¹ kaha na ndaka ili yoshe ikambulula nguayo Yesu Kilistu ikeye Muene,
ku vumpau vua Njambi Tate.

Tueni Ceke ha Mavu

¹² Nankuma, vacizango cange, ngue mumuno nonokelamo ntsimbu yoshe, nkuma hano honi, keti lika omuo njiliko vuno honi cikuma kuma nganjuihiko, pangeleni kuovoka ceni na liova nakujujukua.

¹³ Omuo Njambi alinakupanga muli yeni, linga mukale na cizango nakupanga ha cipangi cendi cacili.

¹⁴ Pageni viuma vioshe kuakuhona kulinienieta cipue vimpata,

¹⁵ linga mukapue vakuhona kapayo nakusamba, vana va Njambi vakuhona kapayo mukati ka cikota ca lizangamena na makuli. Hali vakevo mukaviakuma ngue vieke ha mavu,

¹⁶ muka kakateye ku lizi lia muono, linga ha litangua lia Kilistu njikali-halesa nguange nzili yange na vipangi viange kuviaile muangoco.

¹⁷ Cipue vene nga vanjitila ngue viakunua ha nkombelo yakukombelela lutsilielo lueni, njivuahelela nakujolela neni voshe.

¹⁸ Mumolika vene neni naua munapande kuvuahelela nakujolela nange.

Timateo na Epafolonditusi

¹⁹ Njatsiliela muli Muene Yesu kutuma Timateo kuli yeni vuavuno linga akunjivuahelese na muzimbu uakuhuma kuli yeni.

²⁰ Kunjesi naueka uakulifua ngue ikeye, uje asa kushoshomua cihindu ceni.

²¹ Voshe valinakulimuena vije vivatonda vakevo vavenia, keti vije viatonda Yesu Kilistu.

²² Vuno honi muatantekeya vati Timateo muje muanalisholola vukaleho vuendi, ngue muje muana muakapanga na ishe, mukemo muanapanga hamo nange mu muzimbu uacli.

²³ Nankuma, njatsiliela kumutuma vuavuno kuya muje viuma muvikan-jendelamo.

²⁴ Kaha njatsiliela muli Muene nguange nange naua vuavuno njija.

²⁵ Njasinganieka nguange cinapande kutuma Epafolonditusi kuli yeni, uje ikeye muanetu na mukueto mutukapangela na mukueto lisualale, ikeye kanganda keni na mukuasi ku vipangi viange.

²⁶ Ikeye uamitonda cikuma yeni voshe, kaha nashoto mutima omuo munevu nguavo navavalele.

²⁷ Cilivene navavalele, nakutonda kutsa. Vuno honi Njambi nakala na cikeketima hali ikeye, keti lika hali ikeye vuno honi na hali yange naua, nakunjitetela linga keti njikale na vusiuha ha vusiuha.

²⁸ Nankuma, njili nakutonda cikuma kumutuma linga muakuvuahelele omo muakumumona naua, linga nange naua keti njishote mutima.

²⁹ Nkuma mutambuleni muli Muene na nzolela yoshe, nakuhana kasingimiko kuli vamala vangacije,

³⁰ omuo natondele kutsa ha vipangi via Kilistu nakuhaka muono uendi muvukalu linga amanese vipangi vieni kuli yange.

3

Vusunga Vuacili

¹ Mukumanusuila, vamuianetu, joleleni muli Muene. Kunjesi nashuama yakusonekela kuli yeni vuima viakulifua, kaha eci cimikuasa yeni.

² Litengeni kuli vaje vaka kulinga vupi, vaje tutali, litengeni kuli vaje vaka kunongesa ntsitu.

³ Omuo yetu tuapua vakulovoka va vusunga, vaje valemesa Njambi mu Cimbembesi, na vumpau muli Kilistu Yesu. Kaha kutuekutsiliela mu vuntu.

⁴ Cipue vene yange vavenia njili na cuma cakutsiliela mu vuntu. Nga kuli umo asinganika nguendi ali na cuma ha kutsiliela mu vuntu, kaha yange njili naviavingi.

⁵ Kutuhuka ha litangua lia mucitanu na atatu, ku vantu va Isaleli, ku muyati ua Mbenjamine, Kahevelu uakusemuka ku Vahevelu, ngue ku lishiko lia Kafaliseo,

⁶ ngue ntuima yakama mukupakesa cikungulukilo, ngue ku vusunga vua lishiko kuakuhonoua mulonga.

⁷ Vuno honi viuma vioshe via nganio vije njakele navio, njavitandele kupua viangoco omuo ya Kilistu.

⁸ Cilivene njilinakutanda vioshe kupua viangoco omuo ha seho yakama ya kutantekeya Kilistu Yesu Muene uange. Omuo yendi njinamono viuma vioshe kupua viangoco nakuvitanda viakuhona seho linga njinganiale Kilistu

⁹ nakukala muli ikeye, linga keti njikale na vusunga vuange lika vuje vuakundama ha lishiko, vuno honi vuje vuahitila mu lutsilielo muli Kilistu, vusunga vuje vuhuminina kuli Njambi vuje vuakundama ha lutsilielo.

¹⁰ Linga njitantekeye Kilistu na nzili ya kusanguka cendi, na kulipangela tuyando tuendi nakupua ngue ikeye mukutsa cendi,

¹¹ linga nga casiuha hamo vaka njisangule ku vatsi.

Kutunta kuheta naku Ntsongo

¹² Keti ngue nguavo njinahiana laja cuma eci cipue nguavo njinalele laja houé. Vuno honi njilinakutualelelaho linga njicipuisse cange, omuo Kilistu Yesu nanjipuisa uendi.

¹³ Vamuanetu, kunjekusinganieka nguange njacipuisa cange, vuno honi cuma cimo njilinakulinga eci, kusuva viakunima nakutualelelaho na vije vilikulutue.

¹⁴ Njilinakutualelelaho lutue linga njiuane vuana vuje Njambi nanjisanena cikuma kuhitila muli Kilistu Yesu.

¹⁵ Yetu vaje tunakolo mu mana tunapande kukala na mana acifua eci, kaha nga mu vintsimbu vimo tusinganieka viakuliseza, kaha Njambi akacisholola naua kuli yeni.

¹⁶ Tuyeni lika tukakateye mua vusunga kuli vije vitunauana.

¹⁷ Vamuanetu, lipandakaneneni hamo mu kunjitemuinina, hakeleni mana kuli vaje vayoya ngue muje mutualingile yetu.

¹⁸ Omuo ngue muje munjamilekesele laja vintsimbu viavingi na hano vene njimilekesa naua honi na misozi nguange, yoyeni ngue vitozi va cilindakano ca Kilistu.

¹⁹ Mamanusuililo avo akapua akunonga, njambi yavo ikeye mazimo avo na vumpau vuavo vuli mu shuama yavo, na mana akusinganieka via mavu lika.

²⁰ Vuno honi yetu vukalo vuetu vuli muilu, kaha hali vukevuo tulina kuvandamena Musoyesi, ikeye Muene Yesu Kilistu,

²¹ uje akatengulula mivila yetu ya kutsa yakuzeya kupua ngue muvila uendi ua vumpau, na nzili ije ikamulingisa linga anehe viuma vioshe kuli ikeye vavenia.

4

Vishika

¹ Nankuma, vamuanetu, vaje vanjazanga nacishota mutima, nzolela yange na cilongo cange hanga vinemana ngoo muli Muene, vamuanetu vanjazanga.

² Njilambelega Eundiya na Sintike linga valitavasane muli Muene.

³ Kaha njikulomba nove naua mutuapangela hamo ua vusunga, kuasa ava vumpuevo omuo vanapanga cikuma hamo nange mu vioshe mu muzimba uacili na Kelemente na vaje voshe mutuapangelele hamo, vaje mazina avo ali mu livulu lia muono.

⁴ Joleleni muli Muene ntsimbu yoshe, naua njikahandeka nguange, joleleni.

⁵ Vantu voshe vatantekeye kaleseso keni. Muene alimuyehi.

⁶ Keti mushoshomue ha cuma cimo, vuno honi mu vioshe ha lilombe nakulihana nakutsantsela eceleni vije vimulomba vavitantekeye kuli Njambi.

⁷ Kaha ciyulo ca Njambi cije cipulakana kuvuisisa coshe, cikatulika mitima yeni na viyongola vieni muli Kilistu Yesu.

⁸ Mukumanusuila, vamuanetu, vioshe vije viavusunga, vioshe vije via kasingimiko, vioshe vije viakuvuaha, vioshe vije viakulela, vioshe vije via cizango, vioshe vije via kavumbi, nga kuli vucili, nga kuli vimo via seho kupulakana kushangala, kaha singaniekeni ha viuma evi.

⁹ Vioshe vije vimunalilongesa nakutambula nakuivua nakumona muli yange, vilingeni kaha Njambi ua ciyulo akakala neni.

Kutsatsela ha Vuana

¹⁰ Njijolela cikuma muli Muene nguange honi kumamanusuilo kunji-hakela mana kueni cinahinduka, cilivene muakele nakunjihakela mana vuno honi kumuakele na ntsimbu yakucimuesa.

¹¹ Ketu ngue nguavo munjihandekevi kaha kuli vimo njinajena, omuo njinalilongesa, mu ngila yoshe njilimo, njinapande kupuisamo.

¹² Njatantekeya muje mucafua kukala mukuzena, kaha njitantekeya muje mucafua kukala naviavingi, muli vioshe na mu vintsimbu vioshe njinalilongesa vushueke vuakumona viavingi cipue njala, viavingi kupu-lakana cipue mukuzena.

¹³ Njasa kulinga viuma vioshe kuhitila muli ikeye uje akanjitakamesa.

¹⁴ Capuile ngozi yenu linga tulipangele tuyando tuange.

¹⁵ Yenu vene vavenia vaka Filipu muatantekeya ngueni hambangelo ya muzimbu uacili, omo njahumine ku Masendoniya, nacimo cahi cikungu-lukilo calipandakanene nange mukuhana na mukutambula kuvanga lika yenu.

¹⁶ Omuo cipue vene mu Tesalonika muanjiturumine vukuasi vintsimbu viavingi.

¹⁷ Ketu nguavo njitonda vuana, vuno honi njitonda vushuka vuje vu-vuezelela ku mbango yenu.

¹⁸ Njatambula fueto yakushula, na viavingi, njinapuisamo, ha kutambula vuana vuje vumuaturumine ku Epafolonditusi, vuje vua mulambu ua mazi akunika luengo luacili, na nkombelo ije yatambula nakumuvuahesela Njambi.

¹⁹ Kaha Njambi yange akamihana vioshe vije munazena kuya ku vufuko vuendi mu vumpau muli Kilistu Yesu.

²⁰ Kuli Njambi yetu na Tatetu kukale vumpau miaka yoshe ya yaye! Amen.

Vihindu Viakumanusuila

²¹ Vihindu kuli voshe vantu va Njambi muli Kilistu Yesu. Vaka kutsiliela ava vali nange vanamihana vihindu.

²² Vantu va Njambi voshe kuno vanamitumu vihindu, cikuma kuma vaje vaku lipela lia Kayafase.

²³ Kavumbi ka Muene Yesu Kilistu kakale na cimbembesi ceni.

Mukanda ua Paulu kuli vaka KOLOSE Citsindikisi

Mukanda ua kuli vaka Kolose vausekele kuli kanganda Paulu (1: 1). Uasekele ou mukanda oku tele ali mu kamenga, capuile mu Loma, ku miaka ya makumi atanu na limo hanima yakusemuka ca Yesu (60). Kolose, hamolika na Efeso na Filimoni, vaitumbula nguavo mikanda ya mu kamenga omuo Paulu uasekele oku tele ali mu kamenga. Uasekelele ou mukanda ku cikungulukilo ca mu nganda ya ku Kolose. Paulu keti ikeye uaputukile cikungulukilo ca mu Kolose, ngue muje muanatumbuilamo mu 2:1, vuno honi uacikuatele na mavoko avala. Casiua ngeci Epafalase ikeye uaputukile eci cikungulukilo omuo ikeye uahumine ku Kolose.

Paulu uashotele mutima ha vilongesa via makuli mu cikungulukilo ku Kolose. Evi vikevio vianaseka mu vuingi mu mukanda ou. Kuje hamo kuakele civunga ca vaka Yesu va Vayunda vaje vatondele kusiindiya vakuavo vaka Yesu linga vakavangeye mashiko a Vayunda aku Litavasano Lialaja, cikuma kuma ha via kulovoka. Paulu uasekele lika ngeci vaka Yesu nacimo cahi vajena cipue naumo uahi vajena kuvanga lika Kilistu linga vavatambule kuli Njambi (1: 15-20) kaha naua ngeci vilongesa vije viakundama ha viyongola via vuntu vinapu viakuhona seho (2: 8).

Muvanavitumbikilamo:

1. Paulu aputuka mukanda nakuhinduisa cikungulukilo ca mu Kolose (1: 1-2).
2. Ambahoni asoneka ha vukama vua Kilistu cikuma kuma muakukum-buililamo ku vilongesa via makuli mu Kolose (1: 3; 3:4).
3. Ngue kuya mu mikanda yaingi ya Paulu, mbazuvuila yakumanusuila mukanda akaihaka mukuhana vishika vimo viakatumamesi kacili ka vaka Yesu (3: 5; 4:6).
4. Paulu amanusula na vihindu na vishika ngeci mukanda vanapande ku utanda mukutambakana na mu vikungulukilo vieka (4: 7-18).

¹ Kuhuminina kuli yange Paulu, kanganda ua Kilistu Yesu ku cizango ca Njambi, njili na Timateo muanetu.

² Njili nakutuma ou mukanda kuli yeni vantu va Njambi vakulela na vamuanetu vakukonkama muli Kilistu ku Kolose:

Kavumbi kuli yeni na ciyulo vije vihuma kuli Njambi Tatetu.

Lilombelo lia Cintsatsela

³ Ntsimbu yoshe tukatsantsela Njambi Ishe ya Muene uetu Yesu Kilistu, omo nga tumilombelela,

⁴ omuo tunevu lutsilielo luenu muli Kilistu Yesu na cizango cije cimulinaco ku vantu va Njambi vakulela voshe,

⁵ omuo ya kutsiliela cije civanamitulikila yeni muilu. Cije cimuevuile laja mu lizi lia vusunga, likelio lia muzimbu uacili

⁶ uje uneja kuli yeni, cilivene ha mavu oshe lilinakuima vushuka nakukola ngue muje mulilinakulingilamo kuli yeni vavenia, kuhuma ha litangua limuovuile nakuvuisisa kavumbi ka Njambi mu vusunga.

⁷ Ngue muje mumua lilongesele kuli Epafalase ngamba mukuetu uje ituzanga. Ikeye napu ntuama uakulongua ua Kilistu mu kutupangelako,

⁸ kaha ikeye uje natuleke cizango ceni cije cimuli naco mu Cimbembesi.

⁹ Kaha omuo ya cuma eci, hume ha litangua lije tuacuvuile, kutualikelele kumilombelega. Tukalombo ngueta linga mushule na mana a cizango cendi mu mana nakuvuisisa kuoshe vije cimbembesi cikahana,

¹⁰ linga muyoye vuyoye vuje vuatonda Muene, vuje vumuvuahelesa mu vingila vioshe, kuima vushuka mu vipangi vioshe vije viacili nakulivuezelela mu mana a Njambi.

¹¹ Tukamilombelelako kuli Njambi linga amikolese na nzili yoshe, kuya ku nzili yendi yoshe ya vumpau linga mukale nalukakateya na kusimpa na nzolela,

¹² nakuhana kutsantsela kuli Tate uje natupuisa linga tuase kukala na mutambela mukusuana ca vantu va Njambi vakulela mu ceke.

¹³ Natuhumisa ku nzili ya milima nakutuneha ku vumuene vua Munendi uje yazanga,

¹⁴ muje muli ikeye mukemo mutunapatukila, cikeco kusambuesa ca vipi.

Muntu na Vipangi via Kilistu

¹⁵ Kilistu ikeye cifua ca Njambi uje kekumoneka, ntuatua ua viakutanga vioshe.

¹⁶ Omuo kuhitila muli ikeye viuma vioshe vavitangele, via muilu na ha mavu, vije vitumona na vije kutumono, cipue matanda, cipue vinzili via vimbembesi, cipue vimiene, cipue vaka nzili yakama. Viuma vioshe vavitangele kuhitila muli ikeye kaha omuo ya ikeye.

¹⁷ Ikeye kuakele tele kanda viuma vioshe, kaha muli ikeye viuma vioshe viakala hamo.

¹⁸ Ikeye mutue ua muvila, cikeco cikungulukilo, ikeye maputukilo, ntuatua uakuhuma ku vatsi, linga ikeye akale na cihela cakulivanga mu viuma vioshe.

¹⁹ Omuo camuvuahelelele Njambi linga kushula cendi coshe cikale muli ikeye,

²⁰ kaha kuhitila muli ikeye linga anehe viuma vioshe kuli ikeye nakulikonekela, cipue ha mavu cipue muilu, hakulinga ciyulo kuhitila ha maninga aje ahitile ha cilindakano cendi.

²¹ Kaha yeni, vaje ha ntsimbu imo muakele kulahako na Njambi nakupua vitozi vendi mu mana eni omuo ya viuma viavipi vije vimualingile.

²² Vuno honi nalisambuesa neni kuhitila mu muvila uendi ua vuntu ha kutsa cendi, linga mupue vakulela nakuhona kapayo nakuhona mulonga kuli ikeye,

²³ kaha nga mutualelelaho mu lutsilielo, nakukola na lukakateya, cakuhona kuhuma ku kutsiliela ca muzimbu uacili uje muevuile, uje uvanambulula ku cakatanga coshe cije cili muintsi lia melu, kaha na cije yange, Paulu njapuile ngamba.

Vipangi via Paulu hakupua Ngamba ua Cikungulukilo

²⁴ Honi njivuahelela mu tuyando tuange omuo yeni, kaha mu vuntu vuange njimanusula vije vinahonua mu tuyando tua Kilistu omuo ya muvila uendi, uje ukeuo cikungulukilo,

²⁵ cije canjilingisile linga njipue ngamba kuya ku cipangi ca vusunga cije civanjihanene omuo yeni, linga lizi lia Njambi valitantekeye muakushula,

²⁶ vushueke vuje vuvashueka ha miaka yaingi na ku vikota vioshe vuno honi vanavusholola ku vantu vendi va Njambi vakulela.

²⁷ Kuli vakevo Njambi uahanguile linga vatantekeye muje vati vukama vua vufuko vua vumpau vua vushueke ovu hhakati ka vaje keti Vayunda, vuje vukevuo Kilistu uje ali muli yeni, cikeco kutsiliela ca vumpau.

²⁸ Ikeye uje tuli nakuambulula, kunangula muntu ali uoshe nakulongesa muntu ali uoshe mu mana oshe, linga tupuise muntu uoshe kupua uakukola muli Kilistu.

²⁹ Omuo yeci njilinakupanga cikuma, nakuhundangana na nzili yoshe ije Kilistu akapangesa muli yange.

2

¹ Omuo njitonda yeni linga mutantekeye muje vati njikahundangana cikuma omuo yeni, kaha omuo ya vaje vali ku Laondisiya, kaha na omuo ya voshe vaje kanda vamone cihanga cange,

² linga vasimpise mitima yavo oku vali hamo mu cizango, linga vakale na vufuko vuoshe vua kuvuisisa coshe ca vusunga na mana a vushueke vua Njambi, akeuo Kilistu,

³ uje muli ikeye mukemo vashueka vufuko vuoshe vua mana na man-gana.

⁴ Njihandeka eci linga naumo uahi amikuisse na vihandeka via makuli cipue vene vivuike vati muacili.

⁵ Omuo cipue vene njiuahiko mu vuntu, vuno honi njilineni mu cimbembesi, nakuvuahelela mukumona katumamesi keni nakukolesa ca lutsilielo lueni muli Kilistu.

Kushula na Muono muli Kilistu

⁶ Nankuma, ngue muje mumunatambula Kilistu Yesu kupua Muene, ngeci vene tualeleniho kuyoya muli ikeye,

⁷ mizi yeni itandele nakutunga muli ikeye nakukolesa mu lutsilielo, ngue muje vene muvamilongesele, nakushula mukutsatsela.

⁸ Taleni ngeci naumo uahi akamipuisse vandungo na mana endi a vuntu na makuli angoco, aje ahuma ku vilongesa via vantu naku vimbembesi via hano ha mavu vije vilinakuyula kaha keti ngue kuya kuli Kilistu.

⁹ Omuo muli ikeye kushula coshe ca vunjambi mukemo muvuakala mu muvila,

¹⁰ kaha neni munapu vakushula na muono muli ikeye, uje ikeye uapua mutue ua lishiko lioshe na nzili yakama.

¹¹ Muli ikeye naua mukemo mumualovokele nakulovoka cije keti ca mavoko, ha kumumisa muvila ua tsitu mu kulovoka ca Kilistu,

¹² kaha vamitsindile hamo nendi mu kumimbuitika, naua vamisanguile hamo nendi kuhitila mu lutsilielo kuya ku vipangi via Njambi, uje uamu-sanguile ku vatsi.

¹³ Kaha yeni, vaje vatsile mu vipi nakuhona kulovoka ca ku tsitu yeni, Njambi naminehe ku muono hamo nendi, mukutukonekela yetu ku vipi vietu vioshe,

¹⁴ uahumisile visoneka via mulonga uetu na mashiko avio, kaha eci uacihumisile hakucimbombotela ha cilindakano.

¹⁵ Kaha hakuvahumisa nzili na vinzili viakama, uavapuisile cimueso ku vivunga, uavahianene ha cilindakano.

¹⁶ Nankuma, keti muecele muntu ali uoshe amisompe mukumihula ha viakulia na viakunua cipue kuya ku viuano, cipue ku ciuano ca kutentama ca ngonde, cipue via litangua lia sapalalo.

¹⁷ Evi vikevio lika cimbembe ca viuma vije vili nakuija, vuno honi vusunga vuakundama kuli Kilistu.

¹⁸ Ketu muecele muntu ali uoshe amihonouese, uje alisholola ikeye vavenia kupua uakama na kulemesa tungelo, omuo ha vimona vimo

vije ahandeka hakulikehesa ca makuli omuo vantu va cifua cangacije vakalihalesa na viyongola viavo via vuntu,

¹⁹ kaha vanalikela kukakatela kuli Kilistu, uje napu mutue ua muvila. Uje kuli ukeuo muvila uoshe vanaulisa nakuukuatesa hamolika kuhitila mu manunga na vososo, kaha uli nakukola ngue muje muatondelamo Njambi linga ukolemo.

Kutsa na Kuyoya na Kilistu

²⁰ Nga yeni muatsile na Kilistu ku vimbembesi vije vili nakuyula via hano ha mavu, kaha vika mulinakuyoya ngue hanga mucili mu vaka mavu? Vika muli nakulihanena ku mashiko avio nguavio,

²¹ “Keti mukuate eci! Ketu mumakele cije! Ketu mukuate cije?”

²² Evi viose vilumbununa viuma vije vikanongo hanima yakuvipangesa, kuya ku mashiko na vilongesa via vuntu.

²³ Evi cilivene visholoka kupua viakukundama ku mana mukusindiya cavo cakulemesa nakulikehesa ca makuli nakuyandesa mivila, vuno honi akeuo kuesi na seho mukuvindika mashungu a ku muvila.

3

¹ Ambahoni nga vanamisangula hamo na Kilistu, kaha tondeni viuma vije vili kuilu, kuje kukeko kualu Kilistu, natumama ku livoko lia cilio lia Njambi.

² Hakeleni mana eni ku viuma vije vili kuilu, ketu ku viuma vije vili ha mavu.

³ Omuo muatsile, kaha muono ueni vanaushueke na Kilistu muli Njambi.

⁴ Omo Kilistu uje ikeye muono uetu akasholoka, ambahoni neni naua mukasholoka nendi mu vumpau.

Muono Ualaja na Uauha

⁵ Nankuma, tsiheni vije vinapu via mavu muli yeni, vije vikevio via vupangala, kuhona kulilelesa, mashungu, mashungu a mapi na cipululu, cije cikeco vene kulemesa tumponia.

⁶ Omuo ya viuma evi, vutenu vua Njambi vuli nakuija.

⁷ Mu viuma evi ha ntsimbu imo muendelemo, omo muakele nakuyoyela muli vikevio.

⁸ Vuno honi hano honi munapande kumbila kuti viuma evi via kunien-gua, vutenu, cizindo, kutuka na mezi a mapi kuhuma mu kanua keni.

⁹ Ketu mulikuise umo na mukuavo, mukumona ngeci munombila vuntu vualaja na vilinga viauo,

¹⁰ kaha munazala vuntu vuavuha, vuje vuvanapuisa vua vuha mu mana a cifua ca liavenia samatanga.

¹¹ Hano kukuesi Cingelengu cipue Ciyunda, vakulovoka cipue vakuhona kulovoka, mihuza, vipapoke, ndungo na uakupatuka, vuno honi Kilistu napu ua voshe kaha naua mu viose.

¹² Ambahoni, zaleni ngue vantu vakuhangula va Njambi, vakulela na vakuzanga, cikeketima, ngozi, kulikehesa, kuholoka nakusimpa,

¹³ kulikonekela umo na mukuavo, kaha nga umo alina ciniengo hali mukuavo, kaha lisambeseni umo na mukuavo, ngue muje Muene nasambesa yeni, neni naua munapande kusambesa.

¹⁴ Kaha helu lia viose evi hakeleniho cizango, cije cikakutula viuma viose hamoloka mu vumo vuacili.

¹⁵ Kaha eceleni ciyulo ca Kilistu ciyule mu mitima yeni, kuje cilivene vamisanene kupua muvila umolika. Kaha mupue vakuntsatsela.

¹⁶ Eceleni lizi lia Kilistu likale muli yeni cikuma, longeseni nakulinangula umo na mukuavo mu mana oshe, kaha imbeni miaso yakuntsenkulu, na miaso, na miaso ya cimbembesi nakuntsatsela mu mitima yeni kuli Njambi.

¹⁷ Kaha vioshe mulinga, mu lizi cipue mu vilinga, vilingeni vioshe mu lizina lia Muene Yesu, nakuhana kuntsatsela kuli Njambi Tate kuhitila muli ikeye.

Katumamesi ka Muntu mu Muono Uauha

¹⁸ Vampuevo, lihaneni yeni vavenia ku vamala veni ngue mucinailamo muli Muene.

¹⁹ Vamala, zangeni vampuevo veni, kaha keti mupue vakutenuka kuli vakevo.

²⁰ Vana, ononokeni visemi veni mu vioshe, omuo eci cikeco civuahelesa Muene.

²¹ Visemi va vamala keti muputuke vana veni, ketingoconi vapihilila ku mitima yavo.

²² Vandungo, ononokeni kuli vaje vanapu vimiene veni va ha mavu mu vioshe, keti lika kuvanga kuvali vamimona, ngue vantu vaje vakakutonda lika kuvuahelesa vakuavo vantu, vuno honi cipuevene muli likalieni mu mitima yeni, omuo yakuivuila Muene liova.

²³ Mu vioshe mulinga, pangeni na mutima umo, ngue muli nakupangela Muene keti vantu,

²⁴ okumuatantekeya ngueni kuli Muene kukeko mukatambula vusuana kupua ngue vuana vueni, omuo mulinakupangela Muene Kilistu.

²⁵ Omuo uje muka kupanga via vipi vakamufueta naua via vipi vije vianapanga, kaha kukuesi civembulu.

4

¹ Vimiene, lingeni muacili na vusunga kuli vandungo veni, omuo neni muatantekeya naua ngueni muli na Muene mulu.

Vishika

² Tualeleniho nalukakateya mu malombelo, kaha taleleleni oku mulombela nakuntsatsela kuli Njambi.

³ Kaha tulombeleleni netu naua, linga Njambi atushokuelele ngila ya lizi linga tuambulule vushueke vua Kilistu, lije omuo lialio ngeci njili mu kamenga,

⁴ lombeleni linga njiliambulule muacili ngue muje munjinapande linga njilihandeke.

⁵ Pueni vakuzangama kuli vije mulinga hhakati ka vaje vakakuhona kutsiliea, pangesen ntsimbu yoshe ije muli nayo.

⁶ Eceleni vije vimuhandeka ntsimbu yoshe vipue via kavumbi, viakushutuka ngue muongua linga mutantekeye muje vati mukasa kukumbulula muntu ali uoshe.

Vihindu Viamamanusulo

⁷ Taikikase akamileka vioshe via cihindu cange, ikeye napu muanetu ua cizango kaha uapua muka kupanga uakulongua na mukuetu ngamba muli Muene.

⁸ Njinamutumu kuli yeni omuo yevi vene, linga mutantekeye muje vati tulimo kaha naua linga akusimpise mitima yeni,

⁹ kaha alinakuija na Onesimasi, muanetu uakulongua uje uacizango, uje napu umo ueni. Vakumileka vioshe vije vilinakulingua kuno.

¹⁰ Alisitakase mukuetu uje unjilinendi mu kamenga natumu vihindu kuli yeni, kaha na Mako mpanji ya Mbanambase. (Uje yeni munatambula laja vishika via ikeye, nga eja kuli yeni, mutambuleni),

¹¹ kaha Yesu uje ivatumbula naua nguavo Yusitase, nendi naua ali nakutuma vihindu. Ava vakevo lika Vayunda hhakati ka vakuetu mutukapangela omuo ya vumuene vua Njambi, kaha vanapu vakevo vaje vanjinasimpila.

¹² Epafalase, uje napu umo ueni, ngamba ua Kilistu Yesu, natumu vihindu kuli yeni, ntsimbu yoshe akamianuka mu malombelo endi cakuhona kuhuima, linga mukolese nakushula mu vusunga mu cizango coshe ca Njambi.

¹³ Omuo nange njihana vukaleho hali ikeye ngeci napanga cikuma omuo yeni na omuo ya vaje vali mu Laondisiya na mu Halapolise.

¹⁴ Luka cimbanda uje uacizango na Ndemase vanatumu vihindu.

¹⁵ Haneni vihindu viange kuli vamuanetu vaje vali ku Laondisiya, na kuli Nifa na cikungulukilo cije cili mu njivo yendi.

¹⁶ Kaha omo ou mukanda nga vanamanusula kuutanda hhakati keni, kaha naua utandeni na mu cikungulukilo ca ku Laondisiya, kaha naua moneni ngeci mutanda uje mukanda uhuma ku Laondisiya.

¹⁷ Kaha handekeni kuli Akipase ngueni, "Tala ngeci ushulisise cipangi cije ciunatambula muli Muene."

¹⁸ Yange, Paulu, njilinakusoneka aua mezi a vihindu na livoko liange vavenia. Anukeni malenge ange. Kavumbi kakale neni.

Mukanda ua Paulu ua kulivanga kuli vaka TESALONIKA Citsindikisi

Mukanda uakulivanga ku vaka Tesalonika vausonekele kuli Kanganda Paulu. Uasa kupua mukanda uakulivanga uje Paulu uasonekele kupua mbazuvuila ya Mbimbiliya kaha uasonekele kusetekesa ha miaka makumi atanu naumo (51) hanima ya kusemuka kua Kilistu. Paulu uakele mu Kolinte mukemo muasonekelele mukanda uaku cikungulukilo caku Tesalonika, cikungulukilo caputukile ha vungenzi vuendi vua mucivali vua kutuala muzimbu uacili ua Njambi (Vilinga 17: 1-10). Mu Livulu lia Vilinga lihandeka ngualio mu cikungulukilo muakele Vayunda na Vangelengu. Paulu kasele kutumama ntsimbu ya ilaha mu Tesalonika, hanima ya kuputuka cikungulukilo, kaha uatumine ou mukanda mu kutakamesa vaka kutsiliela kuje. Mukanda ou uli na mitue yaingi hamo na vishika vije muvanapandele kuyoya vaka Yesu. Paulu alina kuhaka mana cikuma ha kuija kua Kilistu lua mucivali. Nankuma, vaka kutsiliela vaku Tesalonika vavuahelele ha mutue ou. Paulu ualikuasesele kuija kua Kilistu lua mucivali linga vayoye vuyoye vuje vuvuahelesa Njambi (5: 6-8)

Muvanautumbikilamo:

Paulu aputuka mu mukanda ou na kumeneka cikungulukilo na kutsantsela Njambi hali vakevo (1).

Kaha alumbununa ha vilinga na muzimbu uje uanehele Timateo (2-3).

Cakuhatako Paulu ahana vishika mu vanapandela kuyoyelamo vaka Yesu mu ceke hakuija kua Yesu lua mucivali (4: 1-5, 15).

Paulu amanusula mukumeneka cikungulukilo naua na kuvalomba linga voshe vautande mukanda (5: 16-28)

¹ Mukanda ua kuhuma kuli Paulu na Siluvanasi na Timateo.

Ku vantu va cikungulukilo ca mu Tesalonika, vaje vanakundama kuli Njambi Tate na Muene Yesu Kilistu.

Kavumbi na ciyulo vikale neni.

Paulu Ahana Citsatselo kuli Njambi ha Muono na Lutsilielo lua vaka Tesalonika

² Ntsimbu yoshe tukatsantsela kuli Njambi hali yeni voshe, kaha naua ntsimbu yoshe tukamilombelela.

³ Tukanuka ku mesho a Njambi yetu na Tatetu muje mumunahaka lutsilielo lueni mu vipangi, na muje cizango ceni cili nakumihundanganesa, na muje kutsiliela kueni mukukola ngo muli Muene yetu Yesu Kilistu.

⁴ Vamuanetu, tuatantekeya nguetu Njambi ua mizanga naua nami-hangula kupua mu vendi,

⁵ omuo tuaminehelele Muzimbu Uacili, keti na mezi lika, vuno honi na nzili na Cimbembesi Uakulela, kaha na lukakateya lua vusunga vuavio. Muatantekeya muje vati tuayoyele omo tuakele hamo neni, eci capuile ngeci omuo yeni.

⁶ Muatembunuisile yetu na Muene, kaha cipue vene muayandele cikuma, vuno honi muatambuile muzimbu na nzolela ije ikahumu kuli Cimbembesi Uakulela.

⁷ Nankuma, yeni muapuile cimueso kuli voshe vaka kutsiliela mu Masendoniya na mu Akaya.

⁸ Omuo keti lika nge lizi lia Muene liahumine kuli yeni mu Masendoniya na mu Akaya kuahi, vuno honi muzimbu ua lutsilifelo lueni kuli Njambi unashandokela kuoshe. Nankuma, nacimo cahi cituasa kuhandeka.

⁹ Vantu va kucihela kuje vakele nakuhandeka muje vati yeni muatutambuile omo tuezile nakumimona, kaha naua na vati muje muatengulukile kuhuma ku tumponia nakuija kuli Njambi, nakupangela Njambi ua vusunga uakuyoya,

¹⁰ nakuvandamena Munendi omo akeja kuhuma muilu, Munendi Yesu, uje yasanguile ku vatsi, naua ikeye uje akatupatula ku vutenu vua Njambi vuje vulinakuija.

2

Vipangi via Paulu mu Tesalonika

¹ Omo Yeni vavenia Vamuanetu muatantekeya ngueni nkuma kumeneka kuetu kuli yeni kukuapuile kuangoco.

² Muatantekeya vati muje vatuyandesele nakutushaula mu Filipu ntsimbu kanda tuije kuli yeni mu Tesalonika. Kaha cipue vene kuakele kutuluisa kuakama, Njambi yetu uatutakamesele mukumiambulula Muzimbu Uacili.

³ Kulomba kuetu kuli yeni kukuemanene ha vutumbe vuakusevuisa cipue ha matumbe a mapi, cipue kukuisa muntu umo.

⁴ Vuno honi vintsimbu vioshe tulinakuhandeka nge muje Njambi atonda linga tulinge, omuo natutavesa yetu ngeci catupande kuambulula Muzimbu Uacili. Kututondo kueseka kuvuahelesa vantu, vuno honi kuvuahelesa Njambi, uje muka kueseka mitima yetu.

⁵ Muatantekeya muacili ngueni kutuezile kuli yeni mukuhandeka viakuzembeleka, cipue kulikuasesa mezi akumifuikafuika cipululu, Njambi ikeye mukaleho uetu!

⁶ Kutuatondele linga vatushangazale kuli muntu umo kuahi, cipue kuli yeni cipue kuli veka, cipue vene nge tunganda va Kilistu nge tuasele kumihana citele.

⁷ Vuno honi tuakele na ngozi omo tuakele neni hamo, nge cisemi ua mpuevo omo alinakulela vana vendi.

⁸ Omuo ha cizango cetu kuli yeni, tualivuaheselele linga tulipangezele neni hamo keti lika Muzimbu Uacili uakuhuma kuli Njambi vuno honi na miono yetu naua. Omuo yeni muapuile vaje vatuazanga cikuma!

⁹ Muavusunga vene anukeni vamuanetu, vati muje tuapangele nakuhundangana! Tuapangele vutsiki na mutania linga keti tupue citele kuli yeni te mutuambuluile kuli yeni Muzimbu Uacili ua Njambi.

¹⁰ Yeni munapu vakaleho vetu, na Njambi naua, linga mu miono yetu ku mesho eni vaka kutsiliela yapuile yakulela, ya vusunga nakuhona mulonga.

¹¹ Muatantekeya ngueni yetu tuapangesele umo na umo ueni nge visemi vapangesa vana vavo vavenia.

¹² Tuamitakamesele, tuamizembelekele nakumisindiya linga muyoye yoyesi ije ivuahelesa Njambi, uje alinakumisana linga mulipangezele hamo Vumuene vuendi vavenia na vumpau.

¹³ Naua kuli cuma cikua vo omuo vika ntsimbu yoshe tukatsatsela kuli Njambi. Omo tuaminehelele lizi lia Njambi, yeni mualiuvuile nakulitambula, keti nge lizi liakuhuma ku vantu vuno honi nge lizi lia Njambi, lije linapu lizi lia Njambi vene. Omuo Njambi alinakupanga hhakati keni vaje vanatsiliela.

¹⁴ Vamuanetu, yeni muatembunusuile vikungulukilo via Njambi mu Yundeya, vije vili muli Yesu Kilistu. Muayandele na mapakeso akuhuma ku vantu veni nge muje Vayunda muvayandeselele vikungulukilo,

¹⁵ vaje vatsihile Muene Yesu na tunanguizi va Njambi va Njambi, nakutupakesa yetu. Vakevo kuvekuvuahelesa Njambi! Vapua vitozi kuli vantu voshe!

¹⁶ Vesekela kutuvindika kuambulula lizi kuli vaje keti Vayunda linga na vakevo vatambule kuovoka. Mu ngila eyi vene vakevo vanashulisa vene seteko ya vipi vije vivalingile ntsimbu yoshe, Kaha honi vutenu vua Njambi hakukotoka vuneja hali vakevo!

Kushunguiya kua Paulu kuakumimenekela naua

¹⁷ Nge hali yetu, vamuanetu, omo tualihangunukile neni mu kantsimbu kakandende lika, keti mu viyongola vietu kuahi, vuno honi ku muvila uatsitu lika, tuamihonene kaha tuahundanganene na kueseka kumimona naua!

¹⁸ Tuatondele kuhiluka kuli yeni. Yange vene Paulu njesekele cikuma kuhiluka lualuingi vuno honi Satana katutavesele.

¹⁹ Nankuma, hangavene munapu yeni, keti veka kuahi, vaje vanapu kutsiliela kuetu na nzolela yetu na cilongo cije tukalihalesa ha kuhiana ku mesho a Muene Yesu omo akeja.

²⁰ Cilivene, yeni munapu kulihalesa kuetu na nzolela yetu!

3

¹ Hakumanusuila, omuo kutuasele kutualelelaho kulinga cili coshe ha kumimona, kaha tuayonguele linga vatuseze mu Atena likaliyetu lika.

² Te tunatumu Timateo, muanetu uje muka kupanga netu mu vipangi via Njambi mu kuambulula Muzimbu Uacili ua Kilistu. Tuamutumine mukumitakamesa nakumikolesa ha lutsilielo lueni,

³ linga naumo uahi ua hali yeni akahiluke munima omuo ha mapakeso aua. Yeni vavenia muatantekeya ngueni mapakeso aua anapu aku cizango ca Njambi hali yetu.

⁴ Te ha ntsimbu ije tuakele hamo neni, tuamilekelele vualumo ngueto tukauana mapakeso, nge mumuatantekeyela, evi vikevio cilivene vi-alingiule.

⁵ Eci cikeko cinjatuminine Timateo. Omuo kunjasele kutualelelaho naua, nankuma, njamutumine linga akumone vati lutsilielo lueni mulunapu. Muavusunga vene kucapuile nge Satana namieseka, kaha nge vipangi vietu vioshe viapuile viangoco!

Muzimbu ua Kusimpisa kuhuma kuli Timateo

⁶ Vuno honi Timateo nahiluka kuno, kaha natuleka muzimbu uacili ha lutsilielo lueni na cizango ceni. Natuleka nguendi ntsimbu yoshe mulinakutuanuka, kaha mulinakutonda kutumona nge naua muje yetu tulinakutonda kumimona.

⁷ Omuo ha cuma eci, mu makalu etu oshe na tuyando tuetu, tuakele nakulitakamesa omuo hali yeni vamuanetu. Lutsilielo lueni lukeluo luatutakamese,

⁸ Honi tuyoya nga yeni muimana ngoo mu vuyoye vueni muli Muene.

⁹ Honi tuhonoua vati kutsatsela Njambi cikuma omuo yeni. Tulinaku-mutsatsela ha nzolela ije tulinayo ku mesho endi omuo yeni.

¹⁰ Vutsiki na mutania tulinakumulomba na mitima yetu yoshe linga atutave kumimona mesho na mesho nakumihana vije vimunahonoua mu lutsilielo lueni.

¹¹ Honi Njambi yetu na Tatetu na Muene yetu Yesu Kilistu vatuvuahesele ngila linga tuije nakumimona!

¹² Honi Muene akolese cizango ceni kuli umo na mukuavo na kuli vantu voshe nakucipuisa cakama nge cizango cetu kuli yeni.

¹³ Mu ngila eyi vene akatakamesa mitima yeni, kaha mukapua vakulamba na kulela ku mesho a Njambi yetu na Tatetu omo Muene yetu Yesu akeja na voshe vaka kulela vendi.

4

Vuyoye vuje vuvuaheselesa Njambi

¹ Mukumanusuila, vamuanetu, tumilomba nakumisindiya muli Muene Yesu, nguetu nge muje mumualilongesele kuli yetu vati munapande kuyoya linga muvuahelese Njambi. Nge muje mumuli nakulinga. Lingeni muje vene nakuvuezelelaho cikuma.

² Omuo muatantekeya vishika vituamihanene kuhitila mu nzili yakama ya Muene Yesu.

³ Njambi atonda linga mupue vakulela nakupatuka ku vukoyi.

⁴ Muntu na muntu kuli yeni vamala atantekeye vati napande kuyoya na mpueyendi mu ngila yakulela nakasingimiko,

⁵ keti na vukoyi, ngue vakakuhona kutsiliela vaje kuvatantekeya Njambi.

⁶ Mucifua eci vene, naumo uahi ueni napande kulinga muamupi kuli vakuavo vaka Yesu cipue kuvazangamena. Tuaminanguile laja cuma eci, kaha tuaminanguile na nzili nguetu Muene akahana kashitiku kuli vaje vakalingi evi.

⁷ Njambi katusanene linga tuyoye mu vukoyi, vuno honi mu kulela.

⁸ Nankuma, uoshe uje aviana vilongesa evi kaviana muntu, vuno honi Njambi, uje akamihana Cimbembesi uendi Uakulela.

⁹ Kutuapandele kumisondeka via cizango kuli umo na mukuavo. Omuo yeni vavenia Njambi uamilongesele vati muje munapande kulizanga umo na mukuavo.

¹⁰ Kaha munakala nakulinga ngeci kuli vaka kutsiliela voshe mu Masendonia muoshe. Nankuma, tumilomba vakuetu, vuezeleleniko cikuma.

¹¹ Pueni vaka kuyoya mukuholoka, hakeni mana eni ku viuma vieni, nakupanga viakulikuasa navio yeni vavenia, nge muje tuamilekele laja.

¹² Mu ngila eyi vene, mukatambula kasingimiko kuli vaje keti vaka kutsiliela, kaha kumukayoyela muntu umo kuli vije munahonoua.

Kuija kua Muene

¹³ Vamuanetu, tutonda mutantekeye vusunga hali vaje vanatsi, linga keti mukale navusiua, nge vaje kuvesi nakutsiliela.

¹⁴ Omuo tunatsiliela nguetu Yesu uatsile, kaha uasangukile naua, kaha tunatsiliela nguetu Njambi akaneha hamo na Yesu vaje vatsile mukutsiliela kuli ikeye.

¹⁵ Evi tumilongesa hano vinapu vilongesa via Muene linga yetu vaje vacili nakuyoya ha litangua lije Munendi akeja kutukatuama kulutue lua vaje vanatsi.

¹⁶ Kukakala mutambi ua lizi liakama liakushika, lizi lia kangelo uakama, nakuohia kua tolombita ya Njambi, kaha Muene ikeye vavenia akashuluka kuhuma muilu. Kaha vaje vatsile mukutsiliela kuli Kilistu vakasangukila ku muono ha kulivanga,

¹⁷ ambahoni yetu vaje tucilinakuyoya ha ntsimbu ije vakatukunguluila hamo navo mu mashelua nakuliuana na Muene havukambuila. Kaha tukakala hamo na Muene ntsimbu yoshe.

¹⁸ Nankuma, litakameseni umo namukuavo na mezi aua.

5

Livuaheseleni vualumo ha kuija kua Muene

¹ Vamuanetu, kutuapandele kumisonekela ha vintsimbu na miaka omo viuma evi vikalangua.

² Omuo yeni vavenia muatantekeya ngueni Litangua lia Muene likeja ngue muje muizi akeja vutsiki.

³ Omo vantu vahandeka nguavo, “Viuma vioshe vili muacili nakuholoka kuluu,” ambahoni hajevene kunonga kukavauana! Hajevene cikeja ngue mushongo ua mpuevo atonda kusema, kaha vantu kuvakasa kuteua.

⁴ Vuno honi yeni vamuanetu, kumuesi mu milima, kaha Litangua lije keti likamikasumune ngue muizi.

⁵ Yeni voshe muapua vantu vaje vanakundama ku ceke, vaje vanakundama ku mutania. Yetu kutuakundamene ku vutsiki cipue ku milima kuahi.

⁶ Nankuma, kutuapandele kukosa tulo ngue veka, tunapande kutona nakulihilula.

⁷ Ikapu ntsimbu ya vutsiki omo vantu vakosa tulo, naua ikapu ntsimbu ya vutsiki omo vantu vakapende.

⁸ Vuno honi yetu tuakundama ku mutania, kaha tunapande kulihilula. Tunapande kuzala lutsilielo na cizango nge cizalo ca kuliniungisa ha ntulo, nakuzala kutsiliela ca kuovoka kuetu nge tepa.

⁹ Njambi katuhanguile kuyandela vutenu vuendi, vuno honi tukatambule kuovoka hali Muene uetu Yesu Kilistu,

¹⁰ uje uatutsililile linga tukayoye hamo nendi, cipue tuyoya cipue tutsa omo akeja.

¹¹ Nankuma, tulitakameseni umo na mukuavo nakulikuasa umo na mukuavo, nge muje mumuli nakulinga hano.

Vishika via kumanusuluila na vihindu

¹² Vamuanetu, tumilomba ngueta haneni kasingimiko kacili kuli vaje vali nakupanga hhakati keni, vaje vamituamenena nakumishika mukuyoya kua vuka Yesu.

¹³ Pangeni navo nakasingimiko kakama na cizango, omuo ha vipangi vije valinakulinga. Pueni vaka ciyulo hhakati keni.

¹⁴ Vamuanetu, tumisindiya ngueta munangule vilenda, takameseni vipa-poke, kuaseni vaka kuzeya, pueni vaka lukakateya kuli uoshe.

¹⁵ Taleni ngeci keti kukale umo ahiluia vupi ku vupi, vuno honi ntsimbu yoshe pueni vakakulinga muacili kuli umo namukuavo na kuli vantu voshe.

¹⁶ Pueni vaka nzolela ntsimbu yoshe,

¹⁷ lombeleni ntsimbu yoshe,

¹⁸ ntsatseleni mu viuma vioshe. Eci cikeco catonda Njambi mukuyoya kueni muli Kilistu Yesu.

¹⁹ Keti muzime Cimbembesi Uakulela,

²⁰ keti mukehese mezi a tunanguizi va Njambi va Njambi.

²¹ Pueni vakakueseka viuma vioshe, kaha niungeni vije vinapu viacili,

²² kaha teueni viuma vioshe via vipi.

²³ Honi Njambi uje mukakutuhana ciyulo amipuisse vaka kulela mu vioshe, kaha aniunge vuntu vueni vuoshe, cimbembesi, na muono na muvila, kuakuhona milonga yoshe hakuija ca Muene uetu Yesu Kilistu.

²⁴ Uje namisana akacilinga, omuo uapua uakulongua.

²⁵ Vamuanetu, netu tulombeeleni naua.

²⁶ Hinduiseni voshe vaka kutsiliela nakulitsuemba ca kulela.

²⁷ Njimilambelega na nzili yakama ya Muene kutanda mukanda ou ku mesho a vaka kutsiliela voshe.

²⁸ Kavumbi ka Muene uetu Yesu Kilistu kakale hamo neni.

Mukanda ua Paulu ua mucivali kuli vaka TESALONIKA Citsindikisi

Mukanda uamucivali ua Tesalonika vausonekele kuli Kanganda Paulu (1: 1). Uasonekele ou mukanda munima ya Tesalonika uakulivanga, kusetekesa ha miaka yakupua makumi atanu naumo (51) munima ya kusemuka kua Kilistu. Paulu uakele mu Kolintu omo uasonekele ou mukanda ku cikungulukilo camu Tesalonika, cikungulukilo cije caputukile mu vungezi vuendi vua mu civali vua kutuala muzimbu uacili ua Njambi (Vilinga 17:1-10). Livulu lia Vilinga lihandeka ngualio, cikungulukilo vacipangelele Vayunda na Vangelengu vavengi. Cikungulukilo camu Tesalonika cahakele mana cikuma ha vintsimbu ya mamanusuililo na kuija kua Kilistu kua mucivali, omuo Paulu uasonekele viavingi mu mikanda yendi yoshe ku Tesalonika. Mbazuvuila ya mukanda ua Tesalonika ua mucivali ya kundamba kuvintsimbu via mamanusuililo. Paulu naua uananguile hakuluisa vilenda. Muntu uoshe napande kupanga cikuma ha via kulia viendi (3: 6-10).

Muvanautumbikilamo

- . Paulu uaputukile mu mukanda kulitumbula ikeye vavenia na vaje vanakele nakupanga navo (1: 1-2).
- . Kaha uatsantselele kuli Njambi ha cikungulukilo mu Tesalonika na kuvalombelela (1: 3-12).
- . Mu capita ya mucivali, Paulu ahandeka ha vintsimbu via mamanusuililo.
- . Kaha ahandeka hakuluisa vulenda na seho yakupanga cikuma (3: 1-15).
- . Paulu naua amanesa nakumeneka cikungulukilo (3: 16-18).

¹ Kuhuminina kuli Paulu na Siluvanasi na Timateo. Kuli vantu vaku cikungulukilo ca mu Tesalonika, vaje vanakundama kuli Njambi Tatetu na Muene Yesu Kilistu.

² Kaha Njambi Tatetu na Muene Yesu Kilistu vamihane kavumbi na ciyulo.

Kusompa hakuija kua Yesu Kilistu

³ Vavusamba vetu tupande kutsantsela kuli Njambi ntsimbu yoshe omuo yeni. Eci cinapu cacili kuli yetu kulinga ngacije, omuo lutsilielo lueni luli nakukola cikuma na cizango cije muli naco kuli umo na mukuavo cili na kupua cakama cikuma.

⁴ Kaha omu mukemuo tulinakulihalesa hali yeni mu vikungulukilo via Njambi. Tulinakulihalesela ha lukakateya lueni nakutsiliela kueni mu mapakeso oshe aua na tuyando otu muli nakumona.

⁵ Kaha eci cinapu vukaleho ngeci kusompa ca Njambi cikeco ca vusunga, kaha mukapua vaka seho mu vumuene vuendi vuje vumulinakuyandela.

⁶ Njambi uapua uavusunga, kaha akaneha tuyando hali vaje valinaku-miyandesa.

⁷ Kaha akamihumisa yeni mulina kuyanda, kaha na kuli yetu naua. Akalinga evi omo Muene Yesu akasholoka kuhuma muilu na tungelo vendi va nzili,

⁸ hamo na milengi ya tuhia, nakuzangamesa vaje kuvatantekeya Njambi, na vaje kuvekuononoka Muzimbu Uacili ua Muene yetu.

⁹ Kaha vakayanda mukuva zangamesa kua miaka yoshe, nakuvahangu-nuna ku mesho a Muene naku vumpau vuendi vuakama,

¹⁰ kaha omo akeja ha litangua lije nakutambula vumpau kuli vantu vendi voshe vakulela nakalemeso kuli voshe vaje vanatsiliela. Neni naua mukakala hhakati kavo, omuo neni naua munatsiliela lizi lije tuamilekele.

¹¹ Kaha omu mukemuo tukamilombelela ntsimbu yoshe. Tulinakulomba kuli Njambi yetu linga amipuisse vaka seho ku muono uje uamisanene ngeci muyoyemo. Na nzili yendi yoshe ashulise vutumbe vueni vuoshe vuacili nakumanesa vipangi vieni via lutsilielo.

¹² Mu ngila eyi vene lizina lia Muene yetu Yesu likatambula vumpau kuli yeni, neni naua kuli ikeye, ha kavumbi ka Njambi yetu na Muene Yesu Kilistu.

2

Yala uakuhona Kuononoka Lishiko lioshe

¹ Kuyongola hakuija ca Muene yetu Yesu Kilistu na hakukunguluka cetu linga tukale hamolika na ikeye, njimilomba vamuanetu nguange,

² keti mukale na citanga mu vuasi mu visinganieka vieni cipue cishoti ku mutima ngueni Litangua lia Muene linahete. Omo vasinganieka ngeci tuahandekele eci omo tuambuluile vunanguizi cipue omo tuambuluile lizi, nge honi uje mukanda uahumine kuli.

³ Keti mutave umo amikuisse mu ngila yeka naua kuahi. Omuo litangua lije kulikeja ngoco kuvanga noho kulitengulukila kua mamanusuililo kuneja na uje yala uakuhonoua kuononoka lishiko nasholoka, uje vemikile kuya ku mbulu ya tuhia.

⁴ Kaha ikeye akaluisa viuma vioshe vije vivahandeka nguavo vanjambi na cuma nkala civaletes, akalihaka helu lia vioshe. Kaha naua akakovela nakutumama mu Njivo ya Njambi nakulitumbula ikeye vavenia nguendi Njambi.

⁵ Nkuma kumuasa kuanuka ndi? Njamilekele vioshe evi omo njakele hamo neni.

⁶ Vuno honi kucili cuma cimo cilinakuvindika evi viuma ngeci keti vilingiue hano vene, kaha yeni muatantekeya ngueni cinapu cuma muka. Nankuma, omo ntsimbu ikapuamo amba honi akeje.

⁷ Vupi vuakukomouesa cikuma vuavushueke vulinakulingiua hano vene, vuno honi vije vilinakulingiua kuvikalingiua kuvanga noho uje muka kuvuvindika vanamuhumisa.

⁸ Kaha honi uje yala uakuhonoua kuononoka lishiko akasholoka, vuno honi omo Muene Yesu akeja, akamutsiha na mpunzi yakuhuma mu kanua nakumunongesa na vumpau vuendi.

⁹ Uje yala uakuhonoua kuononoka lishiko akeja na nzili ya Satana nakulinga vitantekeyeso na vikomoueso viakuliseza seza via makuli,

¹⁰ kaha akapangesa miyati yoshe yakapenga ya makuli hali vaje vakanonga. Vakevo vakanonga omuo kuvatambuile nakuzanga vusunga ngeci vovokeye.

¹¹ Nankuma, Njambi natumu nzili yakuvasevuisa linga ipange muli vakevo ngeci vatsiliele vije vinapu via makuli,

¹² kaha linga voshe vaje kuvatsilielele vusunga, vuno honi vanakundama lika ku vupi, vakavahisa.

Vanamihanguila ku Kuamena

¹³ Tunapande kutsantsela kuli Njambi ntsimbu yoshe hali yeni vakuetu, yeni vaje vazanga Muene. Omuo Njambi uamihanguile kupua vambangelo

ku kuamena ha nzili ya Cimbembesi nakumipuisa vantu vendi vakulela, mu lutsilielo lueni lua vusunga.

¹⁴ Kaha Njambi uamisanene ngeci mulinge cuma eci ha Muzimbu Uacili ua vije vituambuluile kuli yeni, uamisanene ngeci mukahinge cihela ceni ca vumpau vua Muene yetu Yesu Kilistu.

¹⁵ Ambahoni vamuanetu, imaneni ngoo nalukakateya ku vusunga vuje vutuamilongesele mukuambulula kuetu na mu mukanda uetu.

¹⁶ Honi Muene yetu Yesu Kilistu vavenia na Njambi Tatetu, uje uatuzangele na ku kavumbi kendi uatuhanene kutakama cije kucekutenguluka na kusimpa cakutsiliela.

¹⁷ Njambi amitakamese nakumikolesa mukupanga nakuhandeka vije vinapu viacili ntsimbu yoshe.

3

Tulombeleeniko

¹ Hakumanusuila vamuanetu, netu naua tulombeleeniko linga lizi lia Muene liye kulutue nakushandoka vuasi vuasi linga valitambule nakalemeso, ngue muje mumualitambuile hhakati keni.

² Kaha lombeleni naua linga Njambi atuohiele ku vantu va vupi, omuo keti ngue vantu voshe vanapu vaka kutsiliela ku lizi kuahi.

³ Vuno honi Muene uapua ua lutsilielo, kaha akamikolesa nakuminiunga kuli uje muka vupi.

⁴ Kaha Muene natuhana kutsiliela muli yeni, kaha mua vusunga vene tunatsiliela ngueta mulinakutualelelaho kulinga vije vituamilekele linga muvilinge.

⁵ Kaha honi Muene atuamenene mitima yeni mukuvuisisa cizango ca Njambi na lukakateya luje luanamihana Kilistu.

Cinangulo ha Vulenda

⁶ Mu lizina lia Muene Yesu Kilistu tulinakumishika, vaka kutsiliela litengeni ku voshe vantu vaje valinakuyoya yoyesi ya vulenda, vaje kuvukukavangeya vilongesa vije vituavahanene.

⁷ Yeni vavenia muatantekeya muacili nguene munapande kupanga ngue muje mutuapangele yetu. Kutuakele na vulenda omo tuakele hamo neni.

⁸ Kutualile cuma ca muntu umo kuakuhona kufueta. Vuno honi tuatualeleleho kupanga vutsiki na mutania ngeci keti tumituike citele cimo.

⁹ Tualingile eci, keti ngue omuo kutuakele na nzili yakuyoyela ha viuma via vukuasi, vuno honi tuacilingile mukumimuesa ngila linga muyikave.

¹⁰ Ha ntsimbu ije omo tuakele hamo neni, tuakele nakumileka ngueta, "Uoshe aviana kupanga keti vamutavese kulia."

¹¹ Tunahandeka eci omuo tonevu nguavo hhakati keni kuli vamo valinakuyoya yoyesi ya vulenda kaha vivalingevene viahi vuno honi vakundama lika mu vipangi via vakuavo.

¹² Kaha mu lizina lia Muene Yesu Kilistu tulinakushika vantu ava naku-vanangula linga vapande kuyoya muacili nakulinga vipangi vije vivasa kuyoyela.

¹³ Vuno honi yeni vamuanetu, kumuapandele kuhona kulinga muacili.

¹⁴ Kaha hamo kuli yeni umo uje katondo kuononoka lizi lietu lije tuatumu kuli yeni mu mukanda ou. Kaha nga ngoco, mutaleni, kaha mushondolokeni linga shuamua imukole.

¹⁵ Keti mumupangese ngue napu citozi, vuno honi munanguleni lika ngue vaka kutsiliela.

Mezi Akumanusuila

¹⁶ Kaha Muene vavenia, uje uapua ntsina ya ciyulo cetu, amihane ciyulo ha ntsimbu yoshe na mu vingila vioshe. Muene akale neni muva voshe.

¹⁷ Na livoko liange vavenia njasoneka nguange cihindu cakuhuma kuli yange Paulu. Eyi ikeyo ngila ya cimueso ca mikanda yange yoshe, omu mukemuo munjikasoneka.

¹⁸ Kavumbi ka Muene yetu Yesu Kilistu kakale neni voshe.

Mukanda ua Paulu ua kulivanga kuli TIMATEO Citsindikisi

Livulu lia kulivanga lia Timateo liapua mukanda ua kulivanga uakuhuma kuli Kanganda Paulu kuli ndongisi uendi Timateo. Timateo uakulivanga vausekele ha miaka ya kupua makumi atanu na umo na miaka ivali hanima ya kutsa ca Yesu (62-64 AD). Eci casa kupua kuyehi na kuhua ca muono ua Paulu. Paulu uakele navusamba vuakukola na Timateo kaha vintsimbu viavingi uakele nakumutumbula nguendi muana (Fil 2:22, 1 Tim uakulivanga 1:2, 1:18). Ou ukeuo umo uamikanda iuana yakuhuma kuli Paulu ije yasonekelelele kuli muntu keti ku cikungulukilo. Ikuavo itatu ku mikanda eyi ikeyo ya 2 Timateo, na Tito, na Filimoni. 1 Timoteo uakala na vishika viavingi muje vati vasa kulemeselamo mu cikungulukilo (2:1-15), muje vati vantuama va cikungulukilo muvanapande kukelamo (3:1-13), na vinangulo via valongisi va makuli (1:3-11, 4:1-5, 6:2-5). Eci cili nakumonesa muje vati Paulu uakele na kulongesa Timateo kupua ntuama hhakati ka vikungulukilo. 1 Timateo ali na ali na mashiko amengi aje ahasa kukuasa vantuama va cikungulukilo mu matangua ano etu muje vati muasa kukuatelamo cikungulukilo ceni.

Muvanavitumbikilamo:

- 1 Paulu aputuka kumeneka Timateo (1:1-2).
- 2 Kaha a nangula Timateo kuli valongisi va makuli (1:3-11).
- 3 Paulu atualelelaho kulumbununa mu kutsantsela kuendi omuo hali Yesu Kilistu (1:12-19).
- 4 Cakuhataho ashika Timateo ha kulemesa na vantuama va cikungulukilo (2-3).
- 5 Paulu amanusula mu mukanda uendi mukuhana Timateo mashiko akumanuisila (4-6).

Vihindu

¹ Yange Paulu, kanganda ua Kilistu Yesu mukushika ca Njambi muyoyesi uetu na Kilistu Yesu ikeye kutsiliela cetu,

² Njikusonekela yove Timateo, munange ua vusunga mu lutsilielo.

Kavumbi, cikeketima na ciyulo kuhuminina kuli Njambi Tate na Kilistu Yesu muyoyesi uetu.

Kunangula vilongesa via makuli

³ Ngue muje njakusindiile omo njakele nakuya ku Masendoniya, sala mu Efeso linga umone vantu vamo linga keti valongese vilongesa via makuli,

⁴ cipue kulinga vakevo vavenia na visimutuila na mikana ya mazina amalaha avakukulaila vavo vije vineha vimpata, omuo kuviekukundama ku vutumbe vua Njambi vuje vuli mu lutsilielo.

⁵ Vutumbe vua lishiko eli vukeyuoni cizango, cije cihuma mu mutima uakulela, na vilinga viakutungukua, na lutsilielo lua vusunga.

⁶ Vantu vamo vanaseze vuima evi nakuhandeka via vulema.

⁷ Vatonda linga vapue valongisi va lishiko, cakuhona kuvuisisa cipue vije vivahandeka cipue viuma vije vivalina kuhandeka muvina lumbunukilamo.

Vutumbe vua Lishiko lia Mosesa

⁸ Honi tuatantekeya ngueto lishiko liapua liacili, nga umo alipangesa muacili.

⁹ Hakuvuisisa eci, ngeci lishiko kuvalipangelelele vaka vusunga vuno honi valipangelelele vipapoke na vakakuhona kuononoka, na vaje vakakuhona kuononoka Njambi na vaka vipi, na vaje vakuhona kulela na vaje vaka kushaula via kulela, na vaka kutsiha vaishavo na vaka kutsiha vainavo, na vaka kutsiha vantu,

¹⁰ na vaka kulinga vupangala, na vamala vaje vakakulinga vukoyi na vakuavo vamala, na manguangua, na vaka makuli, na vaka kuhana vukaleho vua makuli, nakulinga viuma vije viluisa vilongesa via vusunga,

¹¹ kuya ku muzimbu uacili ua vumpau vua Njambi uakukuisula uje uvanjihanene.

Kutsantsela omuo Cikeketima ca Njambi

¹² Njitsatsela Kilistu Yesu Muene yetu, uje nanjihana nzili yakulinga vipangi viange, omuo nanjisompo mua vusunga hakunjihangula mu vipangi viendi,

¹³ cipue vene hakulivanga njapuile muka kumushaula na kumuyandesa nakumutuka, vuno honi njatambuile cikeketima omuo njakele nakuvilinga kuakuhona kutantekeya na kuhona kutsiliela.

¹⁴ Kaha kavumbi ka Muene yetu kahitililile hali yange na lutsilielo na cizango vije vili muli Kilistu Yesu.

¹⁵ Eci kuhandeka cinapu ca vusunga nakucitambula, cije cihandeka nguaco Kilistu Yesu uezile ha mavu mukuovola vaka vipi, kaha hali voshe ava yange njinapu muka vupi cikuma,

¹⁶ vuno honi yange njatambuile cikeketima ha cuma eci, linga muli yange uje uakulivanga, Yesu Kilistu amuese kushula ca lukakateya luendi linga cipue cimueso kuli vaje vapande kutsiliela muli ikeye ha muono ua yaye.

¹⁷ Kuli Muene ua miaka yoshe, uje kekutsa, uje kutuasa kumona, ikeye Njambi lika, kukale kasingimiko na vumpau ku miaka yoshe. Amen.

¹⁸ Eli lishiko njikundika kuli yove, Timateo munange, kuya ku vunanguizi vuje vahandekela hali yove, pangesa mezi aua ngue vitua via nzita linga ulue muacili,

¹⁹ kaha nuinga lutsilielo luove na vilinga viove via kutungukua. Haku-viana vilinga viavo via kutungukua, vantu vamo vananongesa lutsilielo luavo,

²⁰ hhakati kavo kuli Haimenease na Elekizanda, vaje njinahana kuli Satana linga valilongese kuhona kushaula.

2

Kulemesa ca mu Cikungulukilo

¹ Caculivanga ku viose, njimisindiya nguange kulambelega, kulomba, kulombelega, na kutsatsela vinapande kuvilinga ku vantu voshe,

² ku vimiene na voshe vaje vali ha vituamo viakama, linga tuyoye vuyoye vuakuholoka na ciyulo, vua vunjambi na kasingimiko mu ngila yoshe.

³ Eci cinapu cacili, kaha vacitambula ku mesho a Njambi Muyoyesi uetu,

⁴ uje atonda vantu voshe linga vovoke nakuija ku mana a vusunga.

⁵ Omuo kuli Njambi umo lika, kaha kuli umo uje nemana mukati ka Njambi na vantu, ikeye yala Kilistu Yesu,

⁶ ikeye uje ualihanene ikeye vavenia ngue ndando yakupatula voshe, vukaleho vuje vuasemukilile ha ntsimbu yacili.

⁷ Omuo yeci vanjihanguile kupua muka kuambulula na kanganda (njili nakuhandeka vusunga, kunjesi nakukuisa), mulongisi ua vaje keti Vayunda mu lutsilielo na vusunga.

Vampuevo vanapande kuvatavesa Kulilongesa

⁸ Ambahoni njitonda nguange mu vihela vioshe vamala vanapande kulombela, vajundule mavoko akulela cakuhona kuniengua cipue vimpata.

⁹ Naua na vampuevo vasoloke muacili nakulikehesa, keti na vinkambu via kuvinda mueka cipue ngolinde cipue vusanga vuaseho cipue vuzalo vua ndando cikuma.

¹⁰ Vuno honi na vilinga viacili, ngue via vampuevo vaje vaka kulemesa Njambi.

¹¹ Taveseni vampuevo valilongese mukuholoka namukulihana kuoshe kuli Njambi.

¹² Kunjitavesa mpuevo aliuoshe kulongesa cipue kukala na nzili yakama hali vamala, vuno honi napande kuholoka.

¹³ Omuo Andama ikeye uapuile uakulivanga kutanga, ambahoni Eva.

¹⁴ Kaha keti Andama vakuisile, vuno honi vakuisile mpuevo kaha uapokuele lishiko lia Njambi.

¹⁵ Cipue vene ngoco mpuevo akovoka kuhitila mukusema vana, nga atualelelaho mu lutsilielo na mu cizango na kulela, na kasingimiko.

3

Vantuama vamu Cikungulukilo

¹ Cihandeka eci cinapu ca vusunga, nga muntu umo ashunguiya vipangi via vuntuama mu cikungulukilo, kaha ashunguiya cipangi cacili.

² Honi ntuama ua cikungulukilo napande kupua muntu uakuhona mulonga, napande kupua yala uampuevo umo lika, napande kupua muntu uakuhakela mana ku viuma, muka kulihilula, muka kulongua, muka kujumbula vangenzi, uje asa kulongesa,

³ keti muka kupenda, keti muka vukalu vuno honi apue muka kuononoka, keti muka vimpata, keti muka kuzanga vimbongo.

⁴ Napande kunuinga ntanga yendi muacili, na vana vendi vapue vakuononoka nakasingimiko mu vingila vioshe.

⁵ Omuo nga yala ahonoua kunuinga ntanga yendi, kaha honi asa vati kunuinga cikungulukilo ca Njambi?

⁶ Kapandele kupua muntu uje natsiliela vuavuno, hamo akalishasha nakulihalesa kaha akaula mucihiso ca liyavolo.

⁷ Napande kupua muntu uje ivahana kasingimiko naku vantu vaje keti vamu cikungulukilo cendi, linga keti evue shuamua na kuuila mu muheto ua liyavolo.

Vakuasi vamu Cikungulukilo

⁸ Vakuasi va mucikungulukilo naua vanapande kupua vafutisi yacili, keti vaka vindaka vivali, keti vaka kupenda viniu, keti vaka kuzanga vimbongo,

⁹ vanapande kukakateya ku vusunga vua lutsilielo na kutungukua cacili.

¹⁰ Kaha kakulivanga vanapande kuveseka tahi, ambahoni nga vavauana nguavo kuvesi na mulonga, kaha vavapuisse vakuaasi vamu cikungulukilo.

¹¹ Vampuevo navakevo naua vanapande kupua vafutisi yacili, keti vakalufue, vuno honi vanapande kupua vakulisingimika, nakulongua mu viuma vioshe.

¹² Vakuasi vanapande kupua yala ua mpuevo umolika, vanapande kunuinga vana vavo na ntanga yavo muacili.

¹³ Omuo vaje vapanga muacili ngue vakuasi vamu cikungulukilo vakauana kasingimiko vakevo vavenia naua nakusimpa mu lutsilielo luje luli muli Kilistu Yesu.

Vushueke vuakama vua Vunjambi

¹⁴ Njitsiliela kuija kuli yeni vuavuno, vuno honi njili nakusoneka evi vishika kuli yeni linga,

¹⁵ nga hamo njikotokela kuija, linga mutantekeye muje vati muasa kukala muacili mu ntanga ya Njambi, cije cikeco cikungulukilo ca Njambi ua kuyoya, cije cisimi ca seho na luvula lua vusunga.

¹⁶ Cilivene tulinakuliambulula muje vati vusueke vua vunjambi vuetu muvunapuila mu vuakama:

Uasholokele mu vuntu,

Vuno honi Cimbembesi uamusholuele kupua ua vusunga,
vamumuene kuli tungelo.

Uambuluile ku mafuti,

vaka mavu vamutsilieelele,
kaha vamutualele mu vumpau.

4

Valongisi va Makuli

¹ Honi Cimbembesi ahandeka nguendi ku matangua a mamanusuilo vamo vakaseza lutsilielo nakulihana ku vilinga via vimbembesi via makuli naku vilongesa via mahamba,

² vilongesa evi vikeja kuhitila mu vaka makuli va civembulu vaje mashungu avo anajuuama,

³ vaje vaka kuvindika kuliambata nakuvindika kulia via kulia vimo vije Njambi uatangele linga vavitambule nakutsantsela kuli vaje vanatsiliela nakutantekeya vusunga.

⁴ Omuo viuma vioshe viatangele Njambi viapua viacili, kaha na cimo cahi civanapande kuviana nga vanacitambula na kutsantsela,

⁵ omuo vanavikundika na lizi lia Njambi na lilombelo.

Ngamba Uacili ua Kilistu Yesu

⁶ Nga uana evi vishika kuli vamuanetu, kaha ukapua mulongisi uacili ua Kilistu Yesu, nakuhia na mezi a lutsilielo na vilongesa viacili luje lu unakava.

⁷ Ketu ulinge viuma viavipi na visimo viangoco. Lilongese yove vavenia kulinga via vunjambi,

⁸ omuo kupangesa muvila kuli na seho, vuno honi vunjambi vuli na seho yakama mu vingila vioshe, omuo vilinalukulaheso lua muono ua ntsimbu ino na muono uje uli nakuija.

⁹ Vihandeka vinapu via vusunga kaha vavitambula muacili.

¹⁰ Omuo yeve, mukemo tuli nakuhundangana nakupanga cikuma, omuo kutsiliela cetu cili muli Njambi uakuyoya, uje ikeye Muyoyesi ua vantu voshе, cikumani kuli vaje vatsiliela.

¹¹ Shika nakulongesa viuma evi.

¹² Ketu utave muntu umo linga ashaule vukuenje vuove, vuno honi muesa cimueso kuli vaka kutsiliela mukuhandeka kuove, na mufutisi yove, na mu cizango, namu lutsilielo, na mukulela.

¹³ Kuvanga noho njikezila, hana ntsimbu yove mukutanda visoneka ku vantu, mukuambulula na kulongesa.

¹⁴ Keti useze vuana vuje vuuli navuo, vuje vahanene kuli yove mu vunanguizi omo mpunga ya vakuluntu vasalekele mavoko avo hali yove.

¹⁵ Panga cikuma ha vipangi evi, lihane yove vavenia kuli vikevio, linga voshe vamone vipangi viove.

¹⁶ Linuinge yove vavenia nakuvilongesa viove, kaha tualelelaho kulinga viuma evi, omuo hakulinga ngoco kaha ukaliovola yove vavenia na vaje vaka kukuvuilila.

5

Vipangi vieni kuli vaka Kutsiliela

¹ Keti utenukile mukuluntu ua yala vuno honi munangule ngue isho, pangesa vakuenje muacili ngue vamuanoko,

² pangesa vakuluntu va vampevo ngue vanoko, kaha pangesa na vambanda ngue vamuanoko, mukulela muoshe.

³ Singimika vantuluue vaje vapua vantuluue va vusunga.

⁴ Nga ntuluue ali na vana cipue vatekulu, vapandeletahi kulilongesa vipangi via kutsiliela ku ntanga yavo nakukuasa visemi vavo omuo eci cikeco civuahelesa ku mesho a Njambi.

⁵ Nga uje ntuluue napu ua vusunga, kaha alinakuyoya lika liendi, kaha nahaka kutsiliela cendi kuli Njambi na kutualelelaho nalukakateya mu malombelo vutsiki na mutania.

⁶ Vuno honi uje alihana ikeye vavenia musenga natsi laja cipue vene oku ayoya.

⁷ Shika eci, linga keti umo auane mulonga.

⁸ Nga umo kasa kukuasa vavushoko vendi, cikuma kuma ntanga yendi, kaha naviana lutsilielo kaha napihia kupulakana uje uakuhona kutsiliela.

Vantuluue

⁹ Ntuluue uje kanda ahete ha miaka makumi atanu na limo kapandele kumusoneka, hakupua mpuevo ua yala umo,

¹⁰ kaha muka kulinga vipangi viacili, uje nalele vana vendi muacili, muka kutambula vangenzi muacili, muka kutanesa ku mikono ya vantu va Muene, na kukuasa vaje vali mu tuyando, na kulihana ikeye vavenia ku vipangi viacili mu vingila vioshe.

¹¹ Vuno honi viana kusonekesa vantuluue va vanike, omo nga lishungu likapua liakama vakaseza Kilistu nakutonda kushomboka,

¹² kaha vakalinehela cihiso vakevo vavenia, omuo vanapokola litavasano lia kulivanga.

¹³ Keti lika evi vuno honi vakalilongesa kuendangana, kuhuma njivo kuya njivo, kaha keti kuendangana lika vuno honi na lufue nakulikovelesa mu viuma viambala, nakuhandeka vije kuviapandele kuhandeka.

¹⁴ Kaha njitonda vantuluue vavanike vashomboke, vaseme vana, nakuniunga vinjivo viavo, keti tuhane vitozi vetu muhela linga vahandeka viavipi hali yetu.

¹⁵ Omuo vamo vanahiluka laja kuli Satana.

¹⁶ Nga uoshe mpuevo muka kutsiliela ali na vavushoko vendi va vantuluue, napande kuvakuasa, linga keti cikungulukilo cikale na citeli, linga cikuase vaje vantuluue vakuhona muka kuvakuasa.

Vakuluntu vamu Cikungulukilo

¹⁷ Eceleni vakuluntu vaje vaka kuyula muacili linga vavafuete vimbongo luvali, cikuma kumani vaje vali nakupanga vipangi viakuambulula naku-longesa.

¹⁸ Omuo visoneka vihandeka nguavio, “Keti ukute ngombe ku kanua uje ajungula vinona,” kaha na, “Muka kupanga napande kutambula fueto yendi.”

¹⁹ Keti utave mulonga uli uoshe hali mukuluntu kuvanga hali vukaleho vua vantu vavali cipue vatatu.

²⁰ Kuli vaje vali nakulinga vupi, vatenukile ha mesho a vantu voshe, linga voshe vakale mu liova.

²¹ Ku mesho a Njambi naku mesho a Kilistu Yesu naku mesho a tungelo vakuhangula, njikushika kuniunga mashiko aua cakuhona civembulu, keti ulinge civembulu kuli muntu ali uoshe.

²² Keti uzambule kusaleka mavoko ove ha vantu, keti ukovele mu vupi vua mukueni, liniunge yove vavenia kupua uakulela.

²³ Keti unue lika mema, vuno honi nua na tuviniu tuatundende omuo ya muzimo liove nakuvavala vavala cove.

²⁴ Vupi vuavamo vantu vunalisholola, vuli nakuvatuala kukusompa, vuno honi vupi vua vamo vukevuo vukasholoka kulutue.

²⁵ Mu ngila imo vene, na vilinga viacili visholoka muacili, cipue vene oku keti viacili, vuno honi kuviasa kulishueka.

6

¹ Ecela voshe vaje vali muintsi lia mutiyo ua vundungo valinge vimiene vavo kupua vaseho na kuvasingimika, linga lizina lia Njambi navilongesa vietu keti vavishaule.

² Vaje vali na vimiene vakutsiliela kuvapandele kuvashaula omuo navakevo vanapu vamunaina, vuno honi vanapande kuvapangela muacili omuo vaje vauana vukuasi ku vipangi viavo vanapu vaka kutsiliela na vaje va vazanga.

Vilongesa via Makuli na Vufuko vua Vusunga

Longesa nakuambulula vipangi evi.

³ Nga kuli umo alongesa vieka kaha kalitombola na lizi lia vusunga lia Muene Yesu Kilistu na vilongesa vije viendelela na vunjambi,

⁴ napu muntu muka kulihalesa, vuno honi katantekeya cipue cimo, kaha muka kuvavala mu mashungu nakulinga vimpata via kulikanangana via mezi, vije vineha lifuua, na vimpata nakushaula na viyongola via vipi,

⁵ nakuhona kulivuasana hhakati ka vantu vaje vakusinganieka via vipi, vakuhona vusunga, vasinganieka nguavo vunjambi vunapu cuma cakuanena vufuka.

⁶ Kuli kufuka cakama mu vunjambi kuya na vije tuli navio.

⁷ Omuo kutuezile nacimo hano ha mavu, kaha naua kutukambataho cimo hano ha mavu.

⁸ Vuno honi nga tuli na viakulia na vuzalo, kaha tukapuisamo.

⁹ Vuno honi vaje vatonda kufuka vauila mu vieseko, na mu muheto, na mu viuma viavingi via vulema na mashungu a mapi aje atuala vantu mukuvapihisa nakuvanongesa.

¹⁰ Omuo cizango ca vimbongo cinapu nsina ya vipi vioshe, kuhitila mukutondo vimbongo vamo nahumu ku lutsilielo kaha vanapokola mitima yavo na vusiua vuavuingi.

Vishika via Kumanusuila kuli Timateo

¹¹ Vuno honi ngeci hali yove, muntu ua Njambi, humu ku vioshe evi, tonda vusunga, na vunjambi, na lutsilielo, na cizango, na lukakateya, nakulikehesa.

¹² Lua nzita yacili ya lutsilielo, kuatela ku muono uje kuuekuhua uje vakusanenene omo ualitavelele ku mesho avakaleho vavengi.

¹³ Ku mesho a Njambi uje muka kuhana muono ku viuma vioshe, na Kilistu Yesu ali muvukaleho vuendi ha mesho a Pontiyu Pilato uahanene vukaleho vuacili.

¹⁴ Njikushika nguange niunga mashiko aua kuakuhona kapenga na mulonga kutuala noho Muene yetu Yesu Kilistu akasholoka,

¹⁵ kaha eci vakacisholola ha ntsimbu yacili kuli uakukuisula uje ikeye Muka kushika umo lika, Muene ua vimiene na Shukulu ua vashukulu,

¹⁶ uje ikeye lika liendi kekutsa, kaha uayoya mu ceke cije naumo uahi asakushuena, uje na umo uahi muntu uamumona cipue akamumona. Kuli ikeye kukale kasingimiko nakuyula ca miaka yoshe ya yaye. Amen.

¹⁷ Kuli vaje vanafuku hano ha mavu, vashike keti valihalese, cipue kuhaka kutsiliela cavo ku vufuko vuangoco, vuno honi vatsiliele kuli Njambi uje muka kutuhana muvuingi vioshe linga tuvivuahelele.

¹⁸ Vapande kulinga viacili, kufuka mu vilinga viacili, vapue vaka kukala muacili nakulipangela na vakuavo na mutima umo vije vivali navio,

¹⁹ linga valitulikile vakevo vavenia luvula luacili luakulutue, linga vakauane muono uje ukeuo vene muono uacili.

²⁰ Yove Timateo, niunga vije vanakundika kuli yove. Teua vihandeka viangoco viakuhona vunjambi na vimpata vije mu makuli vavihandeka nguavo mana,

²¹ omuo vamo nguavo vali nauo, kaha omuo ha cuma eci vanazimbalesa lutsilielo luavo.

Kavumbi kakale nove.

Mukanda ua Paulu ua mucivali kuli TIMATEO Citsindikisi

Livulu lia mucivali lia Timateo liapua mukanda uamucivali uakuhuma kuli kanganda Paulu kuli ndongisi uendi Timateo. Mukanda ua Timateo uamucivali vausonekele kuyehi nakuhua ca muono ua Paulu. Va muhakele mu kamenga mu Loma ha ntsimbu eyi (2 Tim 1:16). Paulu uakele na vusamba vuakukola na Timateo kaha vintsimbu viavingi uakele nakumutumbula nguendi muana (Fil 2:22, 1 Tim 1:2, 1:18).

Ou ukeuo umo ua mikanda iuana yakuhuma kuli Paulu ije yasonekelelele kuli muntu keti ku cikungulukilo. Ikuavo itatu ku mikanda eyi ikeyo ya 1 Timateo, na Tito na Filimoni. Ha ntsimbu ije mukanda ua 2 Timateo vakele naku usoneka, vaka Yesu vakele nakuvapakesa mu nganda ya Loma. Eci cikeko canehele linga Paulu vamuhake mu kamenga kaha uakele nakushika Timateo linga atualeleleho nalukakateya mukukaluaa. Ngue kuya mu 1 Timateo, Paulu ahana Timateo vinangulo viavingi ha valongisi vamakuli (1 Tim 1:16-18). Kaha naua alekesa Timateo nguendi kukakala vintsimbu via kukaluaa kulutue (3: 1).

Muvanavitumbikilamo:

1. Paulu aputuka nakuhinduisa Timateo (1: 1-2) kaha ambahoni amukolese (1: 3-18).
2. Ambahoni alekesa Timateo linga atualeleleho nalukakateya (2: 1-13).
3. Cakuhatako amuhana vinangulo vimo vije muasa kuyoyelamo (2: 14-26).
4. Ambahoni amunangula ha vije vikalingiua kulutue na ngila yacili muje vati akasa kuvitambula (3: 1-4; 8).
5. Paulu amanusula na mezi endi lika kuli Timateo (4: 9-24).

¹ Yange Paulu, kanganda ua Kilistu Yesu ku cizango ca Njambi kuya ku cikulaheso ca muono uje uli muli Kilistu Yesu,

² Njikusonekela yove Timateo, munange injazanga:

Kavumbi, cikeketima na ciyulo vije vihumina kuli Njambi Tate na Kilistu Yesu Muene yetu.

Kutsatsela na Kulikolesa

³ Njitsantsela Njambi uje injikapangela na mana akutungukua, ngue muje muvalingile vakukuluila vange, omo njikamianuka vintsimbu vioshe mu malombelo ange.

⁴ Ngue muje njikanuka masozi eni, njikatondo cikuma vutsiki na mutania kumimona, linga njakushule nanzolela.

⁵ Njilinakuanuka lutsilielo luove lua vusunga, lutsilielo luje luakele hakulivanga muli kuku yove uampuevo Loisi na vanoko Yunisi nahano vene, cilivene nguange nove uli naluo.

⁶ Ha cuma eci njikuanukisa linga uhozelele vuana vua Njambi vuje vuli muli yove kuhitila muje munjakusalekele mavoko ange.

⁷ Omuo Njambi katuhanene Cimbembesi ua liova vuno honi Cimbembesi ua nzili na cizango na kulihilula yetu vavenia.

⁸ Keti uvue shuamua ya kuhana vukaleho vua Muene yetu, cipue vuange cinzinda cendi, vuno honi lipangele nange mukuyandela muzimbu uacili mu nzili ya Njambi.

⁹ Ikeye uatuoovuele nakutusana nakusana ca kulela, keti ngue kuya ku vipangi vietu vuno honi ku vutumbe vuendi na kavumbi vije viatuhanene muli Kilistu Yesu tele kanda mavu va atange,

¹⁰ vuno honi vanacisolola kuhitila mukusoloka ca Muyoyesi uetu Kilistu Yesu, uje nanongesa kutsa nakuneha muono na kuhona kutsa ku ceke kuhitila mu muzimbu uacili.

¹¹ Omuo ya muzimbu uacili ou, vanjihanguile kupua muka kuambulula na kanganda na mulongisi,

¹² nankuma njilinakuyanda ngue muje munjili nakuyandelamo. Vuno honi kunjesi na shuamua, omuo njatantekeya uje njinatsiliela, kaha njatantekeya cilivene asa kuniunga muacili vije vinjinakundika kuli ikeye noho ha Litangua lije.

¹³ Kavangeya cimueso ca mezi a vusunga aje unevu kuli yange mu lutsililo na cizango vije vili muli Kilistu Yesu.

¹⁴ Niunga muacili vusunga vuje vuvanakundika kuli yove na Cimbembesi Uakulela uje ukala muli yetu.

¹⁵ Uatantekeya nguove voshe vaje vali mu Asiya vananjitengulukila, kupandakana kumo na Fingeliase na Helemengenese.

¹⁶ Muene ahane cikeketima ku ntanga ya Onesifolase, omuo vintsimbu viavingi ikeye nakala nakunjilisa, kakele na shuama na malienge ange,

¹⁷ vuno honi omo uahetele mu Loma, uanjitondele cikuma nakunjuana.

¹⁸ Muene amutavese linga auane cikeketima cije cikahumu kuli Muene ha Litangua lije! Uatantekeya muacili vipangi vije viakuasele mu Efeso.

2

Lisualale Uacili ua Kilistu Yesu

¹ Ambahoni yove munange, kolesa mu kavumbi kaje kali muli Kilistu Yesu,

² na vije viunevu kuli yange ha mesho a vakaleho vavengi vaje vakundama ku vantu valutsililo vaje vasa kulongesa na vakuavo naua.

³ Lipangele mu tuyando ngue lisualale uacili ua Kilistu Yesu.

⁴ Naumo uahi lisualale asa kulinga nevi na vije mu vipangi viendi via vusualale, omuo viyongola viendi vinapu kutonda kuvuahesela uje ntuama yendi.

⁵ Muka kushatuka kuvasa kumuzika cilongo kuvanga ashatuke muailamo mashiko.

⁶ Ndimi uakupanga cikuma ikeye napande kukala na mutambela uakulivanga ua vimbuto.

⁷ Singaniekaho hali evi njihandeka, omuo Muene akakuhana kuvuisisa muli vioshe.

⁸ Anuka Yesu Kilistu, vamusanguile ku vatsi, uapuile mutekuluilu ua Ndaviti, ngue muvanaviambulula mu muzimbu uange uacili,

⁹ muzimbu uacili uje unjilinakuyandela nakukala mu malenge ngue njimuza. Vuno honi lizi lia Njambi likelio kuliesi mu malenge.

¹⁰ Nankuma njilina kutualelelaho nalukakateya mu viuma vioshe ha mulonga ua vaje vavanahangula, linga navakevo vakauane kuovoka muli Kilistu Yesu na vumpau vuaco vua miaka yoshe.

¹¹ Eci kuhandeka ca vusunga nguavo,
“Nga tunatsi nendi,

kaha naua tukayoya nendi,

¹² nga tutualelelaho na lukakateya,
kaha naua tukayula nendi,

nga tumuviana,
nendi naua akatuviana.

¹³ Nga kutuesi nalutsilielo,
ikeye hanga uapua ualutsilielo,
omuo kasa kuliviana ikeye vavenia.”

Muka Vipangi uje Ivanatambula kuli Njambi

¹⁴ Vanukise evi, kaha vanangule ku mesho a Muene linga keti vakale na vimpata ha mezi, eci kucesi naseho, vuno honi ciphisa vaje vaka kuvuilila.

¹⁵ Linga muuaselamo kulihana yove vavenia kuli Njambi ngue uje ivanatambula, ngue muka kupanga uje kasa kukala na shuama, uje akuata muacili lizi lia vusunga.

¹⁶ Litenge ku vimpata via kasauntu na vimpande via vupi vije virtuala lika vantu kulahako na Njambi.

¹⁷ Kaha vimpande viavo vinapu ngue mbandu yamukongo. Vamo hhakati kavo vapuile Haimenease na Filetase,

¹⁸ vakevo vaje vanaseza vusunga omuo vahandeka nguavo kusanguka cinahiti laja. Valinakupihisa lutsilielo lua vakuavo.

¹⁹ Vuno honi luvula lua Njambi hanga luemana ngoo, na kasateso aka nguavo, “Muene atantekeya vaje vendi,” kaha naua nguavo, “Eceleni uoshe uje atumbula lizina lia Muene ahume ku viuma via mazilo.”

²⁰ Mu njivo yakama kumuakele lika vitenga via ngolinde cipue via siliva vuno honi na via kupanga ha miti na via vuma, vimo via ha cipale navikuavo viakupangesa lika hali hoshe.

²¹ Nga umo alilelesa ikeye vavenia ku vitenga viakupangesa hali hoshe, kaha akapua citenga cakupangesa ha cipale, viakulela na seho kuli liavenia njivo, vialivuahesela lumu kuvipangesa ku vipangi viacili.

²² Teua ku mashungu a vukuenje kaha pangela lika vusunga, na lutsilielo, na cizango, na ciyulo hamo na vaje vasana Muene na mitima yakulela.

²³ Litenge ku vimpata via vulema na vunzimba, uatantekeya nguove vikanehe kulicokota.

²⁴ Ngamba ya Muene kapandele kupua muka kulicokota vuno honi napande kupua ya ngozi ku muntu uoshe, mulongisi uacili, ualukakateya,

²⁵ uje asa kuhilula vaje vamuluisa na mutima uakulikehesa. Linga hamo Njambi akavahanako ntsimbu linga vakatenguluke ku vipi kaha vakatantekeye vusunga,

²⁶ linga vateue ku muheto ua Liyavolo, uje navakuata linga vapange muaya cizango cendi.

3

Kuyoya cakuhona Njambi mu Matangua a Mamanusuilo

¹ Vuno honi ivuisisa eci, mu matangua akumanusuilo kukakala vintsimbu viakukaluua.

² Omuo vantu vakapua vaka kulizanga vakevo vavenia, vakazanga vimbongo, vakalihalesa, vaka lijundula, vakapua vaka kasauntu, vakahona kuononoka visemi viavo, vaka hona kutsatsela, vaka hona kulela,

³ vaka keniuka, vaka hona cikeketima, vakapua vakaleho va makuli, vakapua vaka cipululu, vaka hona kulihilula, vakazinda viacili,

⁴ vaka luuanguania, vaka lupozoka, vaka shula nakulihalesa, vaka zanga senga kupulakana kuzanga Njambi,

⁵ vaka kakateya viuma via cifua cakulemesa Njambi vuno honi vakaviana nzili yavio. Litengeni ku vantu ava.

⁶ Omuo vamo vavo vakalingi vingila viavo viakukovela mu vinjivo via vantu nakukuata vampfuevo vaje vakuzeya, vaje vali na viteli via vipi kaha vanashulu na miyati yoshe ya viuma via mazilo,

⁷ vaje vakevuilila kuli muntu uoshe vuno honi kuvasa kuheta hatsimbu ya kutantekeya mana a vusunga.

⁸ Ngue Njane na Njambele valuisile Mosesa, mukemo vene na vantu ava valuisa vusunga, vantu va mana a civembulu kaha vaka kuhonoua mu lutsilielo.

⁹ Vuno honi kuvasa kuya kulutue, omuo vulema vuavo vukasholoka ku vantu voshe, ngue vua vaje vamala vavali.

Vishika via Kumanusuila kuli Timateo

¹⁰ Honi yeni munakavangeya vilongesa viange, nakatumamesi kange, na vutumbe vua vuyoye vuange, na lutsilielo luange, na kusimpa cange, na cizango cange, na lukakateya luange,

¹¹ na mapakeso ange, na tuyando tuange, na viuma vije vialingiuile kuli yange ku Antioke, naku Ikoniya naku Lisitala, mapakeso akukomouesa aje anjatambuile, vuno honi Muene uanjohielele kuli vakevo voshe.

¹² Cilivene uoshe uje atonda kuyoya vuyoye vua vunjambi muli Kilistu Yesu vaka vapakesa,

¹³ oku vantu vaka vupi na vaka mantseno vakatualelelaho kulinga vupi cikuma, kukuisa vakuavo na vakuavo nana vakavakuisa.

¹⁴ Vuno honi yove tualelelaho kuli vije unalilongesa kaha kolesa mukut-siliela omuo uatantekeya uje kuualilongeselelevo,

¹⁵ kuhuma ku vuanike vuove uatantekeya vilongesa via kulela vije viasa kukutuamenena ku kuovoka kuhitila mu lutsilielo muli Kilistu Yesu.

¹⁶ Visoneka viose Njambi uavihuiminine kaha vili naseho mukulongesa, na mukushulisisa, na mukuhilula, na mukuhana vilongesa mu vusunga,

¹⁷ linga muntu ua Njambi apue uamutuntu, nakushula mu vipangi viose viacili.

4

Kusompa cili nakuija honi Lingeni muacili Vipangi vieni

¹ Njikushika ha mesho a Njambi na Kilistu Yesu vaje vakasompo vaka kuyoya na vaka kutsa, kaha mukusholoka cendi na vumuene vuendi,

² ambulula lizi, livuahesele vualumo mu vintsimbu viacili cipue via vipi, sungamesa, tenukila, takamesa, longesa na lukakateya, keti uhonoue mukuvandamena namukulongesa.

³ Omuo ntsimbu ilinakuija omo vantu kuvakahakela mana kuvilongesa via vusunga vuno honi hakukala na matuitui akujua, vakalitondela vakevo vavenia valongisi linga vakalinge vije vivatonda.

⁴ Kaha vakalikela kuvuilila ku vusunga nakuputuka kuvuilila visimo via makuli.

⁵ Vuno honi yove ntsimbu yoshe livuahesele vualumo, kolesa mu tuyando, linga vipangi viakuambulula muzimbu uacili, shulisisa mu vipangi viovie.

⁶ Omuo yange njalivuahesela vualumo kunjilinga nkombelo, ntsimbu yange yakukatuka inahete.

⁷ Njinalu nzita yacili, njinashatuka nakumanusula seteko yange, njinani-ungu lutsilielo.

⁸ Honi kuli cilongo ca vusunga civananjitulikila, cije Muene ikeye muka kusompa ua vusunga akanjihanaco ha Litangua lije, kaha keti yange lika vuno honi na vaje voshe vazangele kusholoka cendi.

Mezi Ange

⁹ Linga muoshe muuasela linga uije kuli yange vuavuno.

¹⁰ Omuo Ndemase nazange mavu aua aliko, nanjiseze nakuya ku Tesa-lonika, na Kelesenese nayi ku Ngalatiya, na Tito nayi ku Ndalematiya.

¹¹ Kuvanga lika Luka likaliendi ikeye ali nange. Ambata Mako linga uije nendi, omuo ikeye ali naseho mukunjipangela.

¹² Njatumu Taikikase ku Efeso.

¹³ Omo uija, ija na kazaku kaje kajasezele kuli Kapasi ku Tolouase, na mavulu, kaha cikuma kuma mikanda yange ije yakuzenga ya vilambu.

¹⁴ Elekizanda uje muka kufula nanjilingi muamupi cikuma, Muene akamuhana fueto kuya ku vipangi viendi.

¹⁵ Litenge kuli ikeye, omuo ualuisile muzimbu uetu na nzili.

¹⁶ Ha kuliluila cange cakulivanga, naumo uahi uanjikuasele, voshe vanjisezele. Ketu vavahisileco!

¹⁷ Vuno honi Muene uakele nange nakunjikolesa mukuambulula muzimbu mukushula, linga na vaje voshe ketu Vayunda vauvue. Kaha uanjovuele naku kanua ka ndumba.

¹⁸ Muene akanjohiela ku via vipi viosele nakunjohiela ku vumuene vuendi vua muilu. Kuli ikeye kukale vumpau ku miaka yose ya yaye. Amen.

Vihindu Viakumanusuila

¹⁹ Cihindu kuli Pulisila na Akuila nakuli vaka ntanga ya Onesifolase.

²⁰ Elasetase uasalele ku Kolinte, kaha njasezele Tolofimase ku Miletase oku avavala.

²¹ Linga muoshe muuasela linga uije ntsimbu kanda cisika cihete. Eumbulase natumu vihindu kuli yove hamo na Pundenisi na Linase na Kalaundiya na vaka kutsiliela vose vanatumu vihindu.

²² Muene akale na cimbembesi cove. Kavumbi kakale nove.

MUKANDA UA PAULU KULI TITO

TITO

Citsindikisi

Livulu lia Tito linapu limo lia mikanda yakuhuma kuli Paulu lije lia-sonekelele ku muntu keti ku cikungulukilo. Ikuavo mikanda itatu yapua 1 Timateo, 2 Timateo, na Filimoni. Paulu uasonekelele Tito, kaha naua mu mukanda uendi uasonekele linga vautande ku civunga coshe. Tuasa kulinga eci omuo ali nakulumbununa omo muanapuila mu Kanganda, cuma cimo oco Tito napandele kutantakeye laja. Paulu uasonekele ou mukanda ha ntsimbu ya mukati ka miaka makumi atanu na imo na miaka itatu na makumi atanu 63-65 hanima ya kusemuka kua Yesu. Paulu uashikile Tito linga atuamenene vikungulukilo vije viakele ha munkinda ua Kelete. Paulu uasonekele ou mukanda linga ashike Tito hakuhangula na kulongesa vakuluntu va vikungulukilo. Uahanene vishika viakulifua mu mukanda uendi kuli Timateo. Mu mukanda uendi ali nakulumbununa omo vakuluntu va vikungulukilo vanapande kuyoyelamo. Vikungulukilo na vakuluntu va vikungulukilo vanapande kuvuilila cikuma kuviuma vije vitondeka movuntuama.

Muvanautumbikilamo 1. Paulu ashika Tito kuhangula vantuama va Njambi (1: 1-16). 2. Kaha naua, amushika linga avalongese vuyoye vua Njambi (2: 1-3: 11). 3. Mukumanesa, Paulu avalekesako via matumbe endi kaha atuma vimeneka viendi (3: 15.)

¹ Yange Paulu njinasoneka ou mukanda, yange ndungo ya Njambi na kanganda ua Yesu Kilistu.

Vanjihanguile nakunjituma mukukolesa lutsilielo lua vantu vaje vana-hangula Njambi nakuvatuamenena ku vusunga vua mana vuje vuvalongese kufutisi yetu yakulemesa Njambi,

² vusunga vuje vunemana hakutsiliela kua muono uje ua miaka yoshe ya yaye. Njambi uje kekukuisa, uatukulahesele muono ou ntsimbu te kanda vatange mavu,

³ uasholuele lizi liendi kuli yange ha ntsimbu yendi ya cili. Eci vanjikundikileco yange linga njicambulula hakushika ca Njambi Muyoyesi uetu.

⁴ Njilinakusonekela kuli Tito, munange ua vusunga mulutsilielo luje tulinalo yetu voshe.

Njambi tatetu na Kilistu Yesu Muyoyesi uetu vakuhane kavumbi na ciyulo.

Vipangi via Tito mu Kelete

⁵ Evi vikevio njakusezelele mu Kelete linga uvuahese viuma viasaleleko, nakuimika va kuluntu vavikungulukilo ku nganda na nganda, ngue muje njakulongesele.

⁶ Mukuluntu ua cikungulukilo napande uakuhona mulonga, napande kupua yala ua mpuvo umo lika, kaha vana vendi vanapande kupua vakakutsiliela, keti vipapoke cipue vakakuhona kuononoka kuahi.

⁷ Omuo ntuama ua cikungulukilo uapua kaniungi ka vipangi via Njambi, napande kupua uahona mulonga. Kapandele kupua mukakulihalesa cipue muka kuniengua vuasi, cipue mukakupenda, cipue mukaluozi, cipue mukacipululu ca vimbongo.

⁸ Vuno honi apue mukakujumbula vangenzi na cizango cije cacili. Napande kupua mukakulihilula ikeye vavenia, uakusungama, uakulela, namu kakalemeso.

⁹ Napande kupua mukalukakatela mu vilongesa via lutsilielo, vije vivasa kutsiliela. Mu ngila eyi vene asa kutakamesa vakuavo na vilongesa via vusunga, nakusholola naua milonga ya vaje vaka kuluisa lizi.

¹⁰ Omuo kuvali vavengi vaka kutengulukila na vakakuluisa vakuavo na viuma viavo viangoco cikuma, vaje vakafutisi ya Vayunda.

¹¹ Cafuila kuvavindika vihandeka viavo, omuo vakevo vakanienguesa ntanga yoshe mukuvalongesa vije kuvapandele kulinga muafua ya vilinga via shuamua, linga vauane vimbongo.

¹² Kaha umo uavo, umo ua tunanguizi va Njambi tuavo, uje uahandekela vusunga mukuhandeka nguendi, "Vaka Kelete ntsimbu yoshe vapua vakamakuli, vapua tusitu vamu musenge, vilenda vakujujuka."

¹³ Vije viahandekela viapuile via vusunga. Nankuma, vahandekela na mezi akuvambuka ngue mpoko, linga vakale nalutsilielo luamutuntu,

¹⁴ linga keti vovuile ku visimo via Vayunda na ku mashiko akuhuma kuli vantu vaje vanaviana vusunga.

¹⁵ Viuma vioshe vinalele kuli vaje vanalele, vuno honi kukuesi cuma cakulela kuli vaje va nalijualesa, na kuli vaje vakuhona kutsiliela, omuo mana na vilinga viavo vinapu via kujuala.

¹⁶ Vahandeka nguavo vatantekeya Njambi, vuno honi vilinga viavo kuvavikavangeya. Vapua vaka kuzinda na kuhona kuononoka, kaha kuvapandele kulinga viuma viacili.

2

Vilongesa via vusunga

¹ Vuno honi yove unapande kulongesa vije vilitavasana na vilongesa via vusunga.

² Longesa vakuluntu va vamala linga vapue vakukonkama, vakakunanguka, vaka kulihilula vakevo vavenia, vaka lutsilielo, vaka kacizango, vaka lukakanteya.

³ Mungila imo vene longeseni na vakuluntu va vampuevo linga vakale nge vampuevo vaje vayoya mu vuyoye vua kulela. Kuvapandele kupua vakalufue cipue vapue vandungo va viniu. Vapande kulongesa vije viacili,

⁴ linga valongese vambanda kuzanga vamala vavo, navana vavo,

⁵ vapue vakakulihilula vakevo vavenia, na kulela, nakumpua vampuevo vacili vakakuniunga vinjivo viavo, vaje vali kundika ku vamala vavo, linga naumo uahi ashaule lizi lia Njambi.

⁶ Mungila imo vene naua, nanguleni na vanike va vamala linga valinunge vakevo vavenia.

⁷ Mu viuma vioshe yove vavenia unapande kupua citantekeyeso mu vipangi viacili. Pua uaku likonkomeka na kuhakela mana ku vilongesa viose.

⁸ Pangesa mezi akusungama aje kuvasa kuyengula, linga vitozi vove vakale na shuamua, kaha vahonoue kuhandeka via vipi hali yetu.

⁹ Vandungo vapande kulikundika ku vamiene vavo mu viuma vioshe nakuvavuahelesa. Kuvapandele kulinga navo vimpata,

¹⁰ cipue keti vavevile. Vuno honi vanapande kumuesa ngeci ntsimbu yoshe vakevo vapua vacili nakulongua, linga vamuese likongo ku vilongesa via Njambi Muyoyesi uetu mu viuma vioshe vije valinakulinga.

¹¹ Omuo Njambi nasholola kavumbi kendi ha kuamena voshe vantu.

¹² Kavumbi aka kalinakutulongesa kuviana yoyesi ya kuhona kulemesa Njambi na mashungu amapi aha mavu, nakuyoya yoyesi yakulemesa Njambi hano ha mavu mukuliniunga mukusungama,

¹³ ngue omo tuli nakuvandamena Litangua lia kuvezika lije litunatsiliela, omo kutsiliela kua Njambi yetu uakama na Muyoyesi uetu Yesu Kilistu vukasholoka.

¹⁴ Ualianene ikeye vavenia hali yetu, mukutuohela ku vipi vioshe, nakutupuisa vantu vakulela vaje vakundama kuli ikeye lika, vaje vali na cizango cakulinga viacili.

¹⁵ Longesa viuma evi, kaha pangesa nzili yove yakama omo utakamesa nakuvindika vaje vaka kuivuilila. Ketu utave umo uavo akupayese.

3

Futisi ya vaka Yesu

¹ Anukisa vantu vove vapue vakakulikehesa kuli vaka yula na nzili yakama linga vavononoke, nakuualivuahesela mukulinga muacili muvi-uma vioshe.

² Valeke keti vashaule muntu naumo uahi, vuno honi vapue vaka ciyulo na kulizanga, kaha ntsimbu yoshe vasholole vucili vunapandemo kumesho a vantu voshe.

³ Yetu naua tuapuile vifumbua, vakakuhona kuononoka, navakakupi-hisa. Tuapuile vandungo vamashungu na senga yakuliseza-seza. Tu-ahakele vuyoye vuetu kulizangamena, na cipululu, vakuetu vatuzindile kaha netu tuavazindile.

⁴ Vuno honi omo ngozi na cizango ca Njambi Muyoyesi uetu viasholokele,

⁵ ikeye uatuovuele. Ketu ngue muvilinga vietu vavenia viakusungama vitualingile kuahi, vuno honi omuo cikeketima cendi vavenia ngeci tunovoka, kuhitila mu Cimbembesi Uakulela cije catukushile linga tupue tuvavaha nakuuana mono uauhua.

⁶ Njambi uamuaniene Cimbembesi Uakulela hali yetu muvuingi kuhitila muli Yesu Kilistu Muyoyesi uetu,

⁷ linga ha kavumbi kendi vatupuisse vaka vusunga ku mesho a Njambi nakutuhana muono ua yaye uje tunatsiliela.

⁸ Eci cinapu kuhandeka ca vusunga.

Njitonda uhandeke cikuma viuma evi, linga voshe vaje vakakutsiliela kuli Njambi vakahane ntsimbu yavo mukulinga vipangi viacili, vije vinapu viacili, kaha vikuasa muntu voshe.

⁹ Vuno honi yove teua ku vimpata via vulema, na via mikana ya mazina a vakukuilila na kucokota nakulizunga ha Lishiko. Evi vinapu viangoco, kuviesi na seho.

¹⁰ Nangula luvali ku vantu vaje vaneha kahangu, kaha honi keti ulinge naua cuma ceka navo.

¹¹ Unatantekeya ngeci muntu uacifua cangacije uapua ua mana a api, kaha vipi viendi vilinakumusholola ngeci napihisa.

Vilongesa viakumanusuila

¹² Omo njikatuma Aletemase cipue Taikikase kuli yove, kaha unapande kuija kuno kuli yange ku Nikapolise, omuo njayongola kukala kuje cisika coshe.

¹³ Unapande kukuasa Zenase muka-mashiko na Apolo kuvuahesa via vungenzi vuavo, kaha naua tala muacili linga vakale na vioshe via ha vungenzi vuavo vije vazanga.

¹⁴ Vantu vetu vanapande kulilongesa kukala na ntsimbu yakulinga vipangi viacili, linga keti vahone cuma cimo, kaha kuvapandele kuyoya vuyoye ngoco.

¹⁵ Voshe vaje njili navo kuno vanatumu vihindu kuli yove. Hana vihindu vietu kuli vavusamba vetu voshe mulutsilielo.

Kavumbi ka Njambi kakale neni voshe.